

نادية كامل

المولودة



المولودة

نادية كامل

المولودة

رواية : ماري إيلي روزنتال



لمزيد من المعلومات عن الكرامة : facebook.com/alkarmabooks

حقوق النشر © نادية كامل، 2018

الحقوق الفكرية للمؤلفة محفوظة

جميع الحقوق محفوظة. لا يجوز استخدام أو إعادة طباعة أي جزء من هذا الكتاب

بأي طريقة من دون الحصول على الموافقة الخطية من الناشر .

نشر هذا الكتاب بدعم كريم من «مؤسسة روزا لوكسمبورج» ، مكتب شمال إفريقيا



كامل، نادية .

المولودة: رواية نائلة كامل المولودة ماري إيلي روزنتال / نادية كامل – القاهرة: الكرامة للنشر،
2018 .

تدمك : 9789776467934

1- الصحفيون .

2- السياسيون المصريون .

3- المرأة – تراجم .

أ- العنوان .

رقم الإيداع بدار الكتب المصرية : 2017 / 28231

2 4 6 8 10 9 7 5 3 1

لوحة الغلاف واللوحات الداخلية: هبة خليفة
الصور الأصلية من الأرشيف الخاص لعائلة نادية كامل
تصميم الغلاف: هبة خليفة وأحمد عاطف مجاهد

إلى آدم ونبيل ودينا

تمهيد

- بافكر في مشروع عن «البيت» - بيتنا - أسجل لك وتحكي لي؟

- وحتلّيني أحكي عن المعتقل كمان؟

- هههه اللي نفسك تحكيه، هو دا الموضوع، إزاي كل حاجة عشتيها عملت منها بيت .

حوار قصير «ع الواقف» بيني وبين ماما في بيت أختي دينا سنة 2001. نبيل الصغير، ابنها الوحيد وقتها، والحفيد الأول لعائلتنا الصغيرة، يجري بين أرجلنا كاللعبه الزمبلك. كنا نزور أختي زيارة نسائية حياتية، نطمئن عليها ونساعدها في أمور المنزل .

أي أننا لم نكن نشرب الشاي مثلاً بعد الظهر في «البيت» في حجرة الكلام، نتفقد أخبار الدنيا وننتلسف كعادتنا، ثم تنامي الحديث إلى لحظة درامية اتفقنا فيها على تسجيل ملحمة حياتها. أبدأ، حوار يكاد يكون عابراً، تبادلناه على استحياء، نظراً إلى أن محاولات الإمساك بقصص بيتنا البسيطة المدهشة تعتبر من طقوس حياتنا - كل بضع سنوات تحدث فورة تسجيل قصص الحب والسفر والمعتقل بصوت الكبار - ونظراً أيضاً إلى أن ماما تحكي لي بلا توقف منذ وعيت، بل حسب كلامها منذ اللاوعي، حديثنا لا ينقطع، بالإضافة إلى أن كل عام، في أول يناير، يأتي أبي بمفكرة هدية من مؤسسة «أخبار اليوم» حيث يكتب مقالاته السياسية، وتمسك أُمي بمفكرة العام الجديد، وبنظرة كلها عزيمة تُقرّر مجدداً أن تكتب مذكراتها. محاولات قصيرة غير مكتملة، ومتكررة كأبي طقس. لا بأس من تكرار المحاولة، فنظرياً هناك دائماً احتمالات أخرى .

قصص بيتنا تدهشنا، لأنها قصص صغيرة تتدرج من الماضي، مثل حواديت «ألف ليلة وليلة»، حتى تصل إلينا وتستقر على ججرتنا قلقة، فننظر إلى المستقبل، وبيراعة الأطفال نحاول أن نتبين إلى أين سندرجها وتتدرج بنا .

لا أعتقد أن أيًا منا كان يتخيل أننا، بهذا الحوار الصغير، تخطينا عتبة، عتبة بوح، فعل خروج. لم نتصور أننا لن نفعل في حياتنا غير الطواف حول روايتنا، نلفها وتلفنا، حتى مات أبي، ثم ماتت أُمي، وما زلت أنا مستمرة حتى الآن، وكأني وُلدت لقصّ هذه القصة .

جلسنا في حجرتي، حيث استقر مكتب بابا الضخم الذي لم يستخدمه قط. كل شيء في بيتنا خزين. ما في أدرج المكتب وما فوقه والمكتب نفسه، ليست إلا مصائد ذكريات، ونحن نعيش حولها، نرعاها كالكثاكيث. رُبيت ضمناً على أن أقفاص الذاكرة هذه ستساعدني على التذكر يوماً ما. المهم، جلسنا في حجرتي، ماما خلف المكتب، وأنا قبالتها. كنت أسجل كل ما يحدث حولي بدون تخطيط أو هدف، هكذا أُملي عليّ حدسي .

يرادوني الآن منظر ماما وراء ركام التفاصيل على المكتب، كالفلاحة بجانب جاموستها: ورثها
ورصيدها وهمها وجاه دنيته وتركتها .

بدأت تروي لي «الحدوتة» كما نحفظها، على نغمة: «كان يا ما كان يا سعد يا إكرام، بنت صغيرة
اسمها «ماري» اتولدت في بيت فقير في شارع العشماوي بالقرب من جامع كخيا».

ولكن يبدو أن نواميس الكون انسجمت مع روايتنا، أخيراً، وبدأت تظهر علامات تسونامي الحكي .

كانت ماما في سن السبعين، وكنت أنا في سن الأربعين. ربما كانت السن ومراحلها؟

كان ذلك في مارس 2001، والعالم يتصدع. ربما كانت حال العالم ووجوديات الألفية؟

كنا متواطئتين هذه المرّة للمهمة، وقد طفرت كل منا بالحال. ربما كان الأمل؟ أمل ألا تُدفن قصصنا
معنا في القبور؟

كان نبيل الصغير يكبر وسط عائلات مشتتة ومهزومة، والمشاهد تنهار أمام عينيه. ربما كان نبيل؟

على أية حال كان نبيل بلا منازع الفنار والهاجس وضابط نغمة الكلام وتجلي شفافيته. ربما أصابنا
أمل أن يجد نبيل «الحدوتة» عندما يحتاجها .

«إنت جاية إمتى يا نادية علشان عندي حاجات افكرتها بالليل فعلت لئسنة وعايزة أحكيها لك قبل ما
أنساها ثاني؟» .

كانت تتسند على عينيّ برفق لتطل على هوة ذاكرتها. زحفت القصص عليها، تنزح منها وتكسح
عليّ، غمرتني، أشرب ما أشرب وأعب ما أعب. هذه المرّة «الحدوتة» في الشباك، لن تفلت. لحظة
جليلة وفرصة أخيرة .

استسلمنا للزخم، واستمتعنا به. كانت ماما تتحور ثم جرفني التيار فلم يتبقّ حجر واحد من بنياني في
مكانه، ثم ابتلع الطوفان العائلة كلها. كنت قد سمعت أن الحكي سكة «اللي يروح ما يرجعش» .

بعد موتها وجدت نفسي وحدي أمام مهمة الكتابة، كان عليّ أن أستلهم سر السرد من صوتها في
كياني. وميض الخيوط الحريرية - ذاكرتها الوجدانية، الأحداث في حوار قلّق مُربك مع الزمن.
صوت ماما، «الحدوتة» التي روتني بها على مرّ العمر ...

عاززة أبتدي أحكي من الدرج .

درج دولاب أبويا وأمي اللي كان مليون كروت بوستال ورسايل حب .

التصوير كان رديء جداً، كروت عبارة عن انتين بيبوسوا بعض ويحبوا بعض، واحد بيبوس واحدة وهي تعمل كدا ببقها وورا كلمتين حب من أبويا : «توحشيني، إيليا» ، وواحد يحضن واحدة، هو بيبوس كدا وهي ما اعرفش تمسك الوردة ازاي وتشم، وخط أمي : «Ti amo, Leandra» ، وكدا. كنت باقعد بالساعات أبص على كل كارت، واحد واحد. يا ترى كنت باتخيل إيه؟ أصل ما اعرفش في السن دا، ست أو سبع سنين، ما كنتش أعرف كثير عن الحب، ومعناه إيه. الكروت فتحت عندي إن الحب معناه كبير، وكنت متأكدة إن حاعيش قصة حب كبيرة زي أبويا وأمي .

باشوف أبويا وأمي رايعين جابين في البيت ما بيعملوش زي تصوير الكروت اللي في الدرج، أمي مشغولة بأخويا، كان لسه مولود والشغل زاد في البيت، كانوا بيقعدوا بالساعات علشان يوكلوه، ودا كان بيغيظني، وأبويا كان بيشتغل. مشاكل البيت شكل تاني، لكن أنا لما اكتشفت الدرج دا كأني اكتشفت كنز، اتفتح قدامي باب سحر، وراه حاجات ما كنتش أتخيلها .

أنا لو أبتدي أحكي، مش حاعرف أبطل، مشاهد كثيرة في ذهني مخزونة .

لكن دلوقت سناني بتوجعني يا نادية، أكمل لك لما نرجع إن شاء الله من عند دكتور السنان، باي باي يا حبيبتي يا نادية .

أمي قالت لي إن الفقر دخل بيتنا مع ولادتي. كانت حامل فيّ لما أبويا فقد شغله. أمي اتعرفت على أبويا وهو بيشتغل في شركة «سيمنز»، اللي بيعملوا أجهزة كهربائية، وبيصنعوا أسانسيرات، فجأة الشركة قفلت فرعها في مصر، وبعد ما كان أبويا يُعتبر شاب عنده وضع اقتصادي مُستقر أصبح من غير شغل، عاطل .

صدمة .

أنا اتولدت سنة 1931، فأعتقد إن شركة «سيمنز» قفلت في القاهرة بسبب الأزمة الاقتصادية اللي ابتدت سنة 1929 في أمريكا واستمرت عدد من السنين، أزمة اتعرفت في العالم بعد كدا من خلال روايات وأفلام جميلة زي «القلعة»، و«عناقيد الغضب»، وباقي أفلام «هنري فوندا» عن انتشار البطالة والمعاناة من الفقر وعن الناس اللي مش لاقيين شغل في أمريكا - زي أبويا في مصر .

إذن لما اتولدت أهلي انحطوا في وضع اقتصادي صعب، وغيرنا السكن عدد من المرات في منطقة العشماوي بسبب الميزانية، مرة إيجار مشاركة مع عائلة ثانية، ومرة بيت ضيق في الدور الأرضي ومفيهوش نور . في الواقع أنا كطفلة ما حسنتش بالفقر، بالعكس، كان عندي دايماً كل اللي أحتاجه ومُستمتعة بحنان أمي وشخصية أبويا. ومع ذلك أمي كانت بتحب تكرر لي بفخر إن أبويا كان عنده وضع اجتماعي حلو وكان بيشتغل في شركة «سيمنز»، يعني شركة كبيرة، وتأكد لي إن الوضع المادي ما كانش دايماً مزنونق وإن «الشركة هي اللي قفلت». أعتقد بتحاول تشرح لي إن أبويا مش راجل خايب وإنما الظروف هي اللي تعبتنا، ويمكن كمان تحب تطمئن نفسها إنها اتجوزت راجل مستقر بيشتغل في شركة حلوة وبعد كدا «حصل اللي حصل» وإن الوضع ما كانش دايماً وحش، وممكن الأوضاع تتحسن ثاني .

والحقيقة إن أبويا كان راجل ممتاز فعلاً، عمره ما بطل شغل من ساعة ما كان شاب صغير. عندي له صورة من سنة 1925، يعني لما كان عنده 16 سنة، مع الفريق اللي أسس شبكة الكهرباء في مدينة بنها. وبعد الجواز لما فقد «الشغلانة الحلوة المستقرة»، شغلانة شركة «سيمنز»، اشتغل أشغال صغيرة زي ما تيجي . من ضمنها مثلاً اشتغل كهربائي في كوم امبو، أيام تأسيس شركة السكر وإنشاء المصنع، شركة قد الدنيا ساعتها، راح كوم امبو في الصعيد وسابنا لوحدنا في القاهرة مع أمي. مرة من المرات دفعوا له أجرته شوال بطاطس ووصل البيت شايله على كتفه، وفضلنا ناكل بطاطس، كل يوم أمي تطبخ بطاطس بطريقة شكل. في نفس فترة الأزمة دي اشتغل كهربائي في البيوت مع واحد اسمه «ماريو صوفيا». وبعدين جاله أشغال في قصر الملك فاروق في أنشاص في الدلتا المرة دي جنب بلبيس، وأخيراً جاله شغل في مصنع زراير في السويس علي القنال وانتقلنا معاه. السويس فيها صَدَف بالزوفة، والمصنع اللي أبويا اشتغل فيه كهربائي كان بيصنع زراير صَدَف للبيجامات والقمصان الرجالي. أخويا «برتو» اتولد في السويس سنة 1936 .

أول بيت أفكره هو بيت العشماوي في القاهرة جنب جامع كخيا، ما كناش ساكنين لوحدنا، سكنتُ معانا ست إيطالية هي وابنها، «La signora Maria» - يعني الست «ماريا» - وابنها «جورجيو»، بلديات أمي في إيطاليا، من قرية اسمها «ريباترانسوني». الست «ماريا» كانت بتتقاسم الإيجار مع أهلي، هي واخدة الأوضتين اللي على شمال باب السكة واحنا الأوضتين اللي على اليمين، والمطبخ والحمام مشتركين .

في يوم وانا قاعدة على حجر أمي باعيط وهي بتحاول تسكتني، كنت باعيط كثير، ابن الست «ماريا» اللي عنده حوالي 15 سنة، شاب صغير مش واعى قوي، اتضايق من العياط، راح لبس على راسه بشكير أبيض كبير من الحَمَام، ومسك عصاية الغسيل - زمان الغسيل كان بيتغلي في ميه في صفيحة على وابور جاز ويقلبوه بعصاية خشب كبيرة - «جورجيو» طلع من الحَمَام بالبشكير على راسه وعصاية الغسيل في إيده وابتدا يصرخ :

-بعووووو .

قصده يسكّتي بس اللي حصل إن أنا اتخضيت، بطلت عياط فجأة وبصيت بالجنب لدرجة إن عنياً احولت وما رجعتش مكانها. يا عيني أهلي زعلوا وقلقوا وودوني عند الدكتور، والدكتور قال :

- تلبس نضارة لمدة أربع خمس سنين علشان تظبط الحول، والعين حترجع مكانها، ما تفلقوش، لسه صغيرة .

ولكن لإنني لسه صغيرة كنت كمان باكسرّ النضارة بانتظام، وكل مرة يضطروا يعملوا لي نضارة جديدة. علشان كذا أنا فاكرة محل نضارات جيراننا اللي قدام جامع كخيا. اسم المحل «سالتيال» اللي هو اسم العيلة، وكانوا ساكنين تحتنا في نفس العمارة، مرات صاحب المحل ست تخينة بتلبس نضارة مدوّرة بشنبر إسود، كنت باحبها لأن لما بانزل عندها بتديني رُب سوس إسود صغير، هي تكمل شغل البيت وانا أغير منظر وبعد شوية ترجّعتني فوق عند أمي. بالنسبة للحول لما كسّرت النضارة للمرة التمنتاشر أهلي قالوا: «ما دام عينها اتحسنّت، خلاص كفاية نضارات»، لكن في سن البلوغ - زي ما انت عارفة يا نادية - بيحصل طفرة في الجسم، الإنسان أو الطفل بيضعف، فعيني تعبّت وبان عليها الحول تاني. فيه ناس قعدوا يقولوا لازم تعمل نضارة أو عملية جراحية لتصحيح العيب، بس أنا كان عمري يا دوب عشرة أو حداش سنة فما اهتممتش، وأبويا وأمي غالبًا خافوا يعملوا لي عملية في العين، ساعتها الطب ما كانش متقدم زي دلوقت. هي دي قصة الحول اللي عندي في عيني، مش دايماً بيبان للناس لأنه حول خفيف، لكن لما باتعب بيظهر .

الذكرى الثانية إن في السطوح فيه عشة فراخ، وأنا عندي عروسة قماش وشها بس اللي بلاستك وعلى راسها منديل ولايسة جونلة طويلة اسبانيولي. أطلع السطوح ألعب بالعروسة واتقرّج على الفراخ، وباب بيتنا يفضل مفتوح علشان اعرف اروح وارجع من السطوح من غير ما ازعج أمي. في يوم بعد ما لعبت وانبسّطت جيت أخذ العروسة من على الأرض لقيت عليها زي قشاية صفرة، حاولت انفضها وأخذت العروسة ونزلت، لما وصلت على باب بيتنا كان ابن جيراننا أصحاب محل النضارات طالع على السلم، شاب تاني صغير، 15-16 سنة، بص لي بتركيز وخطف مني العروسة ونفض القشة اللي على أيدي بعصية وراح شاليني ودخل بيتنا على الحّمّام من غير استئذان، خد أيدي وابتدى يمص ويتف، وبعدين جاب موس حلقة وعمل قطع صغير على صباغي، الحقيقة ما وجعنيش وما حسّتش به، وكمل يمص الجرح ويتف في الحوض :

- «Scorpione!» - عقربة! - لازم نبلغ الإسعاف .

أمي جت من المطبخ جري تشوف إيه الحكاية. أنا فعلاً حسيت بشكّة وانا نازلة السلم، بس كنت فاهمة إن الشكّة دي من القشة، أتاري اللي على العروسة كان عقربة. ساعتها ما كانش فيه تلفونات بسهولة زي دلوقت، بس بلغوا الإسعاف، أنا عيّلة عندي زي ثلاث سنين، فلما شفت الناس بتوع الإسعاف رحّت استخبيت وقعدوا يدوروا علىّ لغاية ما لقوني ورا الدولاب. ممرض الإسعاف بص على الجرح ومدح في إسعافات جارنا وطمّن أمي وما عملوليش علاج زيادة .

في وقت من الأوقات انتقلنا لبيت تاني في الدور الأرضي في نفس صف جامع كخيا في حي العشماوي، غالبًا زي ما قلت لأسباب اقتصادية، البيت أصغر، أوضتين وصالة وحّمّام في الدور الأرضي ما بيدخلوش نور تقريبًا. ومع إن وضعهم الاقتصادي بيزداد صعوبة، إلا إن أبويا وأمي كانوا بيحبوا ينزلوا يتفحسوا وياخدوني معاهم يتمشوا أو يعملوا زيارة وانا كنت كبرت شوية وذكريات الفترة دي ابتدت يكون فيها شيء من الشقاوة. يلبسوني ويسيبوني في الصالة ويطلبوا مني

ألعب بالعروسة من غير ما انتشاقى ويروحوا يكملوا لبسهم، ودي كانت لحظة مثيرة بتيجي لي فيها أفكار استكشافية. أمي عندها قزازة برفان «كوتي»، ماركة معروفة وحلوة، وأول ما لبسوني ابتديت ألعب بقزازة البرفان، سمعتهم من بعيد :

- سيبى القزازة لاحسن تتكسر .

لكن ما سمعتش الكلام والقزازة وقعت من أيدي واتكسرت مليون حطة وانتشر البرفان في البيت كله. اتخضيت وعيظت ونزلنا من البيت وانا باعيط. بس والله أنا مبسوطه إني باحكي الكلام دا علشان بافنكر وشوش أمي وأبويا وحركاتهم في البيت الضيق العتمة، ازاي حاولوا يطمنونني مش يزَعَقُوا لي .

كان فيه دوا للكحة اسمه «سيرولينا»، غريبة ازاي أنا فاكرة اسم دوا كحة لعبت به من أكثر من ستين سنة! كان بيعجبني دوا الكحة دا وعايضة أشرب منه حتى وانا مش عيانة وأمي تخبيبه مني. مرة وانا مستتياهم يلبسوا - وما كنش عندي 5 سنين لأن أخويا ما كنش لسه اتولد - لمحت القزازة هناك على البوفيه من فوق خالص، وابتديت مشروع الوصول لدوا الكحة، جرجرت كرسي من عند ترابيزة السفارة لغاية البوفيه وطلعت على الكرسي ومنه طلعت على البوفيه وشبييت على طراطيف صوابعي، أخذت القزازة من على الرف البعيد، بس الفرحة ما تمتش، أمي قاقت من هدوئي وقفشتني والقزازة على بقي على وشك إني أشرب منها .

الراديو كان لسه طالع وناس قليلين اشتروه، راح أبويا جاب واحد، لأنه بيحب يجرب الأفكار والأجهزة الجديدة، يسمع عليه مغني مشهور بيحبه اسمه «تينو روسي»، صوته رفيع «تينور»، بيعني نص فرنساوي ونص طلياني، أغاني رومانسية خالص. كان فيه تمثيلية في الراديو بتمثل فيها طفلة صغيرة، لبسوني وحطوني أسمعها على أمل إنها تسليني وابعد عن الشقاوة، وفعلاً صوت الطفلة خد انتباهي، ولكن لما كنا على وشك النزول، البننت اللي في المسلسل ابتدت تعيط، وانا أعيط معاها واقول :

- جوه الراديو! فيه حد بيعيط جوه الراديو !

وأبويا يلف لي الراديو من كل ناحية علشان أشوف إن مفيش حد جوه، وانا أصرخ :

- جوّه! جوّه! فيه بنت بتعيط جوّه .

كل يوم بعد الظهر أمي تخلص تنضيف وطبخ وأبويا لسه في الشغل، تحطني في الـ «poussette» - عربية الأطفال - ونروح «تسيياس» تشتري لي «بابا»، الباباز، جاتوه متسقي شربات وجواه شوية كريمة، أنشغل بيه وهي تاخذ فرصة تنفرج على الفاترينات. «تسيياس» في شارع فؤاد اللي اسمه «26 يوليو» دلوقت، قدام جنيئة الأزبكية، وكان يُعتبر وسط البلد والمركز التجاري لأن فيه كبرى المحلات، «شملا» و«سيكوريل» أو «شيكوريل» بالمصري، و«أوريكو» وكان فيه كمان شركة بيع المصنوعات المصرية فصادها. مرة في ميدان الأوبرا وأمي بتتمشى بي

وانا في عربية العيال مندمجة في أكل الجاتوه إلا وحاجة سودا «فوووووو» وما لقيتتش الجاتوه في إيدي! أمي اتخضت وانا عيَّطت، طلع إن غراب خطف الجاتوه من إيدي وطار من غير ما يلمسني، ما حسنتش به خالص. كنا بنتمشى في شارع فؤاد جنب الفاترينات وعلى الرصيف فيه خردوات كثيرة صغيرة بتتباع زي دلوقت في شارع قصر النيل أو سليمان باشا، كان فيه مراوح ورق صناعة يابانية منتشرة أمي تقف وتفتحها وتجربها وترجعها مكانها. تتفرج من غير ما تشتري علشان معندهاش فلوس كفاية، ما يمنعش إن المشوار دا كان فسحتها وفسحتي. فيه سبب تاني غير قلة الفلوس، وهو إن اللي فاهم في شرا اللوازم الكويسة هو أبويا. أمي كانت بتكرر لي إن أبويا شاطر يعرف المحلات ويعرف يقيس الهدوم مطبوط ويفهم في الخامات والمصنعية، ليه؟ علشان عنده الصبر، خصوصاً في تنقية الجزم، مش فاكرة أبداً إن أمي نزلت اشترت معايا جزمة، أبويا يوديني المحل ويقيس بهدوء، ويحسّس على الصباغ الكبير يتأكد إن كانت الجزمة مش حتوجعني بعد ما نشترها. يجيب أحسن نوع وعنده مثل بيقوله بالطلياني «Chi paga di piu spende di meno» يعني «اللي يدفع أكثر يصرف أقل»، وبالعربي بيقولوا: «الغالي تمنه فيه». الحقيقة إحنا كل شيء عرفناه بره البيت جاي من أبويا، أصل هو اللي من مصر ومولود فيها، أمي إيطالية خواجية واحنا صغيرين مش فاهمين حاجة لسه، ياخدنا ويودينا ويجيبنا ويحكي لنا نروح فين وما نروحش فين، هو اللي يعرف اللغة والبلد.

كان كمان متعدد المعارف والمواهب، بيعمل أشغال صغيرة بـ«الأركيت» بمنشار رفيع زي سن القلم، «الأركيت» هواية انتشرت أيامها وبيتنا اتملأ أرفف وأبليكات خشب مزخرفة في الأركان للزينة أبويا اللي بيعملها، وأنا عندي في البيت لحد دلوقت علبة على التسريحة هو اللي عملها. حبّ يتعلم موسيقى واشترى كمنجة بفلوسه أول ما اشتغل، وخذ دروس عزف، وبيحب القرابة إلى حد ما. من ذكرياتي السعيدة إنني قضيت وقت أفرا كتبه اللي على الرف، كتاب لـ«فيكتور هوجو» مثلاً، أو «Les trois mousquetaires» - «الفرسان الثلاثة» - لـ«أليكسندر دوما»، وصوره «ميليدي» والراجل بيقطع راسها ويمسكه من شعرها، الصورة دي أثرت فيّ وكنت باقعد أبص لها ساعات طويلة. والمجلات اللي أبويا بيشتريها كل أسبوع عن السينما والممثلين والممثلات على الغلاف. حبّ علم الفلك، الكواكب والنجوم من الناحية العلمية، مش قرابة البخت، وكنت باموت من الانبساط وانا باسمع له وهو بيشرح لنا الظواهر الطبيعية. كان فيه طقس في البيت، أبويا يرجع من الشغل حوالي الساعة خمسة أو خمسة ونص بعد الظهر، أمي تكون طبخت ومنتعشى على الساعة ستة أو ستة ونص، بعد العشاء، هي تشيل السفرة وتلم المطبخ واحنا نقعد في البلكونة قصاد أبويا يحكي لنا كل يوم عن ظاهرة :

- أول نجمة تظهر في السما بعد غروب الشمس اسمها «فينوس»!

وكل يوم نوصل البلكونة ونستنى «فينوس» تظهر وندور عليها، يسأل :

- أول نجمة تظهر في السما بعد الغروب، اسمها إيه؟

واحنا نرد :

- «فينوس»!

- طيب لو شاطرين تلاقوها .

وندورّ في السما، لو نلّاقوها :

- شطار !

ويصقّف لنا، ولو ما لقينهاش :

- خابيين ! أهيه موجودة وانتم مش شايفينها .

ونصقّف كلنا، مواقف من النوع دا. كان مُشترك في مكتبة دار الكتب اللي في باب الخلق وبيستعير منها كتب ويرجّعها. نقعد نتفرّج عليها أنا واخويا، أخويا كان صغير وميال لتقطيع الكتب أكثر من قرابتها، كتب مليانة صور عن الكرة الأرضية والكواكب التانية زي «ساتورنو»، المريخ، ولا يمكن زُحل؟ وتصورات للكائنات اللي ممكن تكون عايشة في الكواكب التانية، كائنات شكلها غريب. فهمت من أبويا إن كل ما يَخُصُّ الأرض واللي في بطنها اسمه «جيولوجيا»، وكل ما يَخُصُّ النجوم والكواكب اللي بنشوفها في السما اسمه «أسترونوميا» - علم الفلك - وأعتقد إن من هنا أنا طلعت في بالي إني مش عايزة أدرس إيطالي ولاتيني في المدرسة، وإني مش عايزة أكمل في قسم الأدبي، وإنما نفسي أدرس «جيولوجيا»، وأهلي يضحكوا ويسكتوا .

كان فيه معهد في فرنسا بيدي كورسات كهربا بالبريد. لمدة طويلة كانت الكورسات دي بتوصل لابويا بالبوسطة مكتوبة بحبر أحمر، أعتقد إنها منسوخة بالبالوظة، لأن ما كانش فيه مكن تصوير ساعتها. كنت باتفرّج عليه وهو بيرسم بمنتهى التأنّي والتفاني رسومات كبيرة بالأحمر والأزرق، سمعت منه إنه امتحن بالبريد ونجح ووصل له جواب فيه شهادة إنه «خبير كهربائي» في ظرف بالبوسطة، وكان سعيد بنفسه في الحكاية دي. يعني بالإضافة إلى إنه بتاع شغل، أبويا كمان راجل عصامي كوّن نفسه بنفسه ودرس بالبوسطة من القاهرة علشان يبقى خبير كهربا، الدراسة دي فادته في شغله العملي، لكن الشهادة نفسها ما كانش حد بيطلبها منه .

استمرّ انتقال أبويا من شغلانة للتانية لغاية فترة الحرب العالمية التانية، الإنجليز ساعتها كانوا محتلين مصر، وشركة «كوك» الانجليزية شغلت ميناء - مطار على النيل وطيارات بتنزّل وتطلع من على الميه، خدوا أبويا كهربائي عندهم وأصبح دخله ثابت من جديد. استقر في الشغل أثناء الحرب، ووضعنا اتحسن، فاشترى لنا تلاجة من واحد في الجيش الإنجليزي، جابيين موديل تلاجة يستخدموها في الأرياف من غير كهربا، لها فتيل بيولع بالجاز ويعمل هبابة سودا ولذلك لازم أبويا ينصفها كل شهر. لمدة طويلة كان فيه استقرار في البيت، فسبنا العشماوي وعزلنا لبيت شارع نعيم في بولاق أبو العلا .

*

طول المدة دي وانا فاكرة إني طليانية، أصحاب أهلي والجيران، والكلام في البيت باللغة الإيطالي والأكل مكرونة بنتويجاتها والمدرسة في السويس عند الراهبات الطلاينة، وهنا في القاهرة رحتمدرسة «دانتى أليجييري» الإيطالية. أقدر أعتبر إني ما كنتش باحس بالمجتمع المصري، باشوف مصريين طبعًا بس يظهر كنا في وسط مستعمرة أجنبية كبيرة، بنعيش وسط مجتمع إيطالي. كان فيه حوالينا يونانيين وأرمن ويوغوسلاف بس كلهم بيتكلموا طلياني مع أمي، وفي الأغلب كلهم مسيحيين وأمي مسيحية وأبويامش متدين، فيظهر كنت مفترضة إني مسيحية، بالذات إننا بنروح الكنيسة من وقت لآخر، بس أنا ما كنتش بافكر في الموضوع دا بشكل واعى ولا حد بيتكلم فيه .

رجعنا من السويس وسكنا في شارع نعيم في أبو العلا، كبرت شوية وأبويابيديني مليم أحمر كبير عليه طربوش الملك فؤاد وانا أروح عند بقالة «الهوري» جنب كنيسة الكرمل أشاور على برطمانات الطوفي جنب الـ «Caisse» - الخزنة - فيديني عشرة طوفي بالمليم دا وارجع البيت بمليم قرطاس طوفي. لما كبرت أكثر بقوا ممكن بيعتوني أجيب جبنة وبعدين بقيت أجيب بيض .

جاري اللي ساكن قصادنا كان صبي أكبر مني اسمه هواري الهواري، الهواري الأب بشنبات وجمالية بني وصاحب محل بقالة «الهوري» اللي باجيب منها الطوفي، وكانت العيلة واخدة دور بالكامل، باقي العمارة كل دور شقتين سكان طلاينة، بس انا ما كنتش واخدة بالي مين مصري ومين خواتم ساعته. الهواري الابن كان صبي عمره يمكن 12 أو 14 سنة، أكبر مني، ببيجي له مدرسين خصوصيين وبيضربوه. كان عنده مدرس معين بيضربه كل يوم بانتظام بعصاية رفيعة على صوابع إيديه، وكل يوم هواري يصرخ. أنا أقعد على الشباك أستنى وهو بيصرخ واسمع من جوه صوت أمه وأبوه وهما بيثجعوا المدرسين على ضربه، أو دا اللي تصورته. أسرة كبيرة، أولاد وبنات كتير وهواري الابن الكبير، ويظهر عايزين يربوه كويس. طريقة تعليمه كانت وحشية جدًا، كان بينضرب ضرب هواري الهواري دا، وانا كان بيصعب عليّ .

نشأت علاقة بيني وبينه، إزاي بقى؟ عندي واجب حساب لازم أحله عبارة عن قسمة وجمع وطرح ومسائل زي دي، في يوم من الأيام جت لي فكرة جهنمية إن انا أستغل وجوده في البلكونة، أخذت الطباشير وكتبت على خشب الشيش البني مسألة الحساب « $2 + 6 =$ » فهو كتب على حيطه البلكونة عنده «8» وانا نقلت الحل في الكراسة. هو كان مبسوط وانا كنت مبسوطه علشان باعمل الواجب بسرعة من غير ما اتعب. العلاقة بينا كانت ظريفة جدًا، يرمي لي فاكهة وانا أرمي له بلح ناشف، أنا أكل وهو ياكل. خليته يعمل الحكاية دي كذا مرة مش مرة واحدة. جارتنا اللي ساكنة فوقينا في الدور الثاني ست يوغوسلافية اسمها «سينيورا فاني»، متجوزة راجل يوناني وما عندهمش ولاد، لما نتخانق أنا و«برتو» وبيتي العياط وأمي مش عارفة تودي راسها فين، طبيخ وتنضيف وعيال، الست «فاني» تنادي علينا تطلعنا فوق عندها شوية كنوع من المساعدة لأمي. كنا بنحب بيت الست «فاني» لأن عندها أوضة مليانة عصافير حلوين في أقفاص، بتأكلهم وتاخذ بالها منهم وتحط لهم مية وبلكونتها مليانة زرع. كنت باحب زرعهم، كله شوكة وبيطلع ورد أحمر صغير. تاخذني البلكونة وتعلمني: «دا اسمه إيه؟ ياسمين هندي، ودا اسمه إيه؟ ياسمين بلدي» يريحته الحلوة. مفيش خرم من غير زرع في بلكونتها، غير يا دوب علشان تعرف تفتح وتقفل الشيش. الست «فاني» دي لاحظت إن انا وهواري بنرمي لبعض فواكه ونتكلم، راحت بلغت أمي وفهمتها إن دا تصرف مش لازم

يستمر، أمي أيامها كانت مشغولة بأخويا لأنه كان مُتعب وهو طفل، فمنعتني من غير تفكير كثير إن أقعد في البلونة لما هواري يظهر في بلكونتهم. هواري كبر شوية وابوه ابتدا ياخده معاه المحل يساعده على الخزنة وانا كمان كبرت وانشغلت أكثر بالمدرسة وشوية بشوية ما بقيناش نشوف بعض وانتهت العلاقة بالطريقة دي .

تاني ذكرى مع المجتمع المصري كانت من الناحية الثانية من البيت، مع بيت زكي السماك. في يوم شبابيكهم كلها كانت مفتوحة، بيان من عندنا كل اللي بيحصل عندهم في الشقة لأن شارع نعيم شارع ضيق. أبويا وأمي قفلوا الشيش شمسية وفتحوا الريش، ووقفوا يتفرجوا على استعدادات فرح بنت زكي السماك من ورا الشيش: طبله وزغاريت وأنوار من السطوح لغاية تحت في الشارع ويعرض البيت. تعليق أمي الوحيد :

- الله؟! بيتجوزوا في البيت؟ مش بيروحوا الكنيسة؟

في الغالب قصدها الجامع باعتباره كنيسة المسلمين، ورجعوا يتفرجوا تاني، في وقت معين أبويا قال :

- الله الله! حنشوفي إن الحكاية دي حنتتهي بخناقة، الأفراح عندهم كثير بنتتهي بخناقة .

وفعلاً بعد شوية ابتدى صوت خناقة وابتدوا يرموا كراسي على بعض ويضربوا ويشتموا، ما عرفش اختلفوا على إيه، وفي النهاية جه البوليس وانفض الفرع .

محل زكي السماك قدام جامع أبو العلا على ناصية الشارع اللي رايح السبتية ووكالة البلح. بيحطوا السمك على رُخامة ورا القزاز، محل مش كبير بس أشهر محل سمك في الحطة، منور ومليان سمك طازة وناس بنتشيري مشوي ومقلي وتاكل على الواقف أو تاخذ على البيت. أنا مرتبطة بزكي السماك بسبب إن أبويا كان كل شوية يروح لأبو العلا ويجيب لنا سمك مقلي جاهز، كُلت من عنده كثير .

نرجع لجبران البيت اللي أنا باحكي عنه، بيت شارع نعيم. شارع نعيم مش بعيد عن كنيسة الكرمل، بعد شارع الوابور الفرنساوي، شارع ضيق زي شارع شاهين اللي احنا ساكنين فيه دلوقت في الدقي. كنا ساكنين في الدور الأول، وتحتينا دور أرضي ساكنة فيه ست إيطالية عندها ابن اسمه «نينو»، أكبر مني بسنة أو اتنين. أيام الحرب جوزها كان معتقل، أصل لما قامت الحرب الثانية الإنجليز اعتقلوا كل الرجالة الطلاينة اللي في مصر وحطوهم في معسكر «جنيفرا» على القتال، وهي كانت بتخرج كثير وفيه كلام عليها إن «جوزها معتقل وهي بتصاحب الجنود الإنجليز». قصادنا في الدور الأول ساكنة أسرة إيطالية عندهم 3 أولاد صبيان مفيش بنات. الست الكبيرة، أمهم، شكلها فلاحه طليانية تخينة بالشعر الملموم لورا والنضارة المدورة زي في الأفلام، بنتشوف البخت في الفجان وفي الكوتشينة. مش فاكرة جوزها لكن فاكرة ولادها الكبار وهم خارجين لمصالحهم، في الغالب بيشتغلوا، وطول النهار الناس رايحة جاية على بيتها تشوف لهم البخت وتاخذ فلوس على كدا. فوقينا كان فيه الست «فانّي» اليوغوسلافية اللي عندها بلكونة وزرع

وعصافير وجوزها اليوناني «يورجوس» أو «جورجيو» بالطللياني، كل أسبوع يلبس بوت وياخذ البندقية ويروح هو وأصحابه يصطاد في الفيوم، ويرجع بشنطة مليانة بط. في الدور الثالث كان ساكن صاحب البيت وكان اسمه محمد خطاب، شقتهم بتدي على الناصية والسطوح تبعه لأنه في آخر دور، حوّل السطوح إلى جنينة في غاية الجمال وجزء منها «بيرجولا» - تعريشة - وفيه أوضة للغسيل والتخزين. يظهر إن محمد خطاب كان متجوز اتنين ومراته الأولى هي اللي ساكنة في الشقة دي، للأسف كانت بتتضرب كثير، كل ما يرجع من بره نسمع صريخ وضرب، دي كانت كل علاقتنا به. غير كدا، من وقت لوقت وداد بنته تيجي تاخدني ونطلع فوق السطوح ونتفرج على الزرع .

بياعين الخضار والفاكهة المصريين، حتى الصغيرين اللي بيفرشوا على الأرض في الشارع، بيتكلموا طلياني مع الزباين ويبيعوا لهم على طريقة الأجانب بالواحدة مش بالكيلو، أمي تطلب ست أو سبع برتقانات والبياع يوزن ويقول لها السعر بالطللياني. سوق شارع الوابور الفرنسي سوق زي سوق سليمان جوهر اللي احنا ساكنين فيه دلوقت، جالية طليانية كبيرة ومليان سنات بيوت طلاينة فحصل نوع من المسايرة للغة والبياعين المصريين اتعلموا طلياني. نفس الشيء الجزائر وبياع السمك الطازة اللي جنب العيادة البيطرية اللي في شارع 26 يوليو كلهم بيتكلموا شوية طلياني. لكن لازم أقول إن أمي دماغها ناشفة بصفة خاصة في موضوع اللغات دا، لأن هي عاشت هنا سنوات طويلة، حوالي 40 سنة من العشرينات إلى الستينات وما اتعلمتش عربي، معندهاش ميل للغات وما قدرتش تعمل صداقات إلا باللغة الإيطالية، حتى الست اليوغوسلافية وجوزها اليوناني كانوا بيتكلموا بالطللياني مع أمي. وعلى أي حال العلاقات الاجتماعية اليومية كانت مع الطلاينة اللي ساكنين حوالينا مش مع جيراننا المصريين .

في الوقت دا كان عمري تمن أو تسع سنين، أخويا كان كبير حبة وبقي عمره زي 3 سنين والأوضاع الاقتصادية في البيت استقرت شوية، بدليل إننا نقلنا لبيت شارع نعيم اللي فضلنا فيه أكثر من عشر سنين. كنا بنعمل كل حاجة بشكل عائلي صميم، يوم الجمعة نطفر فول وأبويا بيعتني لفرن العيش البلدي ويقول لي :

- خدي شوية مفقع وشوية طري .

الفرن في بولاق - لو أروح هناك أقدر أقول لك مكانه فين - ما بيعملوش غير عيش في الفرن دا. كنت باحب اتفرج على العيش البلدي وهم بيفقوه، يطلعوا الرغيف من الفرن طري ومنفوخ يدوا له خبطة بكوز مطبق يطلع من العيش بخار وياخذ شكل فصين، ويرجعوه الفرن، وبعد شوية بسيطة يطلعوا المفقع ناشف ويديني منه. أبويا بيعب المفقع وأمي بتحب الطري، فكان لازم أجيّب النوعين. أما عيش كل يوم العادي في البيت فهو العيش الفينو، من الفرن الأفرنجي، أرجو إن يكون لسه موجود، كان في واحدة من الحواري اللي جنب البيت وأنا برضه اللي لازم أروح أشتري. الفرن الأفرنجي، فران الفينو، بيعمل عيش ومخبوزات تانية غير العيش، ومتعود على بنات وولاد الطلاينة، يروحوا له الصبح بدري يشتروا العيش سخن ياخدوه ع البيت، يتعمل ساندويتشات ياخدوها معاهم المدرسة. الفران دا كان لطيف جداً يستقبلنا ويُمطرنا بالكلام الحلو: «يا صباح الفل، يا صباح الياسمين، يا صباح العسل والسكر» يا صباح المش عارفة إيه، يطلع منه كلام حلو كثير

مش واحد صباح الخير وخلص، لا، كل تلميذ يبجي له ياخذ منه الفلوس ويدي له العيش والترحيب

أبويا وأمي خدوها عادة يروحوا السينما بانتظام آخر الأسبوع. نروح «سينما الأربكية» أو سينما «Paradis» - يعني «سينما الجنة» - وهي سينما صيفي مكشوفة على أرض فاضية مبلطينها بلاط بيكرني بسطوح بيتنا، وجنيئة حوالها سور من الشجر والزرع وبوابة للدخول، عاملة زي الكازينو، تراييزات مدورة وحوالي ست كراسي لكل تراييزة. السينما دي كانت في المكان اللي دلوقت موجود فيه محل زكي السماك الجديد قدام «عمر أفندي» الأصلي على الناصية من ناحية شارع الساحة والحتة اللي قصاده اسمها عابدين دلوقت، بس ساعتها كل دا كان أرض فضا مفيش غير السينما و«عمر أفندي». «عمر أفندي» الأصلي دا أربع خمس أدوار وبيبيعوا فيه كل المستلزمات بما فيها الموبيليا. سينما تانية مشهورة كانت سينما «أولمبيا»، على ناصية شارع الساحة مع شارع عبد العزيز اللي بيوصل للعتبة. أنا عمري ما دخلتها السينما دي، أصل سمعتها وحشة وتذكرتها رخيصة، وأبويا بيقول «بيروحوها الناس اللي مش عائلات»، غالبًا يقصد الشباب، أمال مين تاني؟ المهم مش سينما محترمة إحنا نروحها. أبويا حكى لي إن مفيهاش كراسي، المتفرجين بيعدوا على دكك، وإن هو دخل السينما دي أكثر من مرة لما كان صغير قبل ما يبقى هو نفسه «عائلات». أنا شفت فيلم من كام سنة اسمه «مرسيدس» من إخراج يسري نصر الله، وبطل الفيلم زكي ابن فطين عبد الوهاب وليلى مراد، كان داهن شعره أبيض وفي مشهد في الفيلم بيدخل سينما «مش للعائلات» يتخانق وينضرب في حمام السينما، أعتقد إن سينما «أولمبيا» كان بيحصل جواها حاجات زي دي. أما بالنسبة لي فخروجة سينما «بارادي» أحلى الفسح وباستنأها يوم الحد أو يوم السبت بالليل. أهلي يلبسونا، أخويا وانا، وبعدين أمي تلبس شتوي شوية، يعني مش فستان البيت اللي بتلبسه كل يوم، وأبويا يلبس بدلته وبنزل مع بعض نروح السينما نقعد في الجنيئة المكشوفة، نوصل قبل ما الدنيا تضلم علشان نلحق «خدمة الخشاف»: على تمن تذكرة السينما بيقدمو خشاف ببلاش، العائلات توصل بدري وتقعده حوالين التراييزات والسفرجية يجيبوا لنا كل واحد طبق الخشاف من فواكه الموسم وعليها صنوبر ولوز وبنقد وتين مجفف، خشاف غني وحلو، يا دويك ناكله الجو بيتدي يضلّم والشاشة تتور. قبل الفيلم يعرضوا الـ «actualités» اللي إحنا بنسميها الجريدة السينمائية وبعدها فيه «ميكي ماوس» أو «توم وجيري» وبعدين دخلة «مترو جولدن ماير» والأسد وهو بيعمل «عووو»، كل مرة أخاف، أبقى عارفة وحافظة طريقتة واستناه وفي اللحظة الأخيرة برضه أترعش، وبيتدي الفيلم. أبويا كان بيعبد «شارلي شابلن»، أنا عندي يا دوب 9 سنين وباتفرج معاه، بس بازهق، مش دي الأفلام اللي باحبها، باحب أفلام المغامرات والقراصنة في البحر اللي فيها «إيرول فلين» بيهاجم مراكب أسبانية وهي رايحة أمريكا الجنوبية وينقذ سنات لابسين هدوم خرافية، واحب أفلام مغامرات «تايرون باور» اللي فيها شيء من الرومانسية زي «Blood and Sand» - «دماء ورمال» - مصارع تيران صغير وفقير علم نفسه وبعد كذا حب البنيت واتشهر، البنيت «ريتا هيوارث» بتغني أغنية مشهورة اسمها «القمر الأخضر»، وطبعًا كل أفلام «شيرلي تمبل» أو «جانيت ماكدونالد» و«نلسون إدي»، هي «سوبرانو» وهو «تينور»، أفلام استعراضية موسيقية .

خروجات السينما والخشاف دي كانت قبل ما الحرب العالمية الثانية تبتدي، علشان لما الحرب العالمية الثانية حبتدي شوارع القاهرة حتملي جنود انجليز وغير انجليز من جنوب أفريقيا والهند، وأبويا وأمي مش حخلوا حد يخرج في الشارع بعد غروب الشمس «أصل مليون جنود في الشوارع» والبلاد حتبقى «مش للعائلات».

قبل الحرب كنت باروح مدرسة «Le Scuole Italiane all'Estero di Bulacco - Dante» المدارس الإيطالية في الخارج - ببولاق، «دانتي أليجييري» اللي أصبحت مبنى القنصلية دلوقت في الإسعاف عند تقاطع شارع فؤاد مع سكة القطر وكان بيوصل لحد ثكنات الانجليز. دخلت الحضانة حوالي سنة 1937 وأول ذكرى لي في المدارس مرتبطة برضه بحاجة عصلجت معايا. يظهر إن واحنا أطفال ما بنفتكرش المواقف اللي مرت علينا بسهولة، بنستوعبها وننساها، بنفتكر أكثر الأحداث لما تعصلج معانا. المدرسة الطلياني عملت نشاط مسرحي علشان في آخر كل سنة بيقدموا النشاط دا في احتفال ماتينييه في دار الأوبرا، القديمة طبعاً، اللي اتحرقت - يا خسارة - سنة 1971 ودلوقت عبارة عن جراج عربيات. في الحضانة كنا بنتمرن على باليه «سندريلا». أبويا وأمي اشتروا التذاكر وفصلوا لي اللبس المطلوب للاشتراك في العرض ولبسوني لبس العرض في البيت وخدوني وراحوا بي لغاية الأوبرا، ولكن لما وصلنا ظهرت علي أول أعراض الخجل الاجتماعي اللي لازمني على طول بعد كدا؛ رفضت تماماً أخش واطلع على المسرح أرقص الرقصة اللي كنت باتمرن عليها مع باقي المجموعة في الحضانة، ورجعنا البيت لا أنا اشتريت في العرض ولا أهلي اتفرجوا. مساكين أهلي، كانوا طيبين، قلعوني وسابوني ألعب وانا فضلت مدة طويلة، يمكن سنين، ألعب بالهدوم دي اللي ما نفعتش، ألبسها واقلعها وامتل بيها واتكلم واتفرج في المرايا .

في أولى وتانية مشيت في المذاكرة مش بطال، وتقريباً معنديش ذكريات لأن المدرّسة كانت حنيّنة جداً وبتأخذ بالها مننا كلنا في الفصل، بما فيهم أنا. صاحبتني «مارتشيلا» كانت أشطر مني، وكانوا بيقلوا «أصل عندها أخت أكبر منها في ثانوي بتوجهها وتساعدنا»، لكن أنا الكبيرة وأهلي بيسيوني على سجيّتي ومشغولين في «برثو» أخويا الصغير اللي ما كانش طفل سهل. في سنة تالّثة طلعت لي مدرّسة جاية من إيطاليا، «very rude» - قاسية - مشقرة شعرها بميّة أكسوجين، أصفر فاقع، ومعانا في الفصل أختين من عيلة غنية ساكنين في الزمالك بيوصلوا للمدرسة في عربية سودا بسواق، وآخر النهار تيجي العربية السودا بالسواق تروّحهم البيت. المدرّسة الإيطالية اللي صابغة شعرها دي اهتمّت بالبنّتين دول بالذات، دايماً تسألهم وتتابع حالتهم وتهمل معظم الطالبات التانيين بما فيهم أنا. شوية بشوية اتدهوّرت، مرة ما عملتس الواجب فزَعّقت لي، المرة اللي بعدها ما عملتس الواجب ما كلمتتس، كأنها خلاص مش متوقعة مني أتعلم، اعتبرتني بليدة، وابتديت أتأخر عن مستوى باقي الفصل. كتبت لي في الكراسة كلمة علشان أبويا وأمي يتابعوا لكن أنا خبيّت الكراريس منهم. في الفترة دي أخويا، لما حاولوا يفظموه، رفض الأكل ومش عاوز غير لبن أمه. الجيران والأصحاب قالوا لأمي :

- حُطّي على صدرك تقل بُن .

جرّبت وما نفعش، فنصحوها :

- حُطِي طعم مُرّ زي الصبار، علشان يقرّف من صدرك .

مفيش فايده، الدكتور قال :

- الولد لازم يروح يلعب في الجينة .

فأمي يا عيني اتعودت الصبح بعد ما أبويا ينزل تاخذنا أنا و«برتو»، توديني المدرسة وبعد كدا تاخذ الولد وتروح الجينة اللي قدام مدخل نادي الجزيرة، جنب مطعم الباشا دلوقت. ساعتها كانت الجينة دي مفتوحة للجمهور من غير سور . تعدي كوبري أبو العلا وتتمشى على النيل في الزمالك لحد الجينة وتقعّد مع «برتو» هناك ساعتين تلاثة تلاعبه وتغديه وتنيمه في الهوا لغاية ما يبجي ميعاد خروج مدرستي تيجي تاخذني ونرجع البيت تطبخ وتتصف. هي فترة البيت كله كان تعبّان، طول الليل «برتو» يعيط، يفضل بالساعات معلق على صدرها مش سايبها تمام، واتأخر في المشي وفي الكلام وفي النظافة، فضل يعمل على نفسه «كاكا» و«بيبي» أطول من العادي. أهلي اندوشوا ودا خلّاني عرفت أهمل دراستي وما اورّيهمش الكرايس اللي فيها كراسة الواجب . الوضع دا استمر لغاية ما في يوم المُدرّسة الشقرا دي جابت صورة فنيّة، مرسوم فيها مهد جواه بيبي صغير وستين بيصوا له بحنية، ست كبيرة في السن وست أصغر وقالت لنا :

- دي جدّة الولد ودي أمه، يا ترى بيفكروا في إيه؟ وبيتصورا الليبي ازاى لما يكبر؟

وعلقت الصورة قدامنا في الفصل وقالت لنا :

- اكتبوا موضوع إنشا في حدود المعنى دا .

أنا كتبت صفحة بحالها. في الوقت دا المدرّسة كانت أهملتني لدرجة إنها قعدتني ورا وبقيت واحدة من البنات «اللي بيقعدوا ورا» لأن مفيش فايده فيهم، وانا من ناحيتي كنت خلاص برضه وصلت لدرجة إني مش مهتمة، ومقتتعة إني مش حاقدّر اعمل أي حاجة كويسة في أي يوم من الأيام. تاني يوم المُدرّسة قالت :

- مفاجأة! تصورا مين أخذ أحسن نمرّة؟ مين؟ «ماريا لا روزنتال».

وبدل ما تمدح فيّ علشان كتبت موضوع إنشا جيد، جت لحد عندي في آخر صف وجرجرتني من ودني لغاية مكتبها عند السبورة وفضلت تكرر لي قدام الفصل :

- لما انت بتعرفي تكتبي كويس، ما بتذاكريش ليه؟

وتشد وداني. كانت ست قاسية وانا كنت خايفة أنضرب مش قادرة أفرح بمعجزة إني أخذت أحسن نمرّة .

- ما بتعمليش الواجبات ليه؟ أمك وأبوك مش ببيجوا يقابلوني ليه؟

وإنا ما باردش. المرة دي بقى المدرسة اتصرّفت علشان تتصل بأبويا وأمي - نفسي أعرف ازاي، أصل أيامها ما كانش فيه تلفونات. جم جري الاتنين يقابلوها ونزلوا الثلاثة شتايم فيّ، أهلي أكدوا للمدرسة عدة مرات :

- ما شوفناش إن انتِ كتبتِ في الكراسة .

ويعتذروا عن إن انا وحشة وإنهم همّ نفسهم فظيعين لأنهم أهملوني بالطريقة دي .

المهم أنا من ساعتها للأسف اضطريت أعمل الواجبات وأذاكر بشدة تحت إشراف أهلي .

في سنة تالتة ابتدئنا ناخذ في المقرر مادة العلوم، ودخلوا في النحو بالنسبة لمادة اللغة الإيطالية، والتاريخ والجغرافيا أصبحوا مواد منفصلة، ومسائل الحساب ما بقتش «2 + 8» زي اللي كان هوارى بيحلهم لي في البلكونة. يعني دخلنا في الجد، وأبويا وأمي كمان خدوا المسألة جد .

أبويا تولى الحساب والعلوم وأمي تولت التاريخ والجغرافيا .

بين الصالة والمطبخ كان فيه ممر قصير واسع فيه كنبه. أنا أقعد على الكنبه أذاكر، وأمي تروح المطبخ وتتابع عملية الطبخ، وترجع تسمع لي اللي أنا ذاكرته. المنهج في السنة دي كان مركز على تاريخ إيطاليا بالذات. أمي ما بتحبش الجغرافيا خالص وبتكرّوت مذاكرتها بسرعة، وشوية بشوية أبويا تولى الجغرافيا مع باقي المواد بالمرّة بما إنه كان بيحب علم الفلك. في بداية إشراف أهلي على دراستي كان لازم يذاكروا لي بصحيح واضطريت أرجع لورا وذاكر كل اللي ما ذاكرتوش من بداية السنة واضطروا يعملوا مجهود علشان اتعود اعمل الواجب. أمي ذاكرت لي التاريخ بحُب، نقعد ساعات طويلة بعد المدرسة على الكنبه إياها أنا أفرا وهي تطبخ، ومع الوقت تحولت دروس التاريخ إلى مصدر إلهام لأمي، فكّرتها بالأوضاع في إيطاليا قبل ما تيجي مصر. وابتدت تحكي لي على حروب الاستقلال والوحدة من وحي مُقرّر السنة الدراسية من وجهة نظرها هي. البطل الكبير بتاعها اسمه «جاريبالدي». أبوها كان جندي في جيش «جاريبالدي» ، «Camicie Rosse» - «القمصان الأحمر» - ببسموهم كدا، وانضم لحزب «جاريبالدي» الاشتراكي في قريته. في كتاب التاريخ في المدرسة ما كانش مكتوب إن «جاريبالدي» اشتراكي، في المدرسة سموه «بطل قومي تحدّى الاحتلال»، كنا أيام الفاشية في إيطاليا، وحكم موسوليني بيكره الاشتراكية ويعاديها بكل الطرق. كنت أحفظ الدرس وبعدين أمي تاخذ مني الكتاب :

- يلاً قولي .

وإنا أقول، بعد شوية تركن الكتاب وتحكي لي عن قصص عاشتها شخصياً أيام صعود الفاشية في إيطاليا. كنا بنقعد مدة طويلة هي تتكلم وأنا أسمعها .

ما كانش عندي أي فكر سياسي وأنا في تالته ابتدائي طبعًا، ولكن القصص دي دخلت جوايا، سواء القصص المكتوبة في كتاب التاريخ عن التحرر الوطني، أو القصص اللي حكته لي أمي عن مجيء الفاشية والمقاومة في قريتها، استدعتها من منهج تاريخ سنة تالته ابتدائي. الفترة دي موجودة في كتب التاريخ بالعربي في مصر درستوه انتو في السبعينات في شكل فصل قصير أو فقرة بعنوان «حروب الوحدة والاستقلال في إيطاليا في القرن الثامن عشر والتاسع عشر»، ولكن في المدرسة الطلياني الفترة دي كانت بتمثل منهج سنة تالته كله تقريبًا. حكو لنا إن إيطاليا كانت تحت احتلال عدد من الدول الأجنبية. النمسا ملهناش منفذ على البحر، فاحتلت مدينة «ميلانو» و«فينيسيا» ومنطقة شمال شرق إيطاليا كلها وطول التاريخ بتحاول تسيطر على ميناء «ترييستي» الاستراتيجي. البابا والفاتيكان مسيطرين على وسط إيطاليا روما و«نابولي»، وأسبانيا واخدة جزيرة صقلية والجنوب. منطقة واحدة بس اللي كانت تعتبر مستقلة وهي المنطقة اللي جنب فرنسا في الشمال الغربي اسمها «البيمونت»، وكانت متأثرة بالأجواء السياسية للثورة الفرنسية، انتشرت فيها روح ثورية ورغبة في الاستقلال. سنين طويلة جدًا بالطريقة دي، إيطاليا محتلة من دول كثيرة ومقسمة لدويلات وماسمهاش إيطاليا أصلًا، وأنا كنت بادرس في المدرسة نشأة المقاومة ضد الاحتلال في شمال إيطاليا .

مقاومة الاحتلال ابتدت بأفكار شعبية، النمسا تفرض ضريبة على الملح فالناس يحاولوا ما يشتروش الملح، والشباب يطلع في السر يجفف الملح على البحر واتكونت حركة سرية اسمها «Carbonari» - عمال الفحم - وهم ولا عمال فحم ولا حاجة، شباب الطلبة والمتقنين تولوا مهمة تهريب الملح للأهالي في القرى والمدن بمساعدة عمال المناجم. كانوا بيوسخوا وشهم وهدومهم ويسافروا مسافات طويلة مخبيين الملح تحت الفحم في عربيات الكارو. وحصلت حملة مقاطعة للسجائر بسبب الضريبة النمساوية برضه، والبوليس النمساوي يخش القهاوي والمطاعم يراقب الناس ويشوف مين ما بيدخنش السيجار - اللي كان منتشر أيامها في الأوساط البرجوازية - ويراقبوا أصحابهم ويوصل الأمر للقبض على اللي ما بيدخنوش .

نقطة تحول كبيرة في تاريخ المقاومة كانت «أيام ميلانو الأربعة» مش فاكرة والله أربعة ولا خمسة، الأسطورة بتقول إن في يوم شتا ومطر والأرضية مطيئة - مفيش أسفلت لسه - العساكر النمساويين بيجروا مدفع من مدافع زمان الثقيلة، خمس ست عساكر يشغلوها وعشرات يجروها وينقلوها من مكان لمكان. المدفع غرز في الطين وعساكر النمسا حاولوا يطلعوه ما نجحوش. الطلاينة رايحين جايين حوالهم معندهم نية يساعدهم. العساكر في غاية العصبية وبلغت أمرة طلبوا من الطلاينة يزقوا معاهم المدفع والطلاينة ما تعاونوش. الجنود النمساويين طلّعوا كراييج وابتدوا يضربوا الناس بدون تمييز. صبي عنده حوالي 8 سنين من أطفال الشوارع، بيسموهم «باليل»، ودا بي فكرني بتعبير «الواد بلية» عندنا، الولد «باليل» دا لما شاف قسوة الكراييج اتضايق وخذ طوبة من الأرض ورماها على عسكري نمساوي صابته في قورته واتعور والدم نزل. طوبة الولد دا نتجت عنها ثورة صغيرة في الميدان: الستات خرجوا بالحلل والطاسات والمقشحات من المطبخ وكل ما يلاقوا عسكري نمساوي يضربوه، والرجال طلّعوا بأدوات الزراعة والحدادة، ومكتوب في كتاب المدرسة إن الناس كانوا بيرموا مئة مغلية من الشبايبك على العساكر. الحركة انتشرت في «ميلانو» كلها من شارع لشارع والعساكر النمساويين ما كانواش منتظرين ولا مستعدين لرد فعل بالطريقة دي، فاضطروا

يسبيوا المدينة ويمشوا. أهل «ميلانو»، في غاية من السعادة، احتلوا مبنى البلدية أو المحافظة ونزلوا العلم النمساوي ورفعوا العلم الإيطالي، وابتدوا يحكموا المدينة المستقلة. حكومة فيينا في النمسا بعنت جيوش أعادت احتلال المدينة وقبضوا على مئات الناس وقتلوا كثير. شعب «ميلانو» صمد أربع أو خمس أيام في الحكم، وكانت الحركة دي بشاير الثورة الإيطالية ضد الاحتلال .

الطلاينة كتبوا على الجدران : «W.V.E.R.D.I.» - «فيردي» مؤلف أوبرا معروف عندنا في مصر بأوبرا «عايدة»، الـ «W» اختصار «فيفا» بمعنى «يعيش» أو «يحيا» - الشعار معناه: «عاش فيردي»، ولكن الحقيقة إن كل حرف من اسمه بيرمز لكلمة من شعار سياسي وطني ضد الاحتلال، الشعار هو «عاش فيتوريو إيمانويلي ملك إيطاليا» «Viva Vittorio Emanuele Re d'Italia». شعار وطني لأنه بينادي بملك لإيطاليا الموحدة، ملك متوج من الشعب والقوى الوطنية ورمز المقاومة، النمساويين ما فهموش إن شعار «عاش فيردي» شعار ضدهم إلا بعد مدة. فكرة رمزية لأنه مجرد استغلال شعبي لسلطة الاحتلال، لكن زوال الهيبة خطوة. بالإضافة إلى إن مجرد استخدام كلمة «إيطاليا» كان موقف سياسي ضد التقسيم .

اقترن اسم «فيردي» بالمقاومة من قبل الشعار دا، ألف أوبرا عن «نبوخذ نصر»، قصة مش محبوبة في منطقتنا حالياً، بسبب تطور اليهود وإسرائيل وفلسطين في التاريخ الحديث، ولكن أيامها في القرن التاسع عشر كان لها إحياءات مقاومة شعبية عند الطلاينة، الأوبرا بتحكي إزاي ملك بابل - «نبوخذ نصر» - حاكم العراقيين والآشوريين أخذ يهود فلسطين أسرى بستاتهم وأولادهم وعواجزهم وسجنهم تحت برج بابل المشهور، واليهود اتحبسوا سبعين سنة أسرى تحت البرج. الأوبرا افتتحت في مدينة «ميلانو»، اللي فيها أهم مسرح في أوروبا، مسرح «لا سكال». في يوم الافتتاح الأوركسترا عزفت الموسيقى ودخل الكورس الضخم وغنوا عن معاناة الأسرى في السجن والحنين للحرية والوطن مقطوع «Va Pensiero» الشهير، «طيري يا أفكاري على الأجنحة الذهبية واحضني لي غابات وتلال وطني الحنون»، كلام زي كدا. نغمة مؤثرة وسهلة علشان الجمهور يعرف يرددوها مع الكورس، وإذا بالصالة كلها تقف وتغني، وتحولت إلى نوع من السلام الوطني المرتجل ضد الاحتلال في ساعتها، الطباط النمساويين اللي كانوا حاضرين في القاعة اتجاجوا بالحركة وبالحماس الوطني، الجمهور كله واقف بيغني ومفيش غيرهم اللي قاعد، ما عرفوش يتصرفوا إزاي، اترنقوا وخرجوا من المسرح غضبانين. اتقفل المسرح على حس الحكاية دي لمدة طويلة. أسطورة شعبية من التحدي للمحتل بيندولها الناس، مين عارف مدى دقتها. لازم أقول إن كانت مفاجأة أشوف مشهد شبه الحكاية دي في فيلم «Sound of Music» - «صوت الموسيقى» - عن مقاومة شعب النمسا للاحتلال الألماني النازي .

ظهر بقى في أجواء المقاومة دي واحد سياسي وطني اسمه «كافور» وأصبح رئيس وزارة في المنطقة الوحيدة المستقلة على حدود فرنسا، في مدينة «تورينو» التابعة لمقاطعة «بيمونتي». شخص عنده طموح وابتدى ينظم تحالفات مع فرنسا ضد النمسا لتوحيد إيطاليا تحت تاج واحد، تاج دوقية «سافويا» الحرة. ظهر واحد تاني اسمه «ماتسيني» ثائر ومقاوم وعضو في منظمة عمال الفحم «كاربوناري» السرية وتفنن في كتابة منشورات نارية تشجع الناس ضد الاحتلال وسموه

«قلب إيطاليا النابض»، اضطر يهرب إلى لندن من ملاحقة قوات الاحتلال النمساوي ويكمل كتابة من هناك .

وهنا نوصل لـ«جاريبالدي»؛ علمونا في المدرسة إن اللي حققوا الوحدة والاستقلال لإيطاليا ثلاثة: «كافور» بذكائه السياسي، و«ماتسيني» بقلمه، و«جاريبالدي» بسيفه. «كافور» يكلم السياسيين و«ماتسيني» يكلم الشعب و«جاريبالدي» يكسب سيطرة على الأرض. «جاريبالدي» اشتراكي، وواضح عنده ميول أممية لأنه كان أصلاً ساب إيطاليا قبل ظهور المقاومة وراح أمريكا الجنوبية يكافح في الأوراجوي في الحرب الشعبية ضد الإقطاع. في مرحلة معينة من تصعيد المقاومة في إيطاليا القوى الوطنية بعثوا رسالة لـ«جاريبالدي» في أمريكا الجنوبية يقولوا له إن إيطاليا محتاجة له. وصل صقلية عن طريق البحر وقاد 1000 متطوع، لبسوا قمصان حمرا وسموا أنفسهم «القمصان الحمر»، جيش الشعب. «جاريبالدي» ساعتها كان اتجوز واحدة من البرازيل اسمها «أنيتا»، جت معاه وتحولت «أنيتا» إلى شخصية أسطورية هي كمان، بتركب حصان وتحارب مع جوزها على الجبهة .

بعد ثلاث حروب كبيرة على مدى سنين نجح جيش التحرير والمقاومة الشعبية بقيادة «جاريبالدي» في طرد المحتلين الثلاثة النمسا وأسبانيا والفاتيكان. دخول «جاريبالدي» روما كان رمز لانتصار المقاومة لأن روما كانت محاطة بأسوار عالية ولها بوابات حصينة. الفدائيين حفروا ممر تحت الأرض وعملوا فتحة في السور قريبة من بوابة «بيبا»، بوابة من بوابات روما، زي باب زويلة عندنا مثلا، وجيش «جاريبالدي» المنتصر دخل روما من هناك. في كتاب المدرسة كان فيه صورة لـ«جاريبالدي» في معركة التحرير ركب حصان إسود ومراته «أنيتا» معاه على حصان أبيض، صورة رومانسية بالذات إن «أنيتا» ماتت صغيرة على الجبهة أثناء الحرب وما حضرتش الانتصار .

أمي وهي بتسمعي أفرا في كتاب التاريخ كانت بنتحمس لأنها درست لغاية تالته ابتدائي وما كملتش. أمي اتولدت سنة 1902 حضرت فترة «القمصان الحمر»، كانوا يعتبروا أبطال إيطاليا المنتصرين أولاد وأحفاد الفدائيين اللي أصبحوا جيشها الوطني النظامي، وحضرت الحرب العالمية الأولى وحضرت صعود كتائب الفاشية اللي عملت عمايلها ضد الشعب الإيطالي. وأبوها، اللي هو جدي، «قميص أحمر» اشتراكي اشترك في الحرب العالمية الأولى، مش فاهم الاشتراكية زي ما بنفهمها إحنا دلوقت، نظريات وتيارات وتنظيمات، لكن من الاشتراكيين الأصليين البلدي اللي بيّفهموا العدالة الاجتماعية والتحرر. موسولينى نفسه كان عضو في الحزب الاشتراكي، وبعد الحرب العالمية الأولى انشق عن الحزب الاشتراكي وكون كتائب من الشباب تعتمد على النظام الشديد والانتماء والطاعة ولبسهم قميص إسود وسماهم «Le Camicie Nere» - «القمصان السودا» - كإشارة على وجود فكرة جديدة منشقة على أفكار القميص الأحمر والاشتراكية. مسألة الصراع بين الألوان الأحمر والإسود كان وراها صراع أفكار .

الحزب الاشتراكي اتكون في القرن التسعتاشر وانتشر الفكر الاشتراكي في إيطاليا كلها وكان كله نابع من أفكار تحرر وطني وعدالة اجتماعية وكثير من الاشتراكيين انضموا للجيش الوحدة والاستقلال و«جاريبالدي» كان اشتراكي، وفي تراث أمي الاشتراكيين هم اللي وحدوا إيطاليا ودا ما

كانش مكتوب في كتاب المدرسة أيام موسوليني. سلوك «القمصان السودا»، كتائب الفاشية التابعة لموسوليني، كان عنيف، ابتدوا جو من الرعب والإرهاب بين الناس، يتجمعوا ستة سبعة تمانية مع بعض ويمشوا بالخطوة العسكرية واليونيفورم في شوارع المدن والقرى كل واحد بالهراوة مددلة من وسطه وطربوش أسود، يكسروا مقرات الحزب الاشتراكي والجريدة. مش بس كدا، يكسروا الدكان اللي صاحبه معروف إنه «قميص أحمر» أو اشتراكي ويمشوا، ولما يقابلوا رجالة في السكة يطلبوا منهم السلام الفاشيستي، إن الشخص يرفع ذراعه لفوق وكفه مفرد ويهتف «هيا هيا هيا هيا»، واللي ما ياديش التحية أو ما يظهرش حماس كافي يشربوه زيت خروج بالقوة لغاية ما يجي له إسهال في وسط الشارع. بهدلوا كرامة اللي ما يخافش منهم أو ما يطيعهمش. جدي صابه نوع من الشلل النصفي بعد أزمة قلبية أو جلطة، وبقي يمشي بالعصاية، الإيد السليمة تسند على العصاية ويجرجر الرجل التعبانة، ولأنه معروف إنه اشتراكي، «القمصان السودا» يصرُّوا لما يقابلوه في السكة يطلبوا منه التحية، وهو بسبب الشلل ما يقدرش يطيعهم، ينزلوا فيه ضرب ويسبيوه مرمي على الأرض، بعد ما الكتائب تمشي، الناس تخرج من البيوت يشيلوه ويرجعوه البيت مضروب وجدتي تولول وتعيط. أمي بتقول إن الحكاية دي حصلت له ثلاث مرات وفضلت تحكي لي القصة دي من ساعة ما كانت بتذاكر لي تاريخ وانا في تالته ابتدائي لحد ما ماتت وانا عندي 50 سنة .

الفاشيست وصلوا الحكم بالانقلاب والاستيلاء على روما في أوائل العشرينات، وعلى طول الميليشيات المحلية في كل مدينة وكل قرية ابتدت تستولي على مقرات الحزب الاشتراكي. الأخبار كانت بتأخذ أيام علشان توصل أصل ما كانش فيه تلفون، خبر الانقلاب الفاشي وصل قرية جدي بالليل قبل ما يطلع النهار، كان فرّان والفرن جنب مقر الحزب الاشتراكي فجري مع ولاده خد الأعلام الحمرا اللي بيستخدموها في المسيرات، وخبوها داخل الفرن ورا الخشب اللي بيولعوا بيه للخبيز. في نفس اليوم فصائل الفاشيست هجموا على المقر قطعوا الوثائق والأوراق وكسروا الكراسي والترابيزات والدواليب وشمعوا المقر بالشمع الأحمر وعملوا كومة في وسط الميدان وحرقوا كل مقتنيات الحزب قدام أهل قرية «ريبيا». جدي وأمي والعيلة بيفتخروا إن هم اللي خبوا الأعلام وأنقذوها، في القرى اللي حوالهم الأعلام الحمرا اتحرقت مع باقي الحاجات. جدي طلع الأعلام وفصلوا منها فساتين للتلات بنات، أمي «لياندر» واخواتها «جيجيتا» و«ألبينا»، ويوم العيد راحوا الكنيسة يتمختروا بالفساتين الحمرا قدام أهل البلد وقدام العساكر الفاشيست اللي كانوا منتشرين في كل الشوارع. لازم كان عيد الفصح، علشان يمشوا بالفساتين في الشارع يعني الجو كان معقول مش في عزّ الشتا .

خالتي «ألبينا» اتجوزت واحد عنده محل جزمجي، بيفصل جزم ويصلحها، أيامها الجزم ما كانش بتتباع جاهزة. كتائب «القمصان السودا» كسروا «دومينجو» المحل لأنه اشتراكي، صلح المحل ورجع يشتغل، كسروه له ثاني. أصبح لما يشوفهم جايين يقفل المحل بسرعة قبل ما يوصلوا له ويجري يهرب منهم، بافتكر القصة دي لما البلدية تعدي في سوق سليمان جوهر هنا والبياعين يلموا حاجتهم بسرعة ويخبئوها في بير سلم العمارات والشوارع الجانبية. بالطريقة دي «دومينجو» ابتدى يفكر في الهجرة لأن «دي مش عيشة» .

في تصوري إن جدي وافق على الجائزة بسبب إن «دومينجو» اشتراكي، وبنت الفران اتجوزت الجرمجي وخلفوا ولد سُموه «أوجو». «دومينجو» سافر الأرجنتين وساب «ألبينا» في البلد وبعد مدة، عدد من السنين، بعث لها تذكرة علشان تحصّله هي وابنهم. طلائنة كثير هاجروا الأرجنتين في الفترة دي بسبب الفاشية والفقر. خالتي «ألبينا» كانت بتبع جوايات لأمي من الأرجنتين لإيطاليا، وبعد كدا أمي هاجرت لمصر واستمروا يتراسلوا وكنت باشوف أمي تستلم جوايات أختها جاية لها من الأرجنتين على عنوانها في القاهرة. خالتي اشتكت إن ابنها «أوجو» كبر وانضم للحزب الفاشيستي الأرجنتيني وبيتخانق مع ابوه الاشتراكي طول الوقت وبعدين ساب لهم البيت. ازاى وازاى بعد كل اللي حصل لهم بسبب الفاشية، ابنهم يطلع فاشي؟ في الأرجنتين كان فيه صراع متواصل بين الاشتراكيين والفاشيست زي في إيطاليا. خالتي «ألبينا» تحكي لأمي في الجوايات، وأمي تقرا لي الجوايات بصوت عالي مع دروس التاريخ وقصص أبوها. الابن الكبير الفاشي «أوجو» مات فجأة أظن ما كانش كمل 40 سنة، «ألبينا» كانت خلفت ولد تاني، «أوزفالدو»، الحمد لله طلع ميال أكثر لأفكار أبوه الاشتراكية. أمي بتقول إن خالتي «ألبينا» ماتت بحسرتها على ابنها الكبير .

في نفس الوقت اللي أمي في البيت بتحكي لي القصة دي ضد الفاشية، الراهبات في المدرسة بيحتفلوا بأي انتصار للفاشية في العالم، في يوم الست الشقرا مُدرّسة تالّثة ابتدائي الفاشية أثناء طابور الصباح خطبت بانفعال «النهاردا يوم كبير، أخيراً «قوات الحرية» دخلت مدريد»، هي سمتها كدا - «قوات الحرية» - بتسمي القوات الفاشية «قوات الحرية»، وشرحت إن مدريد مدينة في أسبانيا وإن فيه ناس وحشين «التانيين»، محتلينها وإن قوات «فرانكو» حررتها .

على أي حال السنة دي انتهت على خير، وكانت آخر سنة لي في المدرسة دي لأن أثناء الصيف، آخر أغسطس 1939 ابتدت الحرب العالمية الثانية .

*

أول ما قامت الحرب اعتقلوا أبو «مارتشيلا» صاحبتني. الإنجليز اعتقلوا كل الرجالة الطلائنة ومنهم أبو «مارتشيلا» وصادروا جميع أملاك الحكومة الإيطالية في مصر - ومنها مدرستي - باعتبار إيطاليا دولة عدوة مع ألمانيا في حرب ضد الإنجليز وحلفائهم. أهلي راحوا يقدموا لي في المدرسة لقوها مقفولة واتحولت لمعتقل لكبار السن والعيانين. بعد كام شهر أبو «مارتشيلا» انتقل من معتقل «جنيفرا» في الإسماعيلية إلى مدرستي هنا في القاهرة، وبقينا نزل أنا و«مارتشيلا» نعمل نفسنا بنتمشى على الرصيف قصاد مبنى مدرستنا وباباها يستنانا في الشباك ويشاور لنا ويبعث لها قبلاات على طراطيف صوابعه. «مارتشيلا» كان عندها أخ وأخت أكبر منها راحوا إيطاليا في الصيف واتزنقوا هناك، المدارس الإيطالية في مصر كانت بتنظم رحلات التلاميذ يقضوا شهر أو شهرين يصيّفوا في معسكرات في إيطاليا، ينبسطوا ويعملوا لهم نوع من الدعاية للفاشية وغسيل مخ ويحببهم في النظام الفاشيستي. الحرب ابتدت في صيف 1939، إنجلترا وإيطاليا قطعوا العلاقات والطلبة ما عرفوش يرجعوا مصر. إخوان «مارتشيلا» عاشوا في إيطاليا خمس سنين، الحرب بطولها، معتمدين على مساعدات من الصليب الأحمر أو الفاتيكان، لا هم قادرين يرجعوا ولا أهلهم يقدرُوا يروحوا لهم! طول مدة الحرب «مارتشيلا» عاشت لوحدها مع أمها، الأب معتقل في مصر

والولاد مزنوقين في إيطاليا. أمها كانت بتشجعني أروح لهم ألعب مع «مارتشيلا»، وكنت باشوف الأم دي بتعيط كثير .

لما المدارس الإيطالية قفلت، نقلونا كلنا - كل ولاد الطلاينة - إلى مدرسة «الفرنسيسكان» في الأنتكخانة عند المتحف المصري، «الفرنسيسكان» مدرسة رهبان فرنساوي، نظموا لنا فصول اضطرابية بالإيطالي. كانت سنة صعبة بالنسبة لأمي لأنها كانت بتوديني من أبو العلا للأنتكخانة على رجلينا. السنة اللي بعدها نقلونا لمدرسة في روض الفرج عند راهبات دير «ماريا أوزيلياتريتشي» وأخذت شهادة الابتدائية من هناك سنة 1941، أصل الابتدائية أيامها كانت خمس سنين مش ستة. كنت كبرت شوية واطلمت اروح لوحدي من الإسعاف لروض الفرج بالترماي نمرة 13 في عربية الحريم. هناك دخل علينا الفصل الأستاذ سعد الجزايرلي، لقي نفسه الراجل الوحيد في مدرسة كلها راهبات، وكل المواد، رياضة وحساب وأدب ولغة إيطالية مدرّسات ستات، والفصل 30 بنت في سن 11 أو 12 سنة بالكثير، ما نعرفش عربي خالص أول مرة نشوف منهج عربي. شاب صغير ولسه متخرج، كان فيه منافسة بينه وبين أستاذ نصر من مدرسة «الدون بوسكو» للأولاد، أستاذ نصر كبير في السن شوية وقديم في المدرسة ويظهر عايز يثبت إن سعد الجزايرلي مش حينفع معانا، مش حيعرف ينجحنا. سعد الجزايرلي تألق، خلانا نتعلم حاجات محددة، الكلمات يا دوبك علشان نكوّن جمل: ولد بنت، شجرة مؤنث وباب مذكر - عكس الطلياني. الإملاء، الهمزة، الأرقام لحد عشرة، الأفعال الخمسة في النحو، مش ضروري نفهم النحو، المنهج ثقيل والامتحانات قربت، في المطالعة يترجم لنا كلمة كلمة مش ضروري نعرف نقرا المهم نفهم القصة علشان نرد على الأسئلة. انتهى الأمر إن أنا خلصت ابتدائي باعرف اكتب، كويسة في الإملاء ومش بطالة في النحو بس لسه ما اعرفش اتكلم عربي .

في أولى إعدادي تجاري انتقلت لتالت مرة لمدرسة «الدون بوسكو» لأن الراهبات معندهمش إعدادي، في روض الفرج مش بعيد عن الراهبات، مدرسة عريقة للحرفيين حولوها لدراسة عادية في فترة الحرب .

حطونا مختلطين ولاد وبنات سننا حوالي 12 سنة. تقدري تتصوري إن وجود بنات وولاد في السن دا لأول مرة في حياتنا عمل شيء من الهيجان في الفصل. المدرسين استسلموا مش قادرين يسكتونا. إلا مدرس واحد: البروفيسور «دي بينيديكتس». دخل الفصل بهدوء وفضل يبص لنا من غير ابتسامه، شوية كدا وراح خابط خبطة على المكتب بكفه عملت صوت وحش فسكتنا نسبياً وهو حصل على شوية انتباه، وعلى طول من غير ما يستنى راح مدينا واجب على السبورة كله قسمة وكسور، معقد علينا، وقال :

- المهم تعملوا الواجب .

وسابنا ومشي. روحت البيت وعملت الواجب ورجعت المدرسة اليوم اللي بعده ودخل المدرس دا، ما قعدش على مكتبه زي المدرسين التانيين، ومن غير أي تدريس اتجه ناحية الصبيان وقال :

- طلعوا الكراريس .

وابتدى يمر من دكة لدكة واللي معاه يطلع واللي معاهوش يحاول يستخبي، وابتدى يصحح، واحد واحد، كراسة كراسة، والولد اللي عليه الدور يقف والمدرس يكتب على الكراسة النمرة أو التعليق على الواقف قدام باقي التلاميذ. أربعين أو خمسين تلميذ في الفصل، عدد مهول، تلتين صبيان وتلت بنات. ابتدى يتضح إن الصبيان معظمهم ما بيعرفوش في القسمة، المشكلة كبرت لما واحد طلع ما عملش الواجب من أصله، المدرس سأله :

- ما عملتش الواجب ليه؟

الولد وطى راسه وسكت .

- تعالى هنا .

وخرجه من الدكة ومسكه ولف دراعه لورا وابتدى يديله لكميات في ضهره، حسيت إن قبضة المدرس حتخش جوه ضلوع الولد. ساعتها بقى سكتنا بصحيح وقعدنا «stand by» في حالة ترقب، الموضوع قلب جد زيادة عن اللزوم. «دي بينيديكتس» لف على كل الصبيان واحد واحد واللي ما عملش الواجب انضرب فعلاً، ما سامحش حد، كانت مصيبة لنا، مش عارفين ننتفس، كل واحد باصص في كراسته بيحاول يتصور: «يا ترى يحصل لي إيه؟».

وصل عند البنات، كان أملنا إنه مش حيضرب البنات لكن مع أول واحدة ما عملتش الواجب مفيش إلا وطاخ بالقلم على وشها من غير كلام، أنا ابتديت اترعش، يحصل لي إيه؟ كنت عاملة الواجب، بس يا ترى صح ولا مش صح، أصله ما كانش لسه كتب على السبورة الإجابة الصحيحة. أخيراً وصل عندي فقامت ادبت له الكراسة وأنا دايحة، وكان فيه غلطة فعلاً، بص لي بصة صغيرة وكتب بطول الصفحة بالأحمر «sudicia» يعني «مهملة»، لأن الصفحة مبرومة في الركن وفيه بقع لأننا بنكتب بريشة وحرير. بس انا انبسطت إنها جت على كدا وحمدت ربنا إني طلعت «مهملة».

مش هو دا الموقف اللي خلاني أحب المدرس دا، اللي خلاني أحبه هو إنه المدرس الوحيد في حياتي اللي فهمت منه الهندسة والجبر والحسابات التجارية والبنكية، وبقيت اروح البيت واحل الواجب واسلمه، وهو منتظم، ضروري يبص في كل الكراريس ولازم يمتحن شفوي. الهندسة فيها قواعد معينة لازم الواحد يحفظها صم زي قاعدة المتلثات وفيه قواعد محتاجة إن الواحد يفكرها علشان يحل جمل الجبر، وأصبحت بافتكر من غير ما اذاكر كثير واقوم أجابوه على طول. ما ابتسمش أبداً، ولكن أظهر لي شيء من الرضا، يقول لي باقتضاب :

- كويس، روجي مكانك .

والحقيقة إن عمره ما كرر أسلوب الضرب بعد أول يوم في السنة، نمري بقت كويسة في أولى إعدادي وعشت عمري أحب البروفيسور «دي بينيديكتس».

في تانية إعدادي رجّعوا البنات لمدرسة «ماريا أوزيلياتريتشى» وبكدا نقلت مدرسة للمرة الرابعة والحرب لسه ما خلصتتش. يظهر وجدوا إن بنات وولاد مع بعض مش ممكن أبداً. مش عارفة مين اللي تولى رعاية شؤون المدنيين أيام الحرب ينسق مع المدارس دي كلها ويأخذ القرارات، هل هو الصليب الأحمر ولا الفاتيكان ولا مين؟ على أي حال إدارة المدرسة استمرّت تكون موالية للنظام الفاشيستي في إيطاليا ما يعلنوش إلا أخبار انتصارات هتلر وموسوليني ولما يكون فيه أخبار انحسار حربي لمحور ألمانيا يكتموا الخبر. لازم أوضّح إن النظام الفاشي الدكتاتوري وعلى راسه موسوليني قدر يكسب قلب الطلاينة اللي عايشين هنا في مصر لأنه اداهم حوافز زي الدراسة والمعسكرات المجانية للأولاد، وفي نفس الوقت الطلاينة دول ما عانوش من بطش الفاشية ولا الحرب لإنهم عاشوا تحت الانتداب الإنجليزي بعيد عن إيطاليا، دا بيفسر لي إلى حدّ ما ليه الجاليات برّه إيطاليا تمسكت بموسوليني لمدة طويلة بعد ما الشعب تعب منه وثار عليه في إيطاليا نفسها .

*

ابتدى جو البيت عندنا يتغير .

الألمان والطلاينة هجموا على أفريقييا بقيادة الجنرال الألماني «رومل»، نزلوا من صقلية في إيطاليا لتونس بالبحر ومن تونس تقدموا في الصحرا عن طريق ليبيا، حملة رومل العسكرية كانت سريعة، بتتقدم عشرات الكيلومترات في اليوم والناس تعد وراهم هنا في مصر .

تقدّم الألمان كان هدفه الأساسي الاستيلاء على مصر، موقع استراتيجي تحت سيطرة الإنجليز، فدا خلى الجو العام فيه إحساس بالخطر؛ إحنا في مصر ومصر هي الهدف .

جو غريب، الناس تروّح بدري والعربيات تختفي والشوارع تقضى .

ابتدت تيجي لنا غارات بالليل بالطيارات، نسمع سرينة أو صفارة الإنذار، وبعدين نسمع «طفوا النور! طفوا النور!»، نقوم نطفي النور في كل البيت. عواميد النور في الشارع بالجاز مش بالكهربا، يعدي راجل لابس بالطو إسود بطرطور وماسك عصاية مخصوصة طويلة، ويكتم شعلة عمود النور. لما الشوارع تضلم يمروا ناس من المقاومة المدنية لابسين حرمة لبنى بلاستك يتّموا على الشبابيك، لو فيه أي شعاع نور طالع من أي بيت يزقوا تاني: «طفوا النور! طفوا النور!». رصّوا أشولة رمل قدام مدخل كل مبنى، علشان لما القنابل بتنزل تدك بيكون فيه شظايا، حتت حديد من القنابل اللي كانت بدائية ساعتها، تنتطر وتكور وممكن تقتل كمان، فأكياس الرمل دي تحوش الشظايا عن مداخل العمارات. لما الحرب طوّلت بنوا حيط بالطوب الأحمر مكان أشولة الرمل. البدروم أو الدور الأرضي من كل عمارة تحولوا إلى مخابى، شقة الست أم «نينو» الإيطالية اللي في الدور الأرضي تحتينا أصبحت مخبأ، يعني لما نسمع زمارة الإنذار نجري نطفي الأنوار ونليس بسرعة أي هدم وننزل كلنا نقعد في الشقة معاها - في الضلّمة - لغاية ما نسمع زمارة الأمان بانتهاء الغارة. صفارة الإنذار في بداية الغارة لها صوت ونهاية الغارة صوت مختلف. ساعات كنا بنشوف كشافات الإنجليز وهي بتحاول ترصد طيارات الألمان، سمعتهم في المدرسة يقولوا إن الكشافات

بتعمل أشكال حلوة في السما زي الألعاب النارية، فلما سمعت زمارة الإنذار حببت أتفرج ورحت أبص من الشباك، فوجئت بأبويا زعق ليّ :

- صواريخ دا ايه؟ هي دي حاجة الواحد يتفرج عليها؟

وقفل الشيش ونزلنا نستخبي، أبويا اللي هو ايتته يتفرج على السما. أمي ابتدت تهتم بسماع الأخبار في الراديو، كان فيه محطة بتتذاع من انجلترا باليطياني اسمها «L'Uomo Qualunque» - «الرجل العادي» - وتعمل بروباجاندا ضد نظام موسوليني الفاشيستي اللي كان بيحكم إيطاليا وبيحارب في صف ألمانيا النازية، دعاية موجهة للطلالينة اللي كثير منهم كانوا لسه بيايدوا موسوليني، تديهم الأخبار اللي موسوليني بيخبيها عنهم على إذاعة راديو روما الفاشيستي. التفاصيل دي غيرت جو البيت، الحرب والغارات واهتمام أمي بالإذاعة، وابتديت أدرك القصص اللي كانت بتحكيها لي أمي عن مجيء الفاشيين في إيطاليا أيام العشرينات. كنت باشوف أمي اللي اتربت على مناهضة الفاشية بكل قلبها وإحساسها بتتابع بقلق انتصار النازيين والفاشيين في كل مكان، ساعتها في الأربعينات .

الغارات على اسكندرية كانت أعنف بكثير من القاهرة. في مصر، يعني القاهرة، الغارات أقل وأخف ومن غير قنابل، إنما اسكندرية دكوها بالقنابل بجدا! رومل الألماني كان هدفه إنه يوصل اسكندرية ويحتلها ويحرم الإنجليز من الميناء الاستراتيجي، فالناس اللي تقدر هربت من اسكندرية، والنتيجة إن واحدة اسمها «فيليتشتا» وبنتها «فيليا» هربوا من اسكندرية وجم ينزلوا عندنا. إحنا ما كانش عندنا غير أوضتين نوم، واحدة أنا واخويا وواحدة أبويا وأمي. أهلي على طول استضافوهم بدون كلام، بلديات أمي من قرية «ريبيا». حطوا سرير لـ«فيليتشتا» في أوضتنا وخذوا «برتو» بسريره الصغير عندهم في أوضة نومهم، اتزفنا شوية فترة الحرب، بس عدت .

«فيليا» بنت «فيليتشتا» خياطة، وكانت جاية بتوصية من اسكندرية وراحت تشتغل في بيت عيلة ممدوح رياض، كان حاجة كبيرة في وزارة الخارجية ساعتها. أكيد وجود شغل لـ«فيليا» شجعهم يسيبوا بيتهم في اسكندرية ويهربوا للقاهرة. عائلة ممدوح رياض عندهم فيلا في الزمالك ومراته محتاجة خياطة مقيمة، وعاشت هناك طول سنين الحرب وكانت فخورة إنها خياطة بيت ممدوح رياض. سكنت في أوضة معاهم في الفيلا، أجازتها يوم الحد تيجي تقضيه عندنا تشوف أمها وتروّح، ما عملتش زحمة لأنها ما باتتتش معنا .

بعد العشا في الأمسيات، أبويا يقعد جنب الراديو يسمع أغاني «تينو روسي» أو يدور على محطة راديو «صوفيا» من بلغاريا اللي كانوا بيذيعوا فقرة أوبرا إيطالية، بيحب الأوبرا. ترابيزة السفارة في وسط الصالة وفي نفس الوقت حجرة معيشة وصالون. ما كانش فيه فوتيلات ولا كنب منتشرين في بيوت الأسر اللي على قدها زينا، كنا بنعمل كل حاجة حوالين ترابيزة السفارة، ناكل عليها ونذاكر عليها وأمي و«فيليتشتا» يقعدوا جنب بعض ويشغلوا تريكو ويتناقشوا - باليطياني - من غير ما يبصوا لبعض، عن «فيليا» بنت «فيليتشتا» وخطوبتها: فيه شابين بيتناقشوا عليها؛ «جورجيو» و«أوفيديو»، الشابين ولاد خالة ومن قرية «ريبيا»، كلهم بلديات. على أي حال الشابين اعتقلوا أثناء الحرب زي كل الشباب والرجال الطالينة في معسكر «جنيفرا» الإنجليزي في فايد على القنال. «فيليا» كانت مخطوبة لـ«جورجيو» ابن «أنجلينا»، يا عيني «أنجلينا» كانت بتتكلم كثير وتتخاقق

مع الناس، مرض نفسي دلوقت له اسم وعلاج، أعتقد «فيليا» نفسها كانت ميالة لـ«جورجيو» إلى حد ما، لكن «فيلينشتا» مش عايزة بنتها تتجوز ابن «أنجلينا»، وضغطت بمساعدة أمي لصالح «أوفيديو»، الشاب الثاني. ابتدى «أوفيديو» بيعت جوابات حب لطيفة بس «فيليا» ما كانت بتعرف تعبر، معندهاش القدرة على الكتابة في أي موضوع، ولا حتى على الكلام، بتتكلم نادرًا وباختصار، وأمي كانت فياضة في الكتابة والكلام والتعبير عمومًا. في الكريسماس أو أي عيد ميلاد أو مناسبة، قبل ما نعمل «chin chin» ونشرب مشروب، لازم أمي تقف وتعمل خطبة طويلة توزع تمنيات بالصحة والسعادة للشخص المحتفى به ولأهله وأصدقائه ولنا وللإنسانية كلها، وتقول وتقول وتقول، كان بيحي لها طبيعي إنها تعبر وتقضف. المهم إن «فيليا» مش عارفة ترد على جوابات «أوفيديو»، مش عارفة تكتب إيه، وأم «فيليا» خايفة على العلاقة مع «أوفيديو»، عايزاها تستمر علشان «فيليا» ما ترجعش لـ«جورجيو». كل يوم حد، تيجي «فيليا» وتقعد أمي جنبها تقرا معاها جوابات «أوفيديو»، وتمليها ردود من نوع «وحشتني جدًا وبافكر فيك كثير»، «أنا مستتية لحظة طلوعك من المعتقل علشان نتجوز ونعيش مع بعض». أمي مليانة كلام حب و«فيليا» ساكتة، تقول «طيب» وتكتب كلام أمي. أمي كتبت لـ«فيليا» كل جوابات الحب على مدى فترة الحرب، خط إيد «فيليا» وكلمات أمي. وحصل، «أوفيديو» هو اللي كسب الجولة. وترسخت عندي فكرة إن أمي ست شاطرة في كلام الحب دا .

مع تقدم الألمان أكثر وأكثر، ظهرت مشكلة: أبويا يهودي .

كان معروف إن أول إجراء يعملهُ الألمان إنهم يعتقلوا كل اليهود. كنت بالاحظ المناقشات وزيادة في العصبية في البيت، أمي تسمع الأخبار وهي خايفة، حتى أبويا ظهر عليه شيء من التوتر، و«فيلينشتا» قالت :

- إحنا حن دفاع عن سنيور «إيليا»، إحنا حنقول إن الرجل دا كويس جدًا وطيب جدًا، ولا يمكن يمسكوه .

الست «فاني» اللي ساكنة فوقينا، كانت يوغوسلافية وفاشية!! مش قصدي أذم فيها بس الست «فاني» اللي بنحبها كانت فاشية، حتى هي قدام الخطر على أبويا وأمي، اتناقشت وقالت إنها حتتدخل وحتمنع اعتقال أبويا !

- مش بيعتقلوا أي حد بدون تمييز، مش أي يهود، لازم يكونوا عملوا حاجات وحشة، أنا حاشهد إن سينيور «إيليا» راجل طيب .

تصوري يا نادية؟ «فيلينشتا» و«فاني» حيعرفوا يدافعوا عن أبويا قدام الألمان! مين كمان وقف معنا؟ أم «مارتشيلا» صاحبتني اللي أبوها كان معتقل عند الإنجليز، كل الستات دول كانوا مبسوطين بوصول الألمان لمصر، بسبب الدعاية الفاشية وبسبب سوء معاملة الإنجليز للطلابنة، فكانوا متكاتفين لتهدئة أمي وتهوين الخطر .

في نفس الوقت دا أبو صاحبة تانية اسمها «أنجيلا دي بتون» ما اعتقلش مع إنه طلياني لأنه عضو في منظمة «anti-fascista» اسمها «إيطاليا الحرة» ضد الفاشية، منظمة مصرية-إيطالية كَوْنها طلاينة ضد إيطاليا الفاشية، فالإنجليز ما اعتقلوهمش. لكن لما الألمان قَرَبوا من اسكندرية ووصلوا لغاية مرسى مطروح أبو «أنجيلا» اختفى. أروح اذاكر معاها في بيتها وهي تيجي بيتي، والأب ولا في المعتقل ولا في البيت. ما سألتش ساعتها راح فين، بس عرفت بعد الحرب إنه هرب لفلسطين، اتضح إن الطلاينة اللي ضد موسوليني في مصر هربوا إلى فلسطين لإن لو رومل كان خش مصر كان حيقبض عليهم باعتبارهم حَوْنَة. بعض الناس قالوا لأبويا إنه لازم يسبب البيت يستخبي أو يهرب زي أبو «أنجيلا»، لكن أبويا قال :

- ما اقدرش، أنا معنديش حد ولا مرتببط بحد، أروح فين؟ اللي يحصل يحصل .

وقعد في البيت .

كل دا أدَّى إلى قرار إننا ندخل المسيحية، بتأثير «فيليتشتا» وتشجيع أم «مارتشيلا» و«فيليا» والست «فاني». أبويا عمل دا كنوع من الهدية لأمي في يوم عيد ميلادها 12 يونيو 1943: رحنا الكنيسة مع كل الناس اللي بتدافع عنا، وكان فيه قسيس لطيف اسمه الأب «مايوني»، لسه واصل جديد، تولى مع الأب «لويجي» العجوز عملية تحويلنا إلى مسيحيين. عمّوني وأخذت المناولة وأنا عمري عشر سنين ونص، متأخرة، لإن المناولة الأولى عادة بتكون في سن 6 - 7 سنين. وحصل الزواج المسيحي لأبويا وأمي، علشان لغاية الوقت دا كانوا متجوزين جواز يهودي، بس دي قصة تانية .

وبعد ما كنا خلاص بنستعد لوصول الألمان للقاهرة رومل اتعطل من كتر سرعتة، خلّص البنزين وإمدادات الوقود ما وصلتش، فحصل له ببطء. في نفس الوقت الإنجليز غيرّوا قائد القوات البريطانية وظهر القائد «مونتجومري» والأسطول الإنجليزي-الفرنسي ابتدى يعترض سكة الإمدادات اللي جاية من ألمانيا لرومل عن طريق البحر المتوسط. من الناحية التانية روسيا اللي كانت تحت الحصار الألماني لمدة طويلة في مدينة «ستالينجراد» ابتدت ترد وتصلب عودها. تصوري الألمان وصلوا لغاية «ستالينجراد»، ولغاية «كليف»؟ خدوا النمسا وطلعوا فوق خدوا بولندا وهجموا على روسيا وحاصروا «ستالينجراد»، دا في الشرق. في الغرب توغّلوا في اتجاه فرنسا وبلجيكا ودكوا انجلترا وفي الجنوب عدّوا البحر ودخلوا أفريقيا الشمالية واتجهوا للإسكندرية! كانت فظيعة فترة الرعب اللي عشناه في بداية الحرب العالمية التانية مع التقدم المسعور للألمان. ولكن زي ما قلت في وسط الانتصار السريع الرهيب للألمان، ابتدت روسيا ترد وظهر «مونتجومري» ولندن ما سقطتش وكانت بتوصل أخبار من جوه إيطاليا إن ناس كثير واقفة ضد النظام الفاشي، وموسوليني بيلاحقهم بشراسة وهم يهربوا أو يخشوا في السرية، من ضمنهم «جرامشي» وأعضاء الحزب الشيوعي الإيطالي وقصص طويلة وعريضة، ملحمة، امتداد لقصص أمي على الكنبه .

البيت عندنا ما كانش يعرف يتنفس وهو يتابع القصة دي، والله كنا بنعد الكيلومترات ورا روميل وهو بيتقدم نحو الإسكندرية، لغاية ما ابتدوا يتراجعوا، لتونس الأول وبعدين عدوا البحر لصقلية، والإنجليز والحلفاء هجموا على جزيرة صقلية والعالم كله ابتدى ياخذ نفسه، واحنا كمان .

لكن فترة الحرب خلّنتني آخذ بالي من حكاية اليهود والمسيحيين دي، مسألة ما كنتش بافكر فيها قبل كذا والحقيقة فوجئت بوجودها .

من وانا عمري 8 سنين لغاية لما أصبح عندي 14 سنة واحنا ما بنخرجش بالليل. نقعد في البيت من المغرب، والشوارع تتملي عساكر انجليز وهنود ومن جنوب أفريقيا، الجيش الإنجليزي معسكر في القاهرة، والجنود يعربدوا بالليل ويشربوا ويسكروا، ما كانش فيه أمان للعائلات إنهم ينزلوا ويروحوا السينما مثلا .

الناس اللي بيروحوا الكنيسة أثناء الحرب كانت قليلة وأغلبهم سنات عواجز. الرجالة مُعتقلين والسنات مش فاضيين والشباب مراهقين معندهم مش خُلق للقداس، صلاة الكنيسة يوم الحد الصبح، القسيس يصلي وبعدين يطلع على منصة صغيرة أو منبر، ويقرا فقرة من الإنجيل ويعلق على اللي قرأه ويحاول يربط بين أحداث الحياة العادية للإنسان وبين كلام الإنجيل، يدي أمثلة ويستخلص نصايح وتوجيهات، زي خطبة الجمعة عند المسلمين. القسيس «لويجي» اللي كان مسؤول عن كنيسة الكرمل اللي جنب بيتنا في شارع نعيم يا عيني ما كانش عنده كاريزما وحضور، ولا في الكلام ولا في الأفكار، يا دوبك يعمل واجبه ويخلص. أعتقد لما رومل ابتدى يتعطل والألمان قبضتهم على إيطاليا ابتدت تنهز في وسط الحرب، رجعت بعض الاتصالات والفايتكان قدر بيعت قسيس شاب، الأب «مايوني»، يساعد الأب «لويجي» القسيس العجوز. الأب «مايوني» كان خطيب ممتاز وكلامه جذاب والناس كانت عطشانة اجتماعيات بسبب حظر التجول، ففي بحر أسابيع قليلة الكنيسة اتملت شباب ورجالة وسنات، جايين يسمعو الأب «مايوني» يتكلم يوم الحد الصبح، وقدر يجمع ويلم الجالية الإيطالية. القسيس الشاطر دا عمل ملعب كرة سلة في حوش الكنيسة الوراني، حوش بلاط كبير، وجاب مدرّب وكوّن فريق. كنت باروح مرتين في الأسبوع واتعلمت العب باسكت بفضل. كان فيه قاعتين، قاعة كبيرة بتستخدم في المناسبات الدينية زي التعميد والمنولة الأولى، والقاعة الثانية أصغر وفيها ترابيزات دايرن داير والأب «مايوني» يجيب كاكوا باللبن وعيش وكبيرة ويلم عيال الطلاينة يلعبوا وياكلوا ويشربوا. نظم الشباب يعملوا سندوتشات وبيبعوها للعائلات ويوم السبت يجيب فونوغراف ويعمل أمسية رقص بعد الظهر. رحت استكشف الرقص مع «مارتشيلا»، هي من عيلة مسيحية كاتوليكية متدينة ومحافظة، لكن أمها وافقت نروح علشان في الكنيسة. ما لقيت نفس معاهم في الأمسيات دي، ما عرفتش اعمل صداقات مع مجموعة الشباب اللي بتيجي ترقص، وما انبسطتش إن أفضل قاعدة ما ارقصش ومحدثش بييجي يتعامل معايا. رحت مرة أو مرتين وما رحتش تاني و«مارتشيلا» كمان ما استمرتتش. كان فيه بنات بيرقصوا ويتحركوا ويقولوا نكت ويضحكوا مع الشبان، يمكن احنا كنا أصغر في السن فأهملونا .

الفترة دي استمرت لحد صيف تانية ثانوي، كنت بادرس في مرحلة بيسموها الثانوية، والشهادة اسمها «Commerciale Superiore» - «تجارية عليا» - بس لما باحسبها بالسنوات هي ما تعتبرش ثانوي، بلغة النهاردا تعتبر إعدادي. الحرب خلّصت وأبو «مارتشيلا» خرج من المعتقل وابتدوا يخططوا يسافروا صقلية عند قرايبهم ويحصلوا اخواتها في إيطاليا، «مارتشيلا» تكمل أدبي هناك زي اختها، تدرس سنة أو سنتين إعدادي أو تمهيدي وبعدين معهد أو كلية في الجامعة. كنت

باحب «مارتشيلا»، وقعدنا على نفس الدكة جنب بعض في الفصل من سنة أولى طول سنين المدرسة فتصورنا إنا حنكمل مع بعض .

ابتدى الكلام في بيتنا عن مستقبلي، أبويا وأمي ابتدوا يسألوني :

- حتعملي إيه السنة الجاية؟

كنا في الصيف وفاضل لي سنة واحدة مدرسة وبعد كذا خلاص، فقعدوا يقنعوني إن أحسن لي أتعلم لغة إنجليزية و «short-hand» و «dactylo—typing» - اختزال وآلة كاتبة - على أساس إني أعرف شوية فرنساوي من المدرسة وطلبياني من البيت وابقى متعددة اللغات واشتغل سكرتيرة في أي شركة من الشركات الكويسة .

- لأ، أنا عاوزة أدرس جيولوجيا .

- جيولوجيا دي مش ممكن تدرسيها هنا لازم تروحي إيطاليا . خلي بالك دي خطة مكلفة واحنا معندناش فلوس .

أبويا اقترح إني أبتدي أشتغل سكرتيرة في مكتب ثلاث أشهر الصيف قبل السنة الأخيرة، أكسب شوية فلوس، أدفع مصاريف آخر سنة في المدرسة وهما في هذه الأثناء يشوفوا حنعمل إيه في مستقبلي، وأمي ابتدت تتصل بأخوها، خالي «جوردانو»، في إيطاليا .

كان فيه في القاهرة عدد من المدارس الليلية لتعليم اللغات، بالذات اللغة الإنجليزية، أكيد بسبب وجود الجيش الإنجليزي في مصر. المدرسة المشهورة اسمها «برليتيز» ولها كتاب معتمد من انجلترا وأبويا أخذ كورسات فيها ولحدّ النهاردا اسم «برليتيز» مقترن باللغات والترجمة والقواميس. لقيت شغل في مدرسة صغيرة اسمها «نيل» لتعليم اللغات في شارع قصر النيل فوق محلات «داود عدس» اللي لسه موجودة لحد الآن، بيدرسوا إنجليزي وفرنساوي ويمكن كمان آلة كاتبة واختزال. محتاجين سكرتيرة في مواعيد راحة السكرتيرة الكبيرة - السكرتيرة الكبيرة يا عيني في الحقيقة كانت صغيرة، بس بالنسبة ليّ أنا كبيرة وشاطرة وفاهمة وخبيرة - تبتدي شغل الساعة عشرة ونص الصبح وتاخذ راحة من واحدة لغاية خمسة ونص بعد الظهر. أنزل من البيت سبعة ونص صباحًا وكون هناك قبل تمانية، أقعد جنب التلفون في مكتب الاستقبال برّه أخذ بالي من الساعة، الطلبة اللي يوصلوا قبل 8 ص يستتوا في قاعة الانتظار والساعة تمانية بالظبط أضرب الجرس، فيقوموا يخشوا الفصول. سكرتيرة المدرسة ومسؤولة، أي حد عنده سؤال أو عايز يبتدي دروس بييجي لي وانا أسجل اسمه، كنت باحس إني شخصية مهمة وأبويا لقي إن دا شغل مناسب ليّ .

ثلاث اشهر الصيف اشتغلتهم في العملية دي وكان أول شغل في حياتي، وهناك بقى قابلت باباك - سعد - جوزي، لأول مرة. سعد كامل كان بييجي المدرسة مع أخته جميلة، بيدرسوا إنجليزي أو فرنساوي. يسبب جميلة في قاعة الانتظار ويتسلل لغرفة السكرتارية، أوضة مفتوحة وفيها مكتب استقبال في الوسط ويسألني عن أي معلومات، أنا ردبت عليه بجدية بس من تعبير وشه ابتديت أحس

إنه ببيعاكسني، مش عاوز يستفسر بالفعل عن تفصييلة معينة. السنة دي بالذات أنا كنت رسبت في مادة اللغة العربية في المدرسة، وعندى ملحق في آخر سبتمبر وباحاول اذاكر، يظهر إنى قلت لسعد الكلام دا فقال :

- أنا أدبكِ دروس، أنا أعلمك عربي .

وبقى بييجي بدري قبل موعد الدرس. كنت باوصل الساعة واحدة بالضبط أستلم من السكرتيرة الكبيرة وهو بييجي واحدة ونص أو اتنين، الجو كان أهدي والناس أقل في فترة شغلي، جبت الكراسة وقعدنا جنب بعض نقرا في الكتاب اللي باذاكر منه، لما جينا نكتب، إذا بسعد يكتب بالعربي: «سعد يحب ماري» فحسيت كذا إن الحكاية... ما علفتش ساعتها بس قطعت بعدها وخلص الصيف وما كملناش دروس عربي. بس انا حسيت. مرة ثانية قابلني في الأوتوبيس بالصدفة، أظن نمرة 4، حببت ادفع، الكمساري قال لي :

- خلاص مدفوع .

وشاور لي على سعد، فشكرته من بعيد، وخلاص أظن انتهت المسألة على كذا. لأ، استتني، أنا كنت نسيت الحكاية دي، إداني ميعاد وانا قلت له :

- أيوه طيب حاجي .

بس ما رحتش وانقطعت العلاقة بينا كمان مرة. ما شوفتوش ثاني إلا بعد كذا سنة وبعد ما حصلت أحداث كثيرة وحنرجع للمسألة دي بعدين. بس اللي لفت نظري للشاب سعد إنه رفيع وطويل وانا كنت جاية من تجربة الكنيسة مع «مارتشيلا» يوم السبت للرقص وبأعاني من عدم اهتمام الشبان بي. ساعتها ما اهتمتش بسعد، بس كنت «flattered» عجبني إن فيه حد مبسوط مني وبيعبّر لي عن اهتمام، وخصوصًا إن مخي كان مليون بقصة حب أمي وأبويا والكروت اللي كانوا بيكتبوها لبعض .

الحرب خلصت وانا كنت في آخر سنة في مدرسة الراهبات «ماريا أوزيلياتريتشى» في روض الفرج. المدرسة عبارة عن مبنيين بينهم حوش بيدو لي كبير ودايرن داير سور وأشجار على طريقة الأديرة المسيحية، منها شجر مانجة، أما البوابة فكانت حديد زهر، واللي يعدّي قدام البوابة وهو ماشي في الشارع يقدر يشوف الحوش. حصلت مظاهرات في مصر وعدت قدام المدرسة مظاهرة كبيرة جدًا من طلبة المدارس المصرية اللي حوالينا، والطلبة يهتقوا، ويهتقوا، وهم معديين كثير منهم يبصّوا على حوش مدرستنا من البوابة الحديد واحنا كنا في الحوش وقت الفسحة، شاوروا بإيديهم «تعالوا معنا»، مش معاكسة، كانوا جادين وهم ماشيين في المظاهرة، لكن البنات لما سمعوا الهتاف وشافوا المظاهرة هربوا ودخلوا جوه. فضلت لوحدي متمسرة في وسط الحوش. ما فكرتش انضم لهم لكن ما هربتش مع باقي البنات، كنت مسحورة بالمنظر وصوت الهتاف ووشوش الشباب، فضلت اتفرج لغاية ما راهبة من الراهبات جت سحبتني من كتافي بلطف ولكن بحسم. بعد سنين

فهمت إن دي مظاهرات 1946 وإنها كانت مهمة في الحركة الوطنية في مصر: مظاهرات العمال والطلبة. البوليس فتح كوبري عباس و المظاهرة فايئة عليه وكثير من المتظاهرين وقعوا في النيل .

أهم خروجة حصلت لي بعد انتهاء الحرب وانتهاء المدرسة كانت برّضه في 1946. «أنجيلا» اللي أبوها معروف في أوساط الطلاينة إنه ضد الفاشية، رجع من فلسطين لبيته في القاهرة، ولنشاطه في منظمة «إيطاليا الحرة» المناهضة للفاشية. كانت الدراسة خلصت يا دوك من أيام، و«أنجيلا» عرضت عليّ أروح معاها نادي ثقافي طلياني جنب منظمة أبوها. مبنى قديم دورين في شارع شريف باشا، اللي كان اسمه شارع المدابغ، في شقة من الشقق القديمة اللي سقفها عالي والأوض كبيرة وخمسيت أوضة في نفس الشقة، كل أوضة فيها جمعية . «Palestra Italiana Cairo» ، واختصارها : «La PIC» ، «البيك» - «النادي الإيطالي بالقاهرة» - نادي ثقافي ورياضي قديم سيطر عليه الشباب اللي ضد الفاشية لما رجعوا من إيطاليا مع نهاية الحرب. «أنجيلا» قالت لي :

- يوم السبت «البيك» بتعمل حفلة رقص، تيجي نروح؟

وطمّنتني إن أبوها وصاحبه «بايلي» جاين، رجالة كبار في السن وضد الفاشية حيخلوا بالهم مننا إحنا البنات الصغيرين. واضح إن انا ساعتها كان عندي شخصية منطلقة، مش مترددة ولا حذرة، مستعدة للجديد وللتغيير، قلت لـ«أنجيلا»:

- قوي قوي أنا على استعداد .

أبويا وافق باعتبار اني رايحة مع «أنجيلا» وأبوها وصاحبه «بايلي». وفعلاً رحنا معاها يوم السبت وكانت حفلة ظريفة، سابت عندي انطباع أفضل من حفلات الكنيسة. «مارتشيلا» صاحبتني اللي خدنتي الكنيسة ما رضيتش تيجي، وأعتقد إن السبب إن أسرتها فاشية، مش فاشية في المعاملة الإنسانية ولكن العيلة كانت مرتبطة بفكرة الفاشية. وحكاية إن الجمعية مناهضة للفاشية غالباً ما ريجتس امها .

المكان كان مليون شباب معظمهم طلاينة، بعضهم بيتكلم فرنساوي أو طلياني بلكنة .

دول شباب «البيك» اللي غيروا حياتي .

الجو كان غير جو حفلات الرقص في الكنيسة اللي ما عرفناش نندمج فيه، دول بالعكس، استقبلونا كويس، بنات واولاد، وحاولوا يتصاحبوا علينا، يسألونا احنا مين. ورقصنا وانبسطنا ورجعنا البيت، وقبل ما نمشي حد قال :

- تعالوا أي يوم، مش بس يوم السبت علشان الحفلة والرقص، إحنا بنعمل يوم الاتنين محاضرة، ويوم الأربعاء بنلعب ألعاب اجتماعية .

كانوا عاملين برنامج لكل الأسبوع وقال لي :

- تعالي حنتبسطي .

وفعلًا رحلت يوم المحاضرة، خسارة مش فاكرة مين فيهم اللي قال لي آجي ولا كان إيه موضوع المحاضرة، لكن أنا وقعت في حبهم، لقيت عندهم ثقافة مرتبطة بالسياسة، فيها كل مفاهيم الديمقراطية اللي ضد الفاشية، وإيه هي الفاشية، وعرفت عن طريقهم كمان تطور الفكر الديني من أيام الـ «Inquisition» - محاكم التفتيش في العصور الوسطى - وحركة البروتستانت وأحداث تاريخية كثير ما كانش عندي فكرة عنها خالص. يجوز دا كان موضوع المحاضرة الأولى اللي انا حضرتها؟ وحضرت يوم الألعاب: نقعد ويلعبونا ألعاب زي لعبة الحركات، الواحد يشرح من غير كلام، زي «لعبة الأفلام» اللي انتو بتلعبوها. ولعبة تانية اسمها «روبسبير»، واحد يختار شخصية تاريخية أو حدث مهم والتانيين يسألوا ويخمنوا الشخصية أو الحدث، زي «عروستي» بس على التاريخ وشخصياته، كان لازم اكون على دراية برضه بالتاريخ علشان اقدر اخمن فكنت بتعلم. كلها نشاطات ثقافية مرتبطة بالتاريخ والفكر السياسي. معظم الشباب دول ثقافة فرنسية وبعضهم كانوا متخرجين من مدرسة «الليسيه» الفرنسية، وبعضهم طلائنة رجعوا من إيطاليا بعد ما اترنقوا هناك أربع أو خمس سنين الحرب .

زي ما قلت أنا وقعت في حب المجموعة دي وأجوائهم وأصريت أحضر كل نشاطاتهم، أقل اهتماماتي كان رقص يوم السبت، بس برضه كان لطيف الرقص في جو حبي وصداقة وشباب. «أنجيلا» اللي عرّفتني بيهم حضرت مرة أو مرتين وما رضنتش تيجي تاني، ما اعرفش حصل إيه، يمكن زهقت، ما سألتش فيها من كتر ما اتعلقت بيهم. قعدت مدة أخذ الإذن من أبويا وأمّي على أساس إنّي رايحة مع «أنجيلا» لغاية ما اكتشفوا إن «أنجيلا» مش بتروح فحاولوا يمنوني بس ما نفعلش. أبويا كان شايف الأصول ما اتأخرش عن الساعة 8م، ولكن علشان أكون في البيت الساعة 8 زي ما أبويا عاوز لازم أمشي من النادي في نص المحاضرة أو اللعبة، أغلب الشباب دول أكبر مني شوية وابتدوا يشتغلوا أثناء النهار فبيوصلوا الجمعية على سبعة بالليل، فدخلت في خناقات مع أبويا وأمّي بسبب الحكاية دي، وفي الآخر استسلموا وسابوني أكمل .

في الجمعية لاحظوا على طول إن انا «معاهم معاهم» ومش حاسي بهم، فابتدوا يجندوني وكان فيه بعض الشباب الجديد غيري وفي الغالب عملوا معاهم نفس الشيء. ساعتها ما فهمتش حكاية التجنيد دي .

«ماكس كوهين» كان عنده 24 سنة، عجوز في نظري، كان كبير القعدة، جد وبيدخن بيبة بيسمعوا كلامه وبيان إنه أعقل واحد فينا، كان أكبرنا في السن فعلاً على أي حال وفي الغالب كان مسؤول عن القسم الإيطالي في حركة سمعتهم بيقولوا اسمها «حدثو»، كانوا عاملين قسم فرنسي وأرمني ويوناني كمان. ماكس كان عنده موكب من المساعدين، اتنين اخوات اسمهم «جو وليو باتينو» عمرهم زي 22 سنة، بالنسبة لي برضه «كبار» أصل أنا كان عمري ساعتها حوالي 15 سنة. الاتنين بيشتغلوا في الـ «Société Egyptienne de Publicité» - «الشركة المصرية للإعلانات» - جريدة «الجمهورية» دلوقت، وكان بيصدر عنها «Le Progrès Egyptien» - جرنال «التقدم المصري» - عندهم جنسية إيطالية وبيتكلموا «طلياني طلياني»، بدون لهجة فرنساوي زي لهجة «ماكس كوهين» اللي أصوله فرنسية. كان فيه مين كمان من الكبار؟ «ريللي»

و«نينيا» وأخين تانيين من اسكندرية، غالبًا جم القاهرة بسبب القنابل زي «فيلياً» الخياطة وأمها «فيليتشتا»، الأخين «لوكساردو»، «جابريللا كاسوتو»، «ماريو بتروتشي» اللي كان أصغر من «ماكس» بس له مكانة ممكن يقاطعه ويتدخل في الكلام أثناء المحاضرة. «ماريو» و«نينيا» و«ريللي» من الشباب اللي اتزرق في إيطاليا بسبب الحرب وحضروا سقوط الفاشية ونهاية الحرب هناك. بنات واولاد بالألوف عاشوا سنين الحرب في إيطاليا بعيد عن أهلهم في ملاجئ ومعسكرات خيرية وحكومية، أظن الرهبان تولوا أمور كثير من الشباب العالق على قد ما قدروا. لما الحلفاء انتصروا في شمال أفريقيا بعد معركة العلمين ودخلوا جزيرة صقلية في جنوب إيطاليا النازيين الألمان اعتبروا إيطاليا خرجت من سيطرة موسوليني فاحتلوا بالجيش من الشمال. والفدائيين بعد ما كانوا بيكافحوا ضد موسوليني الفاشي، أصبحوا بيكافحوا ضد الاحتلال النازي. «ماريو» هرب من الدير وانضم للـ «partigiani» - الفدائيين - استخبي في الجبل وعاش كفدائي سنين وكافح مع الفدائيين وحضر سقوط الفاشية ونهاية الحرب .

«ماريو» بيحكى قصص الفدائيين وانا باسمعه وانا في عالم ثاني جديد .

مبهورة .

الانبهار دا خلاهم يكلفوا اللي اسمها «جابريللا كاسوتو» بمتابعتي، عندها 21 سنة، كبيرة برضه .

- إنت بتقري جرايد؟

- يعني، أبويا بيحيب كل يوم Le Journal d’Egypte - «جريدة مصر» - وهو راجع من الشغل علشان يبص على إعلانات السينما .

- لا لا، دا ما اسموش كلام، إنت لازم تيجي لي أعلمك كام موضوع علشان تفهمي شوية في السياسة .

قلت لنفسي «طيب! وماله» ورحت لها بيتها وابتدت تعلمني ازاى الواحد يقرأ الجرنال، يهتم بإيه وما يهتمش بإيه :

- بالطريقة دي لو تتواجدي مع ناس زي ما احنا بنقعد في الجمعية تقدرى تاخدي الجرنال وتقولي إيه مهم وتعملي عرض للمجموعة .

انبسطت من الدرس دا. بعد كدا جابت تاريخ الحزب الشيوعي السوفيتي وقعدت تقول لي ازاى لما الواحد يقرأ يفهم كل حاجة عن الشيوعية والاشتراكية :

- إنت عندك فكرة عن لينين؟ عندك فكرة يعني إيه شيوعية؟ عندك فكرة؟

ما كانش فيه حاجة في دماغي، ميح خالص. حكيت لي شوية وبعدين قالت لي :

- اقرى صفحتين ثلاثة من الكتاب دا و المرة الجاية قولى لى فهمت ايه .

بس ما فهمتش حاجة من الكتاب . ابتدت تفهمنى هى يعنى ايه الماركسية ويعنى ايه الشيوعية
والمفاهيم دي، وفي نفس الوقت كنت باحضر معاهم جلساتهم الجماعية .

- انت مش بتشتغلي؟

- لا ما باشتغلش، أصلى حاسافر .

- تسافري؟

- أيوه، علشان أدرس، أكمل دراسة .

الناس دول عيبهم إن الدراسة عندهم مش مهمة في الحياة، بيعتبروا الدراسة رغبة برجوازية والناس
اللى عايزة تكمل دراستها وتاخذ شهادات ناس عندها تطلعات برجوازية .

- والعمال لما بيشتغلوا بيكونوا درسوا؟

دا على أساس إن احنا خلاص اتفقنا إن احنا مع الطبقة العاملة، والحقيقة أقنعوني :

- حادور لك على حنة تشتغلي فيها وتبقي جدعة، مش لسه «يا بابا اصرف عليّ»، لسه حيصرفوا
عليك وتروحي إيطاليا؟ دلح !

لقت لى فعلاً شغل على الآلة الكاتبة في شركة جنب ميدان التحرير قصاد بيتها بالطبط. أنا كنت
فاهمة إن دا اهتمام شخصي من «جابريللا» وكنت مبسوفة انها بتديني معلومات وتتقني .

أول نشاط اشتركت فيه معاهم كانت رحلة لاسكندرية في الصيف، ببسافروا مع بعض بطريقة
اشتركية، كل واحد يحط فلوس وناكل مع بعض ونروح البلاج، الشاطئ، وننام في أوض في
بنسيون نأجرها مع بعض، واحد أو اتنين مننا ينظموا العملية بالحسابات والترتيبات. أخذت أخويا
معايا لأن أمي كانت في المستشفى، جالها تيفود وساعتها التيفود كان بيقد مدة طويلة، بيعالجوه
بمنع الأكل عن المريض. خفت وروحت البيت وجت لها نكسة ورجعت المستشفى تاني .

اتحجرت حوالي شهر ونص في المستشفى الإيطالي وشعرها كله وقع من الضعف. أنا ما كنتش
صغيرة قوي ولا حاجة كان عندي زي 16 أو 17 سنة بس اهه ما كنتش كبيرة كفاية عشان آخذ
مسؤولية، أبويا كان بيعمل كل شغل البيت، يطبخ ويروح الشغل وياخد باله مننا ويوماتي يروح
يشوف أمي في المستشفى وعمل لها باروكة عشان كانت مكسوفة من شكلها. إزاي عمل دا كله؟
مرة واحنا بنزور أمي في المستشفى اشتكيت لها :

- كل يوم ناكل سباحتي، كل يوم، كل يوم .

وأمي مش تنبهنني وتقول مثلاً «كتر خير» لا :

- حرام عليك يا «إيليا» بتأكل العيال مكرونة كل يوم، ممكن تتوع لهم شوية .

فالمساهمة الوحيدة في الفترة دي اني أخذت «برتو» معايا اسكندرية مع مجموعة «البيك»، الشباب ما كانوا سعداء قوي إن أجزر معايا ولد 12 أو 13 سنة ولكن ما مانعوش وكانوا لطاف معاه. «برتو» ما كانش بياكل كويس من صغره، رفيع ومعدوش شهية وصحته نص نص، لما راح اسكندرية معايا سبته يلعب في الرمل والبراح، وبعد اللعب نروح مطعم صغير جنب الشاطئ نطلب ونقسم وناكل شوية من كل صنف، «برتو» بقى ياكل بشراهة ويطلب أكثر وكنت باجيب له ما كانش فيه مشكلة، وفي 10 أيام تخن واسمرّ ووشه اتملا واتغيّر خالص. آخر يوم واحنا في الأتوبيس راجعين مصر طلع لـ«برتو» دمّل في عينه، وعينه ورمت واحمرت. دخلنا البيت وعينه بالطريقة دي، بس أبويا شاف «برتو» حلو ووشه مدورّ وتخانن ومِسْمِر وشعره طولان فضل يبص له، فرحان به، ما اتخضش من الدمّل اللي في عينه وعالجه على طول، عمل له غسيل، شاطر أبويا، يعرف يعالج كل الأوجاع. بعد يومين عين «برتو» رافت وكان زي القمر خدناه ورحنا أخيراً المستشفى نشوف أمي، كانوا مبسوطين بشكل! أعتقد كانوا مبسوطين كمان من تطوّر علاقتي بـ«برتو» واني خدته يصيّف معايا .

العادي إن أنا و«برتو» ما نعدش مع بعض، ولو حصل نتخانق، أيام الأجازة لما أمي تنزل تشتري الطلبات من السوق تضطر تسيبنا في البيت توصينا ما نتخانقش وان كل واحد يقعد في حاله، ما كنتش عاوزة أفهم أبداً إن هو أصغر مني والمفروض أكون أعقل منه، مش عايزة أعرف إن كان صغير ولا كبير، بيفهم ولا ما بيفهمش، حقي أنا عاوزاه بالكامل، وفي يوم من الأيام هي نزلت من هنا وأنا و«برتو» اختلفنا على طول، يومها الزعل والخناق بيني وبينه وصل إنه شد الروب اللي انا لابساه، وأنا أشد وهو يشد لحد ما اتلفت جامد علشان امشي فاتقطع من قدام وبعدين اتقطع من ورا الروب اتفرتك بيني وبينه بالطريقة دي. أمي رجعت من السوق لقتنا متخانقين وراميين حاجات على بعض وكمان معدنيش روب. كنت 9 أو 10 سنين و«برتو» 3 أو 4 سنين، دا كان شكل العلاقة بيني وبينه لحد رحلة اسكندرية مع مجموعة الشباب الطلياني .

ظهر وباء الكوليرا بتاع 1947 وانتشر في مصر وفي القاهرة، وعلى طول المجموعة دي نظمت مساعدة وحماية للناس. وزعوا علينا برمنجات وفنيك وأدوات تنضيف. بولاق أبو العلا اللي انا ساكنة فيها كانت فقيرة وفيها حنتت أفقر كمان من حنتنا في شارع نعيم، وحي معروف فيه سوق وبيوت صغيرة وقديمة. مسكنا مسؤولية الحي من الإسعاف في رمسيس بما فيها بيتنا وشركة النور، من الوابور الفرنساوي لغاية مدرستي القديمة «دانتى أليجييري»، منطقة كبيرة. كنا اربع أنفاري في المجموعة، أولاد وبنات، إدونا قز ايز فنيك وبرمنجات ومبيدات، شيلناها على كتافنا، نطلع مع بعض بيت بيت، نخش جُوه ونقول للسكان إن احنا مندوبين من الصحة، نديهم قزارة فنيك ونشرح لهم كلهم، صغيرين وكبار، إن لازم يغسلوا أيديهم وهما راجعين من بره وضروري في طشت فيه مية بفنيك بكمية تكفي للتطهير. كان فيه بيوت فقيرة جداً في الصف اللي ورا الوابور الفرنساوي، طلاينة ومصريين. نطلب نبخ الحمام والكابينيه بالمبيد، نرش كويس بالرشاشة اللي معانا ونسيب لهم قزارة الفنيك. بيوت دورين ثلاثة اربعة نطلع على السلم، دور دور، باب باب، عيلة عيلة، نبخ

الحَمَّامات وننزل البيت الثاني والثالث بشكل منتظم وفي الآخر لما نخلص نكتب احنا عملنا كام بيت. أنا اتحمست حماس غير معقول إننا بنعمل المساهمة دي. ما تقديش تتصوري يا نادية في سني دا قد إيه كنت متحمسة من العملية دي. كلنا خواجات، وانا يمكن الوحيدة اللي من بولاق، يعني من حطة شعبية إلى حد ما، فلما كنا بنخش عند الناس ساعات كانوا يضحكوا علينا، بس احنا عملنا الشغل دا بدون تردد بقيادة منظمة «حدثو». أنا ساعتها ما كانش عندي فكرة إن انا جزء من حركة منظمة، بس أول ما ابتدا وباء الكوليرا جت تعليمات لكل الأقسام أن يوقفوا كل النشاطات والبرامج وينزلوا يساعدوا، تعليمات من واحد اسمه «هنري كوريل»، قالوا لي إنه مؤسس منظمة «حدثو»، خد إن من وزارة الصحة ونظم معاهم توفير الأدوات والمواد اللي احنا كنا بنستعملها، وعمل تنظيم هائل للانتشار في الأحياء الشعبية الفقيرة. كانت أول مرة أسمع عن «هنري كوريل»، ولاحظت مع الوقت إن عنده حاسة المشاركة في الاحتياجات الشعبية، بفضلها أنا اشتغلت بديني في الحملة دي. وأقنعوني خلاص ورحت قلت لهم في البيت :

- حاشتغل مش حاسافر .

واتعلمت آلة كاتبة وشغلنتي «جابريللا» في «جون ديكنسون»، شركة انجليزية للورق أكتب الجوابات على الآلة الكاتبة، وكان مطلوب مني اتعلم الاختزال .

النادي بناعنا، «الببكي» انتقل من شقة شارع شريف لمدرسة «دانتي أليجييري» اللي كانت مدرستي زمان، وعملوا فريق باسكت، وكنت بالعب باسكت في حوش المدرسة الكبير وآخر النهار واحنا مروحين من الجمعية كان عندهم العادة الظريفة إن الولاد يوصلوا البنات لبيوتهم، كنا بنمشي كثير جداً، نتفصح على كوبري أبو العلا لغاية الحطة اللي فيها شارع نادي الجزيرة وجنيئة الأندلس ونغني في الشارع كمان واحنا ماشيين. وفي يوم من الأيام «ماريو بتروتشي» الفدائي البطل جالي وقال لي :

- «ماريا» أنا اللي حاوصلك البيت النهاردا .

قلت لنفسني: «مفيش مانع»، ومشينا. ابتدى «ماريو» يسألني أسئلة غريبة: «هل أنا جاهزة» و«هل أنا فعلاً معاهم»، كأن فيه شك إن انا مخلصه، هو ما كانش قصده كدا بالظبط، بس انا أخذتها كدا، إن فيه شك في إخلاصي للفكرة الشيوعية والاشتراكية والكفاح والعمل. يظهر «ماريو» مهمته إنه يكشف على المجندين الجداد يشوفهم استنوا كويس ولا لسه ويقرر لو يعرضوا علينا نبقى أعضاء منظمين. بس انا زعلت من الأسئلة، من كتر ما كنت متعلقة بيهم مش متصورة إن لسه حد يبسأل. ابتدينا بان ما اردش عليه، حالة طفولية شوية كأني مقموصة، ماشيين، هو يتكلم ويسأل وانا ما اردش وابص الناحية الثانية. بعد شوية لاحظ :

- إنت زعلانة ليه؟ أنا باقول حاجة غلط؟

مش عارفة قلت له إيه ورديت بإيه المهم إنه قعد يعتذر ويعتذر ويعتذر :

- أبدأ أنا ولا في بالي إنني أشك في إخلاصك .

وانتهي الأمر على كذا. أكيد قال لنفسه «لا لا لا، دي لازم ندخلها على طول» لأن «جابريللا»
المرّة اللي بعدها سألتني بشكل مباشر :

- إحنا منظمين، عاوزة تتضمي لنا ولا لأ؟

- برضه؟ دا كلام؟ كل دا وانا مش معاكم؟

كلام من النوع دا، المهم دخلوني فعلاً. كنت أصغر واحدة في السن وكنت البنّت الوحيدة تحت سن العشرين. «أنجيلا» صاحبتني اللي عرفتني بيهم كانت اختقت من زمان وانا ما سألتش فيها. كان فيه شبان تانيين واحد منهم اسمه «روميو» زي بتاع «جولييت» عنده 19 سنة وأسه راجع من إيطاليا بعد الحرب، أنا وقعت في حبه، بس هو ما حبنيش ولا عبرني، واكتشفت بعد شوية إن هو بيحب مين؟ بيحب «جابريللا» الكبيرة اللي كانت بتتقني .

أنا اتألمت كثير وقلبي وجعني بصحيح في الحكاية دي .

بس بعد كذا طبعاً نسيت .

نزل عليّ أفكر إن مسألة إن اقعده أحكي لها ميزة وعيب. الميزة معروفة، كل ما باتكلم بافتكر أكثر، بس العيب إنها بتأخذ شيء من الطاقة العاطفية، بينتهي الأمر ان الواحد يعمل نوع من الـ «introspection» - تفقد الذات - يعني بيبحث جوه نفسه. سألت نفسي «إيه اللي خلاني أول ما رحنت النادي الإيطالي وقابلت الشباب المناهض للفاشية رميت نفسي في السياسة، وكان دا اللي كنت منتظراه طول عمري ودا اللي انا اتولدت علشانها؟». السبب مش ابويا، أبويا ما ادانيش حب السياسة والأحداث أو التاريخ. هي أمي اللي ادتني الارتباط دا، وحصل بالشكل اللي حكيتة لما كنت في تالته ابتدائي وابتدوا يهتموا بالواجبات المدرسية بعد ما أهملوني مع ولادة اخويا. ياربط هنا بين مقاومة الفاشية اللي كانت بتحكيها لي أمي ويوم ما رحنت للنادي الإيطالي وبداية علاقتي بالمجموعة دي. واحدة من أوائل المحاضرات اللي حضرتها كانت مُحاضرة عن الفاشية في إيطاليا، والمُحاضر كان «ماريو بتروتشي». حضر ناس كثير طلابية مصريين شباب وكبار في السن لأنها كانت من أول اللقاءات السياسية بعد الحرب في مصر، بيحاولوا يفهموا. بعد ما القاعة اتملت على الآخر وصل واحد، ضخم، كبير، تخين، شوية زي... يمكن مش ضروري أعمل التشبيه دا؟ شوية زي الراجل بتاع الحزب الوطني، اسمه إيه؟ نسيت! كمال الشاذلي ! المنظر كأنه رئيس أو جنرال دخل وحواليه أتباعه، الكل في القاعة بص عليه، الأوضة كانت على آخرها كل الكراسي اتملت لكن الأفوكاتو دا قعد على طول في أول صف، أتباعه كانوا حاجزين له مكان. أنا ما كنتش شفته قبل كذا، بس كنت أسمع عنه «دا الأفوكاتو «موربورجو» واحد من كبار المحامين الطلابية في القاهرة ومعروف عنه إنه فاشيستي كبير، أول مرة يظهر بعد ما الفاشية وقعت والنازية انهزمت». يا عيني «ماريو

بتروتشي» شاب صغير بيواجه راجل فاشيستي كبير ، ولكن «ماريو» كان شاطر ما اتهمش، ابتدى يحكي ويشرح إيه هي الفاشية ويشهد هو شاف إيه منها وهو في إيطاليا، كان بيهاجم الفاشية بوضوح ويدي تقاصيل، ففي وقت معين الأفوكاتو دا قام وابتدى يشتم «ماريو» ويشوِّح بإيده ويتقدم بجسمه ناحية «ماريو» كأن حيضربه، فأصحاب «ماريو» سابوا كراسيهم والتفوا حوله، فالأفوكاتو فقد أعصابه وزعق :

- إنتم ولاد كلب شيوعيين .

ولكن «ماريو» ما سكتش، كان طويل ورفيع وراسه طالع زي الديك من وسط اصحابه :

- إحنا ما كافحناش وما ماتش مننا ناس كثير علشان يجي واحد وسخ زيك يقول «تحيا الفاشية»، بعد كل اللي حصل؟

تحولت لخناقة ومسكوا الكراسي وكانت حنتهي إلى معركة وحشة، بس في النهاية «موربورجو» ساب القاعة، لكن «ماريو» كان انفعل ووشه احتقن واحمرَّ وفضل يقول :

- إزاي يحصل كذا؟

ويكرر ويعيد :

- يعني إيطاليا تحرر نفسها وناس بالملايين تموت وبعدين يجي واحد وسخ عايش بعيد، ما شافش حاجة، وما يهموش حد، وبعد إيه؟ بعد ما وقعت الفاشية؟ وبعد ما قتلوا موسوليني؟

موسوليني كان هرب والفلاحين جريوا وراه هو ومراته - مش مراته - رفيقته، كان مرافق واحدة اسمها «كلارا بيتاتشي»، الفدائيين لحقوهم ومسكوهم في شمال إيطاليا وقتلوهم وعلقوهم الاتنين من رجليهم من كتر الكراهية. تصوري انتهى الأمر بيهم كذا: موسوليني و«كلارا».

المحاضرة دي كانت حادثة مهمة في الطريق لتجنيدى، ودخلوني في منظمة «حدثو» وعرفت بقى إنها اختصار لـ«الحركة الديمقراطية للتحرر الوطني»، مفيش كلمة شيوعية في الاسم فشرحوا لي إنهم «منظمة شيوعية في الأساس ولكن المرحلة في مصر هي مرحلة تحرر وطني من الاستعمار»، اللي عايزة أقوله ان ما كانش ممكن يصيبوا وجداني أكثر من كذا، أصل التحرر الوطني دا اللي كنت بادرسه في كتاب التاريخ مع أمي .

في نفس الوقت اللي تم فيه تجنيدى كانت بتحصل الوحدة بين منطمتين شيوعيتين: «ح.م» اختصار «حركة مصرية» بقيادة «هنري كوريل» السكرتير العام، والمنظمة الشيوعية الكبيرة الثانية كان اسمها «إسكرا» يعني الشعلة بالروسي في الاتحاد السوفيتي، بالعربي كانوا بيسموا أنفسهم «شرارة»، وكانت بقيادة واحد اسمه «هلال شوارتز». كل دا عرفته شوية بشوية مش على طول، وهم بيجنودوني أنا ما كنتش دريانة بالتنظيمات دي كلها، واللي بيجنودوني ويتفونى ما بيدوش

تفاصيل. المنظمين دول اتحدوا مع بعض وعملوا منظمة اسمها «حدثو» اللي أنا أصبحت عضوة فيها. لكن على طول بعد الوحدة - وانضمامي - ابتدت خناقات وخلافات بين المجموعات المتحدة. من جوه «حدثو»، مجموعة «إسكرا» كَوْنُوا منظمة اسمها «منظمة شيوعية مصرية» اختصارها «م.ش.م.» منشقة على «حدثو». يعني كل اللي اتغير هي الأسمي «ح.م.» بقت «حدثو» و«إسكرا» بقت «ميم شين ميم»! الخناقات زادت بدل ما تقل، ما كانوا بيقلوا لي، بس أنا كنت باحس بيهم وباشوفهم وهم بيتناقشوا، مش فاهمة الخناقات على إيه بالطبط، خلافات فكرية، بس يمكن كمان اعتبارات شخصية بينهم .

الحادث الثاني اللي حصل وانا في أول تجنيدي والمرّة دي أثر عليّ بالوحش وما انبسطش أبدًا، بعد كام شهر من وجودي معاهم :

- فيه مؤتمر عام، حنجمع كلنا، فيه خلاف وموضوع مهم حيناقشوه، إنت دلوقت عضوة ولازم تحضري وتفهمي وتتابعي وتأخدي موقف .

اجتمعنا في بيت «جابريللا». البيت في وسط البلد، كبير وفيه صالة واسعة مليانة ناس، كل الطلاينة اللي انا اعرفهم وناس تانيين كثير ما اعرفهمش. موضوع النقاش كان حول واحد من الطلاينة فاكرة اسمه ما انساهاوش «جوليو لاوري» صحفي في «الشركة المصرية للإعلانات» اللي اسمها جريدة «الجمهورية» حاليًا. بيحاكموا «جوليو لاوري» دا وتهتمته: «اتصالات جانبية». فهّموني إن «الاتصالات الجانبية ممنوعة خالص بالنسبة لأي عضو في منظمة شيوعية». أنا مش فاهمة يعني إيه اتصالات جانبية، «يعني الاتصالات بين بعض ممنوعة، الكلام والشكاوي والآراء لازم تكون عن طريق التصعيد إلى المسؤولين الأعلى في الخلية». «جوليو» المتهم بالاتصالات الجانبية كان بيقول :

- أبدًا، كنا بنتكلم مع بعض وانا من حقي أعبر عن نفسي .

كان فيه «هلال شوارتز» ومسؤولين تانيين، «هنري كوريل» ما كانش موجود. بالنسبة ليّ الشكل دا كان وحش، كانوا عايزين يفصلوا «جوليو لاوري» من المنظمة علشان «اتصالات جانبية»، ما اعرفش مع مين. فاكرة ومتضايقة لحد دلوقت من المنظر دا، ثلاثة أو أربعة يحاصروه بالأسئلة والاتهامات وبجسمهم كمان وهو يحاول ينكر ويقول :

- دا من حقي، دا مش غلط، أنا ما عملتش أي حاجة غلط .

الطريقة اللي عملوا بيها المحاكمة دي ضايقتني. وفيما بعد لما شفت أفلام عن محاكم التفتيش في أسبانيا في القرون الوسطى، حسيت إن في شبه كبير. «جوليو» كان في القسم الإيطالي واللي خلاني ساعتها أخذ صفه هو إني ما كنتش فاهمة إيه الجريمة الكبيرة دي اللي اسمها «الاتصالات الجانبية». انتهى الأمر إنهم فصلوا «جوليو لاوري»، وانا ما شفتوش ثاني .

على طول بعدها حصلت الانقسامات الكبيرة .

الحقيقة التواريخ مش واضحة ليّ بدقة، ومش حادخل في تفاصيل دقة التواريخ علشان عمري ما اهتميت بيها، وبالتالي ما اقدرش افكرها، لحد دلوقت ما اعرفهاش كويس، وما درستهاش بعد كدا، يعني ما خدتش كتاب رفعت السعيد وقعدت أقرأ، هو عمل رسالة في الموضوع .

أنا علشان افكر التواريخ لازم احسب سنّي في الوقت دا: التحول الكبير في حياتي حصل لما خلّصت المدارس في يونيو 1946 لما صاحبتني «أنجيلا» قالت لي على جمعية الشباب «البيك» وجمعية «إيطاليا الحرة»، يعني كان عندي خمستاشر سنة وتلات شهور لما قابلت المجموعة دي. ارتبطت بيهم في كل الأنشطة، منها وباء الكوليرا والوحدة التاريخية الكبيرة بين المنظمين «ح.م» بقيادة «هنري كوريل»، و«إسكرا» - «شرارة» - بقيادة «هلال شوارتز». وبعدين لما صدر قرار تقسيم أرض فلسطين من الأمم المتحدة وبعدها إعلان قيام دولة إسرائيل، خرج الجيش المصري مع الجيوش العربية يدافع في الحرب في 1948، وابتدت حملة كبيرة من طرف الحكومة المصرية للقبض على الصهاينة. أيامها كان لسه فيه الملك فاروق، والكفاح ضد الإنجليز والملكية كان على ودنه في كل حة في مصر، فلأسف الحكومة المصرية انتهزت فرصة القبض على الصهاينة من تحت راس إسرائيل وقبضوا كمان على الشيوعيين المصريين، برّضه التفاصيل السياسية مش عندي لكن أعتقد شحاتة هارون كتب عنها. كان فيه كتير من الشيوعيين خوارجات ومنهم يهود، ومن ضمنهم «هنري كوريل». دا معناه إن الفقرة دي من حياتي استمرت سنتين من 1946 إلى 1948، أنا باحسب التواريخ كدا .

في الفترة دي كمان كان المفروض أسافر إيطاليا علشان أكمل دراستي والشباب أفتعنوني إن دي تطلعات برجوازية وإن الكفاح والنشاط السياسي أهم من دراستي، لغيت السفر إلي إيطاليا وكان عندي ستاشر سنة وقعدت أنشط معاهم في مصر، ومن ضمنها حملة الكوليرا. لغاية الوقت دا كان فيه خوارجات ومصريين بالمئات في المنظمات الشيوعية، لكن شعور كتير من المصريين ضد الأجانب كان بيزيد بسبب الإنجليز والملك والاحتلال، وضد اليهود بسبب إنشاء دولة إسرائيل، والحكومة والرجعية كانوا بيستغلوا الشعور دا ويقبضوا على الشيوعيين والخوارجات واليهود بدون تمييز مين صهيوني. الطلائية الشيوعيين اللي في مصر عملوا مؤتمر واتفقوا إن مش ممكن الخوارجات يلعبوا دور حقيقي في البلد في الأجواء دي لأن مهما يقولوا عن أنفسهم إنهم وطنيين ومصريين، مفيش مصداقية بعد اللي حصل في فلسطين، وقرروا في المؤتمر إن كل واحد يروح لبلد أصله علشان يكملوا الكفاح بشكل يكون فيه مردود، يعني مش كفاح ع الفاضي. اللي له أصل طلياني يروح إيطاليا، أصل فرنساوي لفرنسا، ولكن كان فيه أرمن مثلا يروحوا فين دول؟ يمكن الاتحاد السوفيتي على أساس إن جزء من أرمينيا كان تبع الاتحاد السوفيتي؟ وبعدين كان فيه يهود مصريين ملهمش أصول أوروبية يروحوا فين دول؟ حتى اللي لهم أصل يوناني مثلا كان عندهم مشكلة لأن كان حصل انقلاب فاشيستي في اليونان بقيادة تلات جنرالات جيش، فكان خطر على الشيوعيين اليونانيين المصريين إن يروحوا اليونان. على أي حال الطلائية قرروا يمشوا من مصر وابتدوا يعملوا أوراقتهم .

- إنت حتروحى فين؟

- أنا معنديش ورق جنسية، أنا «apolide» - بلا جنسية - زي ابويا. مش انتم من سنة قلتوا إن احنا حنكافح هنا في مصر؟ وقلتوا الدراسة مش مهمة؟

- سفرك كان للمذاكرة، لأهداف برجوازية، علشان تحسني من وضعك الاجتماعي وتحصلي على شهادات وكلام من دا. لكن دلوقت السفر قضية سياسية لأن مش ممكن الخواجات يكافحوا في مصر، مش حيقدرُوا يساعدوا، المصريين مش حيصدقوا إننا مخلصين، الدعاية أقوى مننا، فالوفاء الشيوعي الاشتراكي هو إننا نساfer .

- بس انا مصرية، مكتوب في شهادة ميلادي مصرية، مش حاسافر .

وقررت اقعء .

سافروا كلهم .

خدوا بعضهم واحد واحد، «ماريو بتروتشي» راح إيطاليا و«جو وليو باتينو»، و«ماكس كوهين» و«نينيا» اتجوزوا وراحوا فرنسا، و«ريللي» أخت «نينيا» راحت استراليا وبتيجي تزور مصر من أن لآخر وباشوفها، ومن سنّي سافر «ليفيو دي روزا» و«جابريللا» اللي جندتني و«روميو» صاحبها اللي حبيته وما عبّر نيش، وواحد كمان حوالي سبعناشر سنة بيتعلم يبقى صايغ، يشتغل في المجوهرات وفي الذهب، حصلت حاجة رومانسية شوية بيني وبينه، بس في الحالة دي هو اللي كان ميّال ليّ، أنا ما كنتش ميالة له، عكس قصة «روميو»، المهم سافر هو كمان وراح إيطاليا وفقدت الاتصال بيه خالص ونسيت اسمه كمان زي ما انت شايفة .

الوحيدة اللي فضلت - من اللي أعرفهم في القسم الطلياني - هي أنا .

قبل ما الطلاينة يسافروا سلموني للقسم الفرنسي. استلمني واحد اسمه «نيني أسين»، عرّفوني عليه علشان يكمل عملية دروس الماركسية مكان «جابريللا». افكرت الولد «نيني» دا فجأة وانا في العربية رايحة عند الدكتور «أفيديس»، دكتور السنان، عدينا قدام عمارة قديمة جنب مدرسة «الفرنسيسكان» قصاد الأنتكخانة، ساعتها كانت طوب رملي أحمر، دلوقت بيّضوها، لكن دي عمارة «نيني» وكان ساكن في الدور الثالث أو الرابع. في القسم الفرنسي - يظهر كانوا منظمين أكثر من الطلاينة - عندهم كورسات للماركسية: كورس نمرة 1، نمرة 2، نمرة 3. ابتديت مع «جابريللا» بالطلياني وكملت مع «نيني» بالفرنساوي. الفرنسي ما كانش مشكلة، الولد هو اللي كان صعب، أكبر مني بثوية مش كثير، رفيع وشعره نص أصفر وأكرت، وكان عصبي جدًا ومكشّر طول الوقت. وشه المكشّر دا خلاني مش قادرة استوعب ولا اتجاوب مع اللي بيقله، ببسأل بعصبية :

- فاهمة ولا مش فاهمة؟

تجربة مش لطيفة. وانا ما فهمتتش هو ليه عصبي ومتضايق، يمكن كلفوه يدرّس لي وهو مش عاوز؟ ولا لقاني مش مصححة؟ ولا عايز يسافر وقاعد غصب عنه؟ ولا عايز يقعد ومسافر غصب عنه؟ ولا خايف؟ إدّاني درس أو درسين بس الحمد لله سافر هو كمان من ضمن الناس اللي سافروا، وانتهى الأمر على كدا وما شفتوش تاني ولا عرفت عنه أي قصص. واحنا فايئين بالعربية قدام بيته

افتكرت الأسانسير الجميل، حديد زهر وإطار الخشب، كنت باشوف السلام من القزاز وانا طالعة له

*

الشيوعيين الفرنسيين وهم ماشيين سلموني لخلية شيوعية مصرية والمسؤول عنها وعني كان واحد اسمه عبد الستار الطويلة، عضو في اللجنة المركزية للمنظمة، مش بالانتخاب ومش علشان يستحق، إنما بالتصعيد: يعني لما اتقبض على أعضاء اللجنة المركزية، سعدوا الصف الثاني من أعضاء الحزب للقيادة وبقوا هم اللجنة المركزية، ولكن اتقبض على الصف الثاني كمان فانتهى الأمر إن واحد زي عبد الستار وعدد من شباب الشيوعيين مسكوا القيادة. أعتقد إنني قابلته في بيت واحد اسمه فؤاد بلبع في العباسية، عرفت بعد كذا إن عبد الستار كان مسؤول عن الجهاز الفني، يعني المطبعة، وحطني في «جهاز» توزيع المنشورات. كان فيه رغبة من القيادات اللي في السجن إن الجهاز الفني بالذات يستمر، والمنشورات ضرورية بأي شكل لازم تستمر تطلع وتتوزع، علشان يدوا إحساس للبوليس وللحكومة إن عدد الشيوعيين كبير وفيه غير المقبوض عليهم أعداد ياما برّه. بالطريقة دي أنا دخلت تنظيمياً في خلية لتوزيع المنشورات، والنظام إن حد يديني منشورات ويديني طريقة اتصال مع ناس أنا مش فاكدة ولا أساميهم ولا الأماكن اللي باقابلهم فيها، أفتكر نفسي طشاش وانا باسلم منشورات .

كان المفترض إن انا مش باثير أي شكوك لأن شكلي أجنبية، بيضة شوية وشعري على الموضة: كانت طلعت تسريحة من ممثلة فرنسية اسمها «دومينيك بلانشار» عملت فرائشة يعني قصّة منزلة شوية شعر على القورة، عجبتي القصّة لاني كنت متعقدة إن قورتي مش واسعة كفاية، على أساس إن القورة الكبيرة تدل على الذكاء والقورة الصغيرة تدل على الغباء. دا غير إن قورتي دوغري مش مدورة. لقيت طريقة الفرائشة أو القصّة اللي تنزل لغاية الحواجب، ممكن تتفعني وتخبي قورتي. القورة الواسعة موضة انتشرت من تكوين الممثلات الأمريكيات، عندهم قورة «bombée» مقورة واسعة وعريضة. في عز النشاط مع الطلاينة، محاضرات وثقافة وكفاح وشيوعية وتحرر وطني وكوليرا، كنت مهتمة باللبس ورحت خدت كورس تفصيل عند «بروفيلي» لمدة شهر، واتعلمت القصّ وعمال الباترون وابتديت أفضل لنفسى على الموضة. كنت باحاول ألبس شيك، باحب الهدوم، وأمى كانت بتشجعني طبعاً. الجماعة الشيوعيين هنا قالوا :

- دي حتكون كويسة قوي بعيدة عن كل الشبهات .

أشيل شنطة سوق كبيرة، أحط جواها المنشورات واسلمها لناس معينة في مكان معين. وانا باحكي ابتديت افتكر كان بيحصل ازاي، معظم الأعضاء كانوا لسه طلبة في الثانوية العامة وكانوا محتاجين لدروس لغات، أروح عندهم في البيت أدبهم دروس فرنساوي علشان الامتحانات. كان فيه طالب في العباسية كنت باروح أدّي له درس، تحت اسم إن أنا مدرسة فرنساوي، أسيب عنده المنشورات وانزل بشنطة الخضار فاضية وأخذ فلوس الدرس ياخذها مني عبد الستار الطويلة، أنا شغلي كان تطوع للعمل السياسي . كل دا أبويا وأمى ما يعرفوش حاجة، قلت لهم بشكل عام اني بادّي دروس، ما دقفوش .

اتعرفت على أعضاء أول خلية، عابدة أخت إجلال السحيمي، عابدة كانت بتدّي دروس إنجليزي علشان تعليمها إنجليزي، كانت ساكنة في الزمالك وبرضه المفروض إن شكلها البرجوازي ما يثيرش شكوك البوليس. والتالّة كانت اسمها عليّة، افكرتها دلوقت وانا باحكي وافكرت اسمها كمان. عليّة بنت محمود باشا كانت ساكنة في جاردن سيتي في بيت شيك وعندها مربية فرنسية بتربّيها من أيام ما اتولدت. المربية الفرنسية سمّتها «ألييت» علشان يبقى اسمها فرنساوي وكانت بتأخذها في الصيف تقسحها في فرنسا، على حساب أبو عليّة، الباشا، وترجعها مصر بتتكلم فرنساوي مية في المية، أظن إنها كانت بتدرس في مدرسة «الليسيه». عليّة عزمتني على الغدا عندهم، تجربة ظريفة، الباشا محمود راجل كبير في السن يقعد على السفرة وأمها ست مصرية تخينة ما تعرفش تقرا عربي، تشبه شوية لمرات النحاس باشا، عندها سفرجي وطباخ، غير الدادة المربية اللي كانت بتقعد معنا على السفرة. عليّة قالت لهم :

- عابزة اعزم واحدة صاحبتني تتغدى معنا .

فقدوني على السفرة جنب «ألييت». الأكل بيطبخه الطباخ باستثناء اللحمة، بينما إحنا قاعدين على السفرة بناكل، تقوم المربية في نص الأكل تروح المطبخ تعمل الفيليه أو الأنتركوت «à la minute» - يعني في ساعتها - بإيديها والسفرجي والطباخ واقفين، اللحمة تيجي سخنة من على النار وناكلها في ساعتها والسفرجي يخدم علينا .

من الناحية الثانية أنا كنت محتاجة لدروس عربي علشان خواجية ما باتكلمش عربي إلا بسيط وعليّة تعليم فرنسي نفس الشيء ما تعرفش عربي تقريبا. عبد الستار الطويلة يجي عند عليّة على الساعة تلاتة بعد الغدا على أساس إنه مدرس العربي، لابس بدلة وطربوش. كان عنده خطوة واسعة، وزرّ الطربوش يتهز وهو ماشي بطول البيت، والبيت كبير، لحد ما ندخل في الاستوديو يعني المكتب. إدانا فعلاً دروس عربي وكتاب عربي وشوية واجبات، ما دام احنا بنكافح مع الشيوعيين المصريين لازم العربي بتاعنا يكون كويس. أنا و«ألييت» اتصاحبنا أكثر من عابدة السحيمي لأن كنت باشوفها أكثر. «ألييت» حبّنتي لدرجة إني عزمتها على الغدا عندنا في بولاق. قلت لأبويا وأمّي إن فيه واحدة صاحبتني عزمتني على الغدا عندها وعابزة اعزمها عندنا. ما اعرفش قلت لهم اتعرفت عليها ازاي، بس إنت عارفة إن أبويا وأمّي بيحبوا الأكل ويحبوا يطبخوا ومكرونة أمّي حلوة، وجت عليّة اتعدت معنا والمرة اللي بعدها جابت دانتها، الست المربية الفرنسية، عابزة تطمن، وانبسطة من جو البيت عندنا. إحنا كنا ساعتها لسه ساكنين في شارع نعيم على فكرة، يعني حنة متواضعة جداً. أنا وعليّة كنا بنعمل المغامرات دي كأننا بنتفسح، نقعد مع بعض نتغدى سوا وناخد وندي دروس ونروح السينما ونوزع منشورات. أقصد أقول إن ما كانش عندنا الإحساس بالخطورة . ما كانش خايفين خالص .

اسم عبد الستار الطويلة الحركي كان «فتحي» وهو من اللي بيسموهم «المحترفين الثوريين»، يعني يسيبوا شغلهم والمنظمة تصرف عليهم من اشتراكات الأعضاء، مهنته «ثوري» متفرغ، ساب بيته وعایش في حنة مش معروفة يحرس المطبعة وينظمن. دي بقي كانت مسؤوليته في اللجنة المركزية. الاتصال به كان عن طريق تلفون الشركة اللي باشتغل فيها «جون ديكنسون» لتصدير

وتوزيع ورق الكرايس، شركة ورق إنجليزية كبيرة. بعد كام درس عربي، عبد الستار الطويلة بالطربوش، بطل ييجي، اختفى أيام وبعدين كلمني في تلفون الشركة وقال لي :

- أنا هربان، جم يقبضوا عليّ وهربت، حنغير مكان المقابلة، المرة دي نتقابل في شارع قصر النيل، حنكمل شغلنا عادي .

أنا رديت :

- آه طبعًا .

عمارة كبيرة واخدة زاوية شارع قصر النيل وفيها محل كبير يمكن «صيدناوي» أو «داود عدس» . عبد الستار أجّر أوضة من أوض السفرجية والطباخين فوق السطوح .

رحت له، الواحد يطلع بالأسانسير لغاية آخر دور وبعدين ياخذ سلم الخدامين للسطوح. أوضة عادية. كملنا دروس علشان ضروري أتعلم عربي، وأداني اسم حركي، وكتبت اسمي الجديد على كتاب العربي: «فضيلة»، واستمررت أدّي دروس فرنساوي ولكن لطالب جديد، فين بقى؟ في القلعة، حنة شعبية، واحدة زيي شكلها خواجية إلى حد كبير تعدي هناك، أكيد ملفنة للنظر ومثيرة للشبهات. كنت باخد الشارع اللي بيطلع على القلعة وبعدين شمال في شارع محمد علي اللي ساكنين فيه عائلات الناس اللي بيرقصوا في الأفراح، الشاب الجديد دا بيته في واحد من الشوارع الجانبية. عيلة الشاب عيلة محترمة، ما حسسوني ش حاجة تضايقتني، بيت بسيط، كنية بسيطة، أبسط من بيت طالب العباسية، بس مش دا المهم، المهم هو إني كنت باحبيب له المنشورات في القلعة! أستلم المنشورات واروح شارع محمد علي، أدّي له الدرس واسيب له المنشورات وانزل اروح. أخش عندهم بشنطة مليانة منشورات واطلع بشنطة فاضية، واحط قماش أو خضار أو أي كرايب علشان ما يبانس إنها فاضية. الشغلانة دي استمرت مدة، لكن عليّة - «ألييت» - اختقت من حياتي .

بعد بيت القلعة كان فيه بيت بين العباسية والحدايق. بيت قديم شيك مش عارفة جابوه منين، وأدوني كلمة سر علشان استلم المنشورات، جملة نتأكد بيها من بعض. هل دا البيت اللي فيه المطبعة؟ خبّطت على الباب وقلت كلمة السر ودخلت، المنشورات تحت، فوجئت إن لازم اطلع فوق أخرج من باب غير اللي دخلت منه، احتياطي علشان لو حد شافني وأنا داخلة، ولكن في نفس الوقت مش عايزين حد من أهل البيت يشوفني فمش ممكن استخدم السلم الداخلية. فيه علبة أسانسير بين الدور التحتاني والدور الفوقاني، تجويف صغير نص متر في نص متر، يظهر أسانسير أكل، المطبخ تحت والناس اللي حتاكل ساكنة فوق. الشاب عايزني أدخل الأسانسير المربع دا، وهو بمنافيل بحبال من الدور الفوقاني يسحبني. جيت ادخل في الأسانسير، أنا ما كنتش نحيفة، مش تخينة زي دلوقت بس كنت مليانة، وكنا بنقول بين بعض أنا وعليّة إني محتاجة اخس، بس مش عارفة، أصلي باكل كثير. دخلت الأسانسير أنا والمنشورات والشاب ابتدا يطلعني بالمنافيل، بس الحكاية ثقيلة عليه، تعب، يرفع شوية وبعدين يسكت، ويرجع يحاول تاني، وأنا جوه العلبة بافكر «مسكين الشاب دا». والله كان في منتهى الأدب، كنا بنعمل شغل سياسي حقيقي ولا انا قلقت مثلاً إني قاعدة لوحدي مع شاب في سني أو أكبر شوية، ولا هو فكر في معاكسة، وحتى لو فكر ما ورّانيش ولا عمل أي حركة

زيادة عن إن احنا ثوربين وبنعمل عمل ثوري شديد ومهم وخطير ولازم ناخذ بالننا من البوليس. في النهاية مسكين نجح، وخرجت من خرم صغير مربع، وهو ساعدني بإيده، فانا قلت له :

- أنا آسفة على التعب، ما كنت اطلع من الباب اللي تحت أو على السلم وخلص .

فقال :

- لا، لا يمكن، علشان الأمان لازم تطلعي بالطريقة دي .

وخذت المنشورات اللي طبعوها في الشنطة وخرجت بيها من البيت. مش فاكرة ودّيتها لمين ولا فين. مشيت من البيت من غير ما اعرف هو مين ولا اسمه إيه، فضلت فأكراه لأن مغامرة محرجة. ما شفتش الشاب دا ثاني إلا بعد حوالي 40 سنة وكان اتجوز إجلال السحيمي أخت عابدة، وعرفت بقى ان اسمه عبد الحميد السحرتي، ما اتكلمناش في الموضوع وانا ما سألتوش، يا ترى افكرني؟ عليّة «آلييت» كمان ما شفتهاش إلا بعد ما فاتت سنين طويلة وبالصدفة في اسكندرية في الحي اللي كنا بنصيف فيه عند فتحي رضوان، العصافرة. شفتها ماشية على الكورنيش رايحة جاية بأرستقراطية شديدة وماسكة كلب وولف، صغير في السنّ لكن عالي، تقريبا طولها، كانت كبرت طبعًا بعد كام سنة بس زي ما هي ما اتغيرتش، يمكن طولت شوية، ممكن لأن سننا كان أقل من 18 سنة لما اتقابلنا في الأول. ناديت عليها :

- «آلييت»! «آلييت»!

عرفتني :

- «ماري»! ازيك؟ «Comment ça va?».

دا بعد ما انا اتحبست مرتين وخرجت ويمكن كنت خلفتك كمان، يعني يمكن بعد 15 سنة من آخر مرة وزعنا منشورات سوا. قلنا حاشوف بعض ثاني أكيد ولكن ما حصلش .

نرجع لعبد الستار الطويلة، المسؤول عني وعن عملية الجهاز الفني «المطبعة». كلمني عبد الستار ثاني في الشغل :

- ما تجيش الأوضة، قابليني في محطة ترماي باب اللوق، تمشي ورايا كأنك ما تعرفينيش، حاكون لابس جلابية بيضة .

كان لسه فيه ترماي أيامها. وفعلاً رحق لقيته ماشي يبص يمين ويبص شمال بالجانب بشكل مريب، واثأكد إن انا شفته ومشيت وراه، مش عارفة رحنا فين، حكى لي إن البوليس هجم على أوضة السطوح :

- وانا هربت من السلم الثاني .

فيه سلمين في العمارة :

- خرجت لابس جلابية بيضة افتكروني من الخدامين وما عرفونيش .

ساب الأوضة باللي فيها وهرب، ومن ضمن ما فيها الكتاب والكراسة اللي كنت باتعلم بيهم عربي، ولكن الحمد لله إن على الكراسة والكتاب مكتوب اسمي الحركي «فضيلة» مش اسمي الحقيقي: هي دي بقى فايده الأسماء الحركية. المقابلات أصبحت بالطريقة دي، يكلمني في الشغل ويديني ميعاد في محطة ترماي أو أتوبيس، أشوفه ويشوفني وما نكلمش بعض، يبجي الأتوبيس يركب هو درجة ثانية وأنا اركب درجة أولى. ولما يبجي مكان النزول يفوت قدامي لو قاعدة على كرسي أقوم من غير ما نبص لبعض، ينزل وأنا انزل وراه، يمشي وأنا امشي وراه على مسافة. عبد الستار سكن مع «زميل» عايش مع أمه وأنا حسيت إنهم بياخدوا منه إيجار. أكيد كانوا مخبيين المطبعة هناك، والزميل دا كل اللي اعرفه عنه إن اسمه الحركي «عبد النبي»، مش فاكهة اسمه الحقيقي. كنا «خلية» أنا وعبد الستار والزميل «عبد النبي».

فاكرة بيت السيدة زينب لأنه كان آخر بيت .

الشغل السياسي كان محصور في كذا: تمويه للبوليس السياسي، وتمويل من خلال دروس الفرنساوي اللي بادئها، وتوزيع المنشورات اللي بتتطبّع .

طول السنة دي تقريباً والبوليس بيدورّ على الجهاز الفني، اللي هو المطبعة، يا اللي انا عمري ما شفتها المطبعة دي! باخد المنشورات اللي بيطبّعوها لكن ما اعرفش بيطبّعوها إزاي. طباعة رديئة على فكرة. أيامها كنت باعرف عربي قليل، والمنشورات مكتوبة بالعربي طبّعاً، كتابة كثير وضيقة. مش مثلاً يطبعوا بحروف كبيرة شعارات أو أفكار محددة، لا، صفحتين ثلاثة وكتابة صغيرة وكلام كثير مدبسة من هنا ومن هنا. يلا معلش، كانت طريقة بدائية عملية نشر الفكر الشيوعي في المجتمع المصري. أعتقد إن قليلين اللي كانوا بيقتعدوا ويقروا المنشور دا من الأول للأخر .

في السنة اللي انا اشتغلت فيها مع عبد الستار غيرّ مكان سكنه ثلاث مرات. مرة كان عند فؤاد بلبع في العباسية أو في الحدائق مش فاكهة كويس، بعد كذا راح في أوضة الخدم على السطوح، فوق «داود عدس» في شارع قصر النيل، ومرة تالته في السيدة زينب في بيت «عبد النبي». لو نروح السيدة أوريه لك، ورا الجامع، وانت جاية من شارع المبتديان والجامع في وشك الحارة تبقى على يمين الجامع، الواحد يمشي مسافة في الحارة دي وبعدين يدخل في حارة ثانية صغيرة يمين وبعدين شمال، بيت شعبي طبّعاً في حارة صغيرة ومش ممكن حد يفوت منها إلا من سكان الحتة. أكيد من أول مرة أنا رحّت خدوا بالهم إن فيه حد «غريب»، تصوّرني إن المفروض بالعكس، المفروض إن المكان دا يكون في منتهى الأمان والسرية والاحتياطات من البوليس .

المشكلة اللي عرضوها عليّ، عبد الستار وزملاته أحمد الرفاعي وأنور عبد الملك وواحد أظن اسمه لمعي، إن عايزين يأجروا بيت يحطوا فيه المطبعة، بس لازم يكون ساكن فيه اتنين متجوزين

عاديبن علشان ما يفتوش نظر البوليس يوافقوا إن بيتهم بيقى «الجهاز الفني»، ما لقوش، ودا المفروض السبب اللي علشانه حصل الجواز بيني وبين عبد الستار الطويلة. سألوني :

- مستعدة تتجوزي؟

وانا كنت مستعدة لكل شيء، كنت في حالة تنويم مغناطيسي، جو من السرية ومن المغامرة والمؤامرة والكفاح ضد البوليس فما كنتش باحسب أي حساب .

- هل شرط علشان تتجوزي إن الشخص دا يكون مسيحي؟

أنا لقيت السؤال غريب شوية، أنا فاهمة إن انا لو حاخش في العمل السري وابقى محترفة، حاسيب الحياة العلنية، حاسيب البيت وحاهرب من عند ابويا وامي، إزاي ممكن في الظروف دي يسألوني مسيحي ومسلم؟ تفرق في إيه؟

قلت لهم :

- لا مش شرط .

وكمان الحقيقة إني ما كنتش واخدة بالي قوي إن المصريين مسيحيين ومسلمين، المصريين مصريين - عرب - الخواتم هم اللي مسيحيين ويهود، آخر لخبطة في دماغي .

قعدوا يفكروا وفي النهاية يظهر ما لقوش طريقة تانية علشان يخبوا المطبعة دي. فجه عبد الستار الطويلة وقال لي :

- عندك مانع إننا نتجوز؟ أو نعمل نفسنا متجوزين؟ ونقعد في شقة ونكوّن خلية الجهاز الفني؟

- لا معنديش مانع .

واضح إن انا كنت عبيطة أكثر من اللازم، هو كان عنده 22 سنة وانا بعد شهر حاتم 18 سنة، فقال لي :

- بس لازم نعمل عقد جواز .

- نعمل، مش مشكلة .

قطعاً هو لاحظ إن انا أقل وعياً من تصوّره لأنه قال :

- ممكن نعمل جواز عرفي بشهود، لأنه مستحيل نعمل جواز حقيقي بمأذون من غير أوراق .

أنا دلوقت باتساءل إيه هي الأوراق اللي كانت ناقصة، عبد الستار كان هربان من البوليس وبيدوروا عليه مختفي في الحياة السرية للتمويه علشان ما يقبضوش عليه، أوراقه هو اللي ناقصة ولا أوراقي أنا اللي ناقصة؟

في يوم، اتعمل عقد الجواز العرفي في بيت أحمد الرفاعي، كان ساكن مع درية مراته في القصر العيني من ناحية المنيرة قدام الشارع اللي بيروح الجامعة، حارة صغيرة جوه. برضه مكان غلط، ما كانش المفروض إن أنا أروح الحنت دي علشان لو فيه بوليس سياسي مراقبهم بيلاحظني على طول. الجواز دا كله فيه عدم نضج ونوع من الاستغلال، لأن واحدة أجنبية ماشية في السيدة زينب ملفتة للنظر، الجواز ما ساعدش في التمويه. على أي حال اتعمل عقد الجواز بوجود أحمد الرفاعي كشاهد وأنور عبد الملك الشاهد الثاني اللي لازم أقول إن لما بافتكره دلوقت كان الوحيد اللي مش مرتاح للعملية دي كلها .

عبد الستار استريح كدا وبقيت أقابله في بيت السيدة زينب .

ابتديت انزعج من العلاقة دي اللي دخلت فيها، من ناحية إيه؟ بعد أسبوع عشر أيام عبد الستار قال لي إن عبد النبي و امه ناس فقرا، فحقتي لما آجي أجيب معايا كيلو رز أو كيلو سكر، شوية شاي، بقالة زي دي. أنا ما كانش عندي فلوس، باشتغل سكرتيرة وفي بداية الشغل والمفروض حيزودوني بعد مدة، لكن باقبض ستة جنيه وبادي الفلوس للبيت، لابويا وامي، فمش عارفة أعمل ازاى علشان أجيب رز وسكر. عندنا في البيت فيه دولاب صغير بيحطوا فيه مثلاً اتنين كيلو سكر خزين غير اللي في علبة كل يوم، خدت كيلو سكر ومش عارفة شاي ولا إيه تاني من خزين البيت. حسيت مش مطبوط أعمل كدا في أهلي وحسيت إن دي سرقة، وأمي قعدت تسأل: «إنت خدت السكر؟ طب إنت خدت السكر؟» ليّ ولا بوياء ولـ«برتو» اللي كان عنده 13 سنة، وأنا أقول لا، كلنا بنقول لا، وبقى لغز في البيت إزاى ممكن يختفي السكر، لغز إن تموين يختفي من البيت. كان عقلي صغير، والله مش عارفة إيه اللي حصل لي، بس عملتها مرة وبعد كدا ما عملتهاش تاني وابتديت أحاول اشتري .

الفترة دي ما استمرتش كثير، يوم تلاتين مارس 1949 - عيد ميلادي الـ18 وكان المفروض آخر النهار أرجع البيت ونحتفل مع أهلي - وأنا خارجة من الشغل الساعة واحدة عبد الستار اتصل بيّ وقال عندنا اجتماع خلية في السيدة زينب. ركبت التراما اللي بيروح من شارع التحرير لغاية ميدان السيدة زينب. كنت حفظت السكة وأصبح مفيش داعي إن عبد الستار يقابلني ويمشي قدامي في الشوارع. وصلت بيت عبد النبي، كان فيه شوية سندوتشات فول وطعمية على المكتب علشان نتغدى ونبتي شغل، يعني اجتماع خلية، يمكن كان فيه أوراق مطبوعة على التراييزة مع السندوتشات؟ يا دوبك أنا قعدت على المكتب ولقيت الباب اتفتح واربع خمس رجالة دخلوا البيت وانتشروا في كل حنة وواحد مسكني من دراعي. مش فاكرا لو أم عبد النبي فتحت الباب ولا هم اقتحموا، كنت قاعدة بالطبط زي ما أنا قاعدة قدامك دلوقت، عبد الستار قام وقف، فهم أسرع مني، مسكوه هو كمان وابتدوا يفتشوا البيت. فين وفين لما فهمت ان دا البوليس، رجالة لابسين مدني وأنا في حالة الـ shock - صدمة - حصل لي نوع من البلادة أو الشلل في المشاعر والأفكار، اكتشفت إن باطل افكر وما باشعرش ولا بالخوف ولا بالزلزل ولا بافهم أي حاجة. فعلاً فضلت واقفة كأن إيه بانقرج على فيلم، مش على أحداث بتحصل لي وأنا جزء منها. خدوا عبد النبي، قبضوا عليه هو

كمان، وعرفت بعدين إنه يا عيني كان شيوعي مبتدئ ويا دوب مترشح للعضوية، فكان زعلان جدًا من خراب بيته من تحت راس عبد الستار الطويلة. وخدوا عبد الستار الطويلة طبعًا وما شفتوش ثاني إلا في المحكمة لما اتعرضت قضيتنا .

البوليس خدني، حطوني في الكاميون وودوني سجن الأجانِب. مش فاكِرة التحقيق حصل في سجن الأجانِب ولا في قسم السيدة. في التحقيق بسرعة سألوني على اسمي وعنواني وعلى معلومات عني، وانا رديت عليهم بكل صراحة، فراحوا البيت عندي، عند أبويا وأمي، وفتشوا، ما كانش فيه ولا منشورات ولا غيره في البيت فخدوا الصور العائلية، خدوا صور كثيرة ودي كانت أكبر خسارة .

حاجتين لفتوا نظري في سجن الأجانِب: أولاً إن السجانَات النباتية كانوا بنات صغيرين، شابَات مش شاويشات كبار في السن، والمفاجأة الثانية إن السجن كان بيت مش عنابر وزنازين. شقة زي دي فيها أَوْض بكذا سرير للمسجونَات اللي بتوصل. بيحي لنا الأكل من بره، من مطعم تحت البيت، ما كانش بنطبخ، وكان فيه اتنين أو ثلاث ستات بيخدموا، يمسحوا وينضفوا المكان. بيت مفتوح، فيه حرية للتحرك جوه الشقة، مفيش طريقة للهروب، باب الشقة الكبير مقفول وحديد على الشبابيك وكنت باشوف الهلال الأحمر من شباك سجن الأجانِب .

فردوس، واحدة من السجانَات، أصغر واحدة فيهم، شابة عندها 20 سنة تقريبًا، تعرف شوية كلمات انجليزي، وبتحب تأكد إنها تلميذة وبتذاكر من منازلهم. مشيتها وكلامها بتقول إنها متعلمة. الموضة بالنسبة لتسريحة الشعر تشبه طريقة أم كلثوم بالفرق في الوسط وملوم لورا. أول مرة أسمع عن وزير للتعليم اسمه طه حسين كان على يدِ السجانَة الشابة فردوس، كانت بتعبده. ما اعرفش كان وزير ساعتها ولا لسه، بس طه حسين خلى التعليم مجاني وهي واضح كانت بتستفيد من دا، تشتغل سجانَة وتدرس من منازلهم. كان فيه سجانَة ثانية نباتية، بس أنا مش فاكِرة السجانَة الثانية دي خالص، بافتكر فردوس بالذات علشان كانت بتكلمنا، بتكلمني أنا بالذات. اتأثرت منها ومن الطريقة الشعاعية اللي بتتكلم بيها عن طه حسين، إنه ضرير وإنه مُكافح، فردوس، مش بأنساها أبدًا .

اتنين بس من المسجونَات أفنكرهم، واحدة إيطالية يظهر بترقص في الكباريهات، وبتمدح في «la chute de hanches» - سحبة مؤخرتها - «من الوسط لغاية الركبة من ورا خط واحد من فوق لتحت، مفيش كلاكيع». يمكن اعتُقلت لأسباب آداب وتهم زي دي لكن كانت بتتكر وبتدافع عن نفسها، محطوطة في سجن الأجانِب في سبيلها إن تتطرد من مصر وترُوح إيطاليا .

مسجونَة ثانية وصلت هي وبنتها، فلسطينية، إحنا ساعتها كنا في أبريل تسعة واربعين بعد إعلان دولة إسرائيل في تمانية واربعين، ودا موضوع ما كنتش متابعاه ولا فاهمة قوي موضوع فلسطين، في البيت ما جاتش السيرة، وفي الاجتماعات اللي كنا بنعملها أثناء السنة الأخيرة في الخلية المصرية كانت مركزة على المنشورات وتوزيع المنشورات، ومين اتقبض عليه ومين ما اتقبضش عليه. يمكن السنة اللي قبلها كان فيه شوية مناقشات سياسية في القسم الإيطالي، وكلام عن الصهيونية «قد يه غلط» لأنها عنصرية، وان احنا الشيوعية نبقي «عكس الصهيونية»، كان فيه

شوية توعية سياسية في اللي بيحصل حوالينا، بس برضه مش كثير أو مش كفاية. إنما أول ما رححت مع المصريين ما كانش فيه أي كلام في السياسة. طول السنة اللي معاهم لحد ما اتقبض عليّ عشت مش دريانة باللي بيحصل في الدنيا من أحداث، لغاية ما - زي ما باقول لك - اتقبض عليّ ورحت سجن الأجانِب وقابلت الست الفلسطينية دي. ست تختوخة وبيضة، بنتها عندها زي عَشْر سنين، خدوهم من على الحدود، بيهربوا من فلسطين، حطوهم في سجن الأجانِب معنا هي وبنتها لغاية ما بيتوا في حالتهم. جوزها وابنها كانوا في قسم الرجال، في الشقة اللي قصادنا، وبشوية الفلوس اللي معاهم تبعت تجيب عيش فينو وموز وتعمل سندوتشات موز، وتستتي إن الباب يفتح - كانوا يفتحوا الباب بانتظام علشان يدخلوا الأكل - فجوزها يقعد في مدخل شقة الرجالة وهي على مدخل شقة الستات، وتناولهم سندوتشات الموز .

دي كانت أول مرة أنتبه إن فيه ناس بتهرب من فلسطين، وبعدين إيه، مش بس بيهربوا دا كمان بيتقبض عليهم على الحدود المصرية وهما جايين .

الست الفلسطينية دي ما كانتش بتعرف أي لغة غير عربي فلسطيني وأنا كنت باتكلم عربي مصري قليل، فما بالك بقى عربي فلسطيني، مين عمل مترجم؟ بنتها اللي عندها عشر سنين. نقعد أنا وفردوس نسألهم. الست تحكي والبنت الصغيرة تعرف انجليزي طشاش وفردوس ما تعرفش إنجليزي تقريباً خالص، وأنا اعرف شوية انجليزي بس برضه بسيط، وقعدنا نتكلم ونتفاهم ونفهم فيه إيه، وإيه حكايتهم الناس دول، بالانجليزي، عن طريق البنت الصغيرة اللي كانت في غاية الذكاء، لما ما كانتش بتعرف كلمة، كانت بتلاقي، بتخترع طرق علشان تفهمني بالإشارة وبالصوت .

الفترة اللي قضيتها في سجن الأجانِب كانت قصيرة. يظهر ودوني سجن الأجانِب متصورين إني أجنبية عندي جنسية تانية وبالمرّة حيطلعوني من البلد، لكن اتضح لهم إن أنا معنديش بلد تاني، معنديش جنسية تانية، فنقلوني سجن مصر .

كنت قاعدة في شقة سجن الأجانِب بقميص نوم وروب، أمي وأبويابوهم لي، يوم النقل لسجن مصر لبست اللبس اللي اتقبض عليّ به، اللبس اللي كنت لابساه علشان عيد ميلادي. جونلة مربعات أبيض واسود بالورب. كنت باحب الجونلة دي، قماش كوردونيه آخر موضه مش بيتكرمش بسهولة وبلوزة كام «جابونيز ترواكار» يعني ولا نص كم ولا كم طويل، برضه آخر صيحة، كان اختراع جديد. وإيه تاني؟ أه وسط الجونلة كان ضيق لكن من تحت كانت بتوسع فجأة عند الهانش، فكانت بتعمل تموجات بيسموها «جوديهات»، حتعرفي يعني إيه جوديهات، حابقي اوريهم لك على فستان اتنشر في آخر عدد من مجلة «حواء». لابسة آخر موضه وعاملة فرانشة ومش فاكرة لو مسيية شعري ولا ملموم «ديل حصان» زي ما بيسموه هنا. دخلوني عند مأمور سجن مصر باللبس دا، في نفس اللحظة دخلت واحدة باين عليها أجنبية، لابسة عادي مش على الموضه، المأمور أداها باكو قطن كبير وحاجات تانية وقال لها :

- أبوكِ اللي باعتها لك .

وشاور عليّ :

- دي شيوعية جديدة .

فهي بصت لي وابتسمت ابتسامة رقيقة ومشيت. ما اعرفهاش، وما ركزتش معاها، كنت مشغولة بمسألة دخولي السجن .

إجراءات الدخول: الأول أسيب كل حاجة خاصة بيّ في الأمانات، الساعة والإسورة الذهب ولو فيه فلوس، ولو إن ما اظنش كان معايا فلوس، مش فاكرة بيسموه ايه، بس الإجراء دا له اسم معين. الست السجانة اسمها توحيدة ريسة السجانات: ست ضخمة لابسة اللبس العسكري وساعات تلبس بالطو أبيض. كبيرة في السن نسبياً، أكبر من فردوس، حطت إيدها الثقيلة على كتافي وعلى رقبتني من ورا وسحبنتني، عندها ابتسامة خفيفة ومش باين تعبير على وشها، لا كويس ولا وحش، ولا تعاطف ولا كراهية، بس انا ما كنتش مركزة، برّضه رهبة دخول السجن ما كانتش مخلياني أهتم بالتفاصيل، لسه، فيما بعد التفاصيل دي أصبحت كل حياتي .

الريسة توحيدة سحبنتني من أوضة المأمور للحوش، ومن الحوش لبوابة حديد كبيرة لحوش تاني فيه مبنى صغير، فيما بعد عرفت إن دا مغسل ومكوة لمسجونات الأشغال الشاقة. الستات مش بيكسروا الحجر في الجبل زي الرجال، بيقضوا الأشغال الشاقة غسيل ومكوة في المبنى دا. لمحت سجّاننتين شكلهم أصغر، بيتقرجوا عليّ وأنا مسحوبة مع توحيدة. بعد المغسل على اليمين بوابة حديد كبيرة وعالية: بوابة العنبر. العنبر اربع ادوار، ثلاث ادوار فوق للمسجونات اللي واخدين حكم، لابسين الميري، لبس السجن، اللي هو عبارة عن جلاية بيضة بيسموها الشوال، والدور الأول للمسجونات اللي لسه تحت التحقيق ودول بيفضّلوا باللبس الملكي، لبس بيوت، لبسهم .

العنبر طويل، طوله كيلومتر. ما اعتقدش كيلومتر، بس طويل قوي قوي قوي قوي، أكثر مما تتصوري. الثلاث ادوار اللي فوق عنابر، الزنزانة بتاخذ حوالي عشرين نفر، الدور الأول الزنزانة ثلاث امتار في مترين بتاخذ من نفر لثلاث انفار. باب الزنزانة حديد - كل بوابات السجن حديد - له فتحة اسمها «نضارة»، أظن بيقولوا عليها «طاقة» الزنزانة، بتفتح من بره بس والسجانة تبص جوه تشوف اللي بيحصل في الزنزانة في أي وقت من غير ما تضطر تفتح الباب، وفوق النضارة شراة بعرض الباب عليها قضبان مفتوحة على طول علشان التهوية .

الشاويشة توحيدة طلّعت المفاتيح اللي كانت معلقة على وسطها وفتحت بوابة العنبر وإيدها على قفايا على طول، دي طريقته، تحط إيدها على رقبة وكتاف الشخص علشان توجّهه. دخلنا العنبر ومشينا قدام كذا زنزانة، زنازين مقفولة، ما باشوفش جواها فيه ايه، لغاية ما وصلنا على ما أعتقد لنمرة حداشر، زنزانة نمرة حداشر. فتحت الباب بالمفاتيح، دخّلتني جوه وقفلت الباب ورايا .

لوحدني لأول مرة من ساعة ما اتقبض عليّ .

سجن الأجانب كان شقة، ما كنتش لوحدي .

قصاد باب الزنزانة شباك عالي أطول مني وعليه حديد، فيما بعد كنا بنحط حاجات تحتيه على الأرض ومنتشعبط علشان نتفرج شوية بره فيه إيه الأرض أسفلت، لقيت جردلين في الركن، جردل مدور فيه ميه وكوز صاج بإيد فهمت إن دي مية شرب، وجردل تاني جنبه بيضاوي مش كبير وفاضي برضه فهمت بعد شوية إنه للـ «pipi» - البول. في ركنة تانية بالعرض تحت الشباك فيه «البورش»، يبقى إيه البورش؟ حصيرة من حبال مضفرة، دا بقى للنوم .

كل اللي كان معايا جزمة ويمكن قميص نوم، أمي وأبوي بعنوا لي شوية غيارات في العشر ايام اللي قعدتهم في سجن الأجانب. ويمكن فوطة وش .

قعدت على الأرض .

وصلت الزنزانة على الظهر، في وقتٍ ما دخلوا لي طاستين في عمود قديم مطبق، طاسة فيها رز، والتانية فيها كوسة أو صنف خضار، بحتة لحمه .

مش بطال دا. كان كويس. أنا لقيته كويس جداً .

كان فيه على البورش بطانيتين لونهم اسود زي بتوع العساكر، عندنا في البيت هنا واحدة صوف انجليزي سودا زيها، خشنة .

أكلت، وبعدين شربت، وبعدين جه الليل، طبعًا مفيش نور، قعدت واستنيت، وبعدين خدت الفوطة وحطيت الجزمة جواها وحطيتها تحت راسي ونمت .

غير مريح .

مش متعودة على نوم الأرض، بعد شوية عضم الجنب يوجع، فالواحد يتقلب على الجنب التاني، طول الليل انتقلب. ولأول مرة في حياتي على الفجر ركبي توجعني، بيقلوا من الرطوبة .

بس أنا كنت متوقعة أوحش من كدا، فما اشتكتش .

ما صحيتش من نفسي طبعًا، هم بالمفتاح فتحوا الباب الصبح بدري وواحدة من السجانات الصغيرين، مش توحيدة، قالت بصوت عالي :

- يلاً! دورة الميه .

الحقيقة في الوقت دا ما كنتش اعرف إيه هي «دورة الميه» بس قمت معاها. في آخر صف الزنازين فيه طرقة مستخبية فيها أربع أو خمس كابينيئات بلدي من غير باب، وعلى الحيطه اللي قصادهم خمس ست حنفيات وستات كثيرة. لما وصلت السجانة قالت :

- يلاً يلاً يلاً !

فخدوا جرادل الميّه وطلعوا بره، فهمت بعد كدا إنهم مسجونات عاديات وانهم بيلمّوا جردل الكابينيه من الزنزانه يكبّوه ويغسلوه ويرجعوه الزنزانه، وكان لازم اعمل زيهم. دخلت و عملت في الكابينيه البلدي اللي من غير باب، الحقيقه المسجونات مُريحين، اللي تيجي تملا جردل ميّه من الحنفية قدامي ما تبصش، الحكاية عندهم أصبحت عادية. غسلت أيدي في الحنفية وخرجت، رجعوني الزنزانه تاني و قفلوا عليّ .

بيجيوا شاي باللبن بالسكر الصبح، واحده من المسجونات بيسموها «النوبتشية» تمرُّ بأبريق كبير شاي بلبن بسكر جاهز، تخش كل زنزانه تصب بالكوز وتخرج. الفطار الصبح بيضتين مسلوقين - معظم الوقت مش طازة - بس أهه ماشي، وحتة عيش .

بعد ساعتين، فتحو الباب تاني والسجانه بتقول لي :

- يلاً طابور .

يعني إيه طابور؟ ما اعرفش. في نفس الوقت اتفتحت الزنزانه اللي جنب زنرانتني وخرجت واحده لابسة ملكي زيي. حافتكر لك اسمها، يا «انجيل» يا وداد، لا، مش فاكرة. خرجت ومعايا المسجونه الثانية دي. فضوا الحوش اللي قدام المغسلة والسجانه قالت لي :

- يلاً اتمشي .

وفهمت إن التمشية دي بيسموها «طابور».

على طول رحنت عند المسجونه الثانية لأنني خمنت إنها شيوعية :

- اسمك إيه؟ إنت هنا ليه؟

كلمة زي دي. المفاجأة انها ما بتردش! تبص لي بوش زي الحديد وما تردّش، لفّت وشها الناحية الثانية وسابتني وابتدت تتمشي مشية نشيطة من الحيط للحيط في الحوش المستطيل اللي بين المغسل والعنبر. الملاحظة توحيدة والسجانتين المسؤولين عن الدور ركنوا على باب العنبر يتفرجوا علينا ويضحكوا، توحيدة جت وقالت لي :

- معلش هي كدا، اتمشي انت كمان علشان عندك نص ساعة وحارج أقفل عليك تاني .

ابتديت انا كمان أحاول امشي خلف خلاف مع الزميلة اللي ما بتكلمنيش .

خلصت النص ساعة طابور، ورجعت الزنزانه. وقعدت لوحدي تاني. الضهر جالي الأكل، وبعدين الساعة ثلاثة ونص اربعة فتحو الباب ودخلوني الحمام، وبعدين طابور بعد الضهر، بس المرة دي انا كنت جاهزة إن الزميلة دي مش حتكلمني فما اتأثرتش. الساعة اربعة ونص بعد الطابور قفلوا عليّ تاني، أثناء النهار بيقلوا الزنازين قفلة واحده، وبالليل قفلتين، ويدوا التمام :

- تمام .

- تمام .

- تمام .

بيردوا على بعض الأرباع ادوار لما يفلوا الزنازين آخر اليوم، وبعدين سمعت باب العنبر الكبير «طق طق طق» بيتقل، أنا جوه الزنزانة مش شايفة بس باتخيل .

انتهى اليوم الثاني ونمت تاني، والصبح رجع شوية وجع الركب .

إذن أول يوم دخلت السجن، تاني يوم اتعرفت على نظامهم ولقيته حلو الحمد لله واطمنت . أصل أنا ما اعرفش إن فيه ترتيب كدا في السجن . ما كانش عندي أي فكرة عن السجن . كل اللي اعرفه أو قريته عن الحرب العالمية الثانية أو غيرها هو إن فيه تعذيب ومفيش شبابيك، مفيش هوا، مفيش أي حاجة والواحد ينام على أرض مبلولة . لما نقلوني سجن مصر كنت متوقعة إن حتكون حياة جديدة كنت متوقعة الأسوأ، حتى التعذيب . كنت مجمدة نفسي، مشددة نفسي علشان اقدر استحمل .

المهم انطباعي إن أنا لقيت إن السجن نضيف والزنزانة حلوة وجميلة .

*

تالت يوم الصبح رحنا الحمام مع السجانة بالنظام اللي اتعلمته، وأنا راجعة شفت من بعيد عند الباب الكبير جنب الملاحظة واحدة لابسة ملكي زيي، مسجونة جديدة لسه واصلة، دققت فيها لقيتها إجلال السحيمي، أخت عايده اللي كنت باوزع منشورات معاها . ما اقدرش أقول لك الفرحة اللي جت لي، فرحة غير مناسبة لإجلال علشان هي زعلانة إن اتقبض عليها، بس أنا جريت بلهفة لأنني كنت في عزلة مع الزميلة اللي ما بتكلمنيش وطول النهار مش باتكلم ولا باشوف حد، قاعدة كدا في الزنزانة .

- يا إجلال ما تقدريش تتصوري قد إيه أنا مبسوطه إنني أشوفك .

وحضنتها بحرارة، مبسوطه إن اتقبض عليها! انتهى الأمر إن إجلال ابتسمت ابتسامة خفيفة .
خطوها في الزنزانة اللي جنبي وقلوا عليها . استمرينا يومين نمشي طابور أنا والزميلة اللي ما بتكلمنيش، وبعدين السجانوات من نفسهم سألوني :

- تحبي تخرجي مع إجلال؟

وخرجونا احنا الثلاثة نتفصح مع بعض في الحوش . المسجونة الثانية ما كلمتنيش ولا أنا كلمتها
للآخر، لغاية ما خرجت من السجن، حوالي سنة . اتمشيت الطابور مع إجلال وحكيينا لبعض إزاي اتقبض علينا .

في يوم الصبح بدري قبل ما نروح دورة المية وانا لسه في السرير سمعت الطاقة تتفتح وصوت واحدة :

- اسمي «ميمي كانيل»، أنا شيوعية، إنت شيوعية؟

- أيوه .

جريت على الباب أحاول اشوف، الواحد يحط عينه على الطاقة علشان يشوف وبعدين يشيل عينه ويحط بقة علشان يتكلم .

- حنبتدي إضراب عن الطعام من بكرة، معانا؟

- طبعًا .

- مفيش أكل خالص، مسموح نشرب ميه بس .

قلت لها :

- آه .

والسجانة بتجر جرها بعيد، أصل ممنوع نتصل ببعض . وابتدينا إضراب عن الطعام .

في الوقت دا أمي وأبوي كانوا يجيبوا لي أكل . اشتروا عمود مخصوص، يطبخوا ويجيبوا العمود كل يوم حوالي الساعة حداثر أو اتناشر، وكان الأكل بيخش باسمي، نبعث نقول عايزين إيه، هدوم، أكل، والأهل يجيبوا . في الإضراب المفروض العمود يرجع زي ما هو من غير ما نلمس الأكل . يا عيني أهلي تعبوا معايا في موضوع السجن، من يومين لقيت صورة أمي كتبت لي على ضهرها «دي صورتني أنا وأبوك على مركب في الطريق لإيطاليا»، كانوا مترددين يسافروا ويسيبوني في السجن . المركب كانت عاملة سعر خاص بمناسبة عيد تشينها الخمسين، وكانت فرصة، أول سفريّة لأمي من ساعة ما سابت إيطاليا في العشرينات، الصورة دي من سنة 1950، يعني أمي كان بقالها حوالي 25 سنة ما رجعتش بلدها . أبوها وأمها ماتوا وهي في مصر، لكن اخواتها وكل عيلتها كانوا لسه موجودين . عملوا كل تحضيرات السفر ووجودي في السجن كان حيوّظ الرحلة المهمة دي، لكن الحمد لله أنا أصريّت وشجعتهم يروحوا وراحوا، وخسارة إني ما كنتش معاهم . أمي كانت حابة تاخذ جوزها وعيالها وتقدمهم لأهلها في «ريبيا» .

نرجع للإضراب: ما كلتش خالص بجد .

العمود اللي أهلي بيعتوه كان بيفضل هناك قدامي وانا سايباه مقفول ويرجع لهم زي ما هو، كنت جامدة أيامها . قعدنا حوالي أسبوع نشرب ميه وما ناكلش، لحد ما طلعوننا من الزنازين قدام الباب

وشفت المسجونات التانيين أخيراً، وقفونا اتنين اتنين، جه نائب مدير السجن، راجل نص اشقر أو احمر، وكان بيتكلم إنجليزي كويس .

- «Why are you fasting?».

«ميمي» هي اللي ردت :

- عايزين إنهاء للحبس الانفرادي .

ساعتها بس فهمت اننا في حبس انفرادي، وان دا مش الوضع الطبيعي. كنت فاهمة إن دا الوضع اللي حيستمر لغاية آخر العمر .

- عايزين نتقدم لمحاكمة، وعايزين جرايد وكتب وورق وأقلام .

حلوة المطالب دي علشان كنت ابتديت أز هق بشدة، وكنت فاهمة إن هو دا السجن: إن الواحد يز هق، أتاري إنه عقوبة استثنائية، عقوبة على إيه ما اعرفش .

- وعايزين مراتب مش عايزين النوم على الأرض .

«ميمي» اللي كانت محضرة الطلبات الكويسة دي علشان الحياة تكون أحسن، من طريقة كلامها حسيت إن «ميمي» هي الريسة في الحتة، ما كنتش اعرفها قبل كدا. بالطريقة دي بعد أسبوع إضراب عن الطعام حطونا مع بعض. المضربات كانوا من منظمة «حدثو»، سجينات المنظمات الثانية ما أضربوش معنا، ما يكلموناش وما يضربوش معنا. كنا ستة أو سبعة من «حدثو» وحطونا مع بعض في زنانتين. أنا في زنزانة مع أسماء البقلي و«جانيت إسرائيل» وواحدة اسمها «برت». «ميمي» يظهر كانت تعرف إجلال فقعدت معاها في زنزانة. لا استنتي شوية، «برت» و«جانيت» و«ميمي» مع بعض، وأنا وإجلال وأسماء البقلي مع بعض في الزنزانة الثانية، وحطوا لكل واحدة مرتبة على الأرض. ابتدينا بقى نتعرف واحنا مستمرين في الإضراب، بس نبتدي أي حديث في أي موضوع، لازم ينتهي بحديث على الأكل. أنا بسبب طبيخ أمي اللي بتطبخ أكالات حلوة وفي البيت بنحب الأكل - إلا اخويا - كنت باتذكر أكالات كثيرة، وإجلال وأكثر منها أسماً: أكل أكل أكل. ما بناكلش، بنشرب مية بس، ونشبع بالتفكير في الأكل والكلام عنه، بنطرد الجوع بالخيال والذهن، تجربة غريبة .

بعد يومين جه دكتور كشف علينا، لقانا في صحة جيدة إلا أسماً البقلي، كانت ضعيفة عننا. وفعلاً بعد يومين اضراب زيادة أدونا باقي الحاجات اللي كنا طالبينها، أقلمة وكراريس وكتب، آه ومعجون وفرشة سنان ومشط وشوية تفاصيل مهمة برضه في الحياة العادية .

إدونا كل اللي طلبناه إلا التقديم للمحاكمة، كان فيه أحكام عرفية واحنا كنا مسجونين بدون محاكمة. بس وقفنا الإضراب وابتدينا ناكل، واستمرينا نتعرف ببعض ونفهم احنا مين وإيه حكاية كل واحدة .

كنت حكيت عن أول مؤتمر عام أو اجتماع عام أنا حضرته، محاكمة لـ«جوليو لاوري» المسكين، ببحاكموه على «الاتصالات الجانبية بأعضاء منظمات تانية من غير ما يمر برؤسائه»، هو كان بيديف وبيدافع عن نفسه ويقول «دا من حقي»، و«هلال شوارتز» كان من الشخصيات الكريهة اللي اشتريكت في المحاكمة، «شوارتز» شخص رفيع، مش طويل، وشه جامد وشديد في مواجهة «جوليو». دي علاقتي بـ«هلال شوارتز». «برت» اللي معانا في السجن طلعت مرات «هلال شوارتز» دا، واتقبض عليها بسبب إنها مراته، وأضربت معانا طولها من طول «هلال»، تختوخة شوية ولكن جسمها متماسك، مش مترهلة. متضايقة من وجودها في السجن، مش بتتكرر إنها شيوعية، بس قبضوا عليها بسبب جوزها وبتكرر :

- خلاص حنساfer، حنسيب مصر، مش حنقعد .

وكانت مهتمة بالتمرينات الرياضية، كل شوية تعمل تمرينات وكان عندها علم بالرياضة .

- لازم تلعبوا انتو كمان .

فعلاً كنا بنقعد كثير من غير حركة، ومعندهاش مانع تقودنا في التمرينات الرياضية. بعد مدة أفرجوا عنها لأن هي أصلاً اتقبض عليها من غير أدلة ولا أي تلبس، اعتقلت هي و«جانيت» من بيتهم، أنا كنت اتمسكت متلبسة في اجتماع في السيدة زينب. أظن الغرض من القبض عليها هي و«جانيت» و«هلال» و«مارسيل» إنهم يضغطوا عليهم يسيبوا البلد. وفعلاً «برت» وجوزها «هلال» سابوا مصر، كان عندهم جنسية تانية يمكن فرنسية أو إيطالية؟ نسبة من اليهود المصريين في الوقت دا كان عندهم جنسيات أوروبية، المهم سابوا مصر وما شفتهاش تاني ولا سمعت عنهم عملوا إيه بعد ما سابوا مصر. دي كانت أكثر شخصية اعتبرتها زي ما تقولي متباعدة، باردة. «برت».

الشخصية التانية هي «جانيت»: «جانيت» مرات «مارسيل إسرائيل» - اسمه كدا. كان قائد، والله كلهم كانوا قادة، «شوارتز» كان واحد من القادة، «مارسيل إسرائيل» طلع إنه شيوعي أقدم كمان من «هلال شوارتز» وقائد منظمة تالته مش فاكرة اسمها. «جانيت» كانت طويلة، وإنسانية أكثر من «برت»، «برت» كأن احتياجات الإنسان غير الرياضة البدنية مش مهمة، «جانيت» بتسأل وتنكلم، وتحكي عن حياتها مع جوزها «مارسيل» مثلاً. من ضمن قصصها إنهم الاتنين يهود إلا إن هي أشكيناز وهو سفرديم، حبوا بعض وما تقرقش معاهم، لكن لما جم يتجوزوا ظهرت خلافات عائلية غريبة في طريقة ترتيب الكراسي وياه اللي مسموح في الأكل، عادات عائلية دينية، بالنسبة لي كانت أول مرة اعرف إن فيه التقسيمة دي. وحكت لنا إن أيام الحرب العالمية هي وجوزها كانوا واخدين صف الإنجليز، سواء من ناحية إنهم يهود وخايفين من الاضطهاد أو من ناحية إنهم شيوعيين مؤمنين بالمساواة، كانوا كدا وكدا واخدين صف الإنجليز ضد الألمان، فلما الألمان قربوا من العلمين الإنجليز ساعدوهم يهربوا لفلسطين، ولما الحرب انتهت رجعوا مصر، زي أبو صاحبتي «أنجيلا» المسيحي الطلياني اللي خدتنني النادي الإيطالي وشقبت حياتي، رجعوا كلهم من فلسطين لما الحرب خلصت. «جانيت» في الوقت دا كان عندها ابن واحد عنده ست سنين، ما اعرفش سابوه مع مين ودخلوا السجن هم الاتنين، كانت قلقانة عليه وكانت بتتكلم عنه كثير طبعاً. «جانيت» خرجت مع «برت». أظن ما في السجن الحكايات والقصص، ما كانش عندي أي فكرة

عن القصص في باقي الأقسام الأجنبية قبل ما تحصل الفركتشة و1948 والقبض على الناس وقرار سفر الخواجات إلى أوروبا. «ميمي» ما كانش عندها تفاصيل مسلية أصلها من اسكندرية. إجلال كانت عارفة شوية تفاصيل عن طريق قرييها شريف حتاتة، قائد شيوعي هو كمان . أثناء وجود «برت» و«جانيت» في السجن، جابوا سيرة شخصية زي مثلاً «إيبو المنسترلي»، مين إيبو المنسترلي دا؟ كنت بالآقي إن هو كمصري «إيبو» يبقى اسم غريب شوية، بعد كذا فهمت إن اسمه إبراهيم وإيبو اسم الدلع، عنده اصحاب كتير وإيبو اسم سهل للمصريين والخواجات ينطقوه بنفس الطريقة . حب واحدة اسمها «إيميه»، سابت جوزها علشانها. فانتت الأيام وبعد مدة طويلة جداً عرفت إن الزميل اللي سابته علشان إيبو هو «ماكس كوهين»، رئيس مجموعتي اللي بيشر ببيبة ويدينا محاضرات! مسكين «ماكس». ما كانش عندي فكرة إن «ماكس» كان متجوز قبل «نينيا»، عموماً انا باحب «ماكس» و «نينيا» وما اعرفش إيبو بالمرّة. لكن حتى بعد ما خرجت من السجن واتجوزت، من وقت لوقت كانت بنتجي سيرة إيبو المنسترلي، يظهر كان شخصية عندهم، شاب وسيم وغني وشيوعي من عيلة المنسترلي اللي عندهم قصر على النيل في المنيل. عمري ما قابلته .

الشخصية الثالثة هي أسما البقلي. أظن كانت مدرّسة، وفيما بعد كتبت كتاب ونشرته عن المرأة. كانت مرات أسعد حلیم، سمعت عن أسعد حلیم؟ برّضه واحد من القادة الشيوعيين في واحدة من المنظمات، ما كنتش اعرفه شخصياً. كان فيه عدد كبير جداً من المنظمات، منظمة اسمها «دال شين» - «ديمقراطية شعبية» - ومنظمة «الفجر الجديد»، غير «حدثو» و«م.ش.م» منظمات كثيرة ومش عارفة إيه تفسير زحمة المنظمات دي. على أي حال أسما كانت أضعف واحدة فينا، تعبت من الإضراب عن الطعام لدرجة إن في اليومين الآخرين كانت نائمة ما بتقومش، ولما بطلنا إضراب برّضه تعبت وجالها مغص. «برت» فاهمة في الصحة نبهتنا :

- بعد الإضراب المصارين بتكون ارتاحت مدة طويلة فلازم ناكل بشويش علشان ما تحصلش دربكة في المصارين .

وفي الغالب أسما عملت كذا بالطبط، أكلت بسرعة وكثير، هي الوحيدة اللي تعبت من الإضراب ومن الأكل، نقلوها لمستشفى السجن قعدت يومين ورجعت لنا. أسما كانت سمرا وعينها رمادي عاملين زي اتنين كشافات في وسط وشها، عندها ابتسامه عذبة جداً. مخلقة بنتين لسه فاكرة أساميهم، عزة وخالدة، كان سنهم ثلاث واربعة سنين، فوق روس بعض، ورّت لنا صورهم، بنتين حلوين حلوة، أسما تعبت كمان علشان سايبه بناتها، اتقبض عليها والعيال انفصلوا عنها. كمان عندها صعوبة تستحمل مجموعة الخواجات الشيوعيات دي، حتى إجلال السحيمي أمها انجليزية، من عيلة أرسنقراطية شوية ساكنة في الزمالك تربية انجليزي. مش عارفة أحكي لك ازاي بس أسما كانت تعبانة من كل ناحية، من السجن ومن الإضراب ومن الأكل ومن فراق عيالها ومن الرياضة ومن العقليات ومن الشخصيات ومن اللغات. بس هي كمان الحمد لله خرجت بعد شهرين ثلاثة، بعد «جانيت» و«برت» بشوية .

وبكدا فضلنا احنا الثلاثة إجلال السحيمي و«ميمي كانيل» وأنا، كل واحدة عندها شخصية خاصة بيها. لمونا في زنزانة واحدة وقضينا فترة مع بعض. «ميمي» حكّت لي بقى إنها لما شافنتي أول مرة في مكتب المأمور رجعت وقالت للمسجونات التانيين :

- فيه واحدة بيقولوا عليها شيوعية بس مش ممكن تكون شيوعية، شكلها مش شيوعي .

على أساس إن انا مش لابسة نضارة نظر ومش شدة شعري لورا ولبسي مش «جد» كفاية .

- ما تزعلش .

- لا ما بازعلش، أنا ما عملتش حاجة خارج طبعي .

«ميمي» كانت من أصل ألماني وبتفكرني كتير بـ«شري» صاحبتنا دلوقت، شخصية كدا، مش جافة ولا كريهة ولكن متعودّة على النظام ومنضبطة، نقيض أسما البقلي المصرية. أسما ما كانت عندها مانع مثلاً ما تلبسش وتفضل بالجلابية أو قميص النوم طول النهار، ومش عايزة تمشي على نظام معين. أما «ميمي» وخصوصاً لما قعدنا إحنا الثلاثة مع بعض حطت لنا روتين، الصبح الأول نشرب الشاي ونفطر ونغسل السنان ونلبس ونبقى جاهزين للطابور، وساعة الطابور هوب! نمشي رايح جاي ورايح جاي ورايح جاي، مش نتسكع ونتكلم :

- عندنا وقت في الزنزانة نتكلم، الطابور دا علشان نحرك جسمنا ونشم هوا .

عودتنا أنا وإجلال على كدا، والحقيقة إنه كان كويس لصحتنا، مش وحش. جوه الزنزانة كمان لازم يكون لنا مشغلة :

- إحنا حنقعد نحكي حكايات كدا على طول؟ لازم نشغل في مشروع .

اقترحت أديهم دروس طلياني، وما اعرفش انجليزي كويس يبقى إجلال تديني دروس انجليزي، وبالمواعيد، كل ساعة لها نشاط، الساعة كذا نعمل كذا، وبعد الأكل نرتاح شوية والساعة كذا نعمل كذا، بالطريقة دي طول اليوم. «ميمي» كانت بتدرس كمنجة وناوية تطلع عازفة كمنجة في أوركسترا، في أي حنة في العالم، بس الكمنجة ما كانتش معاها في السجن فما قدرتش تدينا دروس، لكن كانت اشتركت في رحلات الكشافة، فادّتنا درس بيولعوا النار إزاي ويحطوا الخيمة إزاي وعلمتنا أغاني الكشافة. الأغاني اللي انا غنيتها لكم وانتم صغيرين زي «Auberge blottie» - «الكوخ في حضان الوادي» - مثلاً اتعلمتها من «ميمي» في السجن. أنا كنت اعرف أغاني طلياني زي «Santa Lucia e Avanti Popolo» - «القديسة لوتشيا» و«إلى الأمام يا شعب» - جايهاهم من أمي. بالذات «إلى الأمام يا شعب» نشيد سياسي ظريف أمي علمته لي. «ميمي» ابتدت تتعلم شوية أناشيد بالعربي بلكنتها، عملت مجهود علشان تتعلم عربي، جادة في كل اللي بتعمله .

بالطريقة دي فاتوا شوية وقت حلوين في السجن .

«ميمي» من إسكندرية، من بولكلي جنب رشدي، راحت مدرسة «سان مارك» و عندها ثلاث إخوات، أهمهم ماتت لما كان عندها سبعتاشر سنة و ابوها عايش لوحده وبييجي من اسكندرية يزورها في السجن كل شهر مرة ويجيب لها القطن اللي شفتها بتستلمه من المأمور لما وصلت. كان مهم

القطن عندنا، كنا ستات صغيرين والعادة الشهرية بتجيانا كلنا، وبنستعمل قطن كثير وبنطلب من بيوتنا أكبر حجم بكوات في الأجرخانة. «ميمي» عندها واحد وعشرين سنة، وإجلال اتنين وعشرين وانا تمانتاشر، كنت أصغر واحدة. ف«ميمي» اتجوزت وهي عندها 18 سنة شاب يساري من مجموعات الكشافة في اسكندرية، اسمه «ريمون بنتو»، تصوري إني لسه فاكرة اسمه! فيه أسامي مش قادرة انساها. «ميمي» عاشت سنة واحدة معاه وما قدروش يستحملوا بعض، يظهر الطلاق مش موجود ولا حتى عند اليهود فسابوا بعض واعتبروا نفسهم منفصلين. هو كان دُنْيوي يحب الحفلات ويحب الخروج ويحب الضحك والهزار وهي جد تحب النشاطات الذهنية أكثر وتحب العزف على الكمنجة وعايزة تتمرن ثلاث ساعات في اليوم علشان تقدر تكون عازفة. مش بس ما شجعهاش لكن كان بيتضايق علشان مشغولة عنه ومش فاضية له: كمنجة، قراية، شعر، موسيقى. ما قدروش يعيشوا مع بعض، اتطلقوا أو انفصلوا وهي عمرها تسعتاشر سنة. بعد كذا اتعرفت على واحد اسمه كمال عبد الحليم، أيوه الشاعر المعروف كمال عبد الحليم، ساعتها كان يا دوب نشر أول ديوان شعر له بعنوان «إصرار». راح اسكندرية مندوب عن المنظمة علشان ينظم الشيوعيين الأجانب والمصريين في اسكندرية ومنهم «ريمون» و«ميمي». «ريمون» و«ميمي» كانوا منفصلين بالفعل في الوقت دا وهي حَبَّتْ كمال عبد الحليم، وكمال عبد الحليم حبها، علاقة كلها شعر وموسيقى وسياسة وشيوعية وثورية فاتقاهموا مع بعض على طول. «ميمي» حفظت ديوان كمال عبد الحليم صم، وفي السجن الكتاب دا كان معنا و«ميمي»، حبيبته، من وقت لوقت كانت بتعمل جلسة وتقرأ لنا الشعر اللي كتبه كمال عبد الحليم، وساعات إجلال كانت تقرأ لنا و«ميمي» تسمع. حَبُّوا بعض بصحيح، «ميمي» وكمال .

في هذه الأثناء وبين الحكايات «ميمي» كانت بتعلمنا أغاني وكان لازم نغنيها مطبوط، مسكينة إجلال ما كانت عندها صوت لكن «ميمي» كانت بتقول لها :

- معلش الصوت يتربّي .

وتعلمها: «أيوه، كدا»، «لأ مش كدا» ويضحكوا، بس إجلال كانت مبسوطه إن حد عنده صبر مع صوتها. إجلال علمتنا خطوات باليه، كانت بتتعلّم باليه قبل ما يتقبض عليها، لكن ما تعدناش مرحلة الأربع وقات الأساسية، وقات مش سهلة وكنا بنجرها بصعوبة :

- يا إجلال حاولي تخترعي خطوات باليه للموسيقى دي علشان تبقي مصممة باليه مش بس راقصة .

بعد درس الباليه «ميمي» تغني لنا قطعة موسيقية زي «La berceuse» - «مُهْدَهْدَة بَرَامز» . على أي حال إحنا كنا إلى حد ما مبسوطين من النظام دا، واليوم بيخلص بسرعة من غير ما ناخذ بالنا، مشغولين، وانتهت مشكلة الزهق .

أنا باحكي كل الكلام دا علشان بالنسبة ليّ اللي حصل هو إن انا دخلت في حالة حلم أو جنون لما رحنا النادي الإيطالي وانفصلت نفسيّاً عن العالم بتاعي، صحيح كنت عايشة عند أبويا وأمي بس قلبي وذهني مش معاهم، ولا مع صاحباتي الطالينيات بتوع المدرسة، ما بقيتش اشوفهم، وبعدين الخواجات الطالينيات بتوع النادي الطلياني سافروا. وفترة الشغل مع عبد الستار الطويلة كانت فترة

مقفولة في الفكر وفي الرؤية وفي الثقافة والعلاقات الإنسانية، ما باشوفش حاجة، ما باتعلمش حاجة، جو السرية كان بيخلينا ما نتكلمش مع بعض، كأني مش عايشة في الدنيا دي، فترة فيها إثارة، لكن ما كانش فيه أي كلام سياسي أو ثقافي أو حتى إنساني. دخولي السجن كان نوع من الانفراجة، ذهنية وحياتية، ودا السبب إني باحكي حكايات السجن الأولاني، حتى القصص العائلية والحب والزواج كانت بترويني. شوفي الحكاية دي مثلاً: إجلال يتحكي عن أمها الإنجليزية اللي معلماهم إن من آداب المائدة ان يفضلوا على السفرة لغاية ما الكل يخلص أكل، مش اللي يخلص يقوم يمشي. فيقعدوا كلهم على السفرة بعد الأكل ياكلوا فاكهة، وأم إجلال بتموت في البرتقان، كل واحد ياكل برتقانة ويخلص إلا أم إجلال بتاكل برتقان برتقان برتقان، لغاية ما يتكوم جبل من قشر البرتقان قدامها والكل قاعد مستنيها تخلص. القصص دي كانت بتضحكنا بس بالنسبة لي كان عندي نهم اعرف العائلات الثانية عايشة إزاي .

أنا طبعاً حكيت لهم عن أبويا وأمي وكل قصصهم .

كان فيه كثير من الود والإنسانية بيننا، والسبب كان الحكايات .

الزنازين الثانية فيها بقية المسجونات الشيوعيات، البنات عضوات منظمة «م.ش.م» اللي من ضمنهم الزميلة اللي رفضت تكلمني في طابور أول يوم سجن، وكان معاهم إحسان أدهم وثر يا أدهم ومش عارفة مين تاني، كلهم «م.ش.م» جمّعوهم مع بعض في زنازين بعيد عننا علشان ما نتخانقش، لمينهم في زنانتين بس كانوا أكثر مننا في العدد. كنت باسمعهم بالليل، لازم فيه حد بييجيب لهم أخبار من بره السجن، إن حصل إضراب أو مظاهرة بين العمال أو مطالبة بالإفراج عن المسجونين الشيوعيين، بس لو تسمعهم بيضحكوا بعض بالحماس، تفتكري إن الشعب المصري ما كانش عنده شغلانة في الوقت دا غير إنه يطالب بالإفراج عن الشيوعيين والشيوعيات. عندهم أناشيد ثورية بيغنوها مع بعض بعد ما يخلصوا نشرة الأخبار ويهتفوا شعارات ويدخلوا يناموا. أنا نسيت الشعارات بس كانت من نوعية «تحيا الطبقة العاملة»، الطبقة العاملة كانت لازمة ما بتسيبش بفهم .

في الفترة دي أصبحنا بنخرج طابور كل المسجونات السياسيات مع بعض، مش زي في الأول كل اتنين مع بعض فكان الطابور بيبقى عامل زي الفسحة وكلنا بنشوف بعض. وفي يوم شفنا شيوعية جديدة داخله من بعيد، قبضوا عليها، «ميمي» دقت فيها شوية وقالت لنا :

- دي «أوديت»!

- مين «أوديت»؟

- عضوة في اللجنة المركزية «م.ش.م».

ما كنتش اعرفها ولا سمعت عنها، دخلت «أوديت» الحوش، طويلة ووشها حلو وبيان عليها إنها رئيسة، قومندانة. تختوخة شوية، بس فهموني إنها تخنت لأنها كانت عايشة في السرية قبل ما يتقبض عليهم، قعدوا سنة مستخبين في بيت ما يخرجوش فتختت من انعدام الحركة. إدارة السجن حطوها على طول مع «م.ش.م»، عيت وجالها إسهال لمدة طويلة ولما شفتها تاني كانت خست. مش واضح في ذهني عرفنا ازاى حكاية الإسهال أصل ما كانش عندنا أي صلة بيهم، يمكن عن طريق السجانات .

«ميمي» كانت عندها شوية معلومات عن «م.ش.م» وليه ما بيكلموناش :

- علشان إحنا خونة، إحنا بتوع الـ «M.D.L.N» - «حدثو» - والبوليس حاططنا في السجن علشان نتجسس عليهم. متطرفين وبيكرهونا ومش معترفين بينا كشيوعيين .

عرفت كمان إن «أوديت» هي راس في منظمة «م.ش.م»، هي وجوزها «سيدني سولومون»، عمري ما شفته ولا عرفت هو مين ولا راح فين. فيما بعد سمعت إن محمد سيد أحمد - وكانوا بيقولوا له «ميتسو» - كان عضو في «م.ش.م» وحبسوه في بيت ما يخرجش منه علشان ما يتقبضش عليه لغاية ما جاله اكتئاب من الحبسة ومن المعاملة كمان. بس دي قصة ممكن نسمعها منه هو مباشرة .

مع وصول «أوديت» زادت الأناشيد والتهافتات في الزنزانتين اللي جنبنا، ولكن بعد شهر تقريباً من وصولها، فجأة الملاحظة توحيدة رئيسة السجانات الضخمة اللي ما تبتسمش ولها تكشيرة قوية فتحت باب زنزانتنا في وقت غير متوقع، ولا طابور ولا تمام، دخلت الزنزانة ماسكة واحدة من رقبته، المسكة اللي كلنا عارفينها. مسجونة سمرا شوية ومش صغيرة قوي في السن - 22 سنة - اسمها «لي لي دايان»، شكلها منفعة لكن من غير عياط، وشها جامد بتبلق فينا واحنا بنبلق فيها :

- البننت دي مش عاوزة تقعد مع صاحباتها وطلبت تقعد في زنزانة لوحدها ودا مش ممكن، تاخوها تقعد معاكم؟

- طبعاً طبعاً معدناش مانع .

وبصحيح ما كانش عندنا مانع، بس مستغربين خالص .

دخلت «لي لي دايان» يا حبيبي دي، قعدت يمكن أكثر من أسبوع أو عشر ايام ما بتكلمناش، قاعدة كدا، واحنا سايبينها. يجيلنا أكل من البيت ونقاسم معاها وهي تقبل الأكل بس ما تتكلمش، نسألها شوية علشان ما تحسش إننا بنتجاهلها وبعدين نتكلم احنا. سيبناها في حالها، تمام معانا وتاكل معانا وتخرج طابور معانا، بس يا عيني مش قادرة نتكلم. أنا انفعلت من حالتها. فين وفين لما هديت، وشوية بشوية ابتدت تتكلم وفي النهاية حكيت إن من وقت ما وصلت «أوديت»، «لي لي» دخلت في تحدي وصدام معاها، ليه بقى؟ «أوديت» بتعاملهم بطريقة مش مضبوطة: ممنوع دا، ولازم دا، زي ناظرة المدرسة، فيه شيء من الـ «hiérarchie» - الرُتب والمقامات - حتى في الحياة العادية، نقول

لهم: «لما أنا اتكلم» يعني لما «أوديت» تتكلم ماحدش يقاطعها وماحدش يعترض، فابتدت «لي لي» تعترض وابتدت «أوديت» تعادي «لي لي» بشكل خاص، تستقصدها صبح وضهر وبالليل .

- فيه تصرفات ما تصحش، إحنا مش عيال صغيرة .

«لي لي» بتشرح لنا :

- حتى لو «أوديت» في اللجنة المركزية، في النهاية فيه ديمقراطية، وأصلاً إحنا زملا، إحنا ثوريين زي بعض، مكافحين زي بعض .

آخر احتكاك اللي خلى «لي لي» تنقل نفسها عندنا، واحدة زميلة حطت المشط في مكان ف«أوديت» قالت للزميلة :

- دا مش مكان المشط، حطّي وشك في الحيط .

والزميلة سمعت الكلام وحطت وشها في الحيط. وصل الأمر للدرجة دي، إن الأضعف في الشخصية بيرضى بمعاملة من النوع دا، لكن «لي لي» دافعت عنها: «دي مش طريقة، دا مش كلام» .

وتطور الموقف إلى خناقة كبيرة و«أوديت» شتمت «لي لي» علشان دافعت عن الزميلة، والزميلة ساكتة، وانتهى الأمر ان أخذوا الأصوات وطردها «لي لي» من منظمة «م.ش.م»، «لي لي» انهارت وخبطت على الباب وصرخت :

- عايزة اخرج، عايزة اكون لوحدي، مش عايزة اقعد مع الناس دول .

وتوحيدة جابتها عندنا .

قصة مؤلمة، اتعاطفنا معاها واتصاحبنا عليها واتكلمنا في السياسة وحكت لنا آراء «م.ش.م» وازاي هي مقتنعة بيها سياسياً، ولكن في النهاية دا رأي وفيه الديمقراطية. وابتدت «لي لي» تحكي عن حياتها الشخصية، بتحب دكتور مصري اسمه مراد المستكاوي، بيشغل في الهلال الأحمر كطبيب ومرتبطين ببعض، ولكن من ساعة ما اتقبض عليها معندهاش أخبار منه. بعنت له أكثر من جواب تشرح له إزاي ممكن يوصل لها جوابات داخل السجن، بس الرد ما جاش. وعرفنا كمان إن أصلها جزائرية يهودية: اسمها «لي لي دايان»، بتتطق «لي لي» مش «ليلي» .

بمجيء «لي لي» بقينا أربعة في الزنزانة مع إن قانون السجن بيقول ثلاثة بالكثير، وبعد شهر اتفتح باب الزنزانة فجأة تاني وتوحيدة جايبه بنت تانية، أصغر من «لي لي» ووصلت لنا وهي بتعيط! مش قادرة تسكت من العياط، عكس «لي لي» اللي كانت ماسكة نفسها. يا عيني البنت التانية دي كانت في قاع هرم مقامات «أوديت»، عاملة ضفيريّتين طوال وعندها حب شباب في وشها، اسمها «فيّا ياناكاكيس»، يونانية مسيحية أرثوذكس، مش يهودية، عندها سبعناشر سنة، أصغر حتى مني

أنا. وصلت لنا في حالة من الانهيار التام، ما نجحتش توصل زنزانتنا في حالة الذهول والتماسك
اللي أظهرتهم «لي لي»، «فيًا» كانت بتعيط بصوت عالي وتبرطم عاوزة تدافع عن نفسها :

- أنا شيوعية .

مش عارفة «أوديت» اتهمتها بإيه في الزنزانة اللي هناك دي، بس واضح ابتدت تستقصدها زي ما
استقصدت «لي لي». بوصول «فيًا» فهمنا منها إن «لي لي» واحدة من المسؤولين رتبته عالية
نسبيًا، ولما جت «أوديت» شالت كل المسؤوليات من عليهم كلهم وخذت هي المسؤولية الكبيرة،
الكل يسمعون كلامها. «فيًا» استمرت تعيط يمكن أسبوع، وتبرطم إن هي بنت واحد يوناني من اللي
أسسوا الحزب الشيوعي المصري سنة ثلاثة وعشرين مع عمال الترمي في الإسكندرية، يظهر
نقابة عمال الترمي كانت برضه من أوائل النقابات. أبوها من القاهرة، شخصية قوية، لكن كان مات
خلاص ساعة الحكاية دي. وعرفنا إن كان عنده دكان بيع اسفنج في شارع سليمان باشا، أنا فاكرة
الدكان دا واظن دلوقت بقى محل جزم، لو هو يبقى أكبر تاجر للإسفنج الطبيعي والصناعي في
القاهرة .

«فيًا» حكّت لنا إن لها أخ توأم اسمه «إيلْيوس»، «إيلْيوس ياناكاكيس»، وان كلمة «إيلْيوس»
بالجرجي معناها شمس. أبوهم كان شيوعي صحيح، ولكن كان عنده اعتقاد عميق بنظرية إسبرطة،
كان إسبرطي، إسبرطة مدينة في اليونان كانت في حالة حرب دائمة مع مدينة أثينا. شعب إسبرطة
كان عنده اعتقاد إن الأطفال لما يتولدوا مش لازم الواحد يحميهم ويربيهم، بالعكس، يسببهم بره في
البرد ويرموهم في البحر علشان الضعيف يعيا ويموت أو يغرق، الضعيف جسمانيًا ملوش حق
أصلًا في الحياة ومش ضروري يعيش، النظرية دي اتسمت باسمهم. كانوا بيعتبروها نوع من
التبذير إن المجتمع يخلي باله من الأضعف بدنيًا، وبالطريقة دي قدروا يستنبطوا سلالة شباب
وأجيال من الأقوياء. بيحترموا القوة البدنية والقدرة على التحمل الجسدي أكثر من أي قدرات تانية.
فلما اتولدوا العيلين دول، «فيًا» و«إيلْيوس»، أبوهم حاول يسببهم في عز الشتا عريانين على
السطوح، علشان اللي مش قدها ياخذ التهاب رئوي ويموت، واللي يستحمل يكمل. أمهم يونانية زيه
وبيتخانقوا طول الوقت لأن الأم خايفة على عيالها ومعندهاش أي استعداد إن حد من ولادها يموت
من البرد فوق السطوح وهي قاعدة تحت في البيت. بس أمهم ماتت وهما صغيرين، أطفال، والأب
اتجوز ست يونانية تانية هي اللي ربت «فيًا» و«إيلْيوس»، وبعدين الأب كمان مات ومرات أبوهم
خذت مسؤولية المحل والأولاد. «فيًا» كانت بتمدح في مرات أبوها دايمًا وتقول «هي أمنا الحقيقية»
وبالفعل مرات أبوهم دي كانت بتجري عليهم زي عيالها. كان عندهم سبعناشر سنة لما اتقبض
عليهم هم الاتنين. ما اتقبضش عليهم متلبسين، اتاخذوا في حملة قبض على الخواجات اللي معروف
عنهم إنهم ماركسيين أو شيوعيين من بعيد أو من قريب من غير أدلة، فترة أحكام عرفية في تسعة
واربعين. قبضوا عليهم علشان يرحلوه من مصر، ويطردوهم من البلد. «فيًا» كانت خايفة على
اخوها من الترحيل لأن أصلهم يوناني فمفيش غير حيرحلوه على اليونان. لكن اليونان كان فيها
حكم فاشي، نظام شديد القمع. الشيوعيين اليونانيين كافحوا ضد النازيين واشتركوا في تحرير
اليونان من الألمان والطلائنة، لكن بعد الحرب العالمية حصلت حرب أهلية في اليونان والعسكر
الفاشيست مسكوا الحكم. كانوا بيقبضوا على الشيوعيين بالذات ويرموهم في سجن على جزيرة

بعيدة أظن كان اسمها جزيرة «ماركونيسوس»، مفيهاش ولا أكل ولا مية ومستحيل الهروب منها، احتياجات المعيشة بتوصل لهم من بره الجزيرة بالمركب، وكثير تتأخر وفيه سجناء بيموتوا على الجزيرة من الظروف القاسية، والتعذيب طبعًا. شوية بشوية سجناء الجزيرة دي اتشهروا في العالم، كتبوا في الجرايد الأوروبية إن الشيعي اللي بيعتوه هناك بيمر بتعذيب وحشي، واللي ما بيموتش من التعذيب بيموت من العطش أو المرض، ما حدش بيطلع حي من الجزيرة دي. أي شيعي يوناني لسه ما اتقبضش عليه كان عايش مستخبي أو هربان في المنفى. تصوري «فيًا» واخوها مطلوب منهم يروحوا اليونان في التوقيت دا بالذات. غير إنهم أصلًا مولودين ومرتبيين في مصر وبيعتهوا نفسهم مصريين، ما يعرفوش غيرها. فـ«إيلبوس» كان زي المحكوم عليه بالإعدام و«فيًا» بتعيط، كانت سريعة العياط. أما مرات ابوهم الطيبة دي فكانت حنتجنن بتعمل مساعي يمين وشمال علشان يرحلوهم لفرنسا بدل اليونان .

ما شفتش «فيًا» تاني ولا سمعت عنها، بس مؤخرًا، بمناسبة أزمة ضرب المركز التجاري في أمريكا، قرئت في جريدة «لو موند» الفرنسية بيان مكتوب من عدد من القراء، 8 أفراد كتبوا مقالة عن الإرهاب والحرب ضد الإرهاب واللي عمله الغرب في أفغانستان، ولقيت اسم «إيلبوس ياناكاكيس» من ضمن اللي موقعين على البيان، فرحت قوي، وقلت حاكتب له أسأله عن «فيًا»، بس ما حصلش. الجرنال موجود عندي بس لازم أؤور عليه مع الجرايد اللي لسه لازم أقصصها هناك على الرف. ما كنتش عارفة انتهت إزاي قصة ترحيلهم من سنة 1949؟ واضح ان أهمهم، اللي هي مرات ابوهم، نجحت توديعهم فرنسا وعاشوا هناك .

أما «أوديت» فما شفتهاش تاني بعد السجن. بس لحد دلوقت باسمع عنها قصص القسوة من النوع دا .

الزنانة اللي عشنا فيها كل دا كانت زنانة نمره انتين .

الزنانة نمره واحد كان فيها شخصية غريبة، ست مصرية - مش خواجاية - كبيرة في السن ضهرها فيه أنب، قصيرة وعينيها فيها حول واضح، دايمًا لابسة اسود وبتعرج. غريبة في الوش وفي الجسم وفي الشخصية، مش واضح ليه موجودة معانا. «ميمي» شرحت لنا إنها أخت واحد شيعي، قبضوا عليها بالمره وبسبب الأحكام العرفية وعدم وجود محاكمة، كان فيه اعتقالات وترحيل بس، فالست دي مسكينة مرمية في الزنانة مستنبة الفرج. الحقيقة اننا كنا مش مؤدبين كفاية معاه، هي معندهاش ثقافة ومش من سننا فكانت بالنسبة لنا ست ممله وإحنا ميالين نقعد مع بعض. شابات صغيرين حبيننا بعض وتقاهمنا، نتكلم عن حياتنا ونقرا ونحكي عن الزيارات لما كان فيه زيارات، عشنا شوية حياة المعسكرات، وما نفكرش أبدًا نضحّي بالصحة دي لأي سبب. في الطابور يخرجوها معانا نسيبها تقف لوحدها، ساعات يسيبوا الزنازين مفتوحة على الممر، هي ما تخرجش، قاعدة لوحدها. «ميمي» الوحيدة اللي كانت تسيبنا - وعملته واجب على نفسها - وتروح تقعد معاه من وقت لوقت. بافتكر «ميمي» دايمًا بالخير بسبب الحكاية دي، تسألها، وتخليها تحكي شوية عن نفسها، عرفت منها مثلًا إنها كبيرة ومش متجوزة، وغنت لـ«ميمي» شوية أغاني مصرية قديمة، مفيش صوت، صوتها مش حلو ولكن بتجيب النعمة مطبوطة، و«ميمي» عندها الصبر تقعد تسمعها وتتكلم معاه وسألت عليها طول المدة اللي انا قضيتها في السجن. لما بافتكر بالاقى إن انا

كنت أنانية في الموضوع دا وكنا عيال قوي، بنقول لـ«ميمي» إنت بتضيعي وقتك ليه مع الست دي؟ ما نحبش نضيع وقتنا في المسؤولية الإنسانية، اتعلمت حاجات كتير في السجن، ومن «ميمي» بالذات اتعلمت المسؤولية الإنسانية .

*

فانت أكثر من سنة بالطريقة دي، وحت حكومة «الوفد» للحكم بالانتخاب سنة 1950، أنا بانسى التفاصيل السياسية، سعد هو اللي بيبقى دايمًا فإكر الملايسات السياسية والأسامي بالتفصيل. المهم بالنسبة لي إن حكومة «الوفد» شالت الأحكام العرفية، واعتقد إن دي من الفترات النادرة اللي عدت على مصر من غير أحكام عرفية. مع رفع الأحكام العرفية توقعنا ان تبنتي محاكمة المعتقلين زينا، لكن المحاكمات اتأخرت. سجن الرجالة كان جنب سجن النساء. العنبر الطويل اللي حكيت لك عنه كان فيه اتنين زيه في سجن الرجالة. سجن النساء وسجن الرجالة منفصلين تمامًا لكن كنا بنتصل بيهم عن طريق السجانوات ومن شبابيك دورة المية اللي بتطل على حوش الرجالة، وقت طابور الرجالة وهم في الحوش، نطلع على الأحواض ونقف على راس الحنفية. بالطريقة دي وصل لنا خبر من الزملا إنا ندخل في إضراب عن الطعام للمطالبة بالمحاكمة. الإضراب الأولاني ذكرياتي عنه قليلة، ما أضربناش مدة طويلة، أسبوع تقريبًا وغالبًا كنت لسه بصحتي في أول الحبس، الإضراب الثاني ستاشر يوم لغاية ما وصل خبر إن صدر أمر بتقديمنا للمحاكمة. الستاشر يوم دول كتار بس عملتهم، أنا دايمًا مليانة ودي الفترة الوحيدة اللي خسيت بصحيح وبقى وزني مناسب لطولي لأول وآخر مرة في حياتي، لحد دلوقت .

ورحنا المحكمة وكسرنا الإضراب في القفص، شفت أبويا وأمي أخيرًا، أصل زيارات المعتقلين كانت نادرة واستثنائية، ما كانش يحق لنا زيارات منتظمة زي اللي واخدين حكم محكمة. شفت أبويا وأمي في القاعة جايبين معاهم محامي عن طريق الكهربائي «ماريو صوفيا» زميل أبويا. «صوفيا» دل أبويا على محامي مصري علشان يجي يحضر عني في المحكمة. بس انا ما كنتش مهتمة بالقضية، كنت متأثرة بمنظر عشرات الرجالة والستات، كلهم شباب سنهم عشرين سنة تقريبًا، كتار، وكلهم مضربين عن الطعام، إحنا في القفص وأهالينا في القاعة. لمحت أسما البقلي في القاعة، خرجت من السجن من بدري وجاية علشان جوزها أسعد حلیم، شافتني وشاورنا لبعض بحرارة. أبويا وأمي يا حبايبي زي كل الأهل جايبين لي عمود أكل بيحاولوا يوصلوه لي، طاسات العمود مليانة شعيرية بشورية وحتت فراخ، على أساس أكل خفيف زي ما قالوا لهم ان مش لازم أكل ثقيل في الأول. من إيد لإيد في زحمة القفص والعمود رايحة جاية وصل العمود بتاعي لأسعد حلیم جوز أسما، شفته من مكاني هو وتلاتة اربعة من الزملا فتحوا العمود ونزلوا فيه أكل، ضحكت لأن شايفة أبويا وأمي من بعيد مش مبسوطين ان العمود ما يوصلنيش، مش متصورين أصلًا ازاى بطلت أكل 16 يوم بحالهم. بس انا كنت مبسوطة يومها من كل حاجة وكان فيه تقاؤل في الجو. اتأجلت القضية تلات ايام، مش ممكن القاضي حينظر ويحكم في كل القضايا دي في يوم واحد، وبعد تلات ايام رحنا كلنا المحكمة تاني وصدر الحكم: أنا خدت سنة، وعبد الستار الطويلة تلات سنين زي «ميمي» وإجلال، وأظن عبد النبي طلع براءة أو خد سنة .

بالنسبة لعبد الستار الطويلة طول فترة السجن، يعني سنة ونص، كنت بافكر فيه قليل، هو لقي طريقة بيعت لي جوابات مع السجانة وكنت بارُد عليهم ساعات، مش عارفة ازاي اشرح، انفصلت نفسياً نهائي عنه وعن الفترة اللي قضيتها معاه، قفلت السكة دي. دي خصلة مخيفة شوية فيّ، باقعد مدة ما بيانش عليّ ولا حتى لنفسي إني حاخذ قرار، وبعدين أول ما أخذ القرار باكون في غاية الحسم، مفيش تردد .

نرجع للحكم والمحكمة أنا واخدة حكم سنة وكان بقي لي سنة ونص محبوسة، فخرجت في نفس اليوم! رجعت السجن يا دوب ألم حاجتي واسلم على «ميمي» وإجلال علشان مش خارجين. سلمت على كل الموجودين بس بسرعة كأني راجعة لهم ثاني يوم، مش دريانة إن خلاص حاخرج فوراً بعد سنة ونص وإن حياتي في السجن حتخلص بعد دقائق .

خدت حاجاتي من الزنزانة وادوني اللي كنت سايباه في الأمانات، ولقيت نفسي بره .

وَدُونِي المحافظة عند رئيس البوليس السياسي، كان اسمه فلان «القاويش»، نسيت اسمه الأولاني بس أكيد سعد يفنكره كويس والمرة الجاية حاقول لك على اسمه. كل دا حصل بسرعة، ووصلت المحافظة واستنيت، ما كانش فيه حد في الأوضة، وكان العصر .

أستنى وأستنى وأستنى مفيش حد ومفيش حاجة بتحصل، لغاية بالليل .

سنة ونص بعد مارس تسعة واربعين، يعني كنا خريف 1950 .

أخيراً جه واحد قال لي :

- إنتِ حتخرجي بس اوعي ترجعي ثاني تشتغلي مع الناس دُول، دول ناس وحشين .

«الناس دُول» بيقولها وهو بيشاور بصباعه زي ما الواحد بيهدد العيال، أنا زي العبيطة مش فاهمة مين اللي قدامي وبأرد عليه :

- أنا ما عملتش حاجة غلط، البوليس السياسي غلطان .

ساعتها وصل أبويا، ودخل الأوضة الكبيرة جداً، أوضة رئيس البوليس السياسي في المحافظة والراجل دا قال لابويا :

- خد بنتك، حتخرج، بس انت مسؤول عنها، ولو حتعمل أي حاجة ثاني إنتِ اللي حتحبس .

- حاضر يا افندم، أيوه طبعاً .

وانا باحاول أقاطع واعارض .

- تاني؟ مش كتبت بايديك اللي حصل؟

أبويا عايز يخلص الموضوع وياخدني ويطلع، وفعلاً نجح وخرجنا. بعد كذا فهمت إن دا رئيس البوليس السياسي، اللي اسمه القاويش. وعرفت انهم خلوني استنى كل الوقت دا علشان ما كانش عندي واحد وعشرين سنة، قاصر ما اقدرش اخرج لوحدي، ومعديش جنسية معينة ما يقدرش يطردوني من البلد، فلازم يسلموني لأبويا شخصياً، فبعثوا يجيبوه. أبويا أخذني البيت وأمي كانت محضرة عشا فراخ وشوربة، ملتزمين، علشان انا خارجة من إضراب ستاشر يوم. كنت باسلم عليهم وبيحضنوني وباتكلم، أبويا فجأة قام وبص لي وقال لي :

- ياه ايه دا؟ وشك صغير قوي .

كان بقى لهم كثير ما شافونيش، وحشاهم ومخضوضين عليّ وكنت خسيت كثير، بس منورة من جوه وسعيدة مش حاسة ولا بالتعب ولا بالجوع .

ابتدت بقى مرحلة تانية .

أنا باقيم مرحلة السجن الأول إنه انفراجة كبيرة، مش خبرات عملية لكن ذهنية وثقافية ونفسية. اتصالي بالناس دول فتح لي طاقة. يمكن هو دا السبب اللي خلاني مش عايزة ببقى لي دعوة بعبد الستار الطويلة .

و... نكمل مرة تانية؟

لا استني !

اللي بيخرج من السجن بيسأل اللي مش خارجين إذا عايزين حاجة من بره، يوصل لهم جواب لحد أو يتصل بحد، خدمات زي كذا. وبالرغم من طيشي لحظة الخروج ما نسيتهس اسأل، وفعلاً «لي لي دايان» كتبت جواب لمراد خلنتي أقراه وطلبت مني أوصله، مضمون الجواب إنها «كتبت له كذا مرة وهو ما ردش، وإنها ما تعرفش ايه مصيرها بس في الغالب حيرحوها وحتضطر تسبب البلد، وإنها تحب تعرف أخباره وأثر السجن على علاقتهم، ناوي يعمل ايه؟»، وقالت لي أروح له في مستشفى الهلال الأحمر جنب سجن الأجانب. أنا اعتبرت الحكاية دي واجب كبير على نفسي، وأول ما خرجت، يا دوبك بعد يوم أو يومين بالكثير خدت بعضي ورحت على الهلال الأحمر، د. مراد المستكاوي ما كانش موجود، استنيته، وفي الآخر جه وقابلته. شاب لطيف، أسمر شعره إسود، رفيع وطويل، لكن مش مبتسم .

- أنا فلانة كنت في السجن مع «لي لي دايان»، «لي لي» ادتني الجواب دا أوصله لك .

خد الجواب من غير ما يتكلم، فتحه وقرراه قدامي، افكرت حيسألني «أبعث لها الرد ازايا؟» وكنت جاهزة أشرح الطريقة، أقول له المراسلة مع السجن تتعمل ازايا، إنما هو خلص قراءة وطبق

الجواب ورجعه في الظرف وحطه في جيبه .

- متشكرين .

- خلاص؟

- متشكرين قوي .

وسلم عليّ بالإيد علشان امشي، ومشيت . ما أبدأش أي اهتمام بالجواب وما عرفتش عمل إيه إلا بعدها بسنين .

كان بيمشي بإيديه ورا ضهره، وقور ووسيم قوي .

فجأة سعد سَاب المجموعة اللي كان معاها وجه لعندي، بالظبط زي ما عمل من كام سنة في المدرسة الليلية لما كان ببيجي مع جميلة أخته ياخذ دروس انجليزي .

- إنا مش اتقابلنا قبل كدا؟ مش انا أعرفك؟

- لأ، ما حصلش .

رجع لمجموعته واستمر يلف في المعرض معاها، بعد شوية سابهم تاني ورجع لي :

- إنتو بتقعدوا هنا لغاية الساعة كام؟

ابتدا يجرسكلي علشان ياخذ ميعاد ونخرج مع بعض، أنا كنت باخلص وخلي ويا دوب أوصل البيت الساعة 8 فما نفعش .

مرّيت بحالة غريبة شوية بعد ما خرجت من السجن، كأن اللي فات ما حصلش .

رجعت لحياتي من جديد، أحاول اشتغل، أروح رحلات واتعرف على ناس، ودا طمّن أبويا وأمي. أخويا ما كانش سافر لسه، فأبويا أخذنا ناكل في محل زكي السمك الجديد. يظهر المحل كبير شوية في أبو العلا ففتحوا محل تاني قدام «عمر أفندي» على ناصية شارع عبد العزيز والساحة، مطرح سينما «بارادي»، وعملوا فيه قعدة للأكل وترابيزات وأصبح «مطعم»، وعلى الباب جنب الكيس تلاجة كبيرة بكل الأسماك. ودي كانت آخر مرة أروح لزكي السمك وكانت بمناسبة خروجي من السجن، والحقيقة نفسي أروح تاني علشان أشوف المحل زي ما هو ولا لأ .

خرجت من السجن لقيت «ألبير آرييه»، غالباً كنت اتعرفت عليه أيام «الببكي»، النادي الطلياني، قبل السجن. «ألبير» زيّ حالاتي، من الخواجات الشيوعيين القليلين اللي ما سافروش بس ما كانش في القسم الطلياني، يجوز كان من القسم الفرنسي. مش فاكراة اتعرفت على «ألبير» إزاي أصلاً، سألته وحكى لي قصص ما عرفتش أفكرها. «ألبير» شخص لطيف جداً يعرف كل حاجة عن كل الناس وعنده ذاكرة كويسة، لغاية دلوقت بيفتكر وبيتبع الناس، عامل مخه أرشيف . بس مش عايزة ادعي إني افكرت، اللي أفكره كويس إن «ألبير» أنقذني من الوحدة لما خرجت، خدني نقابل مجموعة شباب متخرجين من مدرسة «الليسيه» الفرنسي، وكان فيهم واحد اسمه «أوسمو»، المجموعة دي ما كانش لها دعوة بالشيوعية، نوضب جلسات قراية شعر «أراجون» و«إيلوار»،

و«جاك بريفير» ، شعراء هاييلين، موضة في العالم كله بعد نهاية الحرب العالمية . «ألبير» عرّفني كمان على حليم طوسون وبقينا أصحاب إحنا الثلاثة. تقريباً نفس السن، سبعتاشر تمانتاشر. «ألبير» ما كانش اتقبض عليه قبل كدا، وحليم كان اعتقل فترة قصيرة، أيوه حليم طوسون بتاعنا اللي انت تعرفيه كويس وتحبيه جدًّا، كان في مجموعة متطرفة شوية و«ألبير» في «حدثو»، راح حليم طوسون واثنتين تانيين معاه دخلوا بيت «ألبير» وحاولوا يسرقوا المكتبة، كانوا حاطين كتب وأرشيف «حدثو» عنده في أوضة النوم، أنا فاكدة موقع المكتبة في بيت أهله وحصلت معركة، أظن ما نجحوش، «ألبير» عرف يطردهم من بيته وما قدروش عليه، يمكن بمساعدة أهله؟ هم اللي حكوا لي، أنا طلعت من السجن لقيتهم أصحاب .

ف«ألبير» عرفني على حليم، وحليم عرّفني على فؤاد حداد، وبقينا نخرج مع بعض يقرا لي شعر، نشر ديوان رفيع مجموعة أشعار أو يقرا شعر بالفرنساوي. كنا بنمشي بحرية، فترة غير فترة السرية الشديدة اللي مرت قبل ما يتقبض عليّ، كله في الشارع في الأماكن العامة، المقابلات بتحصل بشكل علني. مرة فؤاد حداد جه قال لي :

- أنا باحب واحدة .

كويس، يعنى إيه الغريب في دا؟ مفيش غريب بالنسبة لي .

- عاوز أهديها هدية، حتة قماش، تيجي تساعدني نختارها مع بعض؟

قلت قوي قوي قوي، نزلنا شارع قصر النيل وقعدنا نبص في الفاترينات ونقينا الهدية ودفع الفلوس وفعلاً فؤاد اتجوز زكية، وجابوا أولاد، قصة حب جميلة عشان الشابة دي كانت من طبقة مختلفة، أهل فؤاد حداد ناس «مبسوطين» وهي مسلمة وهو مسيحي. أصرّ عليها وأسلم واتجوزها وراح اتقبض عليه، لكن لما خرج عاشوا مع بعض وجابوا الأولاد اللي انت تعرفي منهم يمكن أمين. فؤاد قال لمراته إن حتة القماش دي أنا اللي اخترتها. وهي كانت دايماً لطيفة معايا ولكن مصرّة تتاديني «روزا»، يظهر حاجة بين «ماري» وبين «روزنتال».

واتعرّفت كمان على كمال عبد الحليم اللي «ميمي» كانت بتقرا لنا شعره في الزنزانة، وأنا خارجة إِدْتِي نمرّة تلفونه أو يمكن عنوانه. كمال في الفترة دي كان لسه متخرج، وابتدى يتشهر كشاعر، وبقينا نتقابل مرة في الشهر تقريباً في واحد من كازينوهات مصر الجديدة أترجم له شعر «إيلوار» و«أراجون» من الفرنسي للعربي. كمال كان معجب جدًّا بـ«بابلو نيرودا» من شيلي، نقرا له سوا ترجمة فرنساوي، أنا أساعده في اللغة وهو يشرح لي أبعاد مش بافهمها في الفكرة الشعرية. الشعر لعب دور كبير في حياتي في الفترة دي، وابتديت أقرأ «بول إيلوار» و«أراجون» والشاعر اللي بنحبه «بريفير»، وإذا بي في مرة أقرأ قطعة شعر لناظم حكمت الشاعر التركي، مُترجم للفرنساوي، مشهد سقوط مدريد في إيد الفاشيست أيام «فرانكو»، ناظم حكمت قال إن الثلج يومها نزل أحمر بدم المحاربين وإن قلبه وقف على أبواب مدريد من الحزن، مدريد وقعت في إيد الفاشية، افتكرت مدرسة تالّة ابتدائي، سعيدة بهزيمة الاشتراكيين، بتحتفل بانتصار الفاشية وبسقوط مدريد، بتصور

قوات «فرانكو» إنهم أبطال وتمدح في نازيين ألمانيا اللي بيحاربوا في صف فرانكو، وتسميهم «قوات الحرية».

كنت باروح القلعة أتصور عند جمال كامل ويرسمني، وارُوح ندوة لـ«أنصار السلام» وبعدين معرض خريجي كلية الفنون الجميلة اللي منهم حسن فؤاد، لوحة تخرجه كانت حماسة سلام، وكنت بالعب كرة سلة في النادي مع الطلاينة بالليل في مبنى مدرستي القديمة - «دانتي أليجييري».

اشتغلت سكرتيرة في جرنال اقتصادي كان بيطلع في مصر بالفرنساوي اسمه : «Le Nouvel Observateur» - «المرصد الجديد». كنت باعمل كل الحاجات دي في نفس الوقت، وحياتي كلها في الشوارع وفي الأماكن العامة بشكل علني .

دا كان سنة 1950، خرجت من السجن استأنفت حياتي من الأول كأن ما حصلش حاجة، لغاية لما حلیم طوسون خدني في شغلانة في السفارة المجرية سنة 1951، السفير كان اسمه «زاجور»، راجل منفتح ومودرن، عنده فكرة إن يعمل علاقات طيبة مع بلاد العالم التالت عن طريق نشاطات شعبية، مش عن طريق السياسة والسياسيين، عزم على فريق الكورة المجرية ييجي يلعب في مصر مع فرق الكورة المصرية، «بوشكاش» البطل العالمي كان بيلعب في فريق المجر. اسمه بيتكتب «بوسكاس»، يمكن الـ «S» بالمجري بتتنطق «ش»؟ «بوشكاش» دا كان تحفة، نجم كبير في العالم كله فما اعرفش أوصف لك قد ايه المصريين هنا كانوا سعداء وفرحانيين، «بوشكاش»!

«بوشكاش»! «بوشكاش»! اسمه كان مكتوب في كل حطة في الشوارع، وصوره كمان. حلیم كان بيشتغل في السفارة المجرية ومنظمين معرض لصور الأطفال في مقر متحف الفن الحديث، على ناصية شارع قصر النيل مع شامبليون. يا ترى المبنى لسه موجود ولا هُدوه زي ما هُدوا بيت هدى شعر اوي؟ أنا اشتغلت في المعرض دا وفي يوم دخلت مجموعة من الشخصيات - مجموعة فخمة كدا - ومن ضمنهم سعد، ناس ذوق، سلموا على البنات اللي واقفة على الباب، اللي هي أنا. شغلتي كانت إني ألقت النظر لدفتر الزوار يكتبوا فيه اسمهم وكلمة تعليق أو شكر، وكل ما الموسيقى تقف أبتدي الاسطوانة من أولها علشان يكون فيه مزيجة في الخلفية على طول. سعد عمل لفة مع الضيوف وبعدين جه عندي :

- أنا شفتك قبل كدا؟ فين؟

بس انا أنكرت. مشي عمل لفة تانية ورجع :

- انتو بتخلصوا الساعة كام؟ ممكن اعدي عليك؟

كنا بنخلص الساعة 8م وكان لازم أروح على طول علشان ما اتأخرش على البيت وأهلي يقلقوا، فقلت :

- ما ينفعش .

وخلص .

قابلت سعد تاني بمناسبة برّضه تبع السفارة المجرية، يمكن عرض فيلم، وحضرت نفس مجموعة «أنصار السلام»، المرة دي ما كنتش باشتغل فعددت على فوتيل من الفوتيلات، وبعد شوية جه سعد وقعد على إيد الفوتيل واستند بالإيد الثانية على ظهر الكرسي. شوية وقام جاب طبق بتيفور ما أكّش منه، عرفت بعد كدا إنه ما يبجيش الحاجات المسكرة، بس انا باحب الأكل حادق ومسكر، فأكلته كله. قعدنا نتكلم طول الأمسية، لا هو قام عمل نوع من الواجب مع الناس ولا أنا. فضلنا نتكلم وهو يبص لي وانا أبص له كالحبايب، وممكن أقول إن من ساعتها ابتدت علاقة حب بيني وبينه. يوسف حلمي صديق سعد الحميم كرر عدد من المرات :

- لما شفتكم لزقتم في بعض بالطريقة دي قلت الاتنين دول حيحبوا بعض وحيتجوزوا .

ما اتجوزناش على طول بس دي كانت البداية فعلاً. رجع سعد يسألني واحنا قاعدين على الفوتيل :

- بس انا شفتك قبل كدا في حنة مش قادر أفكرها .

برّضه أنكرت وقلت له لأ .

كل ما كان فيه مناسبة سعد كان بياخدي معاه وكنت متجاوبة معاهم كلهم. يوسف حلمي كان مشغول بتكوين جمعية لأصدقاء سيد درويش، يجتمعوا ويغنوا أغانيه ويجمعوا تراثه. سيد درويش كان بيتتسي وابتدى يضيع، يوسف حلمي كان بيقول إنه عبقرى ولازم نحافظ على موسيقاه كجزء من التراث المصري، وله الفضل في إنقاذ تراث سيد درويش، وبالطريقة دي اتعرفت أنا على موسيقاه. رحنا مع أصدقاء سعد كمان الأفلام المصرية، وانبسطت من اكتشاف أفلام نجيب الريحاني زي «أبو حلموس». وعرفني على أعضاء حركة السلام وفهمني هم مين، إبراهيم باشا رشاد رائد في حركة التعاونيات وتقدرى تسألني عمك عز عليه، إنت تعرفي ابنه حسن رشاد صديقنا. والبنداري باشا كان سفير مصر في موسكو أيام الملك ووقع في حب النظام الاجتماعي الشيوعي الاشتراكي من حضانات للأطفال والنشاطات التعاونية لدرجة سمّوه «الباشا الأحمر»، ولما اتكونت لجنة «أنصار السلام» البنداري باشا كان من أوائل اللي انضموا لها، كان أهم شخصية فيهم وأكبرهم في السن، فعملوه رئيس لحركة «أنصار السلام» في مصر، وكان فيه سيزا نبراوي رائدة للحركة النسائية التقدمية، شخصية عالمية. سعد نفسه كان من الشخصيات البارزة في حركة السلام على صغر سنه. كان متحمس وكان بيحكى لي كثير عنها. في أواخر الأربعينات بعد انتهاء الحرب العالمية الثانية بانتصار الحلفاء على النازية، على طول ابتدت بوادر توتر بين الحلفاء وبعض، يعني نزاعات وصراعات سياسية داخل صفوف القوى المنتصرة. أمريكا والغرب انتصروا على النازية بتحالف ومشاركة كاملة من الاتحاد السوفيتي الاشتراكي الشيوعي، دا أدى إلى تقسيم أوروبا إلى منطقة شرقية ومنطقة غربية، أوروبا الشرقية في حلف وارسو مع الاتحاد السوفيتي، والدول الغربية الحلف الأطلسي - «الناتو» - مع الولايات المتحدة. وابتدى الصراع بين الكتلتين يشتد على جميع الأصعدة إلا صعيد المواجهة المسلحة المباشرة. ازدهرت في الغرب بعد الحرب فكرة إن «مش عايزين حرب تاني لأن الحرب ما بتخدمش مصالح الشعوب» ونشأت «حركة السلام العالمي» كرد فعل ضد الحرب الباردة. حركة تطالب شعوب العالم بالضغط ضد التسليح وضد تصعيد الخلافات اللي ممكن توصل لحرب تاني - المرة دي بين الرأسمالية والشيوعية .

اللجنة الفرنسية لحركة السلام نظمت مؤتمر تأسيسي وابتدوا يحشدوا القوى العالمية المستقلة، بعثوا لمصر مندوبين، من ضمنهم كاتب اسمه «مايكل بوج» اللي اتصل بعدد كبير من الشخصيات المصرية وطلب منهم يأيدوا الحركة ودعاهم للحضور والمساهمة في تأسيس حركة السلام. سعد في الوقت دا كان عضو في «الحزب الوطني» وماسك رئاسة تحرير مجلة «اللواء الجديد» مجلة الحزب. «الحزب الوطني» حزب قديم تبع أفكار مصطفى كامل ومقاومة الاحتلال الإنجليزي، غير خالص الحزب الوطني الجديد بتاع السادات ومبارك. حسب كلام سعد، الدعوة كانت شخصية مش حزبية، شخصيات كثيرة في الحزب رفضت الدعوة، لكن يوسف حلمي المتفتح ومتعدد الاهتمامات، عنده رؤية عامة، وكان شخصية عامة، تجاوب مع دعوة «مايكل بوج» وخذ مهمة تأسيس لجنة لحركة «أنصار السلام» هنا في مصر، سعد اتحمس للفكرة، واتصلوا بعدد من الشخصيات العامة وكونوا اللجنة المصرية، برئاسة البنداري باشا - الباشا الأحمر - وعضوية إبراهيم رشاد وسيزا نبراوي، واختاروا سعد كامل سكرتير للجنة ويمسك مجلة «الكاتب» - مجلة اللجنة - وقرروا كمان إن سعد هو اللي يحضر المؤتمر التأسيسي ويقول باسمهم كلمة «أنصار السلام» المصريين. سعد ساعتها كان عنده تقريباً 28 سنة وكان أصغر واحد فيهم وسافر النمسا وحضر المؤتمر .

غاب سعد عني مدة طويلة وفوجئت به بيكلمني في التلفون :

- أنا رجعت .

- طب كويس .

وفوجئت إنه جايب لي معاه هدية، الهدية دي موجوده لغاية دلوقت عندنا، إيشارب صوف طبيعي حلقات أخضر فاقع على أرضية سودا، والناحية الثانية دوريات سودا على خلفية خضراء، «double-face» - بروحين - اتغسل مرة بالخلط فكش لأنه صوف حقيقي. السفرية دي مثلت تجربة كبيرة لسعد لأن رواد السلام في العالم ناس كبار ومهمين، علماء، فنانيين ومفكرين لهم قيمة ووزن، وكثير منهم مش شباب، ودا كان المؤتمر التأسيسي. بيحكي لي سعد إنه لقي نفسه في قاعة مؤتمرات ضخمة، واقف في طاور طويل من المتحدثين، وكل واحد يقرأ كلمة تعبر عن فهم للسلام وليه انضموا للحركة، قبله ناس وبعده ناس، لما جه دوره فوجئ إن القاعة احتقت به وبكلمة مصر اللي هو ألقاها وقاطعوه بالتصفيق مرة أو مرتين، اهتموا بيه وبمصر وأدواله إحساس بالثقة. بالطريقة دي ابتدت حركة السلام كنوع من النشاط العام في مصر. مثقفين وفنانين مصريين كثير انضموا للحركة، وانتشرت فكرة إن «يستحسن إن السياسيين ما يتسابوش لوحدهم في السياسة» و«لازم عدد كبير من الأدباء والكتاب والممثلين والرسامين والمبدعين من أهل الفن والثقافة ياخدوا موقف» ويتكاتفوا مع بعض ضد الحرب والاستغلال. سعد كان أصغرهم في حركة السلام، أصغر من إبراهيم رشاد ومن يوسف حلمي ومن سيزا نبراوي ومن البنداري باشا، وكان عنده قدرة يسمعهم كلهم باهتمام وفي لحظة يتدخل يقترح اقتراح أو يحدد رأيه في مسألة، وكانوا بيسمعوه باهتمام وغالباً يوافقوه، فجالي إحساس، وكان إحساس مضبوط، إن عنده رؤية قوية وسطيعهم .

من ضمن اللي لُبوا النداء دا ودخلوا الحركة بقلبيهم كانت تحية كاريوكا . تحية كاريوكا ساعتها ما كانتش نجمة عادية، دي كانت نجمة النجوم، في السينما وفي المسرح، الرقصات يقدوا رقصها هي

أو سامية جمال ملهمش تالته، فمسألة إن تحية كاريوكا تقبل تكون سفيرة لفكرة السلام في مصر، كان له معنى كبير . اتعرفت عليها في الإطار دا ولقيتها بعيدة عن نمط نجوم الفن السينمائي الاستعراضى، بعيدة كل البعد، كانت فاتحة بيتها ملتقى فكري، مضيافة وروحها لطيفة تدخل بنفسها المطبخ وتحضر . وكانت على علاقة بظابط في الجيش اسمه مصطفى كمال صدقي، راجل جميل وطويل زيها . تحية اتجوزت كذا مرة وهي لسه في عز شبابها وقمة شهرتها :

- أنا مش محتاجة حد يعيشني، أنا عايشة مكفيّة نفسي، لكن ما احبش أعيش في الحرام، لو مبسوطه من حد، ما نتجوز؟

كانت سعيدة إن الناس دول جايبين لها في بيتها، وسعيدة إن عندها بيت حلو ومريح وصالون كبير، وإن ضيوفها لما بيتناقشوا - ومن ضمنهم سعد - مش بيقولوا تقاهات، الحديث بينهم دايماً على مستوى عالي. كانوا بيشربوا وهي تحضر الويسكي والمزات من غير ضيق وبشكل طبيعي مفهوش قلة احترام، ولما السهرة تطول تسيبهم في وسط الكلام، وتخش تحضر بالوظة، رحت وراها المطبخ علشان أشوف بتعملها ازاى :

- أنا مش باعمل بالوظة باللبن، تقيل وبيعلم غازات، باعملها بالنشا وعصير الفاكهة .

البالوظة نوع من المهلبية الخفيفة .

- كويسة بعد الويسكي، ما تتقلش على القلب .

والضيوف ياكلوا البالوظة والكلام يستمر . صلاح حافظ ساعتها كان من الكتّاب الصاعدين في «روز اليوسف» وكان متجوز الممثلة هدى زكي بنت ممثل أعتقد اسمه إبراهيم زكي، للأسف مش متأكدة من اسمه . صلاح كان بيحضر قعدات بيت تحية كاريوكا، يقرأ مقالاته ويناقشوه وهو يغني لنا سيد درويش، صوته ضعيف لكن حلو كله طرب ياخذ قلبك، ودنه مضبوطة . أنا اتعرفت على صلاح حافظ في بيت تحية كاريوكا وبعد كذا بقينا اصحاب وكان بييجي عندنا في البيت كثير، صداقة دامت العمر كله .

*

أنا ما حببتش سعد على طول مرة واحدة، إلى حد ما في البداية كان واحد من المجموعة وأنا مبسوطه أخرج معاهم، لكن سعد بالتحديد كان له الفضل إنه يعرفني على «شارلي شابلن» . رغم إن المفروض إن انا اللي خواجاية واتفرجت على «شارلي شابلن» من وانا طفلة، إلا إني ما كنتش باحبه، ودا غالباً لأن أبويا كان بيحب «شارلي شابلن» زيادة وكان بيصمم ياخذنا نتفرج عليه بانتظام . حكيت لك عن سينما «بارادي» اللي كنا بناكل فيها خشاف يوم الحد وكنت بأفضل حكايات القراصنة والأفلام الموسيقية اللي انتشرت بعد الحرب . أما أفلام «شارلي شابلن» مش فاكهة منها إلا مشهد بيت بيتزحلق حيقع من على الجبل وشارلن يجري من ناحية وبعدين يجري يلحقه من الناحية الثانية، من فيلم «Gold Rush» - «حمى الذهب» - المشهد دا ضحكني كثير لكن غير كذا

مفيش. في خروجة من ضمن الخروجات اللي بدون أي هدف اللي كنا بنعملها علشان نشوف بعض إذا بسعد يقول لي :

- فيه فيلم «مسيو فيردو» لـ«شارلي شابلن» في سينما «أوبرا».

- أنا ما باحبش «شارلي شابلن».

- إيه؟ ما بتحبيش «شارلي شابلن»؟! !

- لأ ما باحبوش .

فعمل مرافعة دفاع عن فن «شارلي شابلن» قدامي :

- لا لا لا، أنت لازم تعرفي إن «شارلي شابلن» دا رجل عظيم، ضروري تيجي تشوفي «مسيو فيردو»، شفته مرتين وحاروح اشوفه للمرة الثالثة علشانك .

رحت معاه وبرضه ما عجبنيش، تلاقي تربيتي الثقافية لغاية ساعتها ما كانتش عميقة كفاية علشان افهم السخرية والأبعاد اللي في فيلم «مسيو فيردو»، ولكن مجاملة لسعد قلت له :

- أيوه عجبني .

بعدها نزل فيلم تاني، اللي فيه بنت عميا بتبيع ورد، «City Lights» - «أضواء المدينة» - أيوه، وبرضه صمم ياخدني أشوفه، يظهر سينما «أوبرا» كانوا عاملين أسبوع أفلام «شارلي شابلن». ورحت مجاملة تاني، بس المرة دي اتأثرت، أصله دراما، ميلودراما، حبيته بشكل! وفي الآخر قعدت أعيط واعيط وسعد كان مبسوط، لما خرجنا قال :

- يعني أنا عندي حق شابلن رجل عظيم .

بعد مدة جا فيلم «الدكتاتور العظيم»، كنت شفته مع ابويا بس ما رسخش في ذهني إلا مشهد دكتاتور يشبه هتلر بيلعب بالكرة الأرضية زي بالونة بالمؤخرة فوق مكتبه. لما شفته تاني مع سعد بعد الحرب وكنت فاهمة شوية عن النازية والحكم الشمولي، فاستوعبته أكثر. وأخيرًا جا فيلم «أضواء المسرح» في سينما «ريفولي» كانت لسه سينما جديدة ومنزلة أحدث أفلام «شارلي شابلن» والدخول بدعوات. يوسف حلمي كان بيرعانا، عرف يجيب لنا تذاكر ورحنا احنا الثلاثة افتتاح الفيلم في مصر .

الحادثة دي، حادثة إن سعد علمني أفهم واستمتع بـ«شارلي شابلن»، خلّنتي أحترم وجهة نظره واشوفه، شوية بشوية ابتديت أعرفه فشعوري بقي أعمق. لغاية اللحظة دي من علاقتنا إلى حدّ ما كنت متصورة إن انا مثقفة أكثر منه، إحساس بالتعالي تجاهه. فكرة كانت موجودة عندي، كنت فاهمة غلط حاجات كثير، منها إن الشيوعي بيّفهم أكثر وأشطر وأخلاقه أحسن، مش مضبوط طبعًا،

كل دا مش صحيح. أنا كنت شيوعية بوضوح من صغري، وهو أيامها كان لسه بيقول إنه مش شيوعي. كنت فاكرة إن الثقافة هي السياسة والسياسة هي الشيوعية، والباقي كله كلام خفيف، ما كانش عندي فكرة عن الحياة السياسية في العلن، كنت فاكرة إن السياسة الجد لازم تكون شيوعية، وإن الشيوعية الجد لازم تكون سرية، والسياسة الجد لازم تكون سرية. لكن ابتديت أفتح وأقدر سعد بعد ما جرتني لأفلام «شارلي شابلن»، قلت لنفسني «مش شخص تافه، لا، بفهم، مع إنه مش شيوعي!». أمال مين هو «الشيوعي»؟ تعريف الشيوعي في الأحزاب هو «اللي يدفع الاشتراكات، ويرضى بالديمقراطية المركزية، ويبقى عضو في إحدى خلايا التنظيمات الحزبية». فطول ما الواحد ما بيدفعش اشتراك للحزب بالفلوس والحزب ملوش سلطة عليه ومش ملتزم بقراراته، يبقى مش «شيوعي» ونقول عليه «متعاطف». عموماً حبيت سعد أكثر، أصله «مش شيوعي»، كان ساعتها من «أنصار السلام» بس، ومن أنصار الحياة الديمقراطية بس، مش بالطريقة المنظمة اللي أنا اعرفها من المنظمات الشيوعية. والاجتماعات اللي بيحجرني معاه نحضرها كانت علنية، وحلوة قوي، مناقشات غنية مفيهاش جمود اجتماعات الخلايا الشيوعية السرية. مقابلتي لكل المفكرين والفنانين دول إداني نوع من الإحساس بالسعادة وإحساس إنني أحب اعيش بالطريقة دي، أهتم بالسياسة ولكن مش في السرية اللي عرفتها قبل السجن. لغاية النهاردا ما اعرفش إمتى سعد انتقل من «أنصار السلام» إلى عضوية فعلية في الحزب الشيوعي. سعد كان مهتم بالسياسة من صغره بفضل خاله فتحي رضوان، وأصبح عضو في «الحزب الوطني» - القديم طبعاً - وفي فترة دخل مجموعة الاغتيالات. لما اتعرفت عليه ما كنتش اعرف حكاية الاغتيالات دي، بس اقصد إن فكره السياسي كان فيه خبرة وتجربة قبل الحزب الشيوعي، دخل الشيوعية بشيء من النضج السياسي، أنا لما دخلت السياسة دخلت على الحزب الشيوعي على طول، ما كانش عندي خبرة .

وبعدين انا حياتي الثقافية كانت محدودة في المدة اللي عشتها مع أبويا وأمي، بنحب الأوبرا، و«فيلينشتا» بلديات أمي اللي جت تسكن عندنا بتحب الأوبرا كواحدة طليانية بسيطة، زي أي ست مصرية بسيطة تحب أم كلثوم. أول ما خلصت الحرب وابتدي النشاط الثقافي يرجع اشترت تذاكر وخذتني ورحنا مع بعض. كانوا مقدمين أوبرا «بليانتي» و«كافالريا روستيكانا»، بيتعرضوا دايمًا مع بعض علشان قصيرين. دي كانت أول مرة في حياتي أدخل الأوبرا، «فيلينشتا» ما كانتش غنية فقطعت في أرخص أماكن فوق في آخر دور في البلكون - «عشة الفراخ»، بيسموه كدا - وهي ست كبيرة عندها رجل أقصر من رجل وبتعرج والواحد يشوف المسرح من بعيد، ومع ذلك كانت أمسية مبهرة لي. غير كدا نسمع «تينو روسي» في الراديو، وأبويا ياخذنا السينما، دي كانت حدود حياتنا الثقافية. أما حياتنا اليومية فكانت بتأخذ شكل بيتي، أكل وشرب وشغل وتنظيف ومذاكرة، والمناقشات كانت بتدور حولين مواضيع زي أكمل ولا ما اكملش الدراسة؟ وازاي؟ ويبقى أحسن اروح اشتغل على طول بدل ما اسافر إيطاليا وحاجات من النوع دا، أما الأفكار والمفاهيم والحياة العامة الثقافية والسياسية فكانت محدودة في البيت عندنا .

راح سعد جاب تذكرتين دعوة للأوبرا، كانوا بيقدموا أوبرا «عايدة»، أول مرة أقعد في الصالة، وأول مرة أخش الأوبرا من الباب الرئيسي لأن عشة الفراخ لها باب جانبي ومش ضروري شياكة كبيرة في اللبس. أبويا وأمي كانوا يعرفوا ترزي يبجي البيت ويعمل الشغل في يوم واحد - تصوري؟ شطارة غير معقولة يا ريت الخياط دا كان لسه موجود دلوقت - عمل لي تايبير كلاسيكي أزرق

«bleu-marine» ، جاكيت وجونلة. لبست التايير الشيك الجديد وبلوزة بيضا بالدانتيل والكولة من برّه، قالوا لي بتليق عليّ. إنشيكنا ورحنا الأوبرا احنا الاتنين. أثناء العرض لاحظت ان سعد ما كانش مندمج، فيه حتت من الأوبرا غنا طويل ولازم الواحد يعرف القصة والنغمة، بس سعد استحملها، يبص لي وانا اسمع. سعيد إن انا سعيدة .

بالطريقة دي أنا دقت طعم الحياة العادية على مستويين، عادية بره السجن وعادية مش سرية، مختلطة بحياة ذهنية وثقافية. وانا باحكي لك الكلام دا كله ليه؟ علشان انا مع سعد فوجئت إن العالم حاجة تانية، ومع إن النادي الإيطالي «البيك» اللي دخلته أواخر 1946 كان بداية انفتاح على حياة أوسع وأفكار «سياسة وثقافة» لكن برضه كانوا شباب ضد الفاشية بعد الحرب ومحصورين في جانب واحد: إن الماركسية والشيوعية تتقدم في العالم. بعدهم عشت فترة شديدة السرية أيام التهرب من البوليس مع عبد الستار الطويلة، تجربة مُظلمة كدا، فترة توزيع المنشورات بلا مناقشات ولا متابعة للأحداث ولا إثراء فكري ثقافي، وانتهى الأمر إنني رحيت السجن. الحمد لله في السجن عشت نسبة ثراء فكري وثقافي، لكن لما خرجت وبعدت عن السجن وعن جو - مش الخوف - جو الرهبة، السرية، ابتديت أكون سعيدة زي لما دخلت النادي الإيطالي. لقيت المجتمع المصري مليون تقديمين، مش بالذات شيوعيين، تقديمين قريبين من الفكر الماركسي والاشتراكية عمومًا. كنت أعرف شوية عن الشعر والفن في المجتمع الفرنسي بعد الحرب العالمية الثانية، لكن ما كانش عندي فكرة إن مصر مزدهرة بالطريقة دي، شعراء وكتاب ورسامين وسياسيين، معارض واجتماعات ولقاءات، حياة ثقافية إنسانية أنا حضرت كثير منها. علاقتي بسعد اتطورت في الجو دا .

من أحلى الحاجات اللي حصلت لي في حياتي إن سعد خدني معاه في كل حنة يروحها وأي نشاط يدخل فيه سواء عام أو عائلي. حتى الاجتماعيات كانت جانب بينقصني، أبويا وأمي كانوا ناس محدودين في العلاقات الاجتماعية والحياة العامة، لما اتعرضت لمعارف بابا وعشت حياته، انفتح لي مجال كبير، كأنه فتح لي ستارة على مسرح الحياة المصرية. ما اقدرش أقول «كل» الحياة المصرية ولكن مجتمع القاهرة الثقافي السياسي العام، والعائلي الخاص، والريف المصري كمان اللي انا ما كنتش أعرفه خالص - ما كنتش عمري خرجت من المدن .

صحيح أنا حبيت شخصية سعد - كنت بأقدره واحترم أعماله وشخصيته بشكل عام - لكن الانفراجة دي كانت من الأسباب اللي خلنتي أرتبط بيه. بالإضافة كمان إن العلاقة خدت رضا كل المحيطين بيها. الأصدقاء والمعارف من الشباب التقدميين اللي بيشتغلوا وبيشتركوا بطريقة أو أخرى في الحياة الفنية والسياسية المصرية كانوا مبسوطين مننا. وانا كنت مقتتعة إنني عاوزة أعيش الحياة دي مش متضايقة منها ولا خايفة منها .

واستمرينا أحبه وأكثر ويحبني أكثر من غير مفاتحة .

الانفراجة كانت فوق تصوري .

كان فيه انسجام في حياتي .

كنت سعيدة .

26 يناير 1952: حريق القاهرة. كنت في السينما مع أخويا «برتو». كان عنده 15-16 سنة ويبروح مدرسة «الفرير». في الفترة دي علاقتي بأهلي كانت كويسة وباهتم بأخويا، كبرت ودخلت السجن وطلعت وبقيت اتكلم عربي شوية أحسن، بالذات الكلام المصري العادي. كان فيه أفلام إيطالية اتعملت بعد الحرب العالمية، سينما الـ «Neo-Realism» - «الواقعية الجديدة» - والجمهور المصري اتجنن عليها، وانقرجت مع سعد على كثير منها: «روما مدينة مفتوحة» لـ «روسيليني» و«جينو بكي». في ذاكرتي، أنا و«برتو» في سينما «النصر» في شارع الجمهورية، ورا فندق «كونتيننتال» القديم و«شيكوريل» و«شملا» في شارع فؤاد وسينما «ديانا»، بس لما راجعت نفسي لقيت «النصر» سينما صيفي في جنينة مفتوحة، وحريق القاهرة كان في الشتاء في يناير، أكيد متلخبطة. المهم إن خرجنا من السينما والدنيا كانت ضلمت خلاص، لقينا عساكر في كل حتة وناس بتجري وريحة دخان وحسنا جو غير عادي. كنا ناويين نرجع على رجلينا، بس اتخضينا احنا الاتنين وقررت إننا ناخذ تاكسي، كنت الأخت الكبيرة وباخذ القرارات .

- رايحين فين كدا؟ الدنيا مولعة .

- مولعة ازاي؟

- حريقة، عايزين تروحو فين؟

- بولاق .

سواق مش عجوز، شخص ظريف وخايف علينا، كنا لسه ساكنين في شارع نعيم الضيق فنزلنا في شارع 26 يوليو :

- على البيت على طول ما تروحوش ولا هنا ولا هناك .

لقينا أبويا وأمي في حالة ذعر مستنييننا في الشباك وكل الناس قافلة الشيش، كان فيه مظاهرات وهتافات ضد الأجانب وكان فيه ناس بترمي طوب على شبابيك بيوت الخواجات، دا بالنسبة لبولاق .

سعد وخاله فتحي رضوان كانوا في الشارع لما الحرايق دي ابتدت، و«الحزب الوطني» بتاع فتحي رضوان أيامها سمعته إنه حزب مظاهرات وثورة ووطنية، سعد قال لخاله :

- حتشوف إن حيعتقلونا من تحت راس الحكاية دي .

- يا راجل !

وفعلًا على الساعة واحدة أو اثنين بعد نص الليل قبضوا عليهم وعلى الفجر اتقابلوا ثاني في المعتقل مع عدد كبير من الناس وقعدوا يضحكوا وسعد قال لخاله :

- مش قلت لك؟

مروا ست شهور وكنت قربت أنسى سعد، مش واخدة بالي من خطورة حريق القاهرة وتأثيره على الأحداث، وفي يوم ثلاثة وعشرين يوليو اتنين وخمسين حصلت الثورة. كنت باشتغل في شركة للاستيراد والتصدير جنب مدرسة «نيل» للغات في شارع قصر النيل، وانا رايحة الشغل الصبح لقيت دبابات واقفة في ميدان التحرير وفي كل الشوارع. واقفة مكانها ما بتعملش حاجة. في البيت قبل ما انزل سمعنا من الراديو زي إن الحكومة اتغيرت، بس رحنا الشغل عادي كأن مفيش تغيير، وقابلت كمال عبد الحليم بعد الشغل، كان عندي معاه ميعاد من مواعيد الشعر العادية بتاعتنا. واحنا قاعدين فاتت مجموعة من الطيارات، وكان بالنهار .

- دي الطيارات بتاعتنا .

- بتاعتنا ازاي يعني؟

- بقت بتاعتنا، الجيش بقى بتاعنا، الجيش جيش الشعب دلوقت .

وكملنا نقرا شعر .

كمال ما حبش يوضح أكثر، بس بعد كذا أنا خمنت ان كمال عبد الحليم كعضو في منظمة «حدثو» في الأغلب كان عنده اتصال بأحمد حمروش أو يوسف صديق الطباط الأحرار أعضاء «حدثو». «حدثو» كمجموعة شيوعية اعتبرت إن حركة الجيش بتصب في ثورة تقدمية، وانا أظن إن هي كانت وطنية، وأفكر إن يوسف صديق انضم لحركة الجيش على أساس كذا .

سعد كان لا يزال محبوس من ساعة حريق القاهرة، يعني كان جوه المعتقل يوم 23 يوليو 1952 ، لكن أفرجوا عنه وعن المعتقلين السياسيين أو على الأقل عن جزء من اللي اعتقلوا في 26 يناير، سعد خرج ورجعنا نتقابل ثاني ورجعنا لحركة السلام والمقابلات مع سيزا نبراوي وإبراهيم رشاد. رجعنا من غير ما نقول ولا نتكلم في شبه اتفاق ضمني إن احنا بنحب بعض وممكن نتجوز. حاولت أفكر امتي حصلت البداية، إمتي قررنا إننا بنحب بعض أو قررنا نتجوز، لما هو طلب مني ما كانش بشكل تقليدي زي كل الناس «أنا باطلب إيدك نتجوز»، لا ما كانش كذا، بس مش قادرة أفكر حصل ازاي. إبراهيم رشاد اللي كان سكرتير عام حركة السلام عزم سعد و«صديقة سعد» اللي هي أنا، على الغدا في فيلته هنا في ميدان المساحة في الدقي وكان عنده طباخين وسفريجة، كانت حركة مؤثرة شوية إنه يعبر عن تعاطفه معنا .

أكثر واحد ظريف معنا بيساعدنا ويياشر مقابلاتنا كان يوسف حلمي. كنت باحس إنه متبنيني أو متعاطف معايا، يبص لى كثير، مش بأي غرض، لا، عينه عليّ، ياخذ باله مني. يعني ممكن سعد

يبقى مشغول في الكلام فيوسف ما يسيبنيش أحس بالوحدة يشوف لو انا عندي كاس ولا لأ، يقدم لي سيجارة، ياخذ بتيفور في طبق ويجيبه لي. كان مستبشر بالعلاقة. لما ابنتت الفكرة تعشش في ذهننا إن احنا حنتجوز بجد، سعد ويوسف حلمي ابتدوا يبصوا لموضوع الجنسية من الناحية القانونية، يوسف حلمي محامي عنده مكتب في شارع سليمان باشا جنب أوتيل اسمه «Hôtel des roses» - «فندق الورد» - واهتم بمحاولاتي للحصول على الجنسية المصرية: إيه إمكانية إن احصل على الجنسية وما اترحلش من مصر؟ نظرياً فيه قانون إن اللي اتولد في مصر وعاش فيها لما يبلغ واحد وعشرين سنة يقدر يطلب الجنسية المصرية - ويحصل عليها ما دام معندوش جنسية ثانية - دا كان بينطبق عليّ على أساس إن أبويا اتولد في مصر سنة 1909 بدون جنسية محددة، يُعتبر جيت مصر من أيام «الحكم العثماني» مع جدّي، دا غير إن في شهادة ميلادي مكتوب مصرية. طلع قانون بعد كذا أعتقد سنة واحد وخمسين إن المقيمين في مصر لا يعتبروا مصريين إلا لو كانوا حصلوا بالفعل على الجنسية المصرية. مش عارفة المصريين اللي عايشين في مصر من أكثر من خمسميت سنة أو ألف سنة ما كانش مطلوب منهم إثبات، كان طبيعي بالنسبة ليهم. ولكن اللي جاين من بلاد الحكم العثماني في وقت أقرب وبيقولوا إنهم مصريين عليهم يقدموا دليل على إنهم جاين من السلطنة العثمانية. أبويا ساعتها طلب الجنسية المصرية على طول بصرف النظر عن ظروف و رغباتي، مولود في مصر ومكتوب مصري في شهادة ميلاده وأهله جم مصر في أوائل القرن من تركيا ذات نفسها، لكن إدارة الجنسية ما ردوش عليه، إلى حد ما كونه يهودي وكوني أنا ممسوكة في قضية شيوعية ممكن يكونوا أثروا بالسلب. قلت قدام يوسف حلمي إنني شديدة الرغبة إنني أقعد في مصر وما اترحلش، فلما تمّيت واحد وعشرين سنة، سنة 1952 يوسف حلمي عمل لي طلب رسمي للحصول على الجنسية المصرية، وقدمه وقعدنا نستنى الرد .

صحيح كان في ذهني ورغبتني إن في النهاية اتجوز واحد مصري، لكن لما خرجت من السجن ما كنتش لسه بافكر في الجواز، وكنت باعيش حياتي الثقافية السياسية الاجتماعية ومشغولة بيها، كان بدري على الجواز. لكن العلاقة مع سعد طالنت، وبقيت أقدره واحبه وهو كان بيظهر لي عواطف مريحة، الحقيقة لطيف لأي بنت إن يكون فيه واحد عايز يتجوزها وبيعاملها زي ما سعد كان بيعاملني. ابتدا شكل العلاقة مع سعد يتحدد بأني أتعرف على حياته وأهله وأهل أصدقائه كمان، مثلاً خدني يعرفني على نجيب فخري أقدم أصحابه هو وأخوه مدحت في بيتهم في شارع العجوزة على النيل، فنجيب دخلني أسلم على أمه سميرة هانم .

سعد قدمني لطنط عزيزة خالته، قبل ما يقدمني لامامته. طنط عزيزة كانت قاعدة في بيت الحدايق، اللي انت تعرفيه كويس. كانت شاطرة قوي في الطبخ وسعد كان بيتدلح عليها وطلب منها تعمل لنا حمام محشي رز. ورحنا لها. بيت واسع على صالة كبيرة وبلكونة في الوش وأوضتين على اليمين واثنتين على الشمال، فكرني ببيتنا في العشماوي مع الست «ماريا» وابنها اللي جاب لي حول في عيني، بس بيتنا كان يبدو أوسع علشان كنت صغيرة. ولقيت عندها بوفيه زي البوفيه بتاعنا، رُخامة على مستوى الإيد وفاترينتين على دورين، أمي كانت بتخبني دوا الكحة «سيروولينا» على أعلى رف. طنط عزيزة دخلتنا أول أوضة على يمين باب الشقة، «أوضة الصالون» اللي ما يدخلهاش إلا الضيوف. النظام دا كان جديد عليّ. قعدت معانا شوية وبعدين سابتنا لوحدها ودخلت المطبخ، وبعد شوية دخلت ذهب اللي بتساعدنا ومعها الحمام المحشي وأكلنا، أكلنا حمام محشي في أوضة

الصالون. لوحدنا. فوجئت إن مفيش حد أكل معنا. بعد شوية سعد ابتدى يحاول... عايز يحضني، عايز يبوسني، كدا، بس انا الحقيقة كنت بارفض بشدة علشان أنا ما اقدرش! لأنني في بيت خالته. صحيح الباب كان مقفل لكن فعلاً في وقت من الأوقات اتفتح الباب ودخل حد، ذهب أو طنط عزيزة مش فاكرة .

الكلام دا بينما أبويا وأمي معندهمش فكرة عن وجود حد اسمه سعد كامل في الدنيا .

رجعوا عزموني عند طنط عزيزة في لمة عائلية كبيرة، خلان سعد وعائلاتهم بالأولاد. جوز طنط عزيزة كان مات من مدة وما جابنتش عيال، فهي اللي كانت بتاخذ بالها من أبوها عثمان رضوان، راجل كبير في السن. طنط أمينة أختها، خالة سعد الثانية، جت هي وأولادها، حمادة كان صبي وميمي لسه صغيرة، أنا نفسي كان عندي عشرين سنة، بس كنت بانظر لكل أولاد طنط أمينة على إنهم «الصغيرين» واعتبر نفسي من «الكبار». فتحي رضوان خال سعد كان موجود بنفسه يومها وأبلة نفيسة مراته وأولادهم عصام وعزة وعمرو. فتحي رضوان محامي كبير مكتبه في شارع عبد الخالق ثروت وكان زعيم - وفضل زعيم سياسي لحد آخر حياته - كان زي أخو سعد الكبير وأستاذه ومثله الأعلى في السياسة، بيقتضي أوقات كثيرة في السجن بسبب نشاطه السياسي فوجوده يومها كان مفرحهم كلهم، حاجة كبيرة عندهم في عيلة سعد، بيحترموه ويحبوه. في العزومة دي حضر كمان كمال الدين صلاح أخو أبلة نفيسة نسيب وصديق فتحي رضوان، كان ممثل الأمم المتحدة في الصومال حاجة كبيرة برضه. بس انا ما كنتش باحس بالرهبة. يومها حبيت كمال الدين صلاح لسبب شخصي: فكرني بمدرس الحساب في أولى إعدادي، اللي كان اسمه «دي بينيديكتس» اللي خوَّف الفصل كله وكان أحسن مدرس رياضة في حياتي. العزومة دي ما كانش ناقصها إلا أهل سعد، أبوه وامه واخوانه. قعدنا كلنا على ترابيزة السفارة الكبيرة المستطيلة، وفريج جاب الطبخ، وابتدينا ناكل. التعامل معايا كان لطيف، علشان الناس دي كلها ما كانوا بيوجهوا لي أنا بالذات الكلام ولا بيسألوا أسئلة كبيرة، سايبني في حالي، في نفس الوقت ما حسنتش إنني معزولة أو ملغية، أشركوني بشكل طبيعي، فكنت حاسة إنني على راحتني إلى حد ما، شوية أسئلة، شوية كلام، والكلام ماشي والأكل ماشي. فجأة أبو طنط عزيزة، جدّ سعد، ابتدى يعيط، كدا في وسط الأكل وبدون مناسبة، أنا اتخضيت، بصيت لطنط عزيزة جنبي :

- هو زعلان ليه؟ فيه إيه؟

- لا ما تاخدش في بالك، كبر في السن ومن وقت لوقت بيعيط من غير سبب .

وفعلاً، كملوا عادي، وهو سكت ورجع ياكل ويكلّموه ويرد ويستمر شوية وبعدين يعيط تاني .

طنط عزيزة شرحت لي إن كبر السن ساعات يعمل ضعف من النوع دا .

فيه اتنين بيساعدوا طنط عزيزة في البيت ما كانتش لوحدها، حاجة برضه جديدة عليّ، فريج للمطبخ ودهب للنضافة، طنط عزيزة كانت تتميز بسلسلة من المساعدين، تربيهم من وهم صغار وتتخايق معاهم لما يكبروا، كانت معروفة بالقصة دي، هم ملهمش حد وهي معندهاش أولاد، بتتبناهم تقريباً.

طنط عزيزة بتتبنى كل الناس: متبنية سعد وكل ولاد أختها أمينة واتبنتني أنا كمان على طول، وأصبحت ضيفة منتظمة عندها أروح لها حتى لو حدي ساعات، تاخذني في أوضتها وبتكلم، وسعد يحصلني وبنزل سوا من عندها. مؤخرًا كنت باقرا في كتاب المحامي عادل أمين تقارير المخبرين وهم بيراقبونا مكتوب فيها «وتوجّهت إلى حدائق القبة ثم لحق بها سعد كامل» أنا كنت بازور طنط عزيزة .

أخيرًا سعد جابني بيت مامته، هنا في البيت دا اللي باحكي منه الحكايات دي كلها، بيت الدقي .

نانا منيرة - أمه - كانت موجودة في البيت وبتعرفت عليها، كانت لوحدها، أظن جدو يومها كان في العزبة. زي عند طنط عزيزة الضيوف يقعدوا في أوضة الصالون. نانا كانت دايماً مُصرّة ما تستخدمش الأوضة دي علشان تفضل نضيفه وجاهزة لما ييجوا ضيوف، فأنا يومها دخلت البيت كضيفه لسعد، لكن في الأول دخلني عندها في أوضة القُعاد وسلمت عليها وسلمت عليّ وقعدنا نتكلم شوية وبعدين سعد قال لي بوضوح قدام أمه :

- تعالي بقى نقعد في الصالون .

سبناها وقعدنا في الصالون نتكلم ولما جيت أنزل وأنا باسلم عليها نانا قالت :

- روح وصلها لبيتها .

أوضة القُعاد اللي قابلت فيها نانا لأول مرة حولناها مؤخرًا لأوضة نوم وبننام فيها أنا وسعد، وبنسميها أوضة السفارة على أي حال علشان حطينا فيها ترابيزة السفارة في وقت من الأوقات، وكنبة القُعاد اللي قعدنا عليها أنا ونانا في أول زيارة ليّ، إنت خدتيها أوضتك وعملتنيها سرير تنامي عليها وبعدين أنا أخذتها وأنا اللي بانام عليها دلوقت. إلا أوضة الصالون، ما اتغيرتش عمرها، كدا بالظبط، النهاردا زي لما دخلت بيت الدقي أول مرة، التفصيلة الوحيدة اللي اتغيرت هي قماش التجديد، كان قماش رمادي يشبه الحرير الصيني والحيطه كانت لون بمبي قديم اسمه «bois de rose» يعني بمبي مطفي وما كانش فيه الكراكيب اللي احنا حاطينها، زي مكتبي الصغير .

من ناحيتي في الفترة دي من وقت لوقت كنت باحاول افتح الموضوع مع أمي، باقول لها :

- أنا كبرت بقى واظن لازم اتجوز .

فهي تقول :

- آه .

وتسكت، مرتين ثلاثة لغاية ما فتحت الموضوع :

- أنا اتعرفت على واحد مصري وأهل الشخص دا عايزين ييجوا .

قلت «مصري» بس، ما قلتش انه كمان له دعوة بالسياسة، والحقيقة إن انا نفسي ما كنتش اعرف معلومة إنه خارج من قضايا الاغتيالات، أو حتى لو كنت عارفة مش مقدره الخطورة، أنا لسه في مرحلة إن «السياسة هي الشيوعية»، كان عندي شيء من السذاجة السياسية .

*

طنط عزيزة ونانا جم البيت عندنا .

يا حبابي الاتنين والله .

كنا لسه ساكنين في شارع نعيم وبيتنا كان متواضع جدًا ولا صالون ولا حتى قُعاد، لكن انا ما كانت بيهمني .

جم بيتنا في شارع نعيم وقالوا إن سعد عاوز يتجوزني. ترابيزة السفارة مربعة في وسط الصالة، قعدنا حوالينا. ولا طنط عزيزة ونانا منيرة ولا أبويا وأمي كانوا مبسوطين، كان فيه شيء من التردد، ولكن احنا كنا موجودين حوالينهم أنا وسعد، قاعدين كدا جنب بعض مستبيين إن أهالينا يتفقوا . ما اتدخلناش في الحوار بس أكدنا عليهم ان إحنا عايزين نتجوز، وبالطريقة دي حصل رسمياً إنهم طلبوا ايدي على أساس التفاصيل حتيجي بعدين .

طنط عزيزة ومنيرة هانم مشيوا وسعد مشي معاهم، وجه يوم ثاني لوحده بناء على طلب من أبويا، أبويا بقى المرة دي ناقشه بشدة، ضيق الكلام وزنق سعد :

- فيه موضوع الدين .

- حنطه .

- سمعة المسلمين إنهم بيتجوزوا أكثر من واحدة ويطلقوا بسهولة .

- فين دا؟ مفيش الكلام دا عندنا، أبويا اتجوز مرة واحدة وخالي كمان، حياة عائلية مستقرة .

- طيب، وموضوع المعيشة؟ لازم الواحد يفكر كويس .

- أنا مش صغير، أنا عندي ثمانية وعشرين سنة وماشي في التسعة وعشرين، وأعرف كويس أنا باعمل إيه .

- الوضع الاقتصادي مش سهل، حتعيشوا ازاي؟

- أنا خريج حقوق وباشتغل محامي في مكتب فتحي رضوان .

سعد في الحقيقة كان ساب المحاماة وابتدى يشتغل صحفي في مؤسسة «أخبار اليوم» و«آخر ساعة»، بس لما اتقدم لنا قدم نفسه كمحامي مع فتحي رضوان لأنه كان خريج كلية الحقوق فعلاً وكان اشتغل مع فتحي رضوان .

- حندور على بيت وحنأسه شوية بشوية، وحنجوز .

كل ما كان أهلي يعترضوا على نقطة إحنا الاتنين كنا بنحاول نحلها، بس سعد بالذات كان بيتصدّر، كان أشطر مني وكان محامي كويس، حاول يطمئنهم .

- طيب. حنشوف .

أبويا ما كانش مبسوط، بمعنى إنه كان قلقان، مش سهل عليه يطمّن .

لكن احنا ابتدينا نحضر للجواز على أي حال، سعد وانا، بمباركة أصدقاه، وبالذات يوسف إدريس وحسن فؤاد ويوسف حلمي وسيزا نبراوي اللي جابت لي هدية الجواز مقدماً، مفرش دانتيلا معمول باليد. وكان فيه إنجي أفلاطون وجوزها أبو العلا .

بالنسبة للأهالي كانت صدمة .

من ناحية أبويا وأمّي الدين كان عائق أساسي بسبب الفكرة المنتشرة بين الخواجات عن الأزواج المسلمين إنهم وحشين في مسألة سهولة الطلاق وتعدّد الزوجات. فبال تأكيد أبويا وأمّي ما كانوا يحبوا إن انا اتجوز واحد مسلم وعربي. من ساعة ما خرجت من السجن وهم بيحاولوا يعرّفوني على شباب طلياني أو يخلوني أسافر إيطاليا، استئناف المذاكرة أصبح صعب بعد انقطاع أكثر من 4 سنين، لكن كان نفسهم أسافر إيطاليا واشتغل واعرّف بحد إيطالي هناك في إيطاليا، بس ما كانوا ناجحين علشان أنا من وقت ما قلت لأصحابنا الطلاينة «أنا مصرية وحاقد في مصر، مش حامشي» خلاص كان قرار أنا خدته، ما اتغيرتش ولا ثانية واحدة من سنة 1948، وأثناء كل الأحداث اللي حصلت بعد كذا الاقتناع دا كان موجود بعمق في قلبي لغاية الآخر. ومسألة إنهم بيرحلوا الأجانب والخواجات ما كانتش في ذهني، باقول لنفسي «دا ما بينطبخش عليّ، معنديش الجنسية الإيطالية ولا أي جنسية ثانية، اتولدت في مصر وابويا اتولد في مصر، أهلي عايشين في مصر». بالإضافة إلى إنّي كنت مبسوط من البيئة اللي اتوجدت فيها بعد السجن واندمجت لشوشتي مع المجتمع المصري. كنت باقول لأهلي «سعد مش زي اللي بيطلقوا بسهولة ويتجوزوا أكثر من واحدة، مش كل المصريين، مش كل المسلمين زي بعض في المجتمع». من جوه قلبي باقول الكلام دا، زي ما باقول «مش كل اليهود زي ابويا ولا كل المسيحيين زي امي».

أما من ناحية أهله، فبرضه كانت قصة مش مريحة، من ناحية أنا كنت شيوعية وعندي تاريخ سياسي ويفضلوا إن ابنهم يتجوز واحدة تبعده عن المخاطر دي، واللي أكد لي إنّي عرفت فيما بعد إنهم كانوا حاطين عينهم على واحدة من قريباته يتجوزها. وبرضه حكاية أجانب ومسيحيين مش حتكون زوجة يقدرُوا يتقاهموا مع أهلها بسهولة، يفضلوا يتجوزوا من بعض، يعرفوا بعض، بنت

فلان وبنت فلانة، إلى حد ما أريح، مثلاً أمينة رضوان خالة سعد اتجوزت مصطفى مراد، أهلهم يعرفوا بعض. وبعدين زوجة أجنبية ما يعرفوش عوايدها مش زي بنت من بناتهم. أما من الناحية الاجتماعية - مع إن عمرهم ما قالوا - أنا أعتقد إنهم من طبقة نقدر نسميها الطبقة المتوسطة، عندهم حتة أرض، عندهم وظائف معينة، صحيح مش أغنيا ولكن مش فقرا. إحنا السكن بتاعنا في شارع نعيم كان سكن فقير، في منطقة مش معقولة بالنسبة لعائلة سعد، والبيت نفسه من جوه، العفش اللي في بيت سعد كان أظم، أوضة سفرة وأوضة صالون وفوتيلات ودواليب، يبان بوضوح الاختلاف من الناحية الاجتماعية، أظن كانوا يفضلوا إن سعد يتجوز واحدة مستريحة اقتصادياً، خصوصاً إن سعد ما كانش مستقر مالياً وما كانش عنده وظيفة ثابتة .

طنط عزيزة أكدت لي على الكلام اللي أبويا قاله لسعد :

- ما الواحد عاوز يتجوز طبعاً، واللي بيحبوا بعض يقولوا احنا نرضى بأي حاجة، بس لما تيجي تفتحي بيت، فيه احتياجات ما تقدريش تمنعيها، يعني البيت عايز صابون وعايز زيت، مش مسألة عفش وصيغة ومهر دي حاجات ممكن الاستغناء عنها فعلاً، ولكن الحياة اليومية مش سهلة .

مش فاكرة رديت على طنط عزيزة قلت إيه. بعدين عرفت إن في التراث العربي والإسلامي، قصص من نوع إن مفيش مانع الست تبقى قوية مادياً وتسند جوزها، زي الشاطر حسن يتجوز الأميرة هو راجل شاطر يستحق ثروة الأميرة، وزي النبي محمد، الست خديجة كانت قوية اجتماعياً وغنية مادياً، وأصلها وثقت فيه إدت له مسؤولية تجارتها، وبالمقابل فضل يحبها وما يزعلهاش طول حياتها لغاية ما ماتت، ما اتجوزش عليها وهي عايشة، جالي إحساس كدا ان فيه ثقافة إن الست تشتري شطارة جوزها، هو يكسب ثقتها وهي تشتري شطارته، ويمكن الموضوع مش مقصور على العرب والمسلمين .

على أي حال، كل دي أفكار نظرية عن الجواز، لكن عملياً أول ما واجهوا نيتنا، العائلتين عملوا مجهود كبير علشان ياخدوا رغبتنا واختيارنا مأخذ الجد. واحنا من ناحيتنا أول خطوة عملناها حاولنا نرضي أمي بشكل ملموس. الجواز في الكنيسة مش ممكن إلا بإذن من بابا الفاتيكان، لأن سعد مسلم ومش ممكن الكنيسة تبارك جواز مسيحية من مسلم، فسعد قال لأمي :

- إن شاء الله حنصل على الإذن دا .

ورحنا قابلنا قسيس كنيسة أمي، كنيسة الكرمل اللي جنب البيت :

- لا مش ممكن .

القسيس كان اسمه الأب «لويجي»، راجل كبير في السن موجود من أيام الحرب، سعد رد عليه بحسم :

- لا ممكن، ولازم نقول لي إيه الإجراءات اللي مطلوب أعملها، أنا أصلي محامي وعارف إن ضروري فيه طريقة .

- خلاص، روح كنيسة سان جوزيف في شارع عماد الدين واطلب مقابلة ممثل الفاتيكان واحكي له حكايتك وشوف حيقول إيه .

أخذنا بعضنا ورحنا كنيسة سان جوزيف وقعدنا نستنى، استنتينا كثير، كانت الساعة سبعة، بعد المغرب بشوية لما دخلونا أخيراً نقابل «مسؤول الفاتيكان» وأنا شرحت في الأول طبعاً، بس سعد هو اللي كان بيتصدر دايماً إن يناقش ويحاول يقنع اللي قدامه، آخر جملة قالها له علشان يفهمه :

- أنا عايز أكون جدّ، إحنا حنتجوز يعني حنتجوز، بس عاوزين نتجوز برضاكم، كلكم. الدين الإسلامي مفيهوش مشكلة بالنسبة لنا، راجل مسلم يقدر يتجوز ست من أي دين تاني، المشكلة جاية من دين اللي حتكون مراتي، أنا عاوزها تكون مرتاحة ومقتنعة، مش عاوز اعمل تصرف ترجع تتدم عليه بعد كدا .

أقنعه !

أقنعه يكتب للبابا في الفاتيكان يطلب لنا إذن نتجوز بالطريقة المسيحية في الكنيسة: جواز كاثوليكي. كنا بنروح نسأل ويقول لنا تعالوا تاني بعد مدة .

استمرينا في حياتنا، كنا في غاية السعادة، مش عارفة أشرح، كنا بنعيش كويس وراضيين بالناس اللي حوالينا وبأصدقائنا وهم مبسوطين بينا، ومستنيين الإذن من الفاتيكان ومستنيين الرد على طلب الجنسية .

في هذه الأثناء أبويا وأمي وكل أصحابهم ابتدوا يعملوا مجهود ان يتعرفوا على سعد . إنت تعرفي الصورة واحنا بنرقص مع بعض؟ دي كانت حفلة عملوها عيلة «موتي»، أسرة إيطالية، جيراننا، أكبر من أبويا وأمي شوية وعيالهم أكبر مني، فكان فيه شيء من التبني في علاقة «موتي» بأبويا وأمي. عملوا في بيتهم حفلة عشا علشان يتعرفوا على سعد ويعرفوه على الناس والجيران. وكعادة الطلاينة بيكون فيه أكل وشرب وشوية رقص. كنت مبسوطة من الجو دا، ورقصت مع سعد في وسطهم، ورقصت مع «برتو» أخويا، وشوية غنا وشوية مزيقة ومشيت المسألة، والسهرات دي اتكررت .

أهل سعد برضه عملوا مجهود، واتعزمت مع العيلة أروح العزبة في الفيوم على أساس إني «خطيبة سعد» .

أبو سعد كان باع أرضه، حوالي ثلاثين فدان في الشواشنة ناحية بركة قارون، واشترى بنفس المبلغ مئة وثلاثة فدان في سيلا قبلي سنورس، في الفيوم برضه، بس أرض عايزة شغل. بالنسبة ليّ أنا، عمري ما كنت رحت ريف ولا تعاملت مع فلاحين. أمي جاية من الريف بس انا ما كنتش رحت

إيطاليا لسه، أنا اتولدت في القاهرة في العشماوي وعشت طفولتي في أبو العلا وابويا اتولد في القاهرة برضه فما كانش عندي أي احتكاك بأي ريف ولا طلياني ولا مصري. في أبو العلا البياعين مصريين مش خواجهات، وصاحب البيت في شارع نعيم مصري، ولكن على أي حال أصبحوا قاهريين في القاهرة، مش فلاحين في الريف. زيارة العزبة في الفيوم كانت تجربة عظيمة. لما جدو وانا أخذوا أرض سيلا صلحوا بيت العزبة تصليح كبير، البيت كان أوضتين نوم زي ما هو ولكن الفسحة بين الأوضتين كانت حوش مفتوح عليه ضليلة جريد تحمي من الشمس، فعملوا سقف ولضموا المعيشة بالحمام والمطبخ وأصبح بيت متكامل وعملوا عزومة لافتتاح العزبة الجديدة. المرواح للعزبة ما كانش سهل، نانا وجدو بيروحووا بشيل واسبته وشنط لكن جدو كان لسه بصحته، يوقف التاكسي ويشرف على التحميل والتنزيل ويدفع للسواق، كان بيدير العملية بثبات. أخذنا تاكسي من الدقي نزلنا محطة الجيزة وركبنا القطار ورحنا الفيوم، ومن الفيوم أخذنا تاكسي أرياف وصلنا سيلا. كانوا عازمين فتحى رضوان أخو نانا، أيامها كان أصبح وزير في حكومة جمال عبد الناصر، ويظهر محافظ الفيوم جاله خبر، ففي اليوم دا كان فيه هجانة - يعني بوليس راكب جمل - نشوفهم يمشوا حوالينا من بعيد: «حرس الوزير».

اتعرفت على جوز طنط أمينة مصطفى بك مراد وأخوه سعد مراد، سعد مراد كان لسه متخرج من فنون جميلة وبيشغل مدرس رسم في مدرسة في الفيوم فجه هو ومراته وهيبة. وكان فيه كثير من عيال العائلة، ولاد فتحى رضوان الصغيرين عزة وعمرو عيال في حدود تمن سنين مش عارفة ليه عصام الكبير ما كانش موجود يومها، وأولاد طنط أمينة حمادة وميمي وقاسم وإبراهيم وفضيلة، فتحى ما كانش لسه اتولد، فضيلة كانت أصغرهم، طفلة لذيدة شقية بتجري وتتنط، شعرها إسود فحم وناعم جدًا ما يثبتش مكانه أبدًا، ينزل على وشها يغطي عينيها، ويقولوا لها شيلي شعرك من على عينيك وتشيله وينزل تاني، هي مش متضايقه الكبار هم اللي متضايقين، مرة يقصوه لها ومرة يشبكه ببنسة لكن مفيش فايدة. أنا ما كنتش على راحتي يومها، الريف كان جديد عليّ، الفلاحين بلبسهم والبيوت الطين والغيطان والحمير، وانا جديدة في وسط كل الناس دي، فلما جابوا حمار يركبوا عمرو وعزة ويتسلوا عقبال ما الأكل يتحضر اخترت أروح مع العيال ورحلة الحمار، بعثوا معنا ولد من ولاد الفلاحين لكن بعد شوية الولد دا اختفى سابنا مش عارفة راح فين والحمار وقف مش عاوز يتحرك، عايزينه يرجعنا البيت مش عارفين، عزة نزلت من على الحمار ونزلنا عمرو. كنا في السكة اللي بتودي إلى «الأرة»، ثلة بور بين الغيطان، ما كانش فيه بيوت على السكة دي خالص، الحمار سابنا ودخل الغيط وابتدى ياكل في الزرع، سمعنا إن الحمار مش لازم ياكل الزرع علشان المحصول ما ينقصش، الولد اللي كان معنا قال كدا قبل ما يختفي. نزق الحمار ونشده مفيش فايدة، ما بيتزحزحش، مستمر ياكل مش بيعبرنا. الجو كان شمس وحر فقررنا نسيبه في الغيط ورجعنا البيت ندور على مساعدة :

- الحقوا الحمار بياكل الزرع .

أنا كنت حاسة بالمسؤولية علشان أنا الكبيرة وأول مرة آجي مع سعد قوم ابوظ لهم المحصول؟ سعد سألني :

- إيه اللي كان مزروع في الغيط؟

- ما اعرفش .

وعمره وعزة برضه ما يعرفوش، راح سعد لبيت عم رياض الغفير بيلغ على الحمار اللي بياكل الزرع، وعم رياض جه بنفسه معنا للغيط وقال :

- دي درة زغيرة، دا اكله، مش مشكلة .

والحمار مشي معاه بلا مقاومة .

نانا حبيبتي وضبت ترابيزة، جابت لوح خشب طويل وحطته على صناديق في الجينة وحطت عليه ملاية سرير كمفرش، ولموا الكراسي من بيوت الفلاحين، الفلاحين ما كانوا بيستخدموا كراسي أصلاً، فاللي عنده، إن كان عنده، شيع الكرسي اللي حيلته علشان خاطر عزومة «الست الكبيرة». نانا يومها طبخت ديك رومي أو اتنين، وكان فيه فلاحه بتساعدها، كانت شاطرة تعرف تطبخ ملوخية ورز وديك رومي، لكن جينا ناكل الرز لقيناه مليون زلط، يظهر ما نقوهوش. ومع ذلك الكل كان مبسوط، خدوها ضحك وهزار وفتحي رضوان أس على أخته :

- إيه يا منيرة دا؟ انت جايانا في حنة مفيهاش غير رمل؟

العزبة كانت في بدايتها وما كانش فيها حاجة تقريباً، جبل، كأننا في السكة لمدرسة نبيل في القطامية، صحرا مش باين فيها زرع إلا المستطيل اللي الحمار دخل ياكل فيه، كانوا بيسموه «أرض المطار» علشان مستطيل وطويل وأخضر .

لكن أكلنا كويس، الرز بس هو اللي ما اتاكلش. وانا على آخر الرحلة كنت انبسطت .

أنا كمان عملت مجهود، قدمت على شغل كسكرتيرة «dactylo» في شركة استيراد وتصدير وخدوني على طول، كنت سريعة أيامها وكانوا مبسوطين مني، كنت باكتب الجوابات كويس وباشغل الشغل، دقيقة ومهتمة بالعمل، معندهمش شغل كثير ولكن شغلانة مناسبة لي. أصحاب الشركة اتنين اخوات لطاف تبنوني وحاولوا يشجعوني :

- إنت لو تتعلمي الاختزال ماهيتك تزيد وشأنك يكبر .

وابتديت أخذ دروس اختزال بالانجليزي، «طريقة بيتمان» ولسه عندي الكتب هنا. الاخوات الظراف دول كان عندهم عمارة ملك جنب مبنى التلفزيون، البيت الوحيد اللي جنب التلفزيون ولسه موجود، فكرت اسألهم :

- معندكمش شقة؟ عاوزة اتجوز .

وفعلاً كان عندهم شقة فاضية في العمارة، شقة بتشوف النيل من الجنب، كنت باشوف كل النيل من البلكونة، وأظن مبنى التلفزيون ما كانش لسه اتبنى، وأجرنا الشقة وابتدينا نفكر نفرشها .

سعد كان متألق مع حركة السلام، عايزة أفولك على وفد مؤتمر المرأة اللي سعد نظمه تبع حركة السلام، كنت بانظم معاه فإلى حد ما كنت باحس في الكلام والاتصالات بوجودي في وسطهم كأني باشتغل معاهم. سعد جاب طنط عزيزة تروح المؤتمر وهدى زكي الممثلة مرات صلاح حافظ ورضا مرات حسن فؤاد كانت ممرضة واتفرفت على عايدة فهمي - أول نقابية ست في مصر. طبعاً أنا مش فاكرة كل الأسامي، بس مجموعة لطيفة جداً من الستات تحت رياسة سيزا نبر اوي وسافروا ألمانيا الشرقية أو بولندا، حنة من الحنت دي، بلد اشتركي، المؤتمر برياسة «أوجيني كوتون»، رئيسة «الاتحاد النسائي الديمقراطي العالمي». هناك اتنين من الوفد اتخانقوا مع بعض، بس الحدث الأهم إن مرات علي الدالي للأسف مش فاكرة اسمها، معندهاش خلفية سياسية لكن متكلمة وعندها حيوية لما لقت نفسها قدام كل الستات دول - تعرفي جو المؤتمرات - راحت لابسة جلابية فلاحية ومنديل وطرحة واتفكرت بالعربي لأنها ما تعرفش لغات وقالت ببساطة: أنا فلاحه من المنطقة الفلانية في مصر وسعيدة أكون وسط جمع ستات من العالم كله وقالت كلمتين مش اكتر عن مشاكل الستات. قالت كلمتها بالعربي وترجموها للغات كتيرة، صققوا لها كتير وسيزا نبر اوي كتبت في التقرير إن اختيارها في الوفد موفق جداً ونجاحها ممتاز .

مش عارفة قبلها ولا بعدها كان فيه مهرجان للشباب في رومانيا، مهرجان مفتوح بمعنى إن الوفود مش ضروري تكون وفود حكومية أو تابعة للدولة، وفود «شعبية»، شباب من كل بلاد العالم. مهرجان بيحتاج تنظيم كبير لأن الأعداد اللي بتحضر مهولة وفيه كل النشاطات اللي ممكن تهم الشباب من ألعاب رياضية ومعارض وفنون ومحاضرات. حركة السلام المصرية قررت تشارك واختاروا سعد يكون المنظم لوفد شباب مصري في بوخارست. سعد بقى كان بيبلط في المسائل اللي زي دي. الناس اللي حو اليه حسوا بقدراته وبقوا يقولوا له إنت اللي حتجهز الوفد، عنده رؤية وفي نفس الوقت يشيل المسؤولية وينفذ، فعمل تصور لوفد شعبي شبابي مرتبط بمضمون السلام وبفكرة المهرجان. اشتغل شغل! كَوْن وفد فيه تحية كاريوكا تمثل الفنون وهي قبلت على طول، كانت كبيرة نسبياً في السن، فوق الثلاثين وفي عز نجوميتها. اختيار فيه جراً من سعد ومن تحية، جراً منه لأن حتى الشيوعيين في مصر مش بالضرورة عندهم احترام للرقص الشرقي، وجرأة منها لأن رومانيا ما يعرفوش تحية كاريوكا أصلاً، ما كانتش ابتدت ثورة الاتصالات والدش، فالإعلام ما كانتش بنفس الطريقة. سعد كان عنده ثقة، فاهم إن تحية شخصيتها قوية، فنانة موهوبة وبقليها في حركة السلام واجهة معبرة عن فنانيين مصر أيامها. وعن طريق أخت شريف حتاتة، منى، لاعبة كرة السلة في نادي الجزيرة، سعد أقنع الفريق كله يطلعوا المهرجان. وبهجت عثمان راح من ضمن الرسامين، شاب صغير ورسام كاريكاتير موهوب وصاعد، ما نسيش لسعد أبداً الفرصة دي. مصطفى درويش راح كأخصائي سينما، شاب ساعتها ومصطفى روجه دائماً شباب، لحد دلوقت وهو سنة فوق الـ70 سنة فما بالك لما كان في العشرينات؟ دا طعم الوفد اللي شكّله سعد، شباب صاعد متنوع المواهب، وفد حقيقي .

المفاجأة بقى إن حركة الجيش والمخابرات بتاعتها اشترطوا على سعد يقدم لستة بأسامي أعضاء الوفد، والمخابرات لازم توافق على كل اسم، اتناقشوا سعد واللي معاه في حركة السلام وقرروا إن

الموضوع يستحق يقبلوا شرط المخبرات: «المهم نقدر نشارك». بعث القائمة الطويلة دي تقريباً 50 اسم، رياضيين على فنانين على مثقفين وعلى راسهم تحية كاريوكا النجم الأوحده، وحط اسمه هو سعد كامل كرئيس للوفد. المخبرات وافقت على القائمة كلها إلا هو! سعد ما اتعزّش، كمل الإجراءات وعمل لهم الباسبورتات والتأشيرات وكل اللازم ورحنا معاهم اسكندرية نوصلهم بالقطر، وجه معانا إبراهيم رشاد من حركة السلام، وصلناهم للمينا وركبوا المركب. وقفنا على الرصيف نتفرج على المركب وهي بتبعد، وعليها الوفد في الطريق إلى ميناء «كوستانزا» في رومانيا على البحر الأسود على ما أظن. سعد كان بيقول «أنا مبسوط إنهم راحوا، زي بعضه» ولكن سعد كان شاب صغير هو كمان، وبالنسبة له رحلة زي دي كان حجبها قوي، كان نفسه يروح. إبراهيم رشاد كان حاسس بيه وشفته بيضطرب على ضهره واحنا واقفين على رصيف المينا والمركب بتبعد. سعد بيفتكر الحكاية دي وعمره ما نسيها، إزاي وافقوا على الكل وشطبوا اسمه هو، منعوه من السفر، هو اللي منظم الموضوع كله.

تحية كاريوكا راحت كعضو عادي ضمن الوفد وكان ممكن ما ياخدوش بالهم منها في رومانيا، لكن اللي حصل إن المهرجان عاملها كضيفة شرف وكبار الشخصيات في رومانيا قابلوها واتكلموا معاهم، والأهم من دا إنها عملت «succès» - نجاح كبير - بين الوفود ورقصت في شوارع بوخارست والناس على الناحيتين في الرصيف من هنا ومن هنا وفي الميادين العامة تصقيف ورقص معاهم، يمكن بعضهم بيشفوف الرقص الشرقي لأول مرة. عملت جو وعلى حسها الوفد المصري كان نجم إلى حد ما. مهرجان كبير والوفود ضخمة والمشاركين بالآلاف من كل البلاد، يعني وفد مصر ممكن يغرق في الزحمة. بهجت وسعد زعلوا مع بعض بسبب السياسة فيما بعد في السبعينات بس دي قصة تانية، بهجت لما رجع من المهرجان كان مش عارف يعمل إيه علشان يعبر عن مدى الاستفادة، عايز يوصف شاف إيه وانبسط قد إيه، هو ومصطفى درويش حكوا لنا بالتفاصيل لأسابيع عن النظام في الأكل وفي النوم لكل الناس دي، وحكوا لنا إن كان فيه وفود مستقلة جاية من بلاد شديدة العداوة للاشتراك وللمشاركته في المهرجان وتمكنوا ييجوا بصعوبة، بل فيه بلاد منعت وفودها من السفر للمشاركة فبعثوا تسجيلات صوت تحية لمهرجان الشباب. قصص مثيرة للحماس، عشتها بقلبي من غير ما احلل، بس دلوقت وأنا باحكي ذكرياتي ممكن أقول إن بابا، سعد كامل، عنده موهبة حقيقية للعمل اللي الشيوعيين بيصنفوه «العمل الجماهيري»، ما كانش حقته أبداً اتصعد في هياكل التنظيمات من النوع الماركسي الشيوعي، بصدق باقول، أعتقد إن ما كانش لازم أبداً، كل مرة دخل تنظيم اختالف وعمل مشكلة أو حصل صدام مع طبيعة شخصيته، مش ملائمة للتنظيم والسرية و«لديمقراطية المركزية».

المؤتمر دا غالباً حصل سنة 1953، سنة التحضير للجواز، علشان من ضمن تهم تحية كاريوكا لما اتقبض علينا إنها «سافرت بلد شيوعي». دي الأجواء اللي اتقبض علينا فيها، حماس وأفكار ومشاعر حلوة، وفي نفس الوقت حيرة كبيرة من الناحية السياسية، إيه اللي لازم وإيه اللي مش لازم واللي ممكن، وإزاي الواحد يتعامل مع النظام؟ وغيرها من الأسئلة.

لازم أفكر كويس التفاصيل دي، إيه؟ علشان دا كان على طول قبل القبض التانية وانتهاء المرحلة دي من حياتنا ومن المجتمع. كان فيه جبهة وطنية بتتكون بين الشيوعيين والجناح التقدمي من

الإخوان المسلمين والجناح اليساري للوفديين بالإضافة لكثير من المثقفين والفنانين وأعضاء حركة السلام، كانوا يجتمعوا في بيت نجيب فخري. سعد كان ساب بيت أهله هنا في الدقي وابتدى يسكن في الشقة اللي أجراها في ماسبيرو. يمكن كان فيه سرير وشوية حاجات وكان فيه كنبه وكرسيين جلد جابهم من مكتب فتحي رضوان. سعد اتقبض عليه من بيت ماسبيرو، وأنا جم خدوني من بيت أهلي في شارع نعيم في الفجر يوم 7 نوفمبر 1953 .

يهمني أحاول أشرح اللي أعرفه عن الجبهة الوطنية .

أواخر 1952 وأوائل 1953... كان فيه بوادر مش كويسة من النظام، حصلت واقعة إعدام العاملين خميس والبكري بسبب إضراب كفر الدوار، وكان فيه تضيق على الحريات السياسية، الموقف ما كانش اتحدد لكن ابتدى الكلام يدور ويتغير داخل منظمة «حدثو» من تأييد لحركة ظباط الجيش إلى تحفظ على الممارسات الديكتاتورية، واضح إن كان عندهم حق لأن الوضع بعد كذا تدهور بشدة. مجلس الثورة كان بيقول في بياناته «الأحزاب فساد في فساد، وعلشان نبني حياة سياسية سليمة حنلغي كل التجمعات السياسية القديمة المشكوك فيها بتهم خيانات وفساد وحيكون فيه تنظيم سياسي واحد تابع لمجلس الثورة» وفعلاً تم إلغاء الأحزاب وإغلاق الصحف بما فيها لجنة «أنصار السلام» وتم القبض على المعارضين وحبسهم، وحددوا مجموعة أشخاص سموها «هيئة التحرير» اللي بقى اسمها بعد شوية «الاتحاد القومي» وتحول إلى «الاتحاد الاشتراكي».

كان فيه سؤال دائم «هل مجلس الثورة وراه الاستعمار أصلاً لوضع حكومة قوية في مصر تخدم مصالحه وتتفادى قيام ثورة شعبية؟ وكان فعلاً فيه بوادر ثورة قبل يوليو 1952، ولا حركة الجيش دي وطنية والاستعمار ابتدا يأتُر عليهم؟» ولا إيه الحكاية؟ مع إني مليش نفس اتكلم في السياسة، بس مهم أقول إن دي كانت مواضيع متداولة، كنا بنتناقش فيها من غير ردود قاطعة أو أحكام. كانت أسئلة مطروحة. كنا بنحاول نفهم. بالنسبة لي أنا، مفيش شك عندي إن الظباط الأحرار اللي عملوا حركة 1952 كانوا وطنيين صرف وجزء من حالة في البلد ضد الاستعمار وضد الملك وضد ظلم كثير تاني، وإنهم كقيادة جديدة بيتعرضوا لضغوط من الاستعمار، ودا شيء طبيعي، أمال إيه؟ الاستعمار حسيبهم في حالهم؟ ليه يسيبهم في حالهم؟ «هل الاستعمار بيمارس ضغوط؟» دا ما كانش سؤال بالنسبة لي، اللي يهمني كان «هل مستمرين في خطة وطنية من أجل الشعب ولا إيه اللي بيجري لهم؟» دا نوع المناقشات اللي كنت مهتمة بيها. ما كانش عندي رأي واضح ونهائي، بحقيقي. كماركسية شيوعية مؤمنة بالشيوعية أساساً، كان المفروض أعتبر إن الوسيلة للتغيير هي الثورة الشعبية والإطاحة بالدولة الرأسمالية وإقامة دولة اشتراكية. لكن المسألة عندي ما كانتش شيوعية وغير شيوعية في الوقت دا، كنت شايفة إن إحنا بنعيش مرحلة تحرير وطني ولازم تحصل تحالفات بين الطبقات الوطنية المختلفة. بالنسبة لمجلس قيادة الثورة كان فيه إحساس إن فيه شوية عدم خبرة وشوية قرارات استثنائية خطيرة وشوية انفراد بالسلطة وشوية أطماع فردية. كان فيه خلافات داخل مجلس قيادة الثورة بدليل إن عبد الناصر أطاح بمحمد نجيب واتسربت أخبار إن يوسف صديق عضو مجلس قيادة الثورة معترض على الممارسات غير الديمقراطية. الخلافات دي ما كانتش معروفة للجميع ولكن كانت موجودة، وبتعكس على حياة الناس وعلى المجتمع .

النتيجة إن كان فيه مجهود بيتم لتجميع المعارضين التقدميين، مصطفى كمال صدقي اللي أنا جيت سيرته سريعاً لما حكيت عن بيت تحية كاريوكا، ظابط معارض في الجيش، ويوسف حلمي من فلول حركة السلام - اللي كانت انضربت خلاص - رجع من فرنسا علشان الجبهة، وكان فيه شيوعيين، شريف حتاتة واحد منهم وبعض موظفين الدولة زي نجيب فخري مدير مكتب فتحي رضوان وزير المواصلات في الوقت دا. يعني كانت بتحصل اجتماعات للمعارضة في بيت نجيب فخري بينما هو بيشتغل مدير مكتب وزير في الحكم. وعلى مستوى ثاني كان فيه جناح تقدمي يساري للإخوان المسلمين زي خالد محمد خالد، كان مستنير بشكل متميز مفيش زيه دلوقت، و«الوفد» حزب كبير وناس كتير كانوا بيعتبروا إنه خان القضية الوطنية، بس كان فيه جناح يساري تقدمي أعرف واحد منهم كان من عيلة سيف النصر الأرستقراطية، مش عادل سيف النصر، عادل لسه عايش ما ماتش، يمكن حمدي سيف النصر؟ شكله نسخة من الملك فاروق، كان بيحضر اللقاءات دي. سعد اشترك في عملية الاتصالات لتكوين كتلة مؤثرة أو جبهة وطنية معارضة تقف قصاد إلغاء الحياة الديمقراطية في مصر وممارسات الجماعة بتوع مجلس الثورة. أعتقد إن سعد ما كانش شيوعي منظم رسمياً، كان من التقدميين ومن «أنصار السلام» وكان قريب من الشيوعيين في الاتصالات وعلى أبواب الدخول في السرية. بس زي ما قلت قبل كذا أنا ما اعرفش سعد أصبح شيوعي عضو في تنظيم إمتي. كان فيه اتصالات سرية وخلايا وحاجات من دي، مثلاً في يوم من الأيام رحلت مقابلة فيها شيوعيين وتقدميين فوجئت بـ«ميمي كانيل» في مصر، أنا فاكرة إنها في باريس، كانت خلصت مدتها واطرحلت. بس لقيتها موجودة في هذا اللقاء، قصت شعرها قصير وصبغته إسود وجابت نضارات شكل مختلف. فهمت من الكلام إنها دخلت بباسبور مزور واسم غير اسمها وما عرفتش ساكنة فين احترماً للسرية. بعد كذا بعد ما اتقبض علينا كلنا عرفت إن سعد كان من ضمن الناس اللي استقبلوها لما دخلت البلد ونظم سكنها في بيت أحمد كامل مرسي المخرج السينمائي. أنا ما كنتش اعرف مغامرة زي دي أثناء حدوثها. أحمد كامل مرسي المخرج ولولا صدقي الممثلة وغيرهم من الفنانين والمتقنين، كانوا انضموا للجنة «أنصار السلام» قبل ما تتحل، زي تحية كاريوكا، وبالطريقة دي نلاقي واحد زي أحمد كامل مرسي مستعد يستقبل في بيته واحدة زي «ميمي» شيوعية اتسجنت قبل كذا واطرحلت من مصر وموجودة سراً بشكل غير قانوني وجاية علشان تكافح سياسياً في البلد. الحمد لله لما اتقبض على ميمي ما كانتش في بيت أحمد كامل مرسي، كانت انتقلت لبيت في المعادي وشريف حتاتة كان مستخبي هناك برضه. عندي صورة لنا أنا وهي وسعد في جنيحة الزهرية أثناء الفترة دي. لكن تنظيمياً أنا ما كنتش معاهم .

فأنا باحكي دا كله ليه؟ باحكي علشان أقول إن النية على معارضة النظام كانت موجودة مش بس بين الشيوعيين ولكن عند ناس من اتجاهات كثيرة وخلفيات مختلفة. كانت مرحلة تجميع لسه بنتنظم ما دخلتش في مرحلة التنفيذ، وأنا كنت موجودة في وسط الناس دي. أنا رأيي إن كان فيه بواذر لعمل خطة، بس اتقبض على الجميع قبل حتى ما تتوضح معالمها. الحكومة قبضت على عدد كبير من الناس ولموا كل اللي له صلة بموضوع المعارضة من بعيد أو من قريب، بما فيهم ناس زي تحية كاريوكا. في البداية كانت ميغة، قبضوا على عدد من البنات لفترة قصيرة زي «جويس بلاو» وسميرة مرات أحمد طه جابوها بابنها عبده الزنزانة، ما كانش عنده سنتين. كان اسمه عبد القادر على اسم عمه اللي اغتيل. فترة صعبة علينا كلنا عددنا كبير ومصدمين من القبض وأول ما يفتحوا الباب عبده يجري والسجانوات يزقوا لسميرة من بره وهي تطلب منهم عايزة تتضفه، عاوزه مية،

عيل صغير ومفيش ولا بامبرز ولا مية ولا خروج من الزنزانة. وبعدين جاله إسهال وكان بيعمل في أي حنة في الزنزانة واحنا زحمة ثلاث اربع تتفار - أنا مش فاكرة مين بالضبط - الريحة كانت فظيعة وانا ما خبتش، تأففت، سميرة شافنتي وانا بالوي بوزي. بصيت لها لقيتها بتبص لي، حزينة، اعتذرت لها على طول بس كانت غلطة مني ما عرفتش أنساها. سميرة كانت مستاءة، تعمل إيه مع العيل دا؟ واحنا زمايلها، أمال مين حير اعياها؟ الحمد لله معانة سميرة ما طولتش وخرجت هي وعنده وأهيه فانت الحكاية وانا ما شفتش ثاني سميرة. بعث لها تحيات مع واحد اسمه طارق جه يساعد بابا لما رجليه اتكسرت مؤخرًا، طلع يعرف أحمد طه وسميرة وطبعًا عبد القادر الصغير دا خلاص راجل وبيشتغل ومتجوز ومخلف .

الرجالة اتخطوا في مبنى السجن الحربي اللي مخبرات الجيش ماسكينه، واشتهر فيما بعد بالتجاوزات والتعذيب والضرب والتخويف والإرهاب. كمال عبد الحليم مثلًا من ضمن الناس اللي اتقبض عليهم وحصل لهم صدمة، كمال كان من كبار المؤيدين لحركة الجيش من أول يوم ومن قبل ما يتأكد نجاحها، فلما شاف الضباط بيمارسوا أساليب التخويف والإرهاب والتعذيب اتهم، ما اعرفش انضرب ولا إيه اللي عملوه فيه، المهم إنه خرج من السجن مهزوز نفسيًا. لا يزال من ساعتها لغاية دلوقت، كمال عبد الحليم نفسيًا مش كويس. أعتقد إن استعملوا مع الإخوان المسلمين أساليب وحشية وفي الغالب درجة التنظيم في صفوف الإخوان أكثر بكثير من الشيوعيين. سعد بيحكي إن هو شخصيًا ما تعرضش للتعذيب المباشر بس كان بالليل بيسمع صريخ التعذيب، وحصل ضغط عليه إن يقول إن القيادة السياسية لجمال عبد الناصر ومجلس الثورة مش خونة، ولا يزالوا وطنيين. ونظرًا إن المسألة دي كانت مسألة نقاش كبير وبالذات بين أعضاء «حدثو»، ما كانوا مقتنعين بخيانة حركة الضباط للقضية الوطنية، سعد بيحكي إنه قال رأيه بدقة وهو إنهم «مش خونة ولكن الجبهة الوطنية تكونت لمعارضة الإجراءات القمعية». ودا رأيه فعلاً ولحد دلوقت. المجموعة اللي سعد كان معاها - «حدثو» - كانت معارضة إلغاء الأحزاب وإلغاء التنظيمات الديمقراطية وبتطالب باستمرار الحياة الديمقراطية السياسية، بينما كان فيه منظمات شيوعية زي «م.ش.م» مثلًا واطن الإخوان المسلمين وغيرهم كانوا بيتهموا القائمين على حركة الجيش بأنهم متأميرين وخونة .

خدوني على سجن الأجانب برضه وبعدين نقلوني لسجن مصر وهناك لقيت «ميمي» مقبوض عليها على حساب قضية «تنظيم شيوعي»، أنا وسعد كان مقبوض علينا تحت اسم قضية «الجبهة الوطنية» مع نجيب فخري وتحية كاريوكا وجوزها كمال صدقي. كانت حملة من النظام ضد المعارضة وانبض على ناس كثيرة تحت أكثر من قضية .

المهم اننا قعدنا في السجن 4 شهور محبوسين أنا في سجن النساء وسعد في السجن الحربي. وبعد 4 أشهر حصل تغيير في السياسة الداخلية في البلد مش قادرة افكر إيه الحدث السياسي اللي حصل في البلد وغير شوية موازين، فجأة كدا جم يوم الصباح وقالوا «إفراج» وخرجنا أنا وسعد ونجيب وكل اللي على قضية الجبهة، اللي على قضايا تنظيم شيوعي ما تمش الإفراج عنهم. سعد كان متفائل وأكد لي إن خلاص مفيش قضية «كانوا فاهمين الجبهة بطريقة ثانية، كانوا غلطانين». كان متفائل لأنه شايف إن مفيش قضية اسمها «الجبهة الوطنية» حتى من وجهة نظر الحكم والسلطة، ناس بتقابل في العلن وعايزة تكون في العلن، كان مهتم بالفرق بين الجبهة والتنظيمات السرية وبيكرر

«الجبهة مش واجهة شكلية للتنظيمات، الجبهة مهمة والناس اللي تدخلها لازم هي اللي تكون مسؤولة عنها»، وأعتقد إن دي نقطة خلافية تانية مع الشيوعيين بالنسبة لموضوع سعد والعمل الجماهيري ما فهمتهاش كويس ساعتها .

خرجنا من المعتقل وابتدينا ن فكر تاني في الجواز، أصل احنا عايزين نتجوز، ورجعنا نتابع إجراءات الديانة والكنيسة ونحضر. للأسف الشقة اللي جنب التلفزيون كانت راحت خلاص لأن لما اتقبض على سعد فنتشوها ولقوا فيها منشورات .

وجه الإذن من الفاتيكان .

هيبه !

حنتجوز !

كنا مستعجلين وعايزين نخلص من إجراءات الجواز فحصل قرار إننا نسكن مع أهل سعد في الدقي وما نستناش. حددنا اليوم وفصلت فستان أبيض، قررت كدا: فستان أبيض مش طويل علشان أكون مودرن. ونزلت البلد لمحل برانيط علشان ألبس برنيطة بيضة بدل الطرحة الطويلة العادية. وسعد عزم على كنعان صديقه الفنان يحضر، أظن علشان مسيحي، حتى مش فاكرة إن كان حسن فؤاد جه الكنيسة ولا لأ. المهم إن اتعمل المراسم في الكنيسة. عندي صورة على سلاالم الكنيسة فيها «فيليا» و«فيليتشتا» وعيلة «موتي»، وفيه كمان «صوفيا» صاحب محل الكهرباء اللي ابويا كان بيشتغل معاه واللي جاب لي محامي يمثلني أول مرة اتقبض عليّ في 1949. أما الجواز الإسلامي، إحنا اتجوزنا مرتين، كتب الكتاب الإسلامي حصل قبل الجواز المسيحي بمساعدة حسن فؤاد. حسن فؤاد جه معانا ورحنا مش عارفة الشهر العقاري ولا المحافظة، فبين ممكن يحصل كتب الكتاب؟ أشهرت الإسلام بشهادة حسن فؤاد والأستاذ فريد نسييه. كان لازم أقول «لا إله إلا الله ومحمد رسول الله» وخلاص بعد كدا عقد الجواز في نفس اليوم من نفس الناس في نفس المكان. رحنا نتقسط في جنينة الحيوانات أو الزهرية، وقعدنا على ترابيزة وشربنا حاجة ساقعة و«مبروك مبروك» ومشينا، كان ساعة ضهرية وكل واحد فينا راح لمشاغله علشان يعتبر كتب الكتاب بس ولسه اللي بييسموها الفرح والدخلة بعدين .

أنا اتكلمت باختصار لكن إذن الفاتيكان دا اخذ منا مجهود كبير ومشاورير رايح جاي ومناقشات علشان نقدر نقنعهم، في النهاية نجحنا وعلى علمي مفيش حد تاني عمل الحكاية دي أبداً، أنا وسعد بس اللي أخذنا إذن من الفاتيكان نتجوز، مسلم على مسيحية، جواز مسيحي في الكنيسة وبمباركتها. كانت خطوة مهمة لأمي وأنا كنت سعيدة إن مشروعا بينجح وان أهلي مبسوطين، ما قلناش لأبويا وأمي، خبينا عليهم إن أنا أسلمت، وخبينا عليهم إنني غيرت اسمي بشكل رسمي وبقى نايلة كامل، ما جنبنش سيرة لغاية ما ماتوا، ممكن خمنوا أو عرفوا بس مش مني، وهم كمان ما جابوش سيرة ولا سألوا. لما سافروا إيطاليا كانوا بيكتبوا «ماري كامل» على الظرف من بره، تركيبة بين نايلة كامل

و«ماري روزنتال» وسعد كامل. الحقيقة بالنسبة لأبويا وأمي جواز الكنيسة كان مناسبة كبيرة ومهمة، أما بالنسبة لنا أنا وسعد فكنا معتبرين نفسنا متجاوزين وإن كل دي إجراءات .

أبو وأم سعد سابوا لنا البيت وراحوا الفيوم. نانا شاطرة تعمل سبب السفر، تجيب شوية مستلزمات معينة ومحددة مش تقعد تفكر كل مرة يا ترى أخذ إيه ويا ترى حاجتاج إيه، أنا لغاية دلوقت لما آجي أسافر الفيوم باتلخم لخرة لا يمكن تصورها. كانوا بيروحوا الفيوم كثير وكل موسم يستقروا هناك شهر على بعضه وأبو سعد ياخذ باله من الأرض ومن الزراعة .

أبويا وأمي حبوا يعملوا حفلة بعد قداس الكنيسة ويعزموا أصحابنا، عملنا الحفلة هنا في بيت أهل سعد . جم أهلي وجيران أهلي وابن عمي موسى مع بنته من غير مراته، اتجوز بنت مصرية قح من اليهود الأصليين، اسمها «ميري»، وأنا وسعد حضرنا فرحهم لما كنا مخطوبين، موسى الوحيد اللي كان لسه موجود من عائلة أبويا في مصر . وضبنا البيت هنا بشكل لطيف، أوضة الصالون هي هي والسفرة هي هي، والمطبخ تقريباً هو هو، جنبنا بتيفور وسندوتشات وعملنا بوفيه حلو في الصالة، كانت سهرة لطيفة، وبعد ما أكلنا رقصنا واتصورنا وهنينا بعض، رَوْحوا كلهم، وأبويا وأمي كمان مشبوا .

وفضي البيت علينا .

قعدنا سعد وانا فجأة على الكنبه واتفسنا، أخيراً انتهت، شوية توضيب من هنا وشوية كذب من هنا وشوية صبر من هناك تمّت المسألة .

وبدأنا الحياة الزوجية بشكل كامل. أنا سببت البيت عند أبويا وأمي وجيت أعيش هنا في بيت نانا وجدو. أخذنا أوضة نوم جميلة أخت سعد. جميلة كانت اتجوزت علي الراعي وراحت معاه انجلترا يعمل الدكتوراه وأوضتها فضيت، سكنا فيها أنا وسعد وتولينا مسؤولية إدارة البيت، بفلوس قليلة لأن سعد ما كانش بيشتغل بشكل منتظم. مش قادرة افنكر كنا بنجيب فلوس ازاي علشان نعيش كمصدر منتظم، غير مساعدات أهل سعد، سعد كان حاسم إن هو مسؤول عني، وعمرنا ما طلبنا من أهلي .

على أي حال عشرين جنيه كانوا يكفوا الشهر. زي ما طنط عزيزة قالت الحياة اليومية عايزة صابون وملح ورز «مش مسألة نرضى باللي موجود، يعني مش حنغسل وشننا؟ مش حنستحمي؟» هي كانت بتأكد قوي على الصابون علشان هو مش على بال الواحد إنها من ضروريات البيت، الواحد لما بيكون صغير بيفنكر إن الأكل وإيجار الشقة هم المشكلة، لكن الصابون مثل جيد على احتياجات أساسية غير متوقعة. كنت باشتري كيلو الفيليه من عند الجزار بستاشر قرش، رخيص ستاشر قرش بالنسبة لأسعار النهاردا ومع ذلك اكتشفت إن إدارة بيت خبرة مش بديهية. ابتديت أفهم واتعلم أسعار الحاجات، وافكر ناكل إيه كل يوم. حاولت أنظم نفسي «هل الطبخ كل يوم أحسن ولا كل يومين». بالنسبة لسعد لما كان مع أبوه وامه ومش متجوز، حياته كانت بره البيت معظم الوقت ياكل بره أو ياكل في البيت أو ما ياكلش وييجي بالليل وخرى، ما كانش عندهم عادة العشاء .

ابتدت سلسلة زيارات من اصحابنا علشان يباركوا لنا على الجواز. صلاح حافظ وهدى وحسن فؤاد ورضا وناس تانية كتير يباركوا ويتكلموا في السياسة. كان فيه قلق كبير، ما كانش فيه استقرار في البلد، حركة الجيش وجمال عبد الناصر كانوا يحاولوا يستقروا في الحكم وممارساتهم بتزداد قمعية، وحسب ممارسات الحركة في الحكم الواحد يأيدها أو يعارضها، بناخد موقف بالطريقة دي. كان فيه دايمًا شك وتردد حول دور كل عضو في مجلس قيادة الثورة، شك لسه موجود لحد اليوم، لكن أنا باتكلم عن 1954 بعد أقل من سنتين من يوليو 1952، ما كانش عندنا وقت نتنفس، أحداث سريعة ورا بعض، مش متأكدة من ناحية الدقة التاريخية ولا حتى السياسية أنا عشتها إزاي، لكن اللي أقدر أقوله إن أنا وسعد من غير معاناة فكرية كبيرة موقفنا من الحريات والديمقراطية كان واضح دايمًا.

*

سعد نزل الصبح، وحماتي وحمايا كانوا في الفيوم، لوحدي في البيت، خبَّطوا على الباب، فتحت، مجموعة من الرجالة دخلوا بدون استئذان .

- أحمد سعد الدين كامل؟

- ليه؟

- هو فين؟

- مش هنا .

- جاي إمتى؟

- ما اعرفش .

- طيب حنستاه .

فهمت إنهم بوليس وعايزين يقبضوا عليه، فتشوا البيت شوية، لكن ما كانش فيه حاجة معينة .

بس .

قعدوا يستنوا معايا في البيت، وانا قلقانة عاوزة أدِّي خبر لسعد ما يرَوِّحش ومش عارفة أعمل إزاي، باروح من أوضة لأوضة ولما قرب وقت وصول سعد رحت أوضة الصالون وبعد شوية طلعت في البلكونة، ورجعت قعدت في أوضة الصالون، شوية ورجعت البلكونة، قال يعني مش عايزة بيان إني متوقعة أشوفه، وبعدين شفته فعلاً جاي على راس الشارع عند موسى المكوجي، شاورت له ما فهمش، افكرني واقفة مستنياه في البلكونة باسم عليه فشاور يسلم عليّ، كملت أشاور بعصبية «امشي، ابعده»، أخيراً خد باله، وقف وابتدى يتحرك بسرعة بره الشارع، في اللحظة دي

اتنين مخبرين ظهروا ورايا في البلكونة ودخلوني بالعافية وانا داخلة شفت اتنين مخبرين على راس الشارع بيمسكوه وبعد دقائق دخلوا البيت وسعد معاهم .

سألوه شوية أسئلة وعملنا مع بعض شنطة صغيرة - بيجامة، فانلات، غيارات، وفرشة سنان - أخذ الشنطة، بوسنا بعض وقال لي :

- حاشوف إيه الحكاية .

دا كان بعد شهرين من الجواز .

مشي مع المخبرين، أنا قعدت شوية كدا على الكنبه ما باعملش حاجة، وبعدين أخيراً قمت كلمت طنط عزيزة خالته في التلفون :

- سعد اتقبض عليه .

لبست ونزلت رحت عند أبويا وأمي وقلت لهم :

- دا جم قبضوا على سعد .

أظن ليلتها نمت عندهم .

تاني يوم في الجرنال لقيت خبر «تقديم قضية الجبهة الوطنية للمحاكمة»، وأسامي: المتهم الأول مصطفى كمال صدقي لأنه ظابط فحكايته واخدة خطورة أكبر، لها معنى كبير عندهم، مش عادي يقبضوا على ظابط، وشريف حناتة وسعد كامل و«ميمي كانيل» وناس تانية، مفيش اسمي في الخبر، وانا فعلاً ما قبضوش عليّ .

قعدت الصبح أنا والجرنال .

نانا وجدو جم من الفيوم أول ما عرفوا، الاتصالات ما كانتش سهلة، بيّت مع نانا ليلتين وتالت يوم المحاكمة رحت برجليا وشفنتهم كلهم في القفص. اتقربت منهم وسلمت على سعد، كلامه ما كانش فيه اطمئنان ولا أي علامات واضحة، مش زي القبض الأول .

- ما قبضوش عليك؟

- لا .

- كويس .

وسكت .

كان معاه في القفص «ميمي كانيل» وشريف حناتة و«ألبير آرييه» وحليم طوسون، محبوسين من نوفمبر 1953 على حس قضية التنظيم الشيوعي، ما طلغوش معانا، بيحيبوهم من السجن للمحكمة. جلسة علنية مش سرية. ما اتكلمتش مع حد غير سعد. كل منهم مشغول يتكلم مع المحامي أو مع أهله. اترفعت الجلسة و اتأجلت. سمعت التأجيل، القاضي قام، خدوا المتهمين ومشوا .

فمشيت أنا كمان .

وجيت البيت عند نانا منيرة .

رجعت لها من المحكمة معنديش أخبار، ومش عارفة أقول إيه، أصل مفيش كلام يتقال. قعدنا ساكتين .

يا دوبك ساعتين تلاتة، خبطوا على الباب عندنا في بيت أهل سعد وقبضوا عليّ أنا كمان .

حضرت الجلسة وانا حرة، ما حدش كلمني وانا في المحكمة .

يظهر نسيوني، أو مش واخدين بالهم إن انا قاعدة في القاعة، الحكاية كانت كبيرة ويظهر بتحصل غلطات، افتكروا فجأة: فيه واحدة مرات سعد - اللي هي أنا - وجم قبضوا عليّ من بيت أهل سعد وودوني على سجن مصر، دوغري المرة دي .

هناك لقيت «ميمي»، مش فاكرة غيرها بالذات اليوم الأول .

يظهر اتغيرت موازين الوضع السياسي في مصر، تاني، فقرروا ياخدوا القضية كلها، تاني، واحنا جميعاً، كل اللي أفرج عنهم من أربع شهور انتقبض علينا، تاني، بس احنا كنا اتجوزنا .

وابندت جلسات التحقيق، لكن أنا ما حققوش معايا، ظابط التحقيق بيحي في عربية البوليس ياخد «ميمي» يحققوا معاه و يرجعوا السجن. تلات أربع مرات «ميمي» راحت للتحقيق وانا مستتية بيحي دوري. على ما أعتقد في الفترة دي ما كانش فيه إلا احنا الاتنين من الشيوعيات في السجن؟ وكل واحدة في زنزانة لوحدها، مش عايزينا نكلم بعض .

في يوم طلبوني مع «ميمي»، خرجنا من السجن وافتكرت حيحققوا معايا أخيراً. دخلنا أوضة كبيرة فيها زي 15 ست لخبطونا في وسطهم ورصونا صف طويل. معظمهم لابسين بلدي، طرحة أو ملاية، أنا و «ميمي» لابسين ملابسنا الملكية لسه ما اتحكمش علينا، فضروري شكلنا ملحوظ في وسط الستات دي. في الأول ما فهمتش إيه اللي بيحصل، بعد شوية أدركت: عاملين مواجهة. جابوا راجل ما اعرفوش مقبوض عليه في قضيتنا وبيعترف، عرفت من سعد فيما بعد إن اسمه دكتور فؤاد منير من اسكندرية وأظن أصبح مدير في البنك المركزي. في السجن الحربي كانوا مارسوا ضغوط وإرهاب على المسجونين الرجالة، سمعت إن فؤاد منير واحد من اللي ابتدوا يعترفوا على طول من الأول ويقول كل التفاصيل وكل الأسماء - بتحصل. إحنا واقفين صف طويل جنب بعض

والراجل دا دخل من الباب، كلنا بصينا في اتجاهه وكان معاه اتنين تانيين، وابتدى يتمشى ويبص لنا واحدة واحدة، زي في الأفلام، وأول ما وصل عند «ميمي» شاور وقال :

- دي .

بصيت لـ«ميمي» لكن هي ما بصتلش وشها جامد .

- اسمها ايه؟

فقال على اسمها الحركي أظن «ماجدة»، وبعدين كمل يبص علينا واحدة واحدة لحاد ما وصل عندي، فاهم من لبسي إن المفروض يتعرف عليّ، بس هو ما يعرفنيش وأنا ما اعرفوش، ما شوفتوش قبل كدا، وبعدين هو من اسكندرية على أي حال. ظابط المخابرات اللي جايه أصرّ عليه :

- مين الثانية؟

- مش موجودة .

- مش موجودة ازاي؟ بص تاني .

يبص تاني، يجي عند «ميمي» دي واضحة بالنسبة له زي الشمس يشاور عليها، يفوت قدامي ويقف شوية ويكمل ويخلص الصف، فواحد من الضباط اتترفز، جه عندي وطلعتني من الصف :

- دي! ما تعرفش دي؟

فالراجل يا عيني بص لي في عيني وقال للظابط :

- ما اعرفهاش .

سكتنا .

ومشينا .

كان فيه 3 «ماري»، أنا و«ماري بابادوبولو» مرات «نيكولا غازيس»، من أصل يوناني ودا اسمها الحقيقي، وكان في واحدة جرجية تانية من مصر الجديدة ظهرت في فترة رجوع «ميمي» من فرنسا، اسمها «لفكي» واسمها الحركي «ماري». ففي التقارير عندهم واحدة اسمها «ماري» ممكن تكون أي واحدة فينا، يمكن جابوني على أساس واحدة من الاتنين دول؟ الراجل دا ممكن ما عرفنيش لأنه بيدور على «ماري» تانية. باحاول الأقي تفسير للي حصل، ما فكرتش ساعتها وما سألتش .

«ميمي» كانت حزينة وما بتتكلمش كثير، وانا ما كنتش باسأل، مش مناسب أخذ معلومات، ما دام ما اعرفش يبقى ما اعرفش وخلص علشان أفضل مش عارفة وانا في التحقيق .

كان فيه واحد بيساعد في بيت أهل سعد ولأن سعد اتقبض عليه أكثر من مرة، من صغره، فالرجال دا أصبح خبير سجون وعارف النظام، يخش عند الطباط ويمشي الأمور. سعد طلب من نانا تبعت عمودين أكل كل يوم، واحد له وواحد لي. حمل على نانا منيرة ان تفكر في نفرين بدل نفر واحد، بس سعد كان مصمم يؤكد فكرة إنه جوزي ومسؤول عني وإن عائلته هي عائلتي، يا عيني نانا منيرة كانت بتبعت لي الأكل فعلاً. في نفس الوقت أهلي حبوا بيعتوا لي أكل هم كمان، أبويا وأمي بيحبوا الأكل وبياكلوا أكثر من أهل سعد، الأكل بيحتل مكان أكبر في حياتهم، وحياتي، عمومًا، في بيت نانا وجدو كان في شيء من الاعتدال. النتيجة إن كان بيوصلني من حماتي أكل مصري فيه لحمه ورز وملوخية وخضار، ومن أبويا وأمي الأكل الطلياني مكرونة ولحمة روستو. والحقيقة هي لفظة لطيفة لأن الأكل اللي كان بيجي لي من عندها كان الاتصال الوحيد اللي بيني وبين سعد. نقابة المحامين كانت بتصرف إعانات 5 جنيه للمسجونين وسعد طلب من عز الدين أخوه يوصل لي نص الإعانة، لكن عز الدين كان أقل التزامًا من نانا .

مر الوقت وجه يوم النطق بالحكم، افكرت إن حنخرج ونروح المحكمة وأشوف سعد، كان بقي لي شهرين ما شفتوش، آخر مرة شفته كان في أول جلسة قبل ما يتقبض عليّ لكن ما خرجناش وما رحناش محكمة، ندهونا أنا و«ميمي» في قاعة الاجتماعات، كان فيه خمس طباط غير مأمور السجن، 3 منهم واقفين مرصوصين كدا، وقفونا قصادهم، والطباط اللي في الوسط ابتدا يقرأ إنه «حكمت المحكمة»: على «ناعومي كانيل» (ميمي) بـ8 سنوات سجن مع الشغل وعلى «ماري روزنتال» (أنا) بخمس سنوات مع الشغل».

بس .

فضلنا واقفين كدا .

مفيش حاجة تتقال .

كانوا بيحاولوا يعملوا جو من الهيبة في الأوضة علشان يعوّضوا جو المحكمة لكن أنا فكرت إنني عايزة اعرف سعد خد كام سنة .

- وسعد كامل جوزي خد كام؟

اتلخم ولقي إن هيبة المحكمة ما أثرتش عليّ كفاية، كأني مش واخدة بالي إن مش من حقي أسأل فسكت وكشر وما ردّش عليّ، لكن أنا كررت سؤالي :

- وسعد كامل جوزي خد كام؟

- سكوت! إنتِ أمام المحكمة .

رجعنا الزنازين وعلى طول سحبوا الملابس الملكية ووذُّوها الأمانات وسلمونا اللبس الميري - لبس السجن. لبس السجن عبارة عن جلابية من قماش خشن اسمها «شوال» والغيارات الداخلية من نفس قماش الشوال، وسلمونا جزمة. كان شكلنا وحش أول ما لبسناهم، مش ممكن حنقعد بالمنظر دا خمس سنين، قضينا الأسبوع الأول نوضب الشوال على مقاساتنا علشان يبقى شكلنا معقول. سابوا لنا ملابسنا الداخلية الخاصة من غيارات وكومبينيزون وجزمة من عندنا بشرط تكون سودا، ودا بشكل غير رسمي. لكن أبويا أخذ إذن زيارة خاصة وجه يزورني ثاني يوم الحكم على طول، ما كناش لحقنا نصلح الشوال ونوضب شكلنا شوية، رحت له زي ما انا. بوسته وقعدنا في أوضة المأمور جنب بعض، بص لي كدا وراح معيِّط، عيِّط بصوت، فحضنته وقلت له :

- معلش. أنا كويسة. أنا شديدة .

لكن منظره كان متعب بشكل! أنا عمري ما شفت أبويا بيعيِّط. يائس وما عندناش كلام كتير نقوله لبعض، كنا عشنا الفترة اللي فاتت على أساس إن خلاص أنا خلصت مع السجن ومتجوزة وقاعدة في البيت وإن الحياة حتمشي عادية، الحكم دا كان صدمة كبيرة .

في الزيارة الصعبة دي عرفت منه إن سعد أخذ 5 سنين أشغال شاقة وراح ليمان طرة وان نانا راحت تزوره. في فترة التحقيق أهلي كانوا ببيجوا كل يومين علشان يجيبوا لي الأكل ومرة في الأسبوع علشان ياخدوا الهدوم تتغسل وتتكوي، ببيجوا بنفسهم ويجيبوا «الزيارة» ساعات من غير ما يقابلوني لو مش مسموح. فتحي رضوان خال سعد كتب في مذكراته إنه لما كان وزير وهو فايت بالعربية شاف ست واقفة على باب السجن شايلة الزيارة ومستتية الإذن بالدخول وصعبت عليه، لما قرب بالعربية اكتشف إنها أخته منيرة شايلة الزيارة لابنها سعد، المنظر خلاه يعيِّط. لكن مع صدور الحكم معاناة الأهل اليومية توقفت وأصبح ملناش حق الزيارة إلا مرة في الشهر. وابتدينا ناكل أكل السجن: الفول والعدس وجبة السجن العادية، الرز بالزلط والعيش بالفتل. خلاص محكوم علينا والسجن يتولى مسؤوليتنا .

سجن مصر كان حصل فيه تطوُّر، عملوا تحسينات في نظام السجن وانا غايبة، وأصبح في الكانتين، دكان ببيعوا فيه سجائر وبسكويت وعلب سلْمون وشوية نواشف. في فترة التحقيق الكانتين كان بيساعد المسجونة اللي معندهاش حد بيعت لها أكل كل يوم، وبعد الحكم الكانتين ساعدنا كلنا على كسر ملل ووحاشة أكل السجن، نشترى بسكويت بعجوة وسجائر بالنسبة للي بيدخن، دا كان تطوُّر مهم لأن قبل الكانتين السجائر كانت بتدخل السجن خلصة مع المخدرات والممنوعات، تمنها غالي وبتستخدم للابتزاز وعملة لشراء حاجات ثانية. أما يوم الزيارة فكان حفلة كبيرة للجميع داخل السجن لأن الأهل بيتقنوا: حلويات وكبكة وفاكهة علشان يفرحونا بالإضافة للأكل المطبوخ طازة وكنا بنتقاسم .

بس الحكم كان طويل، خمس سنين .

*

ساعات سألت نفسي السؤال دا: أنا اتحكم عليّ بخمس سنين ليه؟ بالغلط؟ ظلم؟

ما كانش ظلم ولكن أنا ما كنتش باعمل «مشاركة» معينة، بالفعل .

أنا كنت باشارك وجدانيًا في كل نشاطات سعد وباقابل كل أصحابه بسبب إنني أصلًا مهتمة وعندي فكرة عن السياسة، وساعات يعملوا اجتماعات موسعة أحضرها واسمع بشكل طبيعي من غير ما يكون عندي صفة عضوية حقيقية في أي تنظيم. كنت مخطوبة لسعد، كنا عملنا خطوبة، وكنت عارفة - ومش معترضة - إنه ابتدا يدخل في الـ «clandestinité» - العمل السري. في هذه الأثناء كان بيحضر لحياتنا الزوجية في شقة ماسبيرو اللي البوليس ما كانش يعرفها لسه، ابتدينا على طول نودي شوية حاجات نفرشها. في الفترة دي زي ما حكيت اشتغلت سكرتيرة وكنت أصبحت سريعة وشاطرة وابتديت اتعلم اختزال، وسعد نقل سكنه في الشقة. كنت موافقة سياسيًا على الاتجاه إن لازم يكون فيه معارضة قوية في البلد ضد الميول القمعية للنظام، ولكن من ساعة ما خرجت من السجن الأولاني في سنة 1950 ما حصلش تنظيمي في أي حزب، وما اشتركتش شخصيًا ولا كنت عضوة في أي خلية معينة، إن اكون مسؤولة عن مهمة محددة أو حد يبقى مسؤول عني ويكلفني، ما حصلش، اكتفيت أتعاطف واتابع واشترك في المناقشات السياسية ويكون لي رأي من خلال عضوية سعد . مش مضبوط إنني أكون سياسيًا ملحقة بسعد، بس انا ما سألتش وما عبرتش ساعتها، كان دا البديهي إن انا وسعد كأننا شخص واحد. حتى لما سعد أصبح مسؤول عن تحرير مجلة «الكاتب»، اللي كانت مجلة حركة «أنصار السلام» قبل ما يقفلوها، مرة قال لي :

- مش عاوزه توزع المجلة؟ تاخدي عدد من النسخ وتوزع عليهم على الناس؟

أنا في بالي تجربة توزيع المنشورات أيام عبد الستار الطويلة فقلت له :

- بلاش تطلب مني حاجة زي دي، أنا ما اعرفش مصريين كثير، كفاية إنك تديني نسخة أحاول أقرأها .

ما كنتش باقرا عربي بسهولة فكان تمرين كويس ليّ وفي نفس الوقت باتابع باهتمام المناقشات العامة من خلال شغل مجلة «الكاتب» ولجنة «أنصار السلام»، لحد ما اتمنعت .

كان فيه أحكام عرفية، اللي هي اسمها قانون الطوارئ دلوقت، ما خضعتش لأي تحقيق بالمرّة في قضية الجبهة الوطنية، ولا أثناء اعتقال الـ4 شهور الأولانيين قبل الجواز اللي ما كانش فيه زيارات للأهالي ولا اتصالات بين المسجونين وبعض، وما كانش فيه قضية واضحة، ولا اتحقق معايا في القبض الثانية بعد الجواز .

خدت حكم 5 سنين بدون تحقيق .

ورحت المحكمة مرة واحدة في الأول وما كانش اتقبض عليّ لسه .

يمكن كانت محكمة عسكرية؟ أصل التصرفات كانت جزافية، يعني مفيش إجراءات معينة، على مزاجهم، ممكن اعتقال، ممكن محكمة عسكرية، ممكن تحقيق لو عايزين معلومات، وممكن من غير تحقيق. واضح إنهم ما كانوا عايزين مني معلومات وإلا كانوا حققوا معايا . «ميمي كانيل» كان وضعها مختلف، عليها تهم محددة أكثر، كانت بتشتغل في العمل السري، اترحلت من البلد في 1952 ورجعت بأوراق مزورة، بمساعدة مجموعة الشيوعيين المصريين من منظمة «حدثو» اللي اترحلوا لفرنسا وعلى رأسهم «هنري كوريل»، وفيه خلايا شيوعية في مصر استقبلتها. الشيوعيين شاركوا في تكوين جبهة معارضة واسعة بالفعل لكن أنا ما كنتش عضوة في تنظيم، كنت عضوة بقلبي بس. ساعتها ما فكرتش وما سألتش، بس دلوقت بافكر ممكن المباحث والبوليس السياسي كانوا فاهمين إن انا حاجة في الحزب؟ أو يمكن ملخبطين بيني وبين «لفكي» أو «ماري بابادوبولو» ، بس ساعتها مش كانوا حيحققوا معايا؟ حد قال لي مرة إنهم بيغلظوا الحكم الثاني بشكل روتيني، يعني وقعت في أيدهم وباطهر في التقارير ولقوا إن عندي ملف من قبل كدا يعني ما جرّمتش، يبقى يدوني حكم كنوع من التأديب، يسجنوني وخلص حتى لو مش ماسكين عليّ حاجة. يلا معلش أنا كنت عبيطة إلى حدّ ما لأنني ما سألتش نفسي السؤال دا إلا وانا باحكي اليومين دول معاك يا نادية .

مرة فريدة النفاش سألتني، كانت صغيرة وفي بداياتها في العمل السياسي :

- مدام نايلة، انت مش بتكتبي ذكرياتك عن السجن ليه؟

- كثير فكرت أكتب ولكن الخلافات بين التنظيمات المختلفة من الشيوعيين تعبتني، لغاية دلوقت مش عارفة أخرج من الإحساس بعدم الراحة، مش قادرة أحكي .

الحوار دا كان سنة 1975 والسادات بيقبض على العمال واليسار وسعد هربان. لما ابتديت احكي لك اتحمست شوية وبعدين رجعت قلت لنفسي حاتكلم عن فترة السجن في وقت ثاني لأني لغاية دلوقت محتاجة أفكر فيها. مؤخرًا مع الحكي حسيت إني ابتديت اعرف احط على جنب الخلافات التنظيمية، وابتديت أتذكر الفترة كانت متمثلة في إيه وازاي. أعتقد إن فترة سجن الـ5 سنين لها «trois dimensions» - ثلاث أبعاد - أولًا السجن بيعمل إيه في الإنسان - من وجهة نظري - الجانب الثاني الشخصيات اللي قابلتها وسرد الأحداث زي ما حصلت واحدة ورا الثانية لغاية الآخر. الزاوية الثالثة تقييمي للناس والأحداث دي، مش عارفة، بالاقبي إن البعد الأول والأخير مش سهلين .

فنبتي من الأسهل .

الشخصيات والأحداث زي ما حصلت .

محتاجة أرجع سريعًا لفترة السجن الأولى في 1949، أنا اتعلمت فيها كثير وكان معايا إجلال السحيمي و«ميمي كانيل» وأسما البقلي و«برت» و«جانيت». أسماء و«برت» و«جانيت» كانوا أكبر سنًا وزوجات زعماء تنظيمات شيوعية مصرية: أسعد حلیم و«هلال شوارتز» و«مارسيل إسرايل» والثلاثة كانوا مخلفين - عندهم عيال. من ناحية ثانية كان فيه العلاقة مع منظمة «م.ش.م» وتصرف زميلتي اللي ما رضيتش تتكلم معايا وشخصية «أوديت» وتأثيرها على بنات مجموعتها. صحيح السجن من ناحية بيعزل عن المجتمع وفعلاً حياتي توقفت سنة ونص، ودا كثير، لكن باكرر دايماً إني باقيم مرحلة السجن الأولى على إنها انفراجة، اكتسبت خبرات ذهنية وثقافية ونفسية، دخلت وانا مش فاهمة كثير عن الدنيا واتصالي بالناس دي فتح لي طاقة واتعلمت اللي ما كنتش أقدر اتعلمه بره السجن أبدًا. مصر كانت تحت الاحتلال الإنجليزي وكان لسه الملك موجود .

الفترة الثانية كانت تحت حكم عبد الناصر، الملك مشي والانجليز بيلموا حاجتهم وماشييين .

الفترة الثانية دي جز عين داخلين في بعض في ذاكرتي، لأن المرتين ورا بعض، نفس القضية تقريبًا، نفس المحبوسين تقريبًا، والمسافة بينهم شهور، نوفمبر سنة 1953 أربع أشهر خرجت اتجوزت ودخلت القبضة الثانية في يونيو 1954 بعد ما اتجوزنا بشهرين اتحكم عليّ فيها بخمس سنين .

كنت حاسة إني عارفة أتوقع إيه، صحيح ومش صحيح .

أول ما قبضوا عليّ ودوني على سجن الأجانب كام يوم، وفوجئت بـ«لي لي دايان» هناك لسه محبوسة هي و«فيا يانكاكيس»، البنات اللي «أوديت» استقصدهم ولجأوا لزنزانتنا. «لي لي» قالت لي :

- أنا مسافرة بكرة خلاص .

- أنا قابلت مراد وخذ جوابك بس ما أدانيش رد .

- آه خلاص .

ما قانتش أكثر من كدا في موضوع مراد. أنا خدت منها جواب وانا خارجة من السجن سنة 1951 وصلت لمراد المستكاوي، وبعد 3 سنين دخلت السجن ثاني لقيتها لسه جوه هي و«فيا»، جايينهم سجن الأجانب علشان يرحلهم من السجن على بره البلد على طول. ثاني يوم جه الكاميون بالطباط ياخدوهم على المركب أو الطائرة اللي حترحلهم. «لي لي» كانت جاهزة، ساكتة كعادتها، لا بنتكلم ولا بتعيط ولا بتصرخ، خدت شنطتها بوقار وقامت، طبيعتها كدا مش جافة لكن فيه شيء من التحفظ ومن الاحترام في تصرفاتها وفي وقفها، سلمت عليّ بدون ما تبتمس .

حضنتني ومشيت .

بصيت من الشباك عليها وهي خارجة من باب السجن تركب كاميون الترحيلات .

البنيت الثانية بقي رافضة تتحرك .

- يلاً .

مفيش فايذة، مش راضية تتحرك .

- مش عايزة أمشي. إجراء غير قانوني. أنا مكافحة من أجل الشعب. أنا باكافح علشانكم .

«hysterical» - في حالة هياج عصبي - تروح على الشباك وتصرخ وتتادي على الناس في الشارع :

- أنا مصرية، عاوزين يطردوني من البلد، دا غير قانوني، أنا مصرية، دا غلط، دا ظلم .

بعتوا بقي يجيبوا رجالة البوليس وفي النهاية جرحوها على السلم، شالوها من أيديها ورجليها لغاية ما حطوها في العربية، ما مشيتش برجلها شالوها شيل، واستمرت تقول هتافات وشعارات مجموعة «م.ش.م» «تحيا الطبقة العاملة» اللي كنت باسمها كل يوم في السجن الأولاني .

طول الوقت دا «لي لي دايان» كانت قاعدة ساكتة مستتية في العربية. الكاميون اتحرك ومشيت .

السجن الثاني ابتدى البداية دي .

ما جتليش أخبار عن «لي لي» ثاني. حتى ما اعرفش رحلوا فين، ما كانش ممكن يرحلهم لإسرائيل علشان ما كانش فيه اتصال بين مصر وإسرائيل، كانت حالة حرب. اللي أعرفه إن كانوا يرحلهم إلى إيطاليا أو فرنسا حسب الورق اللي معاهم، «لي لي» في الغالب راحت فرنسا أصل اظن كان أصلها جزائري. ومن هناك حسب ظروفهم، وللأسف كثير منهم انتهى بيهم الأمر في إسرائيل، بالذات اللي ما عندهم إمكانيّة يستقروا في أوروبا .

عايزة احكي عن ثلاث شخصيات مسجونات مش شيوعيات قابلتهم في سجن مصر. تحية كاريوكا وعلية توفيق زوجة يوسف صديق عضو مجلس الثورة والثالثة زوزو ماضي الممثلة، ما كانش لها أي علاقة بالسياسة لكن إيه، حته شخصية! إحنا الشيوعيات كنا أصغر منهم في السن، نفهم أكثر منهم شوية في السياسة واكثر منهم بكتير في الماركسية والشيوعية، ولكن كخبرة اجتماعية حياتية كنا عيال كتاكيت جنب السنات دول .

تحية كاريوكا تدخل السجن فالسجن كله يقف على رجل، المسجونات، سياسيات وغير سياسيات، السجانات بكل الرتب طول النهار يحاولوا يفوتوا قدام زنزانتهما أو يلمحوا شكلها من بعيد. الضباط كمان، بل مدير السجن نفسه بييجي لها لحد عندها في الزنزانة. ومش بس يسلموا عليها ويرحبوا بيها، يعرضوا عليها خدماتهم ويسألوها محتاجة إيه .

تحية كاريوكا أصبحت رئيسة السجن وقعدت تحميننا أنا و«ميمي» وسميرة مرات أحمد طه. مديرة ورئيسة بطبيعتها وحكاية التغذية في قلبها، مسؤولة عن تغذية الإنسانية كلها مش بس ضيوفها في البيت . ما كانتش عيانة لكن بعثت تجيب لبن ولمون وسكر زيادة من مستشفى السجن. إحنا ما كانش ممكن نبعث نجيب. وجابت كاكاو كمان، وبناء على طلبها جابوا لها قرّوانة لبن كاملة من المستشفى. القرّوانة إناء من الألومنيوم الجزء التحتاني صغير وواسعة من فوق، القرّوانة هي الإناء الأساسي في السجن، يصرفوا لنا فيها الأكل والسوائل واللبن والعدس والبقول مفيش أواني تانية، مفيش فناجين وأطباق وكبايات، كله قرّوانات. بس علشان ما اظلمش السجن كان فيه الكوز، زي كوز الحمام بتاع زمان معدن صاج أو ألومنيوم بايد علشان نشرب ونغرف به .

تحية تصحى الصبح تيجي لها قرّوانة لبن من المستشفى، وبأمرها يفتحوا لنا الزنازين ونروح عندها .

- لازم تمرينات كل يوم وإلا عضلاتي حتتشف ومش حاقد ارقص .

نعمل معاها شوية تمارين، ورتنا ازاي الواحد يحرك البطن يمين دائرياً وبعدين شمال دائرياً .

حصلت كمان على سبرتاية - طبعاً ممنوعة - بعد الرياضة تحط قرّوانة اللبن على السبرتاية واللبن ياخذ مدة طويلة لغاية ما يغلي على سبرتاية، في الوقت دا نقعد حوالينا نسمعها، اللبن يغلي تحط الكاكاو وتقلب وتقلب وهي بتحكي، وتوزع علينا بالكوز في كبايات بلاستيك هي برّضه جابتهم ووزعتهم علينا و«تبعث تجيب» كيكة أو بسكويت. مُتصرفه في الحاجات دي وما تاكلش لوحدها أبداً، فاتحاه مَضِيْفَة في زنزانتهما، تحكي لنا حواديت ونسألها على حاجات. دا بينما إحنا المفروض محبوسين على ذمة التحقيق وزنازين انفرادي وأحكام عرفية، فترة تكدير وعزل قبل الحكم والظروف مشددة، ما كانش فيه زيارات ولا فيه حاجة تخش لنا ولا حاجة تطلع من عندنا، وما عندناش أخبار، والأكل بييجي لنا من المتعهد على حسابنا. فطار المتعهد طاستين عمود معدني بايد وجواه فطار الصبح بيضتين مسلوقين وكام زتونة وحتة جبنة بيضا أو قشطة بالعسل أو حتة

جبنة برغيف عيش، أو حلاوة، فطار المتعهد أكل مش طازة بالذات البيض، عملياً تحية كاريوكا كانت بتعملنا كاكوا الصبح ونفطر كاكوا باللبن في السجن بعد ما نرقص بلدي .

تحية كانت متماسكة ما اتهزنتش من السجن مع إن مفهومها السياسي كان عام جداً وبفضلها الأربع أشهر دول عدوا بسرعة وبدون صعوبة تقريباً . يا عيني الرجالة في الوقت دا كانوا بيتعرضوا لمعاناة كبيرة في السجن الحربي .

علية توفيق كانت عكس تحية كاريوكا خالص في الجسم وفي الشخصية. رفيعة، قصيرة، بشرة رقيقة بيضة، شعر خفيف مُمَوَّج. تحية كاريوكا تحب التمثيل والرقص مش أي فنون تانية، علية تحب الشعر، مليانة حماس وتقول شعر وطني طول الوقت وبالذات البيتين المشهورين لأبو القاسم الشابي :

إذا الشعب يوماً أراد الحياة فلا بد أن يستجيب القدر

ولا بد لليل أن ينجلي ولا بد للقيد أن ينكسر

بس كفاية كدا، دا اللي انا فاكره، لسه فيه سطين في القصيدة حادور عليهم وابقى احطهم .

فالبننت علية دي، أو الست علية، لما كانت تتحمس لفكرة سياسية تطلع فوق حاجة عالية وترفع يديها لفوق وتبتدي «إذا كان الشعب...» بحماس وطني. خبرة غير خبرة تحية كاريوكا، كانت خبرة في عالم ظباط الجيش والبوليس. عقلية الظباط، فهماهم .

هل علية توفيق كانت معنا في فترة تحية كاريوكا ولا فترة الحكم؟ ما اقدرش أفكر بدقة مين حصّلنا متأخر ومين خرج بدري، أعتقد علية توفيق كانت في أول 4 شهور، مش مهم، في ذهني الشخصيات الثلاثة مرتبطين ببعض بصرف النظر عن الفترة الزمنية، تحية كاريوكا وعلية توفيق وزوزو ماضي، أكبر مننا في السن، تحية كاريوكا وعلية كانوا في الثلاثينات، وزوزو ماضي فوق الأربعين .

علية توفيق زوجة يوسف صديق الظابط الحر عضو مجلس الثورة وأخت محمود توفيق الشيوعي - صديقنا. أنا النهاردا باتساءل هم قبضوا عليها ليه؟ قبضوا على جوزها ولا حددوا إقامته بس؟ متصور لي كدا عرضوا عليه ينفوه أو يعملوه سفير بره البلد في محاولة لإبعاده عن مصر وهو رفض. علية كانت تعرف تتعامل مع مأمور السجن وظباط النباتشية وتكلمهم بلغتهم. إحنا المسجونات الشيوعيات صغيرين في السن، ما كناش نعرف نطلب إلا بلغة «من حقنا» و«حقوقنا السياسية»، فأبو «ميمي كانيل» كان بييجي من اسكندرية مرة في الشهر يجيب لها الحاجات اللي هي طالباها يسبب لها «الزيارة» ويمشي، في الفترة دي كنا ممنوعين من الزيارات. من ضمن

الطلبات باكو قطن ضخ مبروم ملفوف في ورق بني، زمان ما كانش فيه الفوط السهلة للتعامل مع العادة الشهرية اللي بتلاقوها اليومين دول في السوق، وما كانش ممكن نغسل قماش كتير في الحبس، فابتكرنا استخدام القطن. المأمور كان من النوع اللي يتشدد في حاجات ملهاش لازمة وكما مور له حق تفتيش الحاجات، حكاية باكو القطن الكبير اللي ببيجي لـ«ميمي» أثار فضوله. كنا حبس انفرادي ممنوع الجرايد والكتب والأقلام، مسموح ملابس وحلويات ومأكولات، القطن مش ممنوع، بس هو اتضايق من القطن ومنعه. كلنا محتاجينه مش بس «ميمي»، حنعمل إيه؟ نتصرف ازاي؟ فكرنا نحتج ونبعث جواب رسمي، حاجات من النوع دا. عليه توفيق ندهتنا :

- اهدوا شوية وفهموني .

هي نفسها ما كانتش واخدة بالها عايزين القطن ليه، فهّمناها فقالت :

- يآه لا لا لا، استنوا هنا .

وراحت عند الطابط :

- وانت متضايق من القطن دا ليه؟ مش عندك واحدة ست في البيت؟ أسألها، الستات بيحتاجوا حاجة زي دي .

فالمأمور اتأسف وساب القطن يخش، بالبساطة دي .

وضع عليه توفيق كان غريب علينا ما كُنّاش فاهمين تهمتها ولا التفاصيل اللي كانت بتحكيها لنا، إحنا عندنا فكرة محددة: ماركسية، شيوعية، ثورة، طبقة عاملة، وحاجات من النوع دا، إنما صراعات داخل الجيش أو داخل البوليس وعلاقات بين الطباط وبعض؟ كان فيه شوية غيرة وشك فيها. بتكلمنا عن عبد الحكيم عامر وجمال عبد الناصر وكل الطباط الأحرار وأعضاء مجلس الثورة كأنهم اخواتها، تعرفهم كويس وواخدة عليهم، ببيجوا عندها البيت يقعدوا مع يوسف صديق جوزها وهي تحضر لهم العشا وتسمع مناقشاتهم. يبدو إن تهمة يوسف صديق إنه رفض قرار الأغلبية داخل مجلس الثورة بكتبت الحريات. الموضوع كان فيه مساومة معاه، مش عايزين يحبسوه، يفضلوا يبعده، وهو رافض الإبعاد. كان في قصة خاصة بطباط اسمه أحمد أو محمد المصري ومؤامرة ضد مجلس الثورة. القصص دي كنا بنسمعها بس مش فاهمينها، هي نفسها مش فاهماها كويس وفيه تفاصيل مش عايزة تقولها .

حكّت لنا عن حياتها الشخصية، الزوجة الثانية ليوسف صديق وعندها ولد وبنت حسين ونعمة، 9 و4 سنين، واحشيتها، فلما جه عيد ميلاد نعمة بنتها جينا قماش وفصلناه وعلما لها هدية فستان وهي بعته هدية لبنتها. نظرتها لجوزها يوسف صديق أنه إله تحبه وتقدره وتصدّقه، كذلك مع أخوها محمود توفيق، كان اتقبض عليه هو كمان، مش قادرة تتصور إن أخوها يلبس هدوم السجن ويمشي حافي :

- رجليه بيضا، محمود ابيضاني، حيمشي ازاي حافي في السجن؟

دي عالية توفيق اللي على قد صغر حجمها شخصية مميزة، عندها قوة داخلية وإلى حدّ ما منبهرين بيها. كتبت كتاب مؤخرًا، نفسي قوي اقراه، ما جاتليش نسخة منه، لكن حادورّ عليه - مذكراتها عن الفترة وإيامنا في السجن .

عالية توفيق وتحية كاريوكا تواجدا معنا بتهم سياسية أما زوزو ماضي فملهاش في السياسة خالص، تهمتها مخدرات أو آداب، التهمة ما كانتش واضحة وعمرى ما عرفت قضيتها انتهت على إيه. اللي يجمع بينا كسياسيات وبين زوزو ماضي بالنسبة لإدارة السجن إنها متعلمة وبرجوازية، قرابة طبقية، فما حبناش نسلم عليها ولا ننخرط معاها .

كنا عاوزين نعلزها، ما سمحتلناش. أصرّت تكسبنا وعرفت تحتوينا .

المسجونات وإدارة السجن على حد سواء عاملونا بشكل متميز، لنا احترامنا على أساس إننا مش مجرمين «عاديين»، جرايمنا جرايم رأي، فزوزو ماضي عملت مجهود تكسر برودنا وتحفظنا، تحب تبدو جزء منا و احنا جزء منها. كسبت الطباط والمسؤولين بشكل مختلف عن تحية وعالية، استخدمت معاهم ببساطة القدرة المادية. أنا ما اعرفش لو جابت هدايا للمسؤولين في السجن، لكن تطلب من بنتها «إيفون» حاجات لا نهاية لها، وبنتها تيجي لها كل يوم ومعها ترامس فيها شاي وعصاير أشكال ومأكولات وحلويات وشكولاتات وملابس. تبهرهم باستعراض قوة مادية، ولما تقدم الهدية يصبح تقريبًا قلة أدب إن تترفض .

إنما الخصلة اللي ميّزت زوزو ماضي بالتأكيد هي الطريقة اللي كانت بتحكي بيها القصص .

أول قصة حكتها لنا إنها حبت طباط كبير في الجيش البريطاني، وازاي اتعرفت عليه، بيتبادلوا الكلام ازاي، وازاي انتهى بيهم الأمر في بيتها. كان فيه معازيم، نزلوا كلهم إلا هو، ما رضيش ينزل، واستمروا يرقصوا .

- فضلنا في حزن بعض .

وبس. وسكتت .

واحنا بنبص لها .

يظهر لاحظت وهي بتحكي لنا قصة الحب مع الطباط الانجليزي إن احنا صغيرين وان دي سكة تخش قلوبنا، فقعدت تحكي لنا قصص مسلية وتعمل أفلام قدامنا واحنا فاضيين ونحب نسمع. تبتدي القصة عادي ونلاقي نفسنا قاعدين قدامها فاتحين بقنا نسمع نهاية القصة. ما كنتش دريانة ساعتها ولكن وانا راجعة لورا وبافتكر اكتشفت إنها استخدمت معنا سلاح غير الماديات مما يدل على إنها

ست ذكية. ممكن أقول إن زوزو ماضي كانت حكاية ممتازة وكاتبة سيناريو درجة أولى. سحرتني وكانت بتسحر الجميع، عندها نظرة للأمور .

يا ترى قد إيه التفاصيل حقيقية؟ بتقول إنها من بني سويف، اتجوزت صغيرة واتصرفت علشان تيجي مصر هي وبناتها من غير جوزها وتدخل مجال السينما. كان عندها اعتقاد تعرضه علينا وهي عارفة إن رأينا العكس تمامًا وهو «إن القدرة المادية هي اللي تكسب» وتقولها لنا كدا في وشنا، إن «علشان تمثل في السينما لازم المخرجين يشوفوها» فراحت دورت في إعلانات الجرايد عن أشيك مطاعم الأغنياء اللي أهل السينما بيسهروا فيها، تلبس أشيك ما عندها وتاخذ بنتها الطفلة معاها، تطلب الـ «menu» - قائمة الطلبات - وبطرف عينها تبص على الأسعار وتطلب أعلى المأكولات، علشان تلفت النظر. لما بنتها تمت 16 سنة قررت تقدمها للمجتمع فأشركتها في مسابقة ملكة جمال مصر والبنت كسبت الجائزة الأولى .

- دي أول خطوة .

افتكرت وهي بتحكي إن فعلاً لفت نظري صورة لإيفون ماضي - بنتها - على غلاف مجلة كملكة جمال. معندهاش أوهام، لامسة الواقع وبتكرر إن لازم تعمل مشروع تجاري .

- التمثيل مش بيدوم .

والمشروع لازم يكون مرتبط بالأجانب .

- فول وطعمية بشكل راقى علشان الناس الغنية والأجانب والسواح بيجوا ياكلوا عندي .

دا مشروع مطعم «فلفلة»، كانت بتدوره في مخها وتجربيه فينا، وكل ما باشوف مطعم «فلفلة» بافتكرها لأنني عارفة إن هي صاحبة الفكرة، باتصور إن بنتها هي اللي نفذته وزوزو ساعدتها بعد ما خرجت من السجن. بنتها كانت من سننا ودخلت عالم الموضة وتصميم الأزياء .

عندها نظرية بتميز الممثلات اللي عندهم قدرة على الإثارة الجنسية، بتقول الإثارة الجنسية موهبة زي كاريزما الكاميرا، نوع من كاريزما الجسم، جسم الشخص على بعضه من راسه لرجليه، من غير سلوك إغراء أو تعرية جسمهم .

- ما تقوليش روحانيات، النداء الجنسي جزء من الحياة، والتأثير الجنسي على شخص كيميا ملهاش علاقة بمقاييس الجمال .

صدرها مش مثير بمقاييس الأنوثة التقليدية، صغير، يكاد يكون رجالي .

- مش مهم يكون صدري كبير، المهم إن أفف واتحرك كأن صدري آية في الجمال .

دي كانت الخبرة اللي إبتها لنا .

- ما تفكروا حلوا ولا لأ، عندكم أجمل صدر في الدنيا وفخورين بجسمكم، تقفوا صدركم لقدام وتمشوا بطريقة تقول بصوالي، أنا أجمل واحدة .

في الغالب احنا ما مشيناش على كلامها، لكن والله كنا بنسمع الكلام دا منبهرين، زوزو بتاخذنا في عالم ما بنفكرش فيه ومعندناش خبرته، بنفكر في الشعر والأدب والفنون والسياسة وممكن الحب، مش بنفكر في طريقة للظهور في المجتمع ومقاييس الجمال وكاريزما الجسم والنداء الجنسي والمشاريع التجارية ما عرفناش أبدًا لو قضيتها مخدرات ولا آداب ولا إيه، زوزو خرجت من السجن واستمرت تمثّل وما قابلتهاش تاني .

نسمع الشاويشة عالية ريّسة العنبر وهي بتفتح البوابة الكبيرة الساعة 6 ونص صباحًا، تقتحم العنبر ومعها السجانات والنباتشية، سجانة الدور الأرضي تفتح علينا الزنازين وتسبب الباب مفتوح، أكمل نوم على السرير مش عايزة اقوم واعتقد إن معظمنا كدا، خصوصًا في الشتاء، إلا تحية أبو النصر تنط من السرير وتبقى فايقة من بدري. النباتشية أم فتحي تدخل علينا ونباتشية تانية تعدي تاخذ جرادل الكابينية وتروح على الحمامات تفضيهم وتغسلهم وترجعهم وجرادل المية يفضى ويتملي تاني، وفي الوقت دا أم فتحي تمسح أرض الزنزانة، والتنظيف على طريقة المسح المباشر، بدون كنس. تيجي نباتشية تالته بأبريق مطلي مينا لونه أزرق مليون شاي بلبن مسكر جاهز، أبريق ضخم يشيل 20 أو 30 كباية، واحنا لسه مستخبين في السرير، محضرة كبايتي جنبي على ترايبزة مربعة صغيرة وموضّبة الشباشب والكراكيب من بالليل علشان أفضل في السرير على بال ما أم فتحي تمسح الأوضة . الأبريق يدخل يصب الشاي ويخرج وانا نائمة، ساعتها بس أمد أيدي واخذ كباية الشاي بالبن والسكر واشرب بشكل اتوماتيكي وفجأة عاوزة أقوم من السرير. إزاي كدا نائمة ومش قادرة أمد أيدي أمسك الكباية وبُقين شاي أصحصح؟ على أي حال كان لازم نقوم مش مسموح بفضل أطول من كدا في السرير. حاولنا نحتفظ بعادات الحضارة زي الناس اللي بره السجن، نغسل وشنا في قروانة لصب المية على حامل في الركن، ونلبس ونغير هدومنا. السرير حديد بيتنقل على الحيطه أثناء النهار، السرير دا تطور مريح، قبل كدا كنا بننام على الأرض، على البورش أو على مرتبة. قبل ما نروح الحمام ممكن يحصل «مرور»، الظابط أو مدير السجن أو المأمور يمر يتأكد إن كل المسجونات موجودين وإن كله تمام ويعمل ملحوظات سريعة. في حالات نادرة يحصل «تفتيش» على الزنازين، زنزانة زنزانة . في الوقت دا النباتاتشيات يكونوا غسلوا حمامات العنبر ويندهوا لنا :

- يا شيوعية الحمّام .

ساعتها بس نقدر نطلع من الزنازين، ناخذ الفوطة على كتفنا والصابونة ومعجون السنان والفرشة في كباية بلاستيك للمضمضة ونروح. الحمّام زي ما أعرفه: 4 أو 5 كابينيات بلدي من غير باب وقدامهم 5 أو 6 حنفيات لغسيل الوش والإيديين. حسيت بصعوبة إني أتعود تاني على حمام من غير باب يتنقل عليّ، ظاهرة غريبة شوية بس أهه الإنسان بيتعود وتبقى صورة عادية، زنزانة «ميمي»

أول زنزانة جنب باب العنبر، بعدها أمال عبد النور، وانا تالت زنزانة وبعدي تحية أبو النصر، انفرادي .

النباتشيات يسيبوا الحمام للـ«شيوعية»، ونبتي نصصح ونتمشى نرجع للزنازين واحنا بندردش .

لرقت فينا كلمة «الشيوعية» «يلاً يا شيوعية حمام»، «يا شيوعية تفتيش!»، وانطبقت على أي حد معانا في العنبر مهما كانت تهمة، مثلاً زوزو ماضي جت بتهمة جنائية بس برضه ينادوا لها «شيوعية»، «مارسيل نينيو» جت بتهمة تانية خالص «جاسوسية وصهيونية» برضه يقولوا لها «شيوعية»، ودي حاجة ضايقتنا برضه لأن احنا كشيوعيات مش عايزين يلزقوا لنا سمعة آداب ولا صهيونية بس كانوا بيفرضوهم علينا، والسجانات ملهمش دعوة بالتهمة، العنبر عنبر «شيوعية» وله حراسة خاصة بالإضافة لرئيسة العنبر. في الأيام العادية يسيبوا لنا ببيان الزنازين مفتوحة واحنا بنفطر، وممكن نتنقل من أوضة للتانية نزرور بعض لحد 10 الصبح، «يلاً يا شيوعية، طابور»، لابسين متسرحين وفطرانين، يفتحوا الباب ونخرج في الحوش قدام باب العنبر ونمشي بالخطوة السريعة بين سور السجن للعنبر الثاني ومباني الإدارة والمغسل، مسافة مش قصيرة، قاعدين طول النهار والليل في الزنزانة ومحتاجين نتحرك. اتنين اتنين أو أربعة أربعة زي ما تيجي، تقريباً من غير كلام، رايعين جايعين رايعين جايعين - نص ساعة. العنبر يتقفل علينا والزنازين تفضل مفتوحة أحرار لحد الساعة 12 ونص. ينزلوا كل المسجونات للغدا إلا احنا يجيبوا حلة كبيرة فيها عدس وفول ويقعدوا في صف طويل، كنا بنشوفهم من عنبرنا، كل مسجونة شايلة قروانة فاضية يغرفوا لهم ويرجعوا ياكلوا في زنازينهم، وعلى الساعة واحدة «يا شيوعية! الأكل». الكانتين يفتح مرة أو مرتين في الأسبوع، بنت صغيرة ظريفة لابسة ملكي، موظفة من بره السجن تيجي بصندوقين ثلاثة وتتولى البيع. شكولاتة وبسكويت وعجوة وعلب جبنة نستو مثلثات، حاجات تصبرنا على أكل السجن. ممنوع نشيل فلوس والأهالي يحطوا مبلغ على باب السجن يصرفوا لنا بيها كوبونات نتعامل بيها مع الكانتين. بعد الغدا ناخذ تقبيلة لمدة ساعة يقفلوا أثناءها الزنازين ويلموا الأكل والسجانات ياكلوا هم كمان. بعد التقبيلة يفتحوا الزنازين ويسيبوا مفتوحة لحد الساعة أربعة يوزعوا عيش وشوية أكل ناشف للعشا. آخر مهمة في النهار يمسخوا الممرات الرئيسية اللي بين الزنازين، المسح إزاي بقى؟ الممر طويل يمكن كيلومتر بحاله، أطول من تصور أي إنسان بره السجن، السجانة تجيب صابون نص سايل ما شفتش زيه إلا في السجن وبالكوز ترمي منه على الأرض وخمس ست مسجونات يوصلوا بالجرادل يرشوا مية ويوزعوا الصابون ويرصوا الجرادل على مسافة وراهم ويقفوا صف جنب بعض بعرض الممر ويمسخوا بالخيشة، تك تك تك كذا مع بعض، يجيبوا من أول الممر لحد الجرادل، يعصروا الخيش ويعدوا الجرادل وكمان مرة تك تك تك، يفضوا الجرادل في الحمام ويرجعوا بيها مليانة مية نضيفة وهكذا لحد ما يخلصوا الممر. في غضون ربع ساعة أو نص ساعة بالكثير كنت تلاقي عنبر طويل وسط صفين زنازين نضيف بيبرق. فضلت اتفرج على العملية دي بدون ملل لمدة 5 سنين. وأخيراً بودونا الحمام قبل ما يقفلوا علينا، لو نحتاج بالليل كنا بنعمل في جردل مخصوص بغطا علشان يقلل الروايح واحنا نايمين. وبكدا كل خدمات السجن تكون تمت، المرور والأكل والطابور والتنظيف، ويقفلوا الزنازين على الساعة أربعة ونص خمسة - بالذات في الشتا .

السجانات يتموا على بعض ...

- تمام .

- تمام .

- الشيوعية تمام .

- تمام .

بعد تمام السجانات يبجي تمام الشاويشة ريسة العنبر :

- الرابع تمام .

- تمام .

والدور الثالث والثاني والأول. آخر تمام هم الستات اللي على ذمة التحقيق، وإحنا .

- ملكية تمام؟

- شيوعية تمام؟

بياتوا معانا سجاننتين، البوابة الكبيرة تتقفل عليهم وعلينا، المفروض يسهروا يحرسوا بس كانوا بيناموا زينا أغلب الوقت. فترة الليل كانت طويلة، من الساعة خمسة مساء لستة صباحًا، شوية قراية، شوية عشا، شوية كلام من زنزانة لزنزانة من خلال شراعة الباب. المسجونات العاديات مع بعض في عنابر واسعة بنسمعهم يغنوا ويرقصوا ويتخانقوا .

كل واحدة فينا اتصاحت على قطة، نسميها ونوكّلها وتنام في حضننا في الشتا تدفينا. قطتي كان اسمها مشمش علشان لونها مشمشي. يختفوا طول النهار ويرجعوا بالليل بعد ما الزنازين تتقفل، القطة تخش وتروح وتيجي زي ما هي عايزة من قضبان بوابة العنبر، تيجي بالليل تقف تتونو قدام باب زنزانة صاحبته، وتعمل إزعاج طول الليل. ابتكرنا حل، نربط الروب في قضبان الشراعة وندلله بره الباب في الممر، القطة ترجع تشوف روب صاحبته تتشعبط عليه وتدخل الزنزانة تنام. سمحوا لنا نحتفظ بروب وقميص نوم وننام بالليل بالهدوم الملكي على شرط أثناء النهار نلبس شوال السجن .

عمومًا النظام دا كان كويس، الكل كان يقدر يمشي عليه مدة طويلة. أما فترات التشديد ففكرتها الأساسية هي عزل المسجونات عن بعض أقصى ما يمكن، نروح الحمام على مراحل، واحدة تخلص الثانية توصل، لو قلنا كلمتين يبقى بسرعة وعلى الماشي، يقفلوا علينا الزنازين ما يفتحوهاش إلا ساعة الطابور، الطابور نمشي اتنين اتنين زي المسجونات العاديات، ما يسيبوناش

نتمشى بحريتنا ولا نسرح، نمسك أيدينا بعض اثنين اثنين ونلف الحوش من غير ما نتلعب، بعد الطابور يظلوا علينا الزنازين على طول، وبالليل يحاولوا يمنعونا نتكلم أو ندلّل الأرواب للقطط. التشديد كان بيتعبنا وبيتعب الجميع بما فيها الإدارة والسجانات لأنه بياخذ مجهود منهم، ما كانوا يفضّلوه وما يطبقهوش إلا بالأمر .

خطبة جمال عبد الناصر في المنشية سمعناها تحت التشديد كل واحدة لوحدها من جوه الزنازين، حطوا لنا سماعات في الممرات بس الـ «acoustique» - الصوت - كان وحش، فمش مفسرين الكلام، فجأة سمعنا هيصة غريبة مش متأكدة لو سمعنا ضرب النار، وبعد شوية سمعنا صوت عبد الناصر تاني لكن لهجته كانت اتغيرت «المجرمين» «الأعداء» «حنقضي عليهم»، إحنا مش متبينين ليه بيزعق بالطريقة دي، فقد أعصابه، أنا ما اقدرش أنسى صوته. اليوم اللي بعده سمعنا إن حصلت محاولة لاغتياله .

كان مطلوب من الإدارة عزلنا بصفة عامة بدرجات مختلفة حسب الفترة، أيام الاعتقال والتحقيق وانتظار الحكم بيعزلونا عن الجنائيات بشدة لأن عندهم سهولة في الاتصال بالخارج، عندهم سكة يدوا فلوس للسجانات والسجانات يوصلوا جوابات ويدخلوا الحاجات الممنوعة. ويعزلونا عن بعض في زنازين انفرادية علشان ما نعرفش نتفق ونتشاور. ولما اتحكم علينا بأشغال شاقة، المفروض نطلع المغسل مع باقي المسجونات الصبح قبل الطابور، نغسل هدوم الضباط وما اعرفش هدوم مين تاني، بيشتغلوا كثير، بس عفونا من الشغل وفصلونا عن الجنائيات في عنبر لوحدها علشان ما نكلمهمش في السياسة، ومن الأول ما نقضيش وقت مع المسجونات العاديات، بيخافوا نعمل أي علاقات بعيد عن عينيهم. ومع ذلك مع الوقت بالذات بعد ما أخذنا حكم وانتهت التحقيقات واستتبت أمورنا في السجن اتصرفنا برضه وقدرنا نتعرف ويكون لنا ناس يساعدونا على الاتصال بأهلينا بره السجن. كنا بنطل على حوش الرجالة من شبايك الحمامات، نطلع على الماسورة ونقف على الحنفيه ونشيب نوصل يا دوك براسنا على الجزء التحتاني من الشباك اللي بيطل على حوش الرجالة يا دوك نشوف. اتصلت بسعد بالطريقة دي، وكان مسجون معاه زهدي، زهدي رسام، فمرة قعدت اسأله ويديني نصايح إزاي اتعلم رسم وانا واقفة على راس الحنفيه. دي كانت طريقة الاتصال مع الرجالة لغاية ما اتقلوا من سجن مصر وراحوا سجن الواحات أظن، وبعد سنة أو سنة ونص نقلونا على سجن القناطر علشان يهدوا سجن مصر والاتصال عن طريق الوقوف على راس الحنفيه انتهى من الوجود .

الستات اللي واخدين أشغال شاقة مؤبدة ستات مشهورة طلّعوا في الجرايد بسبب جرايم قتل وتار ومخدرات، قربنا منهم شوية واكتشفنا إن الستات اللي واخدين تأبيدة مخدرات في الحقيقة زوجات وبنات التجار، يشيلوا التهمة على عاتقهم والراجل يفضل بره، الزوج أو الأب أو الأخ. تأبيدات المخدرات كانوا على أعلى مستوى من كل ناحية، عندهم قدرة مادية بدرجة أو بأخرى، يجيلهم فلوس ويقدروا يشتروا، ونضاف مش بيتعاطوا. تأبيدات القتل كمان عادة من عائلات كبيرة، وأغلبهم من الصعيد، ريسة المغسل مثلاً قتلت جوز بنتها، من عيلة كبيرة من الصعيد، معلمة متمكنة، اتصالاتها مع الخارج ماشية عادي ودائمًا معاها فلوس وتحصل على خدمات من المساجين والسجانات وتدفع لهم، كأنها مديرة السجن. المغسل كان تحت سيطرتها، فيه أفران حديد كبيرة

بيسخنوا عليها المكوة ويغلوها مية الغسيل واللي له سكة عند ريسة المغسل يديها العيش تقمره على حديد الفرن والرغيف يتلدن، يسخن ويطرى من جوه ويقرمش من بره، والله كان عيش حلو بالطريقة دي ببساعد على أكل السجن. «إيقوا هاتوا العيش وأنا أسخنه لكم»، ريسة المغسل نادت علينا وعرضت من نفسها الخدمة الطوة دي وبقت تسخن لنا العيش بانتظام، مش بس كدا، اتطوعت تاخذ الشوال اللي لأبسينه يغسلوه ويرجعوه لنا مكوي ونضيف، مرة في الإسيوع. إحنا معندناش خدمة تقدر نعملها لها بالمقابل، غير اننا نكون ممنونين. واحنا فعلاً كنا ممنونين قوي. اللي فوجئت به هو إن حتى الست الريسة بتأييده جنائية قتل المسيطرة داخل السجن، تحب تضرب صحوية مع الشيوعات، دي ظاهرة مركبة شوية بس فعلاً السجينات كانوا بيحسوا بنوع من الـ «prestige» - القيمة - في التقرب منا، يمكن فضول على شوية عطف كمان. كانت شخصية فريدة ريسة المغسل بس يا خسارة نسيت اسمها .

زي ما قلت ستات التأييده كانوا أرقى ستات، يحافظوا على نضافتهم وشكلهم، على درجة معينة من الذكاء وأخلاقهم كويسة، يعني عندهم كلمة ما يخلفوهاش، بعدهم على طول في المستوى يججوا الحرامية وبتنوع السرقة عموماً. السرقة تقسيمات، النشالين واللي بيسرحوا على البيوت، وكل سرقة متنقمة تخصصات، مثلاً حيدخل الشقة يسرق إيه؟ الحرامية برضه عندهم قواعد أخلاقية، مين اللي أرقى ومين اللي أقل قيمة، مين يتسرق ومين ما يتسرقش. بيعتبروا السرقة مهنة مش صفة، ما يسرقوش حد يعرفوه، ودا اللي خلى أم فتحي الحرامية نباتشية الشيوعية ظريفة معانا، النباتشية سجينه من المسجونات العاديات مكلفينها تمسح وتنظف العنابر يومياً أول حاجة الصبح. العلاقة مع أم فتحي كبرت واستقرت معانا مدة طويلة. أم فتحي سوابق كل شوية تخرج من السجن وترجع له بتهمة السرقة. أخلاقها عالية بشكل غير معقول، ما شفتش زيها، تتكلم قليل، رقيقة وسريعة ومؤدبة معانا ومع كل الناس عموماً، تخش على الزنزانة بالجردل الصبح تمسحها، أخذنا عليها وبقينا نديها اللي نقدر نستغنى عنه، عيش فينو، مأكولات من البيت أو حلويات، إديناها فلوس كمان بس هي كانت عفيفة بالإضافة إن عمرها ما حطت إيدها على حاجاتنا. كنا بنحبها بصحيح من غير كلام كثير، ودي من شطارة السجانات، بيعرفوا يوزعوا الناس بكفاءة .

وهنا نوصل لأوحش الدرجات، المومسات، بيسموهم «دعارة» بيلموا من الشوارع بنات بنتسول، ستات مخلوطة بين بعض. ما اعرفش أوصفهم، سرقة يسرقوا، كذب يكذبوا، خناقات يتخانقوا، شتايم يشتموا، يشحتوا بسهولة ويطلبوا ببجاجة، وبالليل بعد ما يقفلوا الزنازين والعنابر، نسمع أصواتهم وضحكهم مع بعض بين العنابر، هاهاهاه بطريقة فيها كثير من السوقية والتهجم. انحدار أخلاقي، معندهم حدود، مفيش أي كرامة. طبعاً مساكين، حاقول إيه، معظمهم ينتهي الأمر إن يجي لهم أمراض ويروحوا المستشفى وياخدوا علاج، حياة مؤلمة جداً. ما يمنعش إننا حبيننا واحدة منهم اسمها سامية، مش عارفة اتعرفنا عليها ازاي، كانت صغيرة قوي في السن، طويلة، ظريفة، تتكلم معانا وترد على الأسئلة وكثير حاولنا نأثر عليها ونقول لها ما ترجعش، تخرج من السجن تقعد بره شوية ونلاقيها رجعت تاني، كملنا نتكلم معاها ونتصاحب عليها وهي تتصاحب علينا، بس ما أمكنش. الشاويشة عليا كانت بتضحك لما تشوفنا واحنا بنحاول نتكلم ونقنعها، عندها خبرة وعارفة إن الموضوع مش اقتناع وكلام، عارفة إن مفيش فايده، النظام اللي بيحكمهم معقد وأكبر منهم ومننا .

الشاويشة الرئيسة عليّة كان فيها شبه من الرئيسة توحيدية من سجن 1949 لكن أصغر في السن وتختوخة وتقاطيعها حلوة، يظهر بيختاروهم نفس القطعية جسمها ضخم وجامد وشخصيتها قوية. في يوم ظهرت الشاويشة عليّة ماسكة رقبة مسجونة جديدة وجاية من بعيد. مسجونة مبالاة للسمار، عينين سود واسعة وحواجب كبيرة وشعر كثير غزير وموج مقصوص فورمة قصيرة حلوة، مهندمة بشكل عام. خصصوا لها زنزانة وزى أي نزيلة جديدة خصوصاً لو «شيوعية» نروح نعرض خدماتنا «معجون سنان؟» «فوطة؟» ونديها اللي نقدر عليه. اسمها أمال عبد النور، وزى أي نزيلة جديدة داخله حزينة مش مزقطة بدخول السجن. أمال حكّت لنا إن حيطردوها من البلد علشان أجنبية. «بس ازاي أمال أجنبية؟ دي سمرا وشعرها اسود وبتتكلم عربي» قعدنا حوالها نسألها، وعرفنا إنها فلسطينية من مصر الجديدة، هربوا من فلسطين في 1948 وجم مصر في وقت ما، وأبوها على ما أظن كان عمدة مدينة في فلسطين. حكّت لنا إنهم كانوا بيقفوا على الشاطئ يتفرجوا على سفن كبيرة مليانة ناس ترسى جوه في البحر والركاب ينزلوا في مراكب صغيرة يقربوا من البر بالمجداف، المراكب الصغيرة برضه ما توصلش لحد الرملة الناشفة وإلا تغرز، فالناس تضطر تنزل منها في المية، بنات وشباب لابسين شورتات وفانلات، رجليهم ودراعاتهم عريانة، يشيلوا العواجيز والعيانين والعيال يوصلوهم البر على شواطئ فلسطين الفاضية المفتوحة. آلاف وآلاف يفرشوا على الشط وينصبوا أي دروة يناموا فيها، حتى معندهم شنت، جايين بأكياس ويؤج «مشهد غريب علينا إحنا أهل فلسطين، بهدلة، ناس جايين بالمنظر دا كانوا بيصعبوا علينا، سبناهم طبعاً». أبوها كان بيقرأ في الجرايد خبر متكرر إن السفينة الفلانية شايلة كام ألف يهودي بتلف البحر المتوسط مفيش بلد راضية تقبلهم وكثير منهم يا معندهم شنت أوراق تحقيق شخصية أصلاً، أو ضاعت في الحرب. «displaced persons» - لاجئين - من كل الجنسيات الأوروبية، ظاهرة من أيام الحرب العالمية الثانية واستمرت بعد الحرب. اليهود بالذات بيهربوا من أوروبا النازية، اتعملت أفلام واتكتبت كتب على الحكاية دي، والمنظمات الصهيونية كانت بتعمل دعاية «إن ما دام مفيش بلد تقبلنا نرجع للأصل، نروح فلسطين» وكان ساعتها فيه الانتداب البريطاني في فلسطين. أمال عبد النور شافت دا بعينها، أنا فاكدة إنها قالت إنهم وصلوا القاهرة من نابلس، ونابلس مش على الشاطئ، فأمال شافت مشاهد البحر دي فين؟ كانوا فين في 1948 قبل ما يوصلوا نابلس؟ يمكن حيفا. ابتدت حرب 1948، وابتدت موجات هروب الفلسطينيين من البلد، لأن عصابات «شترن» و«الأرجون» الصهاينة ابتدوا عمليات قتل وإرهاب وتطفيش الأهالي. أبو أمال مات وأم أمال قررت تاخذ عيالها الخمسة وتهرب بيهم: كاميونات مرصوفة ورا بعض على الشارع الرئيسي تنقل جماهير الفلسطينيين بره بلدهم - دي أمال اللي بتحكي - والسواقين رزلين بياخدوا 100 جنيه للنفر، ما اعرفش قصدها جنيه مصري ولا إيه، بس فاكدة الرقم، 100 جنيه للنفر في سنة 1948 أو 1949، وأمها ست لوحدها، أرملة، عندها 5 عيال، مبلغ كبير. سابوا كل حاجة، بيتهم باللي فيه، وأم أمال طلعت شوية الفلوس والذهب اللي عندها وصرفت على الهروب. مفيش مكان في الكاميونات دي ياخدوا حتى الهدوم، الناس فوق بعض، عائلات بحالها زي عائلة أمال، ناس عاديين رجالة وستات وعيال، مشحونين بعيد عن بيوتهم - بعيد عن القصف - سفرية طويلة ومتعبة وعايط وصريخ وعيال وناس عيانة وكبيرة في السن. نابلس وبعدين مصر، راحوا على مصر الجديدة عند قرايبهم، بس عذاب في عذاب. بعد سنتين تلاتة أمال دخلت كلية الفنون الجميلة وأخت

آمال الكبيرة، عايدة، اشتغلت، والأصغر سامية كانت لسه في المدرسة. آمال انضمت لمجموعات الماركسيين في كلية الفنون الجميلة واتقبض عليها مع عدد من الفنانين أشهرهم وليم إسحق، وجات عندنا في عنبر الشيوعية في سجن مصر. كان فيه مجموعة كبيرة من الفنانين التقدميين في كلية فنون جميلة، وفي كلية الطب، في كلية العلوم كانوا عاملين أسرة اسمها «Gramophone Society» - «أسرة الجرامافون» - يسمعون موسيقى كلاسيك ويتكلموا في الفن والثقافة، الطلبة كانوا مليونيين حماس وغلان من أيام الملك، قبل 1952. أنا تأثرت وآمال بتحكي حكايتها، فكرتني بسجن الأجانب في 1949 والعيلة الفلسطينية اللي اتقبض عليها على الحدود المصرية، والسبت تعمل سنودنشات موز لجوزها وبنتها تحكي لي أنا وفردوس السجانة على أهوال الهروب من فلسطين .

آمال عبد النور دخلت قلبي، كانت بتعجبني لأن فيها شيء من الذكاء واليقظة في معارضتها. عندها طبع خاص بيها بسبب إنها فنانة، والفنانين بيربوا روح متميزة والاختلاف دا بيطلع في كل تصرفاتهم عموماً. رسامة غير تقليدية في الأفكار، شقية، غير كلاسيكية، وإلى حد ما لما الكل يتفق على حاجة معندهاش مانع تعارض لوحدها وتقول لأ، مش سهلة في التعامل. من المناقشات طلع لي إن مواقفها السياسية شديدة، مع شيء من البرود والتحفظ ضد منظمة «حدثو» ومقاربة مع «م.ش.م.» و«الحزب الشيوعي المصري». «حدثو» سمعتها وحشة عند «م.ش.م.» وبعض المنظمات الثانية، على أساس إن بنوع «حدثو» «معدهمش موقف متماسك» وفي الغالب كان في شيء من التحفظ معنا كشيوعيات يهود. أنا حبيت آمال وصاحبيتها أكثر من كل الباقيين، هي وسعاد بطرس اللي كانت في السجن في نفس الوقت تقريباً، فضلت لغاية ما خرجوا، مش بسهولة نتكلم في السياسة تحديداً، بس من غير تعصب ومن غير عنف وكنا بنتقاهم .

بالاحظ دلوقت وانا باحكي إنني كنت شديدة التردد في ممارسة التكتل ضد بعض على أساس المواقف السياسية. انقسامات الحركة الشيوعية كانت بتدور حول أسئلة من نوع «وطني ولا ماركسي صرف؟» وحول «حركة الجيش، ثوار وطنيين ولا مؤامرة؟» «نؤيد النظام بالرغم من وجودنا في السجن ولا نكافح ضدهم ونعتبرهم عملاء للاستعمار؟». بس الاختلاف على الأسئلة دي كان بيؤدي لقطيعة واتهامات وانا كنت بانفر من الطريقة دي بشكل عفوي .

ومع الوقت آمال حكيت لي إن وليم إسحق الفنان مُعجب بيها وهي مُعجبة بفنه، عمل لها بورتريه كبير موجود في بيته وكانت مبسوطه وبتقول «دا شرف عظيم لي إن فنان كبير زي وليم إسحق يرسمني» .

رسومات آمال كان فيها روح دعابة، شيء من الكاريكاتير حاجات مش رومانسية ومش واضحة ومليانة شخصيات، وبتقول إنها متأثرة بـ«بروجل»، فنان رسم الفلاحين في زمنه أعتقد في ألمانيا بشيء من روح الدعابة. الشاويشة عليا كانت مبسوطه من آمال ومن الروح الغريبة دي وكانت بتتفرج على رسوماتها معنا وتناكفها على طول :

- إيه دا، إيه دا، ما ترسمي حاجة عدلة !

فآمال ترد عليها :

- إنتِ العِدلُ بالنسبة لك إيه؟ أنا شايفة اللوحة عدلة كدا .

أم آمال كانت بتتبع لها سلطة بنجر، فعليّة تقول :

- بتاكلي بنجر علشان خدوك تحمر؟

كنا بناكل مع بعض كتير في السجن، اللي بييجي لها أكل من البيت نقسمه وناكله مع بعض، الروح بينا في المجموعة دي كانت روح اشتراكية متعاونة حلوة. قررنا نعمل فستان شيك للشاويشة عليّة، يبقى موديل شكله إيه؟ كنت خدت كورس تفصيل عند «بروفيلي» اتعلمت مبادئ القص و عمائل الباترون وابتديت أفصل لنفسي حاجات على الموضة، باحب ألبس شيك، وأمّي كانت بتشجعني، بس تحية أبو النصر شاطرة و عندها ثقة وتصور واضح وفاهمة الذوق المصري: فعلاً عرضت على الشاويشة عليّة الموديل والشاويشة انبسطت منه. اشتركنا كلنا في الخياطة إلا آمال، ملهاتش في شغل الإبرة والمقص. أثناء تنفيذ الفستان حصلت مشكلة، ما اعرفش تحية غلطت في إيه وحاولت تصلح الغلطة وغيرت الموديل، بس حنقول إيه للشاويشة عليّة؟ آمال عبد النور اقترحت :

- قولي لها الموضة كدا في باريس .

ودا اللي حصل، اديناها الفستان وقلنا لها إن «دي الموضة في باريس» فالشاويشة عليّة ضحكت ضحكت ضحكت من شقاوة آمال، ما اعرفش عرفت ازاي الحقيقة، وحكاية الفستان انتهت على خير ومحدث زعل الحمد لله .

اللي كان ماسك السجن كان المأمور المستريب اللي شايفنا شيوعيين، نص أجانب نص يهود نص فلسطينية، نفس المأمور اللي عصلج بسبب لفة القطن أيام عليّة توفيق، تيجي آمال عبد النور صاحبتني العزيزة تبعت تطلب عن طريق أهلها كتب فن وكرتون وورق رسم وأتوال وألوان علشان ترسم. كتب غالية جدًّا فيها لوحات للفنانين الكبار من ضمنهم «موديليانى»، عنده طريقة خاصة في الرسم بالإضافة إلى إنه بيرسم ستات عريانة والمأمور منع الكتب :

- لا يمكن، عيب، انتِ بنت بنوت .

بيقولها بصراحة بالطريقة دي، ويعلق على الرسومات :

- دي رسمة ست دي؟ دي مشوّهة، وشها مش مرسوم .

قعدنا نناقشه إن مش آمال اللي بترسم الحاجات دي :

- فنانيين كبار اللي رسموا اللوحات دي والنظرة مش نظرة جنسية إنما نظرة فنية .

أنا مش فاكدة انتهت ازاي حكاية الكتب بس دخّلت عدد منهم. آمال جاية متصورة إن في السجن مش حيكون وراها حاجة وحتقدر تكرّس نفسها أخيراً لفنها وحتترم كثير، إلا إن حياة السجن فيها

حدث جديد كل شوية، حدث سياسي زي «مصر اشترت أسلحة من تشيكوسلوفاكيا» فالجميع يتناقشوا ويتكلموا، والسجناء اللي تبع «حدثو» بييجي لهم توجيه من حزبهم من بره بارسال جواب تأييد للحكومة على الخطوة دي. على أساس إن صفقة أسلحة مع تشيكوسلوفاكيا معناه إننا داخلين في نوع من الخلاف مع أمريكا، دا كان حدث لأن الخلاف مع أمريكا ما كانش واضح في سياسة عبد الناصر من الأول. حدث تاني، قيام حرب 1956، العدوان الثلاثي لما ابتدت الغارات على مصر بعثنا جواب لعبد الناصر عايزين نروح نكافح في القتال ولما تخلص إن شاء الله نرجع السجن تاني، عايزينهم يستخدمونا في حاجات مفيدة أثناء الحرب. ما سألوش فينا ولكن باقي الشيوعيين اللي كانوا بره ومن ضمنهم عبد المنعم القصاص وأمينة شفيق سافروا فعلاً السويس للاشتراك في المقاومة ضد الإسرائيليين. في نفس الفترة دي السجن اتملئ ستات يهود مصريين مطلوب منهم يسيبوا مصر. انتشرت أخبار وصولهم في السجن ومش مسموح لنا نقرب منهم ولا يكلمونا. حطوهم في حطة لوحدهم وكنا بنسمعهم بالليل بيغنوا. بيتهيا لي كانوا بيغنوا أغنية «que sera sera»، يعني «اللي يحصل يحصل»، حالة من الاستسلام أو الشجاعة في مواجهة المصير المجهول. مش عارفين حيحصل لهم إيه بس بينطردوا من مصر، عدد كبير. السجناء قالوا لنا إن العائلات دي بينطردوا علشان أثناء الغارات بيطلعوا السطوح يعملوا إشارات للطائرات الإسرائيلية، مش عارفة إزاي. على أي حال كان مطلوب منهم يسافروا ويسيبوا بيتهم في خلال ساعات. سمعت بعد كدا إن بيوتهم اشتروها طباط في الجيش اللي جم في الحكم جديد، وإن إجراءات الترحيل السريع اتعملت علشان يضطروا يبيعوا لهم البيوت دي برخص التراب. حاجة زي ما دام إسرائيل وفرنسا وانجلترا بيعملوا فينا كدا، يبقى «احنا» كمان نطرد ونستقيد.

إحنا بقى كنا كل شوية نبعت لعبد الناصر جواب، طبعاً جمال عبد الناصر عمره ما رد على رسايلنا، ولكن رسايلنا له واهتمامنا بحال البلد كان بيبأثر على الناس في السجن بما فيهم الطباط. تأييد شراء الأسلحة من تشيكوسلوفاكيا بالذات حاز على احترام كبير من الطباط ومن مدير السجن الجديد، السلطة كانت بتوصفنا لهم إننا «شيوعيين عملاء لبلد تاني»، فموقف زي دا وضّح لهم إن «الشيوعيين وطنيين».

ولكن غير الأحداث السياسية العامة كان في كمان أحداث محلية جوه السجن، زي عملية نقلنا من سجن مصر لسجن القناطر أو لما ابتدينا نربي ققط في الزنزانة وابتكرنا تكنيك الروب للقطط، أو وصول «مارسيل نينيو» المحكوم عليها بتهمة الجاسوسية لإسرائيل، وإنهم راحوا حبسوها معنا إحنا بالذات حاجة أخذت منا مداولات وطاقة. وكنا بنعمل دروس لغة لبعض بالانجليزي والفرنساوي وبالذات العربي. كان فيه بنت اسمها فتية نوفل تبع الإخوة نوفل من المنصورة، تنظيم لوحدهم ولا «حدثو» ولا «م.ش.م»، أنا مش متأكدة فتية دخلت تبع أي حبسة، بس على أي حال فتية دخلت في وسطنا ولقت عدد منّا بنتكلم فرنساوي وفرنجي «لا انتم لازم تتعلموا عربي» وابتدت تدينا دروس، تقرا بصوت عالي وتخلينا نقرا معاها المنشورات اللي بتطلع من التنظيم ويسربوها لنا في السجن. مطبوعة بشكل وحش ما اقدرش أوصف لك، بس كانت بتقرض علينا نقرا المنشورات بالذات، وأنا شخصياً اتكسف اقول «لأ مش عاوزة أقرأ منشورات»، دا كان تعذيب بالنسبة لي. ضد الحكومة ومع العمال طبعاً بس معاني جامدة وأسلوب مش بيساعد، مش بياخذ اهتمام الواحد. كتر خيرها والله فتية نوفل برغم إنها كانت شديدة معنا وكان بتحنقنا إزاي احنا خواجات بنكافح

ونتحبس على حساب الحركة المصرية وعلشان مصر وما نعرفش اللغة كويس؟ أكثر حاجة ساعدت في الحقيقة هي التعامل مع السجانات والمسجونات في الكلام العربي الدارج، مش النحو اللي كنت درسته في المدرسة ولا كلام المنشورات .

بعد 1956 جا لنا مدير جديد لسجن مصر اسمه محمود صاحب، راجل منفتح، قرر يستغل طاقة المسجونات الشيوعيات اللي قاعدين في أرابيزه، «ميمي» كان محكوم عليها بـ8 سنين وانا واخدة 5 سنين وفي الأثناء جت «مارسيل نينيو» بـ15 سنة في تهمة تجسس وتحية أبو النصر 3 سنين وآمال عبد النور وسعاد بطرس أعتقد 3 مش متأكدة . محمود صاحب استغلنا بشكل إيجابي وكلفنا بعمل فصول تعليم للمسجونات الجنائيات . «ميمي» مسكت الموسيقى وجاب لها آلات موسيقية وجاب واحد من فرقة موسيقى البوليس، للأسف نسي اسمها، وقعدوا مع بعض، هي بالكمنجا وهو بالكلارينت وعملوا مجموعة موسيقية من المسجونات . كانت أجواء عدوان 1956 فعملوا كورال للأناشيد الوطنية، يتمرنا 3 مرات في الأسبوع. أنا نابني فصل التمريض مع دكتور لتعليم الإسعافات الأولية، وتحية أبو النصر خدت محو الأمية علشان مُدرّسة، وكلف زوزو ماضي تكوّن فرقة تمثيل وتكون هي المؤلفة والمخرجة ومدربة التمثيل. زوزو خدت الحكاية جد وكتبت قصة علشان تتمثل، لكن المسرح بالذات ما نجش، طلع إنه فوق قدرات المسجونات. أما «مارسيل نينيو» فوصلت مهزوزة وفي حالة انهيار، بعد مدة أقنعوها «ميمي» ومش فاكراة مين تاني تعمل نوع من الاعتذار والمراجعة، شدت حيلها شوية وبالكلام اكتشفنا إنها تعرف تريكو فجاوبوا مكنة وعملت ورشة تريكو. وفي الآخر عملنا احتفال بتأميم قناة السويس و«ميمي» صممت استعراض عسكري وفصلنا هدم وانا رقصت فيه، وكانت مناسبة كبيرة .

أحداث بالطريقة دي على طول، فأمال في لحظة ياس قالت :

- مش معقول كدا، «Never a dull moment» في المكان دا .

بما معناه إن «الواحد مش لاحق يهرش في السجن»، التعبير دا ضحكنا وعبرّ عنا، مفروض إننا مسجونين ومقطوعين عن العالم ولازم نحس بالملل الشديد، انتهى الأمر إننا مشغولين زيادة عن اللزوم .

ابتدت تيجي لي أوجاع اللومباجو، كنت في نص العشرينات بس ضهري ابتدا يمسك ومش قادرة اتحرك. رحلت للدكتورة «إيدا» دكتورة السجن، حاولت تساعد قد ما تقدر، أدتني أسبرين ولكن الوجع وصل لدرجة إن الأسبرين ما بيعملش مفعول، فقالت :

- أحسن لك ما تتحركيش خالص، طول ما فيه وجع تفضلي نايمة .

كانت ست طيبة، الدكتورة «إيدا» وبافتكرها بالخير - دارت الأيام وفوجئت إن صاحبتك اللطيفة نادية سامي اتجوزت ابنها. على أي حال في الفترة الأخيرة من السجن ابتدت تيجي لي كمان حالة من الأرق، وانا عمر ما كان عندي أرق قبل كدا في حياتي، أحاول أقرأ قبل ما انام انعس وجفوني

تقفل أظفي النور وتبتدي الأفكار تيجي في ذهني مش قادرة اسيطر عليها، أفضل صاحبة صاحبة صاحبة صاحبة مش قادرة أنام لحد ما اغفل شوية قرب الصبح .

بس إيه يعني، كنت ابتديت أتعب بصحيح .

*

أول يناير 1959، كنت باعد الأيام اللي فاضلة لي على الإفراج، قاعدين كل واحدة في زنرانتها وفوجئنا بدوشة وهرجلة ووصول عدد كبير من المعتقلات منهم ستات جاية بعيالها، حطوهم في المبني اللي قصادنا وكان بيوصل بينا حوش. كنا في سجن القناطر ساعتها، الإدارة خدت جناح أربع أوض في الدور الأرضي لمبني مستشفى سجن النسا وحولوهم لزنازين للسياسيات بعيد عن عناير المسجونات، كل واحدة فينا أوضة كبيرة نسبياً، يمكن 3×4م، مش زنازين ضيقة زي في سجن مصر. شباك أوضتي وأوضة «ميمي» بيطل على سور السجن العالي اللي آخره أسلاك شائكة، ولكن أوضة «مارسيل» كانت ناحية حوش السجن بنشوف منه مبني العنبر الكبير اللي حطوا فوج المعتقلات الجداد فيه. بالليل كنا بنلمحهم من الشباك ونحاول نكلمهم، ممنوع عليهم الاتصال بأي حد جوه أو بره السجن، ولا حتى زيارات الأهالي. الحظر كان شديد عليهم لأنهم على ذمة تحقيق، إحنا كمسجونات، لايحة السجن تنطبق علينا فعندنا شوية حقوق، شوية حركة وشوية اتصالات وشوية زيارات، وكل واحدة عارفة مدتها، الجداد مش عارفين حيخرجوا إمتي، هل حيتحقق معاهم ويتحاكموا ولا حبس اعتقال، أعتقد الأحكام العرفية كانت لسه موجودة. الأحكام العرفية دي اللي مش عايزة تخلص أبداً عندنا في مصر .

تغيرات سياسية في العراق تسببت في موجة اعتقالات جديدة في مصر، رئيس وزراء اسمه عبد السلام عارف وواحد تاني اسمه عبد الكريم قاسم، نوع من الخلاف بين القوميين والشيوعيين، بس انا نسيت التفاصيل دي، لازم نسأل سعد علشان هو اللي بيبتكر الأسمي وفاهم الصراعات اللي تؤدي إن لما يحصل انقلاب في العراق، الحكومة تقبض على التقدميين والشيوعيين عندنا في مصر، وعندنا يعني جمال عبد الناصر .

في سجن القناطر أيامها جدول النشاط كان بيخلص الساعة ثمانية بالليل، العناير والزنازين تنقفل لتاني يوم الصبح، وتبتدي تطلع أصوات من السجن سامعاها مش شايفها، عناير بعيدة، مسجونات بيضحكوا أو بيغنوا أو بيتخانقوا، الخناقات كلها كانت بتطلع بالليل. من عنبر المعتقلات الجداد كان فيه معتقلة بتقعد على حز شباك العنبر تغني لنا أم كلثوم، كنا بنسكت كلنا ونسمع من الزنازين. سألت مين دي قالوا لي ممثلة جديدة موهوبة اسمها «محسنة توفيق»، ما اتعرفتش عليها إلا بعد عشرة أو خمستاشر سنة عن طريق رعاية النمر، كان معاهم وداد متري بس انا ما كنتش أعرفها ساعتها، برضه لفت الدنيا وانتو اتصاحبتموا على عزة وريم ولاد محسنة ووداد. من المعتقلات الجداد كنت أعرف إنجي أفلاطون من أيام فترة «أنصار السلام»، إنجي وصلت المعتقل متأخرة كام يوم لأنها هربت من البيت لما البوليس جه يقبض عليها، مسكوها بعد كام يوم في قرية لابسة فلاحه بلدي، إنجي حكّت التفاصيل في كتاب مذكراتها، يظهر سابّت مذكراتها لسعيد خيال ولما ماتت هو وضبها لها ونشرها. مش عارفة مين تاني اللي كان معتقل ساعتها، ناس كثير في العنبر البعيد دا وانا

خرجت بعد شهرين من وصولهم، قبل ما طرق الاتصال بيهم تترتب، ترتيب الاتصالات بياخد وقت في السجن، ما لحقتش أفهم إيه حكايتهم الناس دول، حتى لما كانوا بيخرجوا طابور كانوا بياخدوهم في حوش بعيد، الاختلاط قليل والسجن نجح يعزلهم عننا، الذكرى اللي فضلت معايا منهم هو غنا محسنة بالليل .

جه يوم 29 فبراير أخيراً بعد خمس سنين بالطب في السجن، لو تفتكري سعد اتقبض عليه قبلي بتلات أيام، وأنا اتقبض عليّ بعد أول جلسة محاكمة جم خدوني من البيت، بعد خمس سنين سعد خرج قبلي بتلات أيام. سلمت على الشاويشة عليّة، وعلى المأمور، وطبعاً على زميلاتي في الزنازين، أما المعتقلات اللي في العنبر فما أمكنش إنني أتقرب منهم، وما تمتش المعرفة، بس الحقيقة أنا كنت سعيدة وعندني صعوبة أركز في الفراق. ظابط اسمه عبد العال سلومة جه ياخدني، قريب سعد وموصيه عليّ، ظابط متعاطف مع الشيوخ عيين والتقدميين .

- أنا قريب سعد كامل، أنا اللي حاوصلك لوزارة الداخلية، محتاجة حاجة؟

الحقيقة سعد وعيلته كانوا بيوصوا عليّ بانتظام كأني بنتهم، لطيف منهم، في بداية مدة السجن مدير السجن «سالم بيه» طلع من معارف نانا وجدو فجّه برضه يطمئن عليّ ويسألني إذا محتاجة حاجة. ركبت الكاميون وعبد العال سلومة ركب معايا بوشه البشوش وودّاني القسم، لقيت سعد مستتيني ما رضيش يروّح قبل ما انا أخرج، مش عايز يدخل البيت من غيري، سعيد إن خلصنا السجن ومستتيني نروح سوا. كنا في فبراير وموجة برد، اليومين البرد دول يا عيني سعد قضاهم في القسم. وصلت القسم وسعد كان جاهز، قابلت سعد بغاية السعادة ما اقدرش أقول لك ولا أوصف لك . رحنا سوا على مبنى وزارة الداخلية، الإفراج بيتهم من هناك . عبد العال سلومة وشه أبيض وأحمر، ملامح تركي، من قرايب جدو كامل، فرحان بيينا وبفرحتنا وبأن الإفراج يتم على إيده، للأسف مات بعد كذا بفترة قصيرة، جاله سرطان في الزور ومات سريعاً، كان صغير، ثلاثين أو خمسة وتلاتين سنة، ما اتساهوش .

تمت إجراءات الإفراج وخرجنا للشارع وأخذنا تاكسي من قدام مبنى وزارة الداخلية وروّحنا البيت وجينا على هنا، في بيت الدقي .

بيت الدقي، بيت نانا وجدو أبو وأم سعد .

كان في استقبالننا نانا وجدو وأبوي وأمي، أفنكر مها بنت جمال، 7 أو 8 سنين ومستتية عمو سعد وطنط «ماري»، الأبطال اللي كانوا في السجن .

أبوي وأمي كانوا يحبوا إنني أروّح على عندهم في البيت بس سعد من ساعة ما خرج وراح يستتني في القسم، كان على اتصال بالتلفون معاهم وأصرّ إن احنا نخش بيت الدقي مع بعض الأول ونروح

نزور أبويا وأمي في بيتهم اليوم اللي بعده. كنت مبسوفة وسعيدة ومش مصدقة نفسي إن الوقت فات وكأنه ما فتش .

كان فيه واحد اسمه محمد السنوسي بيساعد نانا منيرة في البيت، راجل نوبي لطيف ابتدا شغل عندهم واحنا في السجن. وصولنا البيت تعبته كتير لأن كل يوم يجي يزورنا حد من عيلة سعد. أخوات سعد بعائلاتهم، طنط عزيزة، وعيلة مراد، أمينة مراد وولادها ليلي وفريد وهشام، أمينة مراد كانوا اغتالوا جوزها كمال الدين صلاح، نسيب فتحي رضوان، في الصومال أثناء ما إحنا في السجن. سليمان بيه مراد هو ومراته حنيفة. بهية هانم أم كمال وجمال ونوسة، وخيرية مرات جمال أخو سعد. بهية هانم دمها خفيف تتكلم بصوت واطي وبسرعة وروح دعابة وشيء من السخرية في كل كلامها. كانوا بيشرحووا لي سكة القرابة اللي بيني وبينهم، كنت باركز وأفهم في ساعتها وبعدين أنسى، مش مهم لأن العيلة قابلتنا بحفاوة شديدة وحرارة بره حدود المجاملة وصلة القرابة الدقيقة، وكل ما يبجوا يجيبوا هدية، طبق صيني أو كريستال مليون شكولاتة من عند جروبي، والبيت اتملى بالحاجات الحلوة دي. من الناحية الثانية ابتدت العزومات، كل واحد فيهم بدوره يعمل لنا عزومة نروح لهم في بيوتهم ويعزموا معنا أبو سعد وأم سعد. أغلبهم قراب مامة سعد مش قراب أبوه. اكتشفت في العزومات دي السبانخ بقبة البيض عند بهية هانم وبقيت أطبخها كتير، والسماك بالبشامل عند أمينة مراد في الزمالك، سمك مسلوق متغطي بالبشامل والبسلة والجزر بدل المايونيز، فكرة جديدة، وكان عندها طبياخ وسفرجي ودادة صغيرة اسمها نوال لولادها. كان فيه ناس كتيرة، أنا ناسية للأسف - للأسف حقيقي - لأنني باحب أتذكر الناس .

أمي وأبويا في نفس الوقت كانوا عايزين يحتقوا بينا وبقينا نتعدى عندهم كل يوم حد وحسن فؤاد صاحب سعد ورضا مراته كانوا بيجوا معنا يتعدوا عندهم بانتظام وعملناه طقس. حسن فؤاد كان بيقول «أنا بحب الأبهات والأمهات» ويتعرف على أهل أصحابه وأهل اصحابه يحبوه كمان. حسن اتحرم من الأم، أمه ماتت وهو صغير وواضح إن أهله ما كانوا كويسين بعدها، فكبر يحب يتقرب من أمهات أصحابه بما فيهم أبويا وأمي، حسن شهد على جوازنا وكان صديق ظريف وحنين دايماً. رعاية النمر كمان جت عند أهلي كذا مرة، الغدوة عند أبويا وأمي كانت لطيفة بوجود الأصدقاء، أهلي كانوا فرحانين إننا خرجنا من السجن وان اصحابنا حوالينا وكانوا بيعملوا أكل كويس، انت عارفة، والطبق الجماهيري كان اللحم البانيه، أمي كانت شاطرة في تحميرها، أنا باجرب أظبطها على مدى السنين، يا تطلع ناشفة يا مش باتبلها كويس، اللحم البانيه اللي بتعملها أمي حاجة مخصوصة، أكالات أمي بسيطة وطعمة .

أجي أنزل الرصيف في الشارع توازني مش مضبوط، شرحوا لي «القعدة مدة طويلة في مكان محدود» اللي هو السجن. السلاالم، دوشة الشوارع، أتوبيسات، عربيات، ناس، عجل، أجي اعدي الشارع أقعد مدة طويلة واقفة، وابص من الناحية الغلط. لخبطة .

العادي مش عادي .

الوضع دا قعد شوية وبعدين اختفت الصعوبة، ما اعرفش اختفت إزاي، اكتشفت فجأة إنها اختفت .

*

بعد عشرة أيام أو أسبوعين من العزائم والاجتماعيات في يوم سمعنا تخييط على باب بيت الدقي، بوليس .

- ترحيل .

كان عشية العيد، أظن العيد الكبير، عيد الخروف، صدمة كبيرة ليّ وللبيت كله .

سعد بقى يروح وييجي في البيت بعصبية، حيثجنن مش عارف يعمل إيه .

- ما تخافيش، حطلك، حاشوف، حاتصرف، ما تخافيش، يكون عندك ثقة فيّ .

حاجات من النوع دا .

وخلاص، خدوني وودوني القسم وخطوني في زنزانة لوحدي، زنزانة صغيرة بابها حديد . سعد جه ورانا على طول يشوف حبيبتوني فين ومشي، بعد ساعة أو ساعتين جه محمد السنوسي ودخل عندي في الزنزانة بنفسه جايب لي شوية أكل وملابس وسجادة صغيرة من سجاجيد البيت ومبيد . البيات في الأوضة دي كان وحش جدّا، أنا عندي خبرة بالمبيد اللي اسمه «دي دي تي»، الواحد يرش دايرن دايرن الفرش علشان البق والحشرات يبعدوا عنه وهو نايم، والحقيقة الأوضة كانت مليانة صراصير، بالذات في ركن من الأركان، يمكن ركن الكابينيه .

مش فاكرة قوي .

بيّت حزينة، وعمالة افكر، «guasta festa» - آخر عكنة . طول الليل يفتحوا باب الزنزانة الكبيرة، ويدخلوا حرامية ودعارة، والشاويشية يزققوا . مش عارفة عدّي عليّ يوم ولا اتنين ولا ثلاثة في المكان دا، في الآخر وودوني سجن القناطر تاني . لمحت «ميمي» و«مارسيل» من بعيد، شاوروا لي ما قدروش يقربوا، ما حطونيش معاهم، أنا كنت فاهمة إن حاقعد معاهم، كان نفسي، بس خطوني لوحدي، لأن انا مش محكوم عليّ . مجموعة معتقلات أول يناير اللي شفتهم وهم اصلين كانوا لسه في العنبر وبرضه مش مسموح لي اتصل بيهم .

عزلوني .

ما كنتش متأهلة للمعانة دي .

قعدت لوحدي مش عارفة قد إيه، وبعدين جم نادوا عليّ وودوني وزارة الداخلية .

دخلوني أوضة لقيت فيها ظابط على مكتب وأربع رجالة قاعدين حوايه، شكلهم أجنب .

وسعد .

أول ما ظهرت قام باسني، حطوا لي كرسي قدام مكتب الطباط قصاد سعد .

واحد من الأجانب كبير شوية شعره أبيض ووشه أحمر سويسري أو بلجيكي، قام من جنب الطباط وجه يقعد بيني أنا وسعد .

الطباط قال لي :

- هيه! يا «ماري روزنتال»، إنت عايزة تسافري تروحي فين؟

- أنا عاوزة اسافر؟ أنا مش عاوزة اسافر !

- ضروري تختاري لك بلد، حنرحلك من مصر ما تقدرش تقعدى .

- معنديش بلد أروح له .

و ابتديت أحس بقلبي ينسحب شوية بشوية .

- مفيش كلام من دا، الناس دول من الصليب الأحمر، حيساعدوك تسافري وتلاقي حتة ترتاحى .

فأظن سعد تدخل .

- مش ممكن، مش معقول، هي مصرية، دي مراتي، حتروح فين ولمين؟

أنا كررت نفس الكلام، لكن الطباط كان شاب صغير، وتعرفي الطباط لما بيقوا شباب عندهم كدا نشاط وحيوية، مبسوط من نفسه كأنه بيعمل مهمة حلوة، لكن أنا كلامه دخل في زي المطوة .

ما كنتش مصدقة إن دا ممكن يحصل .

- أبويا وأمي هنا، معنديش أي جنسية غير الجنسية المصرية .

- لا ما عندكيش الجنسية المصرية .

وسعد يقول له :

- لأ هي مصرية .

كلام كدا بالطريقة دي والناس الأجانب بيتكلموا بين بعض .

في وقت ما شفت سواد قدام عينيا، مفيش نَفَس، ما اعرفش لو قفلت عنياً بس بطلت أسمع أي صوت، حسيت إن حيغمي عليّ. فضلت أقول لنفسي «شديّ حيلك، إوعي تقعي، إوعي يغمي عليك». سامعة سعد من بعيد بيناقش ويزعق مع الظابط. الراجل الأجنبي اللي جنبي يظهر حس إن انا تعبانة فاتقرب قوي مني وقال :

- ما تخافيش، مش حتسافري، هو بيقول كدا، مش من حقه، مش حنخليك تسافري .

كلامه دا خلّاني أنتعش تاني، ورجعت اقول وأرد بالفرنساوي بقى :

- أبويا وامي هنا، ساكنين هنا .

- أبويا مولود في مصر .

- أنا مولودة هنا ومعنديش جواز سفر أصلاً، عمري ما خرجت من مصر .

- معنديش حد في أي حطة .

- متجوزة، وجوزي مصري .

وسعد كمان حاول يتكلم بالفرنساوي بتاعه، شفت الأجانب بيشاوروا للظابط بما معناه «دي حالة ميؤوس منها، ما تقدروش تسفروها» فالظابط - حسيت كدا - ابتدى يتترفز ويبص لكل واحد يمين وشمال وفي الآخر بص لي :

- يعني إيه؟ مفيش فائدة فيك؟

- الله؟ فائدة في إيه؟ أعمل لك إيه؟ دا وضعي .

قلت دا بالعربي، مش بالفرنساوي .

- كدا؟ طب خلاص .

ونادى على العساكر :

- خدوها، خلاص .

يا دوبك لحقت أسلم على سعد .

- ما تخافيش، حنعمل المستحيل، مش حيحصل، شدي حيلك .

والراجل الفرنسي قال بالفرنساوي :

- حتقدي هنا، مش حيقدرنا يسفروك .

والظابط قال :

- حتسافري، حتقضي في السجن لغاية ما نرحلك .

مشيت نص مينة، المجهود العصبي اللي عملته في التلت أو النص الساعة اللي قعدتهم مع الناس دي كان فوق احتمالي. ورغم إنهم طمنوني، طمنوني كثير جداً، أهه برضه رجعت السجن .

جزء كبير من سعادتي بالإفراج بعد خمس سنين السجن كان سببها إني لغاية آخر لحظة كنت قلقانة لو حاخرج على البيت ولا حيرحلوني زي «لي ديان» . كانوا بيرحلوا كل الخواجات اللي في السجن، يطلعوا من السجن على المركب أو الطائرة . النقطة الوحيدة اللي واقفة في صفي هي إن معنديش جنسية تانية. معنديش جنسية أجنبية، ومكتوب في شهادة ميلادي إني مصرية، ما كنتش عندي حتى پاسبور في الوقت دا، الوثيقة الكبيرة أيامها كانت شهادة الميلاد. فلما أفرج عني وخرجت فعلاً من وزارة الداخلية مع سعد وروحنا البيت وبقت الناس تيجي تهنينا وننام في البيت ونصحى في البيت ونخرج ونروح تاني، إفتكرت إن خلاص، أمان، كانت فترة حلوة وجميلة جداً .

سعد خلى فتحي رضوان يتدخل، كان وزير في الوقت دا، طلب منه يكلم جمال عبد الناصر نفسه .

ما قدرتش اتقرب من «ميمي» و«مارسيل» أو من معتقلات العنبر بتوع 1959، أغلب الوقت كنت لوحدي، يظهر كنت حالة خاصة. شفت سعد بطرس، زميلة شيوعية من أيام أمال عبد النور وكان حصل بينا ود كبير، حضناً بعض وحبينا بعض تاني، كانت مفاجأة جميلة، كانت تاني مرة سجن بالنسبة لسعد، بس المرة دي ما كانتش عندنا فرصة نتكلم، مقابلات ربع ساعة بالكثير وبعد كدا يفصلونا. أمال كانت خرجت، اترحلت واستقرت في باريس .

- ممنوع يا شيوعية .

أرجع مكاني وسعاد ترجع مكانها .

«لفكي» و«ماري غازيس» اللي هي «ماري بابادوبولو»، شفتهم من ضمن معتقلات العنبر، الاتنين من أصل يوناني واللاتنين من مصر الجديدة، لو كان فيه فرصة كانوا بيقضوها مع «ميمي كانيل»، واضح إنهم كانوا اشتغلوا مع بعض قبل ما يتقبض عليهم، وغالباً دي كانت خلية مصر الجديدة . دا فكرني إن لما جابونا أنا و«ميمي» قبل الحكم وفؤاد منير اتعرف على ميمي وما عرفنيش، خواجاية واسمي «ماري» لكن ما عرفنيش واتحكم عليّ بخمس سنين مع إن «ماري» و«لفكي» واضح هم اللي كانوا بيشتغلوا مع «ميمي» قبل القبض علينا. «ماري» اسمها «ماري»، و«لفكي» اسمها الحركي «ماري». يمكن فؤاد منير كان بيدور على واحدة منهم؟ «ميمي» عمرها ما حكيت لي على

نشاطها قبل الحكم، وعمرها ما قالت لي منير كان متوقع يشوف مين، هل ممكن هي كانت عارفة منير بيدور على مين؟ ما اعرفش لحد النهاردا الحكم أخذته على أساس إيه، كانت محاكمة عسكرية وما كانش فيه محامي وانا ما اتحققش معايا .

ابتديت افكر إن مش مطبوظ إنني لسه ما اعرفش أخذت الحكم دا ليه، وإيه علاقة «لفكي» و«ماري غازيس» بـ«ميمي» والقضية. دي كانت أيام السرية، وباسم السرية حاجات كتير كانت بتحصل، لدرجة إنني ما سألتش حتى نفسي .

ما سألتش نفسي إلا دلوقت واحنا بنتكلم وانا بافتكر واحكي لك .

«لفكي» كان عندها بنت صغيرة، اضطرت تسيبها مع امها وحمايتها. التعذيب اللي كانت متعذباها «لفكي» دي يا عيني ما اقدرش أوصفه لك. الأوحش من البعد إن بعد كام شهر جابوا بنتها السجن تزورها عيلة عندها سنتين وما عرفتش امها. بنت «لفكي» ما عرفتهاش . أنا شفت منظر «لفكي» وبنتها من شباك زنزانتني، «لفكي» بتحاول تتكلم مع البنت، كانت حتتجنن. مدير سجن القناطر ومأمور سجن النساء كانوا كويسين، سمحوا لها تشوف بنتها مع إنها على ذمة التحقيق وممنوع عليها الزيارة. كل ما الوقت بيضت كل ما باكتشف تفاصيل إنسانية كانوا بيضتوها ويغمضوا عينهم عليها. عباس قطب وحسن الكردي .

*

زيارات سعد ابتدت تتأخر وتقل .

- باعمل الإجراءات والاتصالات علشان تخرجي في أقرب وقت .

وبعدين يمشي ويغيب مدة طويلة، وأبويا وأمي بطلوا ييجوا خالص، وبعدين سعد جه أخيراً وجاب لي مأكولات وشوية حاجات وبيطمّني، لكن أنا حاسة إنه مش مطبوظ، مهموم، مشي وغاب تاني، فابتديت أقلق بصحيح إن فيه أخبار وحشة خاصة بالترحيل ومش عايز يقولها لي .

أتاري بينما أنا في السجن على وشك يرحلوني، أبويا انتهى به الأمر إن مش قادر يقف على رجليه، جاله عرق النساء، عصب بيبتدي من الهانش أسفل الظهر لغاية نص الفخدة من ورا. يقدر يقعد ما يتحركش، أول ما يدوس على حطة معينة من مفصل الحوض وهو واقف بيبتدي الوجع، يروح الشغل مش قادر يقف، مش قادر يشتغل، ودي مصيبة. خد مسكنات ولكن الألم زاد وفي الآخر الدكتور عثمان سرور متخصص جراحة مخ وأعصاب، بروفييسور وأستاذ كبير في كلية الطب قال :

- لازم تعمل جراحة، فيه تكلس بين الفقرات بيدوس على العصب، مفيش طريقة غير إننا نفتح بين الفقرات .

أبوياء دخل مستشفى العجوزة علشان يعمل العملية، وكانت عملية نادرة في الوقت دا فكانوا قلقانيين
يطلع من العملية مشلول، وأمى لوحدها ما تعرفش تتصرف لأن «برتو» أخويا كان في إيطاليا. اللي
وقف جنب أمى في المحنة دي كانوا «فيليا» و«أوفيديو» اللي أمى كانت كتبت لهم جوابات حبهم
وجوزتهم أيام الحرب العالمية الثانية، وكان فيه سعد طبعًا وأبوه وأمّه. يظهر سعد وقف وقفة كويسة

أبوياء عمل العملية والعملية نجحت، والدكتور سرور قال لابوياء :

- مسافر مؤتمر و النائب بتاعي حيتابع - مبروك - كله تمام .

وابتدا أبوياء يمشي كويس، ولكن الأوجاع رجعت المرة دي في مكان العملية في ضهره، الوجة بيزيد
وبعدين ما بقاش فيه مسكن نافع ووصل لدرجة إن كان يبصرخ ويتسمع صوته لغاية تحت في
الشارع .

كل الأحداث دي أنا ما حضرتهاش، «فيليا» و«أوفيديو» حكوا لي بعد ما خرجت إنهم كانوا
متصورين إن الراجل دا حيموت. سعد كان يعرف دكتور اسمه أحمد عكاشة من أيام مستشفى
السجن، فطلب منه يدخل في الموضوع ويستشير الدكاترة مع سعد، وتوصلوا إلى إن حصل تلوث
في الجرح، تلوث جوه عضم العمود الفقري أدى إلى التهاب في أعصاب العمود الفقري، ألم فظيع.
واقعين في مشكلة وحيلوها إزاي؟ أمى بتعيط والعيلة بتعيط والجيران بيعيطوا، كلهم حكوا لي إن
سعد لعب دور البطل في الموضوع دا: من الأول لآخر شال المسؤولية بين الدكاترة واتخاذ القرار
يتعمل إيه ولا إيه. توصل للدكتور المهيري، أظن أحمد المهيري، اللي عمل عدد من الاختبارات
وحدد نوع التلوث وعمل المصل المخصوص المضاد للتلوث دا. أبوياء كان متوقع يقعد في المستشفى
أسبوع يعمل عملية عرق النسا وبروح البيت، قضى شهرين أو ثلاثة، تكلفة مادية كمان، بس الحمد
لله أبوياء كان دايمًا راجل عاقل عنده احتياطي، مش يبصرف كل الفلوس، وساعتها كان بيشتغل في
«النمرو»، اللي هي الوحدة البحرية الأمريكية للأبحاث الطبية، ووضعهم كان معقول فقدروا يغطوا
المصاريف. نقدر نقول إن المهيري أنقذ أبوياء، أبوياء حب المهيري دا بلا حدود، وفضل يروح يزوره
واستمر يشوفه لغاية ما أبوياء اضطر يسافر ويسيب مصر. طلع دا السبب إن سعد مش بيبجي
يزورني وما بيدينيش أخبار وكان مرتبك لما بيزورني أصل معدوش أخبار كويسة، أنا عشت قلق
كبير وأنا مستتية في السجن .

في النهاية أبوياء خف ورجع البيت وأنا أفرجوا عني ورجعت البيت .

قالوا لي ببساطة :

- خلاص حطلي ولازم تعلمي الإقامة .

كانت رابع مرة أطلع من السجن وفي موضوع الترحيل دا قعدت 7 أشهر .

عملت الإقامة فعلاً وكان لازم أجددها كل سنة. يوسف حلمي كان لسه موجود وأقنعني بقى أعمل طلب رسمي للجنسية المصرية كزوجة وتولى هو القضية كمحامي. قبل كذا كنت بارفض فكرة طلب الجنسية كزوجة، كنت عاوزة أقول «دا من حقي»، أنا عاوزة الجنسية المصرية اللي طلبتها لما كان عندي واحد وعشرين سنة على أساس الحق، أبويا مولود في مصر وأنا مولودة في مصر. طبعاً الطلب اللي «على أساس الحق» ما ردوش عليه، وبعد خمس سنين في السجن فعلاً لسه عاوزين يرحلوني، فاستسلمت وقدمت للحصول على الجنسية المصرية كزوجة ونسيت الطلب الأولاني، ودخلنا في متاهات تانية من مشاكل الحياة في مصر بعد السجن ونسيت الموضوع، وعشت بالإقامة .

*

خلاص؟ لا مش خلاص، بعد الإفراج حطونا تحت المراقبة لمدة خمس سنين: يفوت علينا يومياً ظابط أو شاويش بعد الساعة سبعة مساء يتأكد إن احنا الاتنين موجودين ما رحناش بعيد - مش عارفة متصورين حنروح فين . دا كان بيحط شيء من القيود علينا، لأن معناه إننا ما نقدرش نساfer يومين اسكندرية مثلاً ولا نتأخر بالليل . ومرة في الأسبوع نروح بنفسنا، كل يوم سبت أول ما نصحى نلبس وننزل، نجري على القسم قبل الساعة 8 ص، ميعاد مزعج، أسبوع ورا أسبوع نصحى نلبس ونمشي بالخطوة السريعة في الشارع الحلو اللي فيه قصر البدر اوي، شارع بولس حنا، وقسم الدقي كان على راس شارع فيني قصاد كوبري الجلاء، كان اسمه كوبري بديعة. المراقبة اليومية تيجي بعد الساعة 7، إحنا نتواجد قبل المغرب في البيت، لكن ملهمش ميعاد محدد ممكن بعد الغروب على طول وممكن واحدة أو 2 الصبح، يضرب الجرس نقوم أنا وسعد نص نايمين كذا نفتح له، يبص لنا ويكتب عنده في الدفتر وينزل. المهم إن على المغرب كنت تلاقينا دايمًا بنجري ودايمًا متأخرين وعلى آخر لحظة ناخذ تخريمة من ناحية بيت شاهين نعدي في خرابة وبعدين نفتح البوابة الصغيرة لجنيانة الجيران نتسحب قدام بيتهم علشان ما نزعجهمش. التخريمة دي كانت بتختصر عشر دقائق من المشوار. ما كانش لسه الدنيا اتزحمت عربيات والشوارع الجانبية من شارع التحرير كانت مهجورة. في يوم واحنا بنجري - كالعادة - شفنا عربية واحدة بس في الشارع، فولكس خنفسة راكنة قدام العمارة الوحيدة، نزل منها واحد :

- يا سعد يا سعد .

طلع يوسف إدريس ورجاء مراته، أتاريهم ساكنين جنبنا على طول في رابع دور، سلمنا عليهم قوي بس مستعجلين مفيش وقت نشرح إيه الحكاية، مش قادرين نقف ندرش :

- نشوفك بعدين، ناخذ تلفون، إحنا لازم نروح البيت بسرعة .

- إنتو ساكنين فين؟ رايعين فين؟

فشاورنا على البيت، يوسف ابتسم وقال :

- طيب باي باي نتكلم بعدين .

سبناه وجرينا. بعدها بسنين يوسف إدريس مَوْتنا من الضحك وهو بيحكي للناس المقابلة الأولانية دي، كان حكاة موهوب :

- واقف قدام باب بيتنا ولقيت اتنين بيجروا وبصيت كدا لقيت: «الله؟ دا سعد» ناديت عليه: «يا سعد إزيك؟». لكن سعد مستعجل عايز يسبيني: «كويس كويس اشوفك مرة ثانية». «طب ساكن فين؟». قال لي: «هنا». بابص على «هنا» دا الخرابة المهجورة اللي قدام بيتي وسكة سد. «باي باي». «سلام». «سلام». بيجروا هو و«ماري» ما وقفوش، دخلوا الخرابة فعلاً واختفوا. أنا ساعتها قلت لنفسني: «يا خبر ابيض يا سعد دا انت ما اتغيرتش خالص، حتى لما اقابلك بالصدفة الأليقك بتتسلل انت ومراتك في الخرابة».

جه الصيف وعايزين نصيف، أبويا وأمي رايعين اسكندرية لمدة أسبوع، انتهننا فرصة نروح نقضي يوم معاهم ما نقدرش نقعد أكثر من يوم بسبب الرقابة. أهلي بيحبوا يصيفوا، مُدبّرِين يحوشوا ويروحوا «السويس كوتدج» أو «الهرميتاج» ولو إن أظن «الهرميتاج» لوكاندة غالية فوق طاقتهم. عملنا خطة، واحد صاحب سعد مش فاكدة اسمه، تخين وطويل قال :

- أنا مسافر بعد نص الليل علشان السكك تكون فاضية، أسوق بحريتي، أوصل اسكندرية الفجر، أنام ساعة ساعتين، أقضي مشاويري في اسكندرية وارجع بعد الظهر .

اتفقنا بيحي ياخدنا بعد المراقبة، وأكدنا عليه إن ثاني يوم لازم نكون في الدقي قبل المغرب. السكة كانت طويلة، ما كانش الطريق الصحراوي اتعمل لسه وانا كبس عليّ النوم ورا في العربية وسببت سعد يجامل صاحبه. رحنا عند أبويا وأمي في الفندق قضينا الصبح واتغدينا معاهم، ومشينا على طول على أساس نوصل الدقي قبل شلويش المراقبة. يومها بالذات عسكري المراقبة وصل بدري، والله ما اتأخرناش بس حظنا إنه جه قبلينا، لقينا أم سعد في استقبالنا في حالة ذعر وعصبية :

- إنتو فين؟ دول جم وحيعلوا لكم محضر واطرجتهم وقلت لهم إنكم على وصول .

لسه راجعين تعبانين ومكسلين نزل نروح القسم علشان نثبت إننا رجعنا خايفين يصمموا يعملوا محضر، المحاضر دي عيبها إنها ممكن تطول مدة المراقبة. بس الحمد لله واحنا لسه بنفكر نعمل إيه، الشلويش كتر خير هـ. يظهر نانا صعبت عليه - جه ثاني وسجل «موجودين» والحكاية فاتت .

عدد كبير من اصحابنا اتقبض عليهم في قبضة 1959 قبل ما نخرج على طول، حسن فؤاد وكمال عبد الحليم وأخوه إبراهيم عبد الحليم أبو نادية مرات رشدي أبو الحسن وغيرهم، فما كانش لاقين اصحاب وما بنشوفش حد ومحططين تحت المراقبة، ما كانش متضايقين، فانت مدة فرحانين بالحرية، بس بعد شوية ابتدينا نحس بالوحدة والتوهان. في يوم ماشيين في ميدان باب اللوق، الميدان المستطيل اللي بين ميدان التحرير وميدان عابدين، ترومايات كثير وما كانش لسه عملوا كوبري المشاة، تعدية الشارع كانت صعبة، 3 أو 4 ترومايات في نفس الوقت، واحد يقف والتاني يتحرك.

كنا ماشيين على الرصيف وشاب سبقنا، أنا شبهت عليه بس ما عرفتوش، وسعد ما كانش منتبه، بعد كام متر الشاب دا بص لورا تاني وفجأة وقف وقال :

- سعد! سعد !

سعد بص له :

- ووووه .

كان عبد المنعم القصاص، الرسام عبد المنعم القصاص ما كناش شفنا حد بره السجن، يحضنا ونحضنه وقعدنا نصوت احنا الثلاثة في الشارع، بنتتط من الفرحة، وفي ساعتها أخذنا على بيته. عرفنا على مراته أمينة شفيق، نقابية شيوعية، أختها بهيرة بعد كدا اتجوزت عز الدين - أخو سعد - وأختها سهير مرات «ألبيير أرييه» الصديق الأول والوحيد من أيام منظمة الطلاب، اللي أنقذني من الوحدة بعد السجن الأول سنة 1950. القصاص كان بيشتغل في «الأهرام»، بيرسم في الصفحة الأخيرة، ابتدينا نشوف القصاص بانتظام، يا بيجي، يا احنا نروح عنده، يحضروا قعدة بسرعة في بيتهم، شاطر ينزل يجيب جينة وعيش وبسطرمة وزتون ونقعد ونجيب حاجة نشربها، عادة يراندي، ونتقابل بدري علشان نروح للمراقبة. ابتدوا يدونا الأخبار، حكو لنا إن أول يناير سنة 1959، قبل الإفراج عننا بشهرين حصلت حملة قبض كبيرة على التقدميين والشيوعيين. أظن أمينة كانت حامل لما اتعرفنا عليهم وبعد كدا ولدت حسن، الولد كان لذيذ وجميل وعينيه زرق لكن كان يشبه الصينيين، أنا في الأول ما كنتش واخدة بالي بس فهمت بعد كدا مأساة أمينة وعبد المنعم، ابنهم الأول حسن كان مصاب بمرض ببسموه «مونجول». العلاقة مع عبد المنعم وأمينة استمرت بحرارة، تبوننا في فترة كان عندنا زي انعدام وزن وأغلب أصحابنا معتقلين أو لسه في السجن بيخلصوا أحكام. تاني واحد قابلناه كان عبد الغني أبو العينين، برضه مصادفة وقعد يحضنا في الشارع، وأصر ياخذنا فوراً عنده في المرسم نواحي القلعة .

- ضروري ضروري تيجوا معايا .

ورحنا معاه. حنة كلها بيوت أرابسك، الفنانين بيحبوا البيوت القديمة والمشربيات، فيه سلالم لأول دور ودور أرضي، أظن نفس المرسم كان بيستخدمه جمال كامل لما كان بيرسمني، وكنعان وغيرهم، أعتقد جمال كامل كان معتقل ساعتها. صاحبة البيت اللي مأجرة لأبو العينين المرسم راحت جابت لنا كباب وخرطة جينة بيضة، أكلنا جينة بيضة مع عيش وكباب. العلاقة مع أبو العينين رجعت، أبو العينين اتعرف على رعاية النمر عندنا في البيت واتجوزوا على إيدينا. قابلنا كمان محمود توفيق وسهير مراته، محمود كان بيحضر يفتح مكتب محامي، كان مقتنع بشغلانة المحاماة مش زي سعد، سعد بيصعب عليه الناس أو يتضايق منهم، عنده صعوبة إنه يتجاوب مع متطلبات المهنة .

أحمد كامل مرسي كان مخرج معروف بدقته وإن شغله في السينما نضيف ومتقن، نعرفه من أيام «أنصار السلام» قبل ما يتقبض علينا، و«ميمي كانيل» استخبت عنده في البيت لما جت من فرنسا

في السر. كان عارف إنها في السرية، وضايفها عنده مدة طويلة لغاية ما لقوا لها مكان ثاني. «ميمي» حكّت لنا في السجن إنها كانت محرّجة منه علشان مُصر يتكفل بكل مصاريف إقامتها عنده حتى مصاريف المكوجي مثلاً، كفاية المجازفة اللي واخدها. بعد ما خرجنا من السجن «أ.ك.م.» تبنّانا أنا وسعد - اسمه كدا، «أ.ك.م.» - يعزّمنّا بانتظام عنده في البيت في الدور الخامس بيطل على ميدان المساحة، بيت صغير على قده بالضبط - ما كانتش متجوز. سألني :

- إنت تعرفي طلياني كويس؟

قلت :

- طبعاً .

- طب تعالي، عندي شغلانة علشانك .

كان اعتزل الإخراج وتخصص يعمل دوبلاج عربي للأفلام الأجنبية، وكان شغّال على فيلم روسي، «الدون الهادي»، ممثلين الدوبلاج محمود مرسي، شاب صغير، وسميحة... اسمها إيه مرات سعد وهبة؟ أيوه، سميحة أيوب، شابة صغيرة هي كمان، سمرا وطويلة. رحنا الاستوديو معاه الصبح وبقينا نروح معاه كل يوم، كنا فاضيين خالص، وأنا كان عندي فضول أتابع عملية الدبلجة والترجمة. طلع حتة تعب الدوبلاج دا، الممثلين يعيدوا نفس الجملة ميت مرة. نقعد في الاستوديو طول النهار ونتغدى معاهم أنا وسعد، لغاية قبل المغرب ونمشي نلحق المراقبة. جه دور الحوارات اللي بالطلياني، كان فيه مشهد في وسط الفيلم، سمعت وفهمت وقلت وترجمت، وهو كتب ورايا والممثلين دبلجوا. كان فيه مشهد في بداية الفيلم صوت إذاعة أو تلفزيون في الخلفية، كررها لي كذا مرة، وأنا مش مفسرة، في النهاية استسلم وقال طيب معلش خلاص، مش عارفة اتصرفوا إزاي بعد ما أنا فشلت، بس هي ما كانتش مترجمة أصلاً بالإنجليزي ولا بالروسي، يمكن مش مقصود تتفهم؟ «أ.ك.م.» إدّاني عشرة جنيه وانا خارجة، ساعتها كان مبلغ، يمكن يقضونا شهر، وكانت أول فلوس أكسبها بعد السجن .

استمرت الحياة كدا مدة، تمر أيام من غير ما نشوف حد .

عشنا مع أبو وأم سعد في البيت من غير موارد تقريباً خالص. نقابة المحامين صرفت لسعد إعانة خمسين جنيه، كثير وممكن تقضي شهرين تلاتة، ميزانية البيت أكل ومعيشة كانت 22 جنيه 50 جنيه كان المفروض نقعد معانا لحد ما سعد يلاقي شغل. فكرنا وناقشنا يرجع للمحاماة ولا لأ، بس سعد كان واضح «مش عاوز أشتغل محامي»، عايز يشتغل صحفي، وراح جرنال «الأخبار» واتقدم وقالوا له «فوت علينا بكرة». سعد حكى لي إن المسؤول عن شؤون التعيينات في «أخبار اليوم» كان ظابط - أعتقد جوز ميرفت التلاوي - وأظن من المنيا وما بيحبش الشيوعيين وكان عامل صعوبات لسعد، ويأجله، يشوف حياخدوه ولا مش حياخدوه. سعد كان محرر قديم من سنة 1945، كان عمل تحقيق ونشر يوميات هروب حسين توفيق وكانت سبق صحفي ناجح جداً فمصطفى أمين عينّه بـ35 جنيه في الشهر، وسعد بيقدم عاوز يرجع الجرنال يبقى محرر سنة 1959 بعد 5 سنين

في السجن، لقي الظابط دا ببقاومه ويكلمه بتعالى وهو ظابط ما يفهمش حاجة في الصحافة. حالة الجيش في البلد كانت على آخرها، ماسكين كل حاجة. سألت سعد مؤخرًا لقيته ناسي اسم الظابط السئيل دا. في النهاية سعد اتعيّن واتحددت ماهيته بحوالي 25 جنيه في الشهر، زعل واعتبر إنهم حطوا من قدره وعاملوه كمبتدئ، وكان رأيه إن الماهية المفروض تكون في حدود 100 جنيه في الشهر ويعينوه على درجة أعلى أو مساوية لدرجته في 1945. شرح لي وهو متضايق وأعتقد إن كان عنده حق، بالتأكيد لو اللي بيعينه متعاطف أو على الأقل متفهم، مش معادي، كان حط في اعتباره الفترة اللي بابا اشتغلها قبل السجن والفترة اللي قضاها في السجن، معاملة الظابط دا بتعكس نفور، ولكن بالتأكيد كمان إن 20 - 25 جنيه كان أحسن من بلاش. كانت فترة اعتقالات وكان فيه أحداث العراق والجراید عندنا كانت شديدة الهجوم على الشيوعيين، وموسى صبري كان بيكتب ضد الشيوعيين كل يوم، وسعد بيحاول يكتب من البيت، بيروح الجرنال ساعات وساعات لأ .

*

فترة بعد السجن ملخبطة في ذهني لأنها فترة معاناة من كل ناحية، فترة مؤلمة لأن ظروف الشيوعيين كانت وحشة في البلد. مفيش عندنا فلوس كفاية لأي متطلبات ومش واضح حنعيش إزاي وحيجيلنا فلوس تاني منين. معظم الأصدقاء والزملاء في السجن وعائلاتهم كانت بتلجأ لنا على أساس إحنا خرجنا وممكن نساعد. ما كانش عندنا إمكانية نساعد. إحنا كنا تايهين خالص. أفنكر زيارة عطيات مرات إبراهيم عبد الحليم، اتقبض عليه وأولاده أمل ونادية ومخلص لسه صغيرين، وسعد الشيوعي الوحيد من المجموعة دي اللي بره السجن. جت عطيات تزورنا وكان لقاء مؤلم، كانت حزينه واحنا كانت حالتنا وحشة، ما عرفناش نساعد بعض، ومشيت، بصيت عليها من البلكونة لقيتها بتعيّط، مش قادرة أنسى عطيات والموقف دا. وبعد كذا جت رضا مرات حسن فؤاد وكانت مقابلة صعبة برضه. أنا من ناحيتي ما كنتش عارفة أعمل إيه، ولا كنت باشتغل ولا عندي فلوس على جنب ولا أهلي عندهم فلوس زيادة علشان يدونا وكمان ما اعرفش أشتغل إيه، معنديش حرفة معينة .

الفترة دي طوّلت .

لقاءات عبد المنعم القصاص وأبو العينين من وقت لآخر كانت لطيفة، بتخفف عنا، لكن الحالة كانت ضيقة قوي. سعد كان متقبل الوضع دا كجزء من صعوبات موقفنا السياسي .

تاني يوم سعد جه بدري المستشفى ومعاه محمود توفيق .

- إزيك يا «ماري» عاملة إيه؟

- كويسة .

مُصرّة لا يمكن اشتكي من الوجع .

وقعدوا الاتنين كل واحد فيهم على كرسي، سعد من ناحية ومحمود من الناحية الثانية وانا في السرير بينهم، وابتدوا يتكلموا يتكلموا بمنتهى الجدية كأني مش موجودة، بعد شوية وقفوا كلام وقالوا لي :

- أصل إمبراح وانت بتولدي، حصل الانفصال، الانفصال مع سوريا .

كنا عايشين مرحلة «من الموسكي لسوق الحميدية» ، أغاني واحتفالات بالوحدة، وبقينا بلد واحد. فترة أمل رغم إن كنا مترقبين ومش لاقين شغل وأغلب الشيوعيين في المعتقل، لكن كان فيه شيء من الانفراجة في التوقعات. فاليوم دا حصل نوع من الـ «standby» - ترقب - قلق، الحكاية مش ماشية زي ما كنا متصورين إلى الأحسن أو إلى شيء من الاستقرار. سعد ومحمود فضلوا يتكلموا ويتناقشوا من خلالي لغاية الساعة واحدة الظهر، كنت شوية أتوجع، شوية أتعب وانعس منهم، وشوية أفوق فيسألوني :

- عايزة حاجة يا «ماري» ؟

- لا، كويسة، مفيش حاجة .

ويرجعوا يتكلموا .

سعد اتعرّف على ثروت عكاشة وزير الثقافة وهو في السجن .

القصة دي ابتدت لما نقلوا الشيوعيين الرجالة لسجن الواحات، سجن الواحات سجن صعب بعيد في صحراء الواحات في منطقة اسمها المحاريق، محكي عنه في مذكرات عدد من المسجونين. واضح إن صعوبة سجن المحاريق ولدت أجمل ذكريات الزمالة، لكنه سجن قاسي وأهالي المسجونين كانوا بيسعوا لإيجاد واسطة طبية تنقل ولادهم لمستشفى في القاهرة، المساجين ياخدوا نَفْسهم والأهل

يزورونهم. زملاء سعد، محمد الجندي وشريف حتاتة انتقلوا المستشفى في القاهرة وانتهزوا فرصة وهربوا، شريف حتاتة حكى القصة دي بالتفصيل في مذكراته. أخو عم أنور جوز طنط عزيزة كان دكتور وحاول يتوسط، وسعد مراد من ناحيته سعى عند قرابيه في الشرقية، و عرفوا يجيبوا سعد من الواحات ويدخلوه مستشفى الدمرداش للعلاج في قسم أمراض نفسية، ودي ميزة لأن التفتيش الطبي على الأمراض النفسية صعب يحدد إن كان العيان خف ولا لسه، وممكن بسهولة يمدوا له يقعد فترة أطول .

دكتور شاب لسه راجع من لندن كان بيمر على العيانيين، د. أحمد عكاشة، عدى على مريض مقبوض عليه وحاطين حراسة على باب أوضته - سعد. فترة الشباب مليانة رغبة في المعرفة واستكشاف الأمور وعكاشة حس بفضول وأصبح يبجي لسعد بانتظام ويزوره علشان يتناقش ويتكلم معاه. أقدر أقول إن أحمد عكاشة وسعد حبوا بعض. بيدو إن أحمد حكى لأخوه - ثروت - عن سعد، ثروت عكاشة كان وزير الثقافة في الوقت دا، وجه يزور سعد في المستشفى. غالباً - في اعتقادي الشخصي - إنه لازم استأذن من جمال عبد الناصر قبل ما يزور «مسجون سياسي من الشيوعيين في مستشفى الدمرداش وخاله يبقى الوزير فتحي رضوان». ثروت جه لسعد في المستشفى، اتكلموا واتفقوا إن سعد يكتب أفكاره واقتراحاته لإنعاش وزارة الثقافة ويبعت التقرير عن طريق أحمد أخوه .

بعد السجن العلاقة استمرت مع أحمد عكاشة واتعرفنا على «جنيفر» مراته، ثروت عكاشة استمر يستشير سعد، وسعد كان حاضر الذهن في موضوع الثقافة ويمكن كان اكتسب شيء من الخبرة السياسية، اقتراحاته كانت متعلقة فيها خليط من الأفكار الجديدة وإدراك للأوضاع، يعني اشتغل مستشار للوزير، غير رسمي وغير معترف به وغير مدفوع الأجر. فترة وحشة وبعد مدة طويلة من غير شغل والتعيين الوحيد اللي كان جه في «الأخبار» بحوالي عشرين جنيه وما كانوش كفاية. ثروت عكاشة كل شوية يجيب لسعد شغلانة، جابه كسكرتير فني مساعد له بشكل مؤقت ما قدرش يعينه أو يثبتته، لكن في الشغلانة القصيرة دي سعد قابل نجيب محفوظ ودي حاجة أسعدته. بعدها ثروت جاب سعد نائب رئيس تحرير مجلة اسمها «نهضة أفريقيا» بتطلع من وزارة الثقافة، يحل محل مديرها - عبد العزيز إسحق - مؤقتاً لأنه كان طالع رحلة طويلة. عبد العزيز إسحق كان زي مندوب الحكومة في أفريقيا، لدرجة لما حصل الانقلاب ضد نكروما في غانا، بعنوه يساعد على تهريب فتحية مرات نكروما وولاده - سامية وجمال - لمصر، بس لما سمع إن ثروت عكاشة حط سعد كامل مكانه في «نهضة أفريقيا» عبد العزيز إسحق جالنا على طول البيت علشان يقول لسعد :

- بص، إنت تخليّ المجلة بين الحياة والموت، ما تعملش حركات كثير وتنعشها وتبقى مجلة مشهورة لاحسن الوزارة أو جهة حكومية ثانية تطمع فيها وتأخذها، في نفس الوقت ما تخليهاش تموت ومقالاتها ممتلئة زيادة، لأن في الحالة دي ممكن يقفلوها .

سعد ما سمعش الكلام، أفريقيا أيامها كانت مليانة حياة وأحداث، راح مغير الغلاف وعمل تجديدات في الأبواب، وسعد لما بينشط ويتحمس بيبقى شاطر ويعرف يشرك الناس في الشغل والناس ينبسطوا ويتعاونوا . لقي حسين عبد الرزاق بيشتغل في المجلة هو ومراته فريدة النقاش، صغيرين ورفيعين ونشطين، ما كانوش لسه أصبحوا من قيادات اليسار. سعد كان بيمدح في وحيد النقاش أخو

فريدة وقال عليه أشطر صحفي في المجلة بس للأسف وحيد اتوفى صغير . الشباب دا بقى يبجي يجتمع هنا في البيت مع سعد ويشتغلوا جامد. اتحمسوا للشغل لدرجة إن عبد العزيز إسحق أول ما رجع مصر دخل في خناقة مباشرة مع سعد وطرده بره المجلة .

بعد «نهضة أفريقيا» ثروت عكاشة عيّن سعد مسؤول عن الجريدة السينمائية، شريط أخبار بيتعرض في السينمات قبل الفيلم. جاب سعد لأن الجريدة كانت مملة، كلها لقطات مسؤولين ببسلموا على بعض بالإيد ويقصوا شرايط، كان عايز يحسن النوعية، وسعد كان عنده رؤية وأفكار واشتغل على طول وابتدى يدّي أوامر للمجموعة اللي بتصور، يهتموا بيايه، يروحوا فين ويجيبوا خبر إيه ومنين علشان يكون فيه حركة ومضمون، التغييرات اشتغلت ونجحت على طول. سعد نفذ عدد أو اثنين من الجريدة وراح لقي المسؤول القديم - واحد مشهور نسيته اسمه - رمى مكتب سعد على بسطة السلم وقفل المقر بالمفتاح، ومنع فريق التصوير من الاتصال به، رماه في الشارع، ببساطة كدا، وثروت عكاشة ما قدرش يعمل حاجة، ما نفعش يتدخل، مش عارفة ليه .

من ناحيتي حاولت أشتغل في محل أدوات رياضية اسمه «بيت الرياضة» في شارع شريف باشا جنب عمارة اللواء، صاحبه واحد اسمه مرزوق، صديق سعد. رحنا على أساس أقف أبيع من الساعة عشرة للساعة اتنين بعد الظهر واكسب شوية فلوس تساعدنا. البيع والبضاعة كانوا تحت على الشارع مباشرة، وفيه «mezzanine» - دور صناعي - فيه مكتب للمدير واثنتين موظفين للأرشيف والحسابات بيحوا الساعة ثمانية الصباح، أنا كنت باوصل الساعة عشرة واعرّف مرزوق صاحب المحل شخصياً، بيكلمني ويدردش معايا، الموظفين دخلوا في خناقات معايا على حاجات مش مفهومة، ما استحملونيش، حسيت إن لازم أسيب. معارف سعد من أيام فتحي رضوان و«الحزب الوطني» كانوا سعداء إن سعد خرج من السجن ورجع للمجتمع، اتصلوا به وصاحبوه ثاني على طول وحاولوا يساعده. واحد من الأصحاب راجل لطيف، عنده شركة استيراد وتصدير، أصلاً ظابط، عرض عليّ شغل، اشتغلت شوية معاه لوحدي، بس لما الشغل ابتدى يزيد جاب موظفين صغيرين وشطار، اتضايقوا من الطريقة المريحة اللي أنا باشتغل بيها وبرضه اضطررت أسيب الشغل. يظهر بتحصل حالة غيرة ونفور عند الموظفين لأن عندي لغات واعرّف المدير واعرّف معارف المدير يقدمني لهم واقعد معاهم، ما اقعدش مع الموظفين، بيحسوا لو ما تخلصوش مني حابقي الرئيسة، وأنا ما كانش عندي الطاقة إن أفرض نفسي كرئيسة .

في مسابقة للأفلام التسجيلية توفيق صالح اشترك بفيلم «مليم الأكبر»، سعد شاف الفيلم انبسط منه ورشحه للجائزة الأولى لثروت عكاشة، ورشحه لإخراج ثلاثية نجيب محفوظ. سعد ما كانش يعرف توفيق صالح لكن بيرشح بنقّة وثروت بيتق فيه وبيأخذ بترشيحه وترشيحاته تحقق نجاح، مثلاً سعد اللي اقترح مصطفى درويش كركيب على المصنفات وعلي الراعي في المسرح وأبو العينين في الفرقة القومية وراجي عنايت لمسرح العرايس وحسن فؤاد في الأفلام التسجيلية ومحمود توفيق في الإنتاج السينمائي. كان يعرف الفنانين والمتقّين ويفهم إمكانياتهم، لامهم حواليه، كان عنده الموهبة دي، موهبة فهم إمكانيات المتقّين ودورهم في المجتمع، وما كانش بيّفكر في أي حاجة تانية من أيام السجن. بيحوا له البيت هنا أو ياخذهم يقصوا كام يوم في الفيوم في عزبة جدو كامل، حسن فؤاد رسم عم عبد الله وشخصية محمود المليجي في فيلم الأرض قصة عبد الرحمن الشرقاوي مستوحاة

منه، وأبو العينين رسم كذا منظر للعزبة والفلاحين منهم لوحة جميلة متعلقة في بيت ليلى بنت بهاء، وحسن فؤاد كذلك. صلاح جاهين سأل الفلاحين «إزاي القطر ما بيقفش في سيلا مع إن فيها محطة؟» وكتب في «صباح الخير» وإدارة الفيوم استجابت لمقالته، ومن ساعتها ابتدا القطر يقف في سيلا. رحنا أنا وسعد نجرب القطر ونزور نانا وجدو في العزبة، بدل ما ننزل في محطة الفيوم وناخد تاكسي يوصلنا للبيت في حوالي نص ساعة أو ساعة، نفضل في القطر وننزل في سيلا، لكن المسافة قصيرة ومفيش تاكسي، أمال حنوصل العزبة ازاي؟ قالوا لي نانا بتركب الحمار، يجيبوا لها كرسي من عند ناظر المحطة، تطلع على الكرسي وبمساعدة خليل وجدو تركب على الحمار وجدو يركب الحمار الثاني وتك تك يوصلوا العزبة عن طريق نقطة الشرطة و خليل ناظر الأرض ياخدها على رجليه وراهم. نانا والعائلة متعودين من صغرهم بما فيهم سعد، فالتوازن على الحمار يبجي طبيعي. فعلا القطر وقف في سيلا ونزلنا لقينا خليل مستتينا بالحمير، أنا عمري ما ركبت حمار، صحيح أمي جاية من ريف إيطاليا لكن أنا اتولدت في القاهرة، ما شفتش حيوانات كثير وما اتعاملتش معاهم في طفولتي، فمش متعودة، وكنت خايفة اركب، خليل طمّني :

- ما تخافيش أنا حامسك كذا وتطلعي على الكرسي .

طلعت وقعدت و خليل سحب الحمار وهو بيكلّم نفسه :

- نمشي بشويش بشويش علشان الست الصغيرة (اللي هي أنا) ما تقعش .

دمه خفيف ضحكني وابتديت اتعرف على شخصيته. وصلنا قدام بيت العزبة ودخلنا من البوابة لقينا نانا وجدو طلعا على الفراندا يستقبلونا، رحت أنا اتحمست ورفعت أيدي أحبيهم فوقعت من على الحمار والقصة دي اتحكّت مليون مرة ولكل الناس، ««ماري»» وقعت من على الحمار قدام باب البيت «.

نرجع لسعد والثقافة، سعد اقترح إن وزارة الثقافة تنظم رحلة للنوبة للمتقنين والكتاب والفنانين، ياخدوا مركب على النيل ويروحوا يزوروا القرى اللي حتغرق، اللي يصور واللي يكتب ويوصف واللي يرسم. فكرة مأخوذة من مشروع «La description de l’Egypte» - «وصف مصر»، فكرة معاصرة، نوصف حاجة حتتقرض، القرى دي حتختفي. عدد كبير من الفنانين والمتقنين تحمسوا للفكرة وسجلوا اسمهم علشان يطلعوا، حسن فؤاد وأبو العينين وعبد المنعم القصاص واطن كان فيه كمان بيكار وجاذبية سري وعدد، ما أقولكيش، من المتقنين المصريين وسعد كان متولي المشروع. ما اعرفش لو الرحلة جابت نتيجة فورية، يعني مش عارفة إذا فيه أرشيف أو كتب أو صور أو مراجع، لكن كفاية إن المجموعة دي أتيح لها تشهد وتشوف، أكيد دا تغلغل في وعينا من خلالهم. بعد كام سنة ثروت عكاشة كوّن الفرقة القومية للفنون الشعبية، أول مدير للفرقة كان راجي عنایت وكان قبلها مدير لمسرح العرايس، وأبو العينين مصمم وخبير لملايس الفرقة، وجابوا خبير روسي اسمه «رامازان» يشرف على معهد الرقص الشعبي لأن الاتحاد السوفيتي كان عندهم فرق كثيرة للفنون الشعبية على درجة عالية من الإتقان والجمال. خدوا «رامازان» ودوه النوبة علشان يشوف الرقص هناك ويصمم من التكوينات دي رقصة نوبية للفرقة. سعد حكى لي إن «رامازان» بعد ما اتفرج شوية قال : «Et cetra et cetra» - إلخ إلخ - نفس الخطوة بتتكرر إلى ما لا نهاية،

وقال إن كل ما عليه إنه يصمم دخول وخروج الفرقة من المسرح. الفرقة تدخل المسرح ورا بعض بالخطوة النوبية والرقاصين يعملوا صفيين بعمق المسرح، راح أبو العينين عمل لهم كمام لونها أخضر واسعة زي كلوش، متبطنه ذهبي من جوه، فلما يرفعوا دراعاتهم لفوق الكمام الخضرا تتقلب أصفر. الحركة البسيطة دي أدت إن لون اللوحة على المسرح اتغير، وكانت مفاجأة بصرية بهرت الناس وصفقوا لها، واتكتب في الجرايد إن أول مرة الجمهور يصقف للملابس وللـ «costumiste» - مصمم الملابس - واتشهرت الرقصة دي واشتهر أبو العينين والملابس بتاعته. بعد كذا لسنين طويلة بعد ثروت عكاشة ممثلات يروحوا له علشان يصمم لهم ملابس للمسرح آخرهم سيمون المغنية .

كان فيه واحدة اسمها ابتهاج ماسكة الرقابة على السينما، كانوا بينتقدوها لأنها مش متابعة اللي بيحصل في الدنيا ولا اللي بيحصل في مصر، وإنها بتمنع أفلام كثيرة احتياطي، سعد اقترح مصطفى درويش وفعلاً اتشالت الست دي وجه مصطفى مدير عام الرقابة. مش عارفة إزاي كان مشهور ساعتها إنه بيحب السينما وخبير فيها بالرغم من إنه مستشار في القضاء. أنا قابلته لما اتعين مدير للرقابة في احتفال بمناسبة توليه المسؤولية الجديدة عند كامل مرسي. كامل مرسي كان جايب المرات العادية بتاعته، بقسماط طويل بالسهم، جبنة بيضا، زتون إسود وخيار، وطبعاً شرب، وفي الفترة دي الشرب كان للفرفشة في قعدات المنقنين، ما كانش لسه للسكر والاكتئاب. جت قعدتي بين وحيد النقاش اللي سعد كان حبه أيام مجلة «نهضة أفريقيا» وجنب مصطفى درويش فسألته عن شغله كنوع من المجاملة، لما فهمت إن الرقابة شغلتها تمنع أفلام وتوافق على أفلام، اهتمت وابتدينا مناقشة عن «إيه الحاجات اللي الرقيب يمنعها: حاجات سياسية؟ حاجات جنسية؟ حاجات دينية؟». في السينما العالمية كان فيه بداية انفتاح سياسي جنسي ديني، ولكن لسه ما كانش فيه مشاهد جنس زي دلوقت، ساعتها المناقشة كانت على بوسة بريئة وحب شبه أفلاطوني، يعني «جريتو جاربو» أو «إنجريد برجمان» في أوضاع تدبك الإحساس إن بعد كذا يحصل حاجة، لكن ما نشوفش على الشاشة، وكان فيه قبلة لـ «إنجريد برجمان» و«جريجوري بيك» اللقطة من بداية وضع الشفايف على الشفايف للقطع طالت أكثر من كذا ثانية على الشاشة، يوووه البوسة دي عملت مشكلة في العالم كله، بيتناقشوا «هل دي جرة ولا قلة أدب» على أساس إن لازم الواحد يكون مؤدب. فسألته مصطفى درويش :

- إزاي بنتم عملية الرقابة؟

- أنا وبعض مستشارين بنتجمع ونتفرج على الفيلم، خصوصاً الأفلام اللي بتيجي من بره، لأن كل حاجة جاية من بره مشكوك فيها، المستشارين يقولوا رأيهم، نتناقش وبعدين، لو فيه خلاف، المدير - اللي هو أنا في الحالة دي - يقول أيوه أو لا .

- إنت لوحدك؟

- أنا لوحدي .

قعدت افكر وبعد شوية قلت له :

- بس دا منصب خطير، إن انت لوحدك تقرر حاجة زي دي .

مصطفى بص لي كدا مدة طويلة في عيني وبعدين قال :

- أيوه فعلاً دي مسؤولية خطيرة .

وانا افكرت إن انتهى الحديث ساعتها على كدا، بس مصطفى ما نسيش، إنت عارفة مصطفى عنده طريقة خصوصي في الكلام كلها تهكم وسخرية، ولسنين طويلة بعد ما ساب الرقابة وطلع على المعاش كمان واحنا قاعدين مع رشدي أبو الحسن يفتكر الحكاية ويحكي إن أنا قلت له «دا منصب خطير» ويضحك. وبرضه مرة وانا باتكلم ارتكبت غلطة وقلت: «فيلم كشر بمبة» بدل «بمبة كشر»، ما تتصوريش، كل ما يشوفني يشاور عليّ ويقول: «كشر بمبة» ويضحك. نرجع لمنصب الرقيب، مصطفى درويش شخصيته ما يخافش يستقز الناس، لو أدرك معنى أو مقتنع بفكرة معدوش مانع يقولها حتى لو عارف إن حترعج ناس، ما يهموش يكسب أعداء أو ناس يكرهوه، بتاع معارك. لما عرفته ما كنتش اعرف إنه من الشيوعيين الموجودين على الساحة، عرفت بعد كدا إنه مش بس شيوعي ولكن كمان إن لما كان أصغر كان عضو «م.ش.م»، منظمة «م.ش.م» فيها طبع التحدي دا، فأول فيلم صرّح بيه كان فيلم اسمه «Blow Up» - «تكبير» - فيلم ظريف معمول بطريقة جديدة في الإخراج وفي السيناريو وفي المضمون وفي كل حاجة، بس مش دا اللي عمل هيصة في مصر، اللي عمل الهيصة هو إن البطلة «فانيسا ريديريف» بنقلع البلوزة وصدرها بيان في لقطة، مسألة إن نشوف المنظر دا على الشاشة عمل نجاح بلا حدود، اتعرض الفيلم في سينما «مترو»، وبعد أيام من بداية عرضه شارع سليمان باشا كان مليون طوابير طويلة لعمق شارع عدلي، أيوه، الطابور يلف حوالين «اكسلسيور» ويكمل جوه شارع عدلي. إحنا دخلنا بدعاوي، سعد كان بييجي له تذاكر من وزارة الثقافة لأنه في المجلس الاستشاري للوزير، وكل دا كان قطاع عام، ما كانش فيه قطاع خاص. في نفس الوقت كان فيه مجموعات في المجتمع المصري مختلفين مع أي تغيير على طول الخط، أي تقدم، أي مسايرة أو فهم لإيه اللي بيحصل خارج مصر أو جوه مصر. مش عارفة انتهت إزاي حكاية مصطفى درويش في الرقابة، طردوه ولا إيه؟ بس كانت فترة رقابة فريدة في تاريخ المثقفين في مصر، واختيار مصطفى درويش للرقابة كان ترشيح سعد .

أنا اللي اعرفه إن دا مش مضبوط، يعني مش مضبوط إن ترشيحاته تكون بالأهمية دي وما يكونش عنده شغل علني أو معترف به في مجال الثقافة، بس هو دا اللي كان متاح. الوضع دا استمر من سنة 1959 لما خرج من السجن لغاية ما جت فترة الثقافة الجماهيرية سنة 1966 .

في الستينات كان فيه صراع بين خطين ثقافيين، خط ثروت عكاشة وخط عبد القادر حاتم. في مناقشاتنا كنا بنقول إن خط عبد القادر حاتم مش مهتم بالارتقاء بالمستوى الثقافي العام للجماهير الشعب المصري، عبد القادر حاتم عاوز يجذب الجماهير وخلص، مش مهم نوعية الأفلام والمسرحيات وكل ما يخص الثقافة، مش مهم إن تكون حاجة راقية أو جديدة، المهم تعجب الجماهير وتجذبهم وتعمل شباك، شباك السينما والمسرح بالذات. طبعاً دا خلاف سياسي في الأصل وفي تصورنا لدور وزارة الثقافة، لأن من وجهة نظرنا الشخص اللي بيتاح له تنوع ثقافي واسع مع الوقت قدرته على الاختيار تزيد وذوقه يتشكل بشكل حر، ثروت كان ييمثل التيار دا، وعبد القادر

حاتم التيار المهتم بالشباك وتسلية الجماهير وتكرار اللي الجماهير واخدة عليه فقط. أظن حصل كمان نوع من الـ «rivalité» - المنافسة الشخصية - بين ثروت وحاتم، واتفوا على وزارة الثقافة عدد من المرات فترة عبد الناصر .

في وسط الحكايات دي ابتدت الناس اللي حوالينا تلاحظ إن أنا مش حامل، وأكثرهم إلحاحًا كان محمود توفيق وسهير، كنا أصحابهم وبنخرج مع بعض بشكل عائلي بالإضافة للعلاقة السياسية التنظيمية بين سعد ومحمود .

من 1959، حوالي سنتين مش حامل، بس انا ما كنتش باخد بالي وما كنتش عاملة حساب سني ولا إن سعد ممكن يكون عنده عقبات في الإنجاب ويمكن عايزين علاج، كنت فاكرة إننا عايزين وقت، لكن لما جه السؤال من عدة نواحي، بالذات من ناحية عيلة سعد نفسه، رحنا اكتشف. لما خرجت من السجن كان عندي شوية متاعب صحية استلذمت إن اشوف كذا طبيب، أمينة شفيق ودتني عند ضياء سيف الدين نسا وولادة، وكان عندي حموضة مستمرة في معدتي فودوني لميشيل صليب واداني شوية أدوية. في الفترة دي أمينة رضوان خالة سعد أم ميمي وحمادة وإبراهيم وقاسم وفتحي وفضيلة مسك فيها سرطان الثدي، كان مرض جديد علينا. جوزها مصطفى مراد خدها على طول وراحوا لندن وعملت عملية جراحية ورجعت، لكن ما استردت قوتها ولا حيويتها، من ضمن ما كانت بتشكي شكت من معدتها فأخذتها معايا عند ميشيل صليب. دخلنا عنده وعلى طول طنط أمينة حكته له :

- أنا عملت عملية بتر ثدي علشان السرطان ولكن باحس إنني تعبانة .

وقعدت تتكلم مدة طويلة وكان مش ضروري الدكتور يكشف عليها ويعالجها وكأنه محطوط علشان يسمع شكواها، الدكتور كان ظريف بشكل مش معقول، سابها تتكلم، مش زي بعض الدكاترة، واستمع بمنتهى الاهتمام، وكل شوية يسأل سؤال، ولكن يظهر ما كانش فيه فائدة وإن المسألة كانت إنه يشجعها، بس هو كان ممتاز، كشف عليها واداه شوية أدوية وكل الكلام كان تشجيع وفعالاً طنط أمينة ما خافتش، اتفاهموا مع بعض. قعدنا عند د. ميشيل صليب مدة طويلة ولما خرجنا لقينا العيادة مليانة والناس بتبص لنا بضيق. طنط أمينة اتوفت ود. ميشيل صليب هاجر وانا الحموضة بتاعتي راحت لكن إنسانيته وهو بيسمع وبيتفهم وشجاعتها وهي بتواجه أثرت في .

المهم اللي شجعني إن عندي دكاترة باثق فيهم فرحت لـ د. ضياء سيف علشان شوية التهابات فسألته :

- بيقولوا مش باخلف .

- معلى حياخد شوية وقت، إنت حتخلفي حتخلفي المهم إنك ما تخافيش، مفيش حاجة عندك وكله طبيعي .

وَأَدَانِي شَوِيَّة تَوَجِيهَات .

بس حتى عيلته أصرُّوا إن سعد يعمل اختبار هو كمان، وما كانش عنده مانع، الحقيقة كان مستسلم، إحنا الاتنين كنا مستسلمين، مش عايزين عيال بشكل خاص ومش فلقانين ولكن بنقول «طيب، يمكن الناس عندهم خبرة أكثر مننا». راح سعد عند دكتور بتاع «andrology» - علم الذكورة - خلاه يعمل اختبارات وطلع كله مضبوط. وفعلاً عقبال ما عملنا الفحوصات دي كنت حبلت. كانت أول مرة. أيوه حبلت بيك إنتِ طبعاً أمال يعني بمين؟ بس أول مرة حصل إجهاض طبيعي، بعد شهر أو شهرين، د. ضياء سيف الدين ودَّانى المستشفى وعمل اللازم في يوم واحد وقال لى :

- ما تخافيش بيحصل كتير الجسم يطرد أول حمل زي حاجة غريبة عليه، تاني مرة حتكون أحسن .

ما فاتش وقت طويل وحبلت بيك تاني. د. ضياء سيف الدين كان متعاطف معايا بشكل! يمكن التعاطف مش الكلمة المضبوطة، أفصد كان بيكلمني زي واحدة صاحبتة ويشجعني علشان أنا أول مرة رحلت له حكيته له إن أنا خارجة من خمس سنين سجن وعندي كذا وكذا وكذا فكان بيبيص لي كدا، خمس سنين كان كتير في نظره، وفي نظري أنا كمان .

وانا حامل على آخري والدنيا حر ظهر يوسف إدريس، مراته حامل زيي وهو بيحب يصطاد سمك :

- إيه رأيكم نروح العين السخنة من الصبح بدري نقضي اليوم على البحر وقبل المغرب بشوية نروِّح، عندي شمسية وكراسي .

رحنا بعربيته الفولكس، المسافة ساعتين من القاهرة للسويس، يوسف جاب صِنارة طويلة بمكنة وكل أدوات الصيد الحديثة. ابنهم كان عنده 3-4 سنين، رفيع زي عود الكبريت، فكرني بنبيل حفيدي، حاجة كلها عضم مفيش لحمة تقريباً، الولد أول ما شاف البحر اتجنن عايز يرمي نفسه في المية، أمه حامل وصاحبة أمه - أنا - حامل، قاعدين على الكراسي، حيعوز يقعد جنبنا ليه؟ رجاء مش قادرة تلحِّق عليه وانا ثقيلة زيها ما اقدرش أجري وراه، يوسف بينصب الشمسية ويفتح الكراسي، يسيب الشمسية ويجري يشد الولد من الميه ويجيبه لأمه .

- اقعده هنا ما تتحركش .

وطبعاً مفيش فايده، الولد كان بيفلت، وسعد ما يعرفش يساعد، يقف كدا، ولا ينصب الشمسية ولا يلحق الولد، طلع مش شاطر في الحاجات العملية. المكان جميل: الشاطئ والميه وسلسلة الجبال الحمراء، مفيش حد، سيكوت تام، لولا يا عيني الولد الصغير اللي شاف البحر واتجنن. ابتدى الحر يشتد علينا، الشمس دقت على راسنا. معانا حاجات ساقعة وميه وتلج، أصل كان لازم نجيب كل شيء للعين السخنة دي، ما كانش فيها حاجة خالص، ولا حتى الكازينو اللي بيقلوا موجود دلوقت، ولا كابينهات طبعاً، منطقة بشوكها كدا. الرجالة كانوا بيتصرفوا بسهولة، لكن إحنا، سلسلة الجبال كانت بعيدة شوية، مش قريبة من الشاطئ، وعلشان تروحي وتستخبي وحامل، مشية محترمة، محتاجة شمسية صغيرة. ابن يوسف ما رضيش يسكت وكان طول الوقت في خطر، يخش البحر

ويقع ويعيط ويوسف يجيبه لأمه وشوية بشوية لما خلصنا الميه قررنا مع بعض بدون تردد إن مش
حنسنتى غروب الشمس وراء الجبال .

- يلاً نقوم .

ويوسف يا عيني ما عرفش يصطاد بالمرة، لم أجهزة الصيد ودخلها في العربية. مشينا والولد نام في
العربية، كلنا تعبانيين .

- أخويا هنا جنبنا في السويس نروح عنده نغسل وشنا ونشرب شاي .

قبل مدينة السويس فيه شركة تكرير بترول أخو يوسف بيشتغل فيها، دخلنا عليهم هو ومراته
مفرهدين خالص كأن حد بيجري ورانا وهربانين. غسلنا وشنا ودخلنا الحمام، تقريباً استحمينا
عندهم، ولما طلعا عملوا لنا شاي أخذنا نفسنا وحالتنا اتحسننت. كنا حرّانين على البحر بس مش
واخدين بالنّا إن كنا حناخذ ضربة شمس. أخو يوسف قعد معنا ودخل في حديث عن الشغل في
شركة البترول، وانا شوية اتكلم مع مراته ورجاء، وشوية أنجذب لكلام الرجالة. يوسف كان لسه
عنده طاقة مهتم يسأل في التفاصيل، كأن صحته أحسن منا. قعدت أفكر إن الحمل تعبنا أنا ورجاء
بس يوسف من سنّ سعد، أو اخر الثلاثينات، دا غير إن يوسف اللي ببسوق وحبسوق في الراجع
كمان، وبيجري ورا الولد طول النهار وهو اللي قام بكل شيء، استغربت إزاي يوسف فضل
مصصح كدا، سعد كان متابع الحديث برضه لكن من غير طاقة. يوسف مضى ساعتين يسأل
ويسأل تاني ويخلي أخوه يتكلم، وبعدين ابنه صحي وكان هادي شوية بعيد عن البحر، وانتقلت
الجملة التقليدية :

- لازم نمشي علشان سعد و«ماري» عندهم مراقبة .

سلمنا عليهم وروّحنا، كل دا والشمس لسه طالعة .

فاكراها الرحلة دي عن يوسف إدريس علشان عجّيني، لاحظت إنه بيهتم بكل حاجة حوالية، وكل
حاجة يعملها بنفسه، أعتقد الجانب دا في يوسف فكري بأبوياء، كنت أعرف يوسف من قبل كدا في
إطار مجلة «الكاتب» قبل السجن لما اتعرفت على سعد وعبد الرحمن الشرقاوي وزهدي بتاع
الكاريكاتير وطبعاً حسن فؤاد وأبو العينين وكمال عبد الحليم، لكن في رحلة السخنة أول مرة أشوفه
في إطار عائلي شخصي، حبيته وابتديت أتابعه باهتمام كأديب. لما دخلنا السجن سبناه بيدرس طب
وحيوت يكتب قصص، على بال ما طلعا من السجن كان ساب الطب أظن من غير ما يتخرج
وتخصص في الكتابة الأدبية، زي شريف حتاتة وصلاح حافظ، سابوا الطب وبقوا كتّاب. في رحلة
السخنة، يوسف كان نشر مجموعة «جمهورية فرحات» من ضمنها القصة اللي اتعمل منها فيلم «لا
وقت للحب» وصلاح جاهين اشترك في الفيلم، مشهد رشدي أباطة بطل مقاومة داخل على السويس
وفاتن حمامة حبيته بتغني مع الناس أغنية الأطفال «يا وابور يا مولع طش الفحم» بصوت عالي
علشان يحذروه من كمين للقبض عليه. وكان بيكتب في «الأهرام» صفحة بحالها، ومقالاته كانت
مؤثرة، مثلاً حصلت حادثة في السيرك، واحد من الأسود أكل المدرب بتاعه، «إزاي دا يحصل بعد

سنين علاقة بين المدرب والأسد بيعملوا سوا عروض قدام الجمهور، إزاي انتقلب فجأة على المدرب وخذ راسه». التفسير اللي كان ماشي في الجرايد كان «إنهم ما كانوا بيأكلوا الأسد كفاية، وكان جعان، ويظهر إن فيه فساد في السيرك والناس بتسرق اللحوم المخصصة لوحوش السيرك»، يوسف إدريس كتب صفحة بحالها في «الأهرام» بعنوان «أنا سلطان قانون الوجود» وقعد يتفلسف ويتقمص شخصية الأسد قبل ما يهجم على المدرب، وكان بيحس بإيه تجاه مدربه طول السنين وهو بيسمع كلامه وإزاي هجم لما حس بضعف عند المدرب، المقالة عملت هيصة وسط المتقنين علشان فيها نظرة غير عادية، علم نفس وفلسفة وسياسة، كان ابتدا يتشهر قوي .

فاتوا تسع أشهر الحمل تحت إشراف دكتور ضياء سيف الدين، بس مع حبي له ما رحتش أولد عنده، المستشفى بتاعته غالية علينا وبعيدة كمان في مصر الجديدة. مستشفى «بابايانو» اليوناني جنبنا في الدقي كانت تأمين أجنب وأصبحت تبع نقابة الصحفيين في الخمسينات، كان عندنا نوع من التأمين فيها من خلال سعد، فقررنا إن أولد هناك. كان بقالنا ثلاث سنين تحت المراقبة وما خدناش مخالفة ملتزمين، يُعتبر كان فيه حسن سير وسلوك فنزلوا الميعاد من المغرب للساعة تسعة وبعدين لـ12 بالليل، فضلوا يخففوا فيها لغاية ما اختفت من حياتي. كان عندنا ميعاد مع طنط عزيزة الساعة 9م قدام سينما «أوديون» نتفرج على فيلم. ولا كان فيه معانا عربيات ولا مع طنط عزيزة، وطنت عزيزة كانت تيجي بالأتوبيس وترجع بتاكسي بمعرفتها، كنا بنركب الأتوبيسات ما كانتش حاجة غريبة، دلوقت الناس لا يمكن تركب الأتوبيس إلا لو مضطرة. فتنا على أمي في أبو العلا نتعشى عندها قبل السينما، وانا عند أمي حسيت ببداية الولادة، تبتدي بإن ميه تنزل، رحت الحمام ولقيت نفسي غرقانة وفهمت إن الولادة ابتدت، قررت ما اقولش حاجة علشان ما ازعجش أمي وما ازعجش طنط عزيزة، كان عندي أفكار من النوع دا، إن لازم آجي على نفسي وما اتعيش الناس معايا حتى في موقف زي الولادة. قلت لسعد :

- إحنا لسه بدري، نروح نتفرج على الفيلم مع طنط عزيزة وبعد كدا نروح البيت آخذ الشنطة توصلني المستشفى وتسييني هناك. ما تصحيش حد وما تضايقش حد .

كنت محضرة شنطة في البيت جاهزة للحنة دي. ورحنا السينما فعلاً ورجعنا البيت نستنى المراقبة، بس على الساعة واحدة بعد نص الليل الشاويش ما كانش لسه جه وقررت لازم ننزل وخلص ورحنا مستشفى «بابايانو».

- مساء الخير، أنا حاولد .

- مين الدكتور بتاعك؟

- ما نعرفش .

طلع مفيش حد بيعمل كدا، الناس بتولد في مستشفى بالاتفاق مع دكتور معين، يكون متابع الحمل من قبلها بمدة. دخلوني المستشفى. كان فيه حد اداني كتاب اسمه «الولادة بدون ألم» للدكتور «فالن

هو»، قريته أثناء الحمل وفكرة إن أنا حاعرف اتحكم في الوجد بالقراية اللي قريتها في الكتاب دا، فقلت لسعد :

- إنت تروح تنام وتيجي بكرة الصبح .

و«باي باي يا سعد» «باي باي يا «ماري»» ومشى. الممرضات سابوني لوحدي في الأوضة ومشوا هم كمان. هنا بقى ابندى الألم الخفيف يشتد، باعمل حكاية التنفس دي اللي بيقلوا عليها في الكتاب، مفيش فايدة، مش جايبة نتيجة. وجع على فترات، وزاد كمان، وكمان، لما زاد كمان ضربت الجرس :

- أنا تعبانة، أكيد حاوؤد خلاص .

جابولي الحكيمة المسؤولة كشفت عليّ :

- لا دا لسه بدري، لازم يتفتح بالطلق، استحملي شوية معلش، بس يعني مفيش حد معاك؟

- لا مفيش حد معايا .

برضه سابنتي ومشيت .

الوجد استمر استمر لغاية الصبح تقريباً، ما قدرتش أنام، كان بيغمى عليّ بين الطلق والطلق لحد ما الوجد يصحيني تاني. باعمل أنواع التنفس اللي قريت عنها وأقول لنفسى «أنا شجاعة» و«أنا مش حاعمل زي الستات اللي بتصرخ» وفعلاً ما صرختش، بس اتوجعت، كان وجع فعلاً يخلي الواحد يصرخ .

جه الصبح أخيراً، الدكتور وصل المستشفى على الساعة تسعة أو عشرة، شوية أسئلة «إنت مين، اسمك إيه، جوزك اسمه إيه؟» «بعد نصف ساعة دخلوها أوضة العمليات» يعني لسه على الساعة حداشر. دخلت أوضة الولادة وبرضه ما كانتش سهلة وانت اتولدت على اتناشر ونص .

كنت بنت ونادية، ما كانش اخترعوا الكشف التلفزيوني علشان يعرفوا البنت من الولد، وارتحت أخيراً .

أول حاجة طلبتها بعد ما انت اتولدت ورجعت الأوضة، فنجان شاي وسيجارة .

طول فترة الحمل ما كانش لي نفس للسجاير ولا كنت أطيق ريحتها وباعد عن اللي بيشربها، لكن أول ما ولدت وجيت انت في الدنيا طلبت سيجارة وفنجان شاي .

سعد ونانا وأبويا وأمي وصلوا وأنا باشرب الشاي، اتصلوا بيهم وقالوا لهم، جم كلهم زعلانين إني ما قتلهمش من بالليل. في ذهني مش عايزة أزعج حد، مش عايزة اعمل زي ما بيعملوا الستات

يصرخوا لما يولدوا ويتوحَّموا كثير أثناء الحمل، «الولادة حققتها تكون إلى حدِّ ما طبيعية» وفي دا كنت متأثرة بمجلة «Noi Donne» - «نحن النساء» - الإيطالية، قرّيت إن كثير من الأبحاث بتتعمل علشان الولادة تكون بدون ألم وبشكل طبيعي، مش عملية عنيفة. العيل لما بيتولد بيبقى شكله غريب وعينه مقلولة لكن لما أبويا وأمى شافوكِ ما اقدرش أوصف لك الحماس :

- دي جميلة ووشها مدور .

الدكتور رجع لي يسألني :

- هو جوزك اسمه سعد كامل؟

- أيوه .

- بتاع «الحزب الوطني»؟

- أيوه .

- تصوّر ي إنه كان زميلي في ثانوي؟ البوليس جه بالليل يسأل عليك ويتأكدوا إن انت فعلاً هنا بتولدي! كلموني في البيت في التلفون .

طلع إن المراقبة عدوا على سعد في البيت، وسعد قال للشاويش دي في المستشفى بتولد .

- يا سلام يا سعد يا كامل! مفيش غير سعد كامل اللي مراته لما تولد يبجي البوليس يسأل عليها .

وقال لي كمان :

- بس باين عليك أجنبية .

- أبداً أنا مصرية .

- لا معلش، واحدة مصرية مش ممكن تولد من غير ما تصرخ، انت ما طلعتيش ولا صرخة واحدة .

سكت، أصل فعلاً ما كنتش طلّعت ولا صرخة واحدة، وجه في ذهني أستمر معاه بس ما شفتوش ثاني الدكتور دا. الممرضات جابوكِ «يا حلوة يا أمورة» ، الحكيمة خرمت لك ودنك وحطت لك الفتلة علشان بعد كدا نلبسك حلق وعازبة الحلاوة، وبعد الضهر جت العيلة كلها، فتحي رضوان وأبلة نفيسة وزوار كثير أصحاب وقراب يسلموا عليّ ويجيبوا هدايا وشكولاتة .

قعدت ثلاث أو أربع أيام في المستشفى اتدلّع على أمي وأقول لها نفسي في الكيكة اللي بتعملها واطلب أصناف أكل، والضيوف يججوا ويسلموا عليّ وبعدين يسيبوني ويقعدوا يتناقشوا في انفصال

سوريا عن مصر. انتهت فترة دلح المستشفى وخذتك معايا ورجعنا البيت. جم كل ولاد العيلة يتفرجوا عليك ويلعبوا معاك ولاد جميلة وجمال إخوات سعد أحمد كان لسه بيبي، محمد وليلى يا دوب سنتين تلاتة، أما لميس فكانت لطيفة سبع سنين بتحب تشيلك وتديك البيبرونة وعايزة تأكلك، ومها 10 سنين كانت زي بنتي الكبيرة اتمرنت عليها أمومة. إنت اخدت اهتمام أمي وأبوي، صعب أوصف لك قد إيه. جابوا لك أول عروسة وكان اسمها «ريرينا الجميلة»، وفسحوك ولما كنا نحتاج سعد وأنا كنا بنودّيك تباتي عندهم واحنا نخرج، كنت بأديك بيبرونة بالليل وأمي تديك بيبرونة وسط الليل لو صحيت أو الصبح. أخويا كان سافر إيطاليا خلاص وانت كنت بتنامي في سريره في أوضته، يحطوا لك مخدات من هنا ومن هنا ومن هنا علشان ما تقعيش .

أما الأحداث السياسية في الفترة دي فمش فاكراها كويس بسبب ولادتك، لما اتولدت حياتي اتغيرت، ما كنتش واعية قبل كذا إن الطفل يستوعب قوة وطاقة الأم بالطريقة دي. في يوم أبويا وأمي جم يزوروك هنا في الدقي، دخلوا علينا لقوني نص نايمة، لأ، الحقيقة إني كنت رحت في النوم، وأنت بتعيطي وأنا مستغرقة، زعلوا مني زعل. كنت بتعيطي كثير وأمي تحاول تمشي بيك وتطبب عليك علشان تسكتي، وحماتي برضه تحاول تاخذك وتلاعبك، لكن انت مش عاوزة تسكتي وأمي بتقول لي: «البننت بتعيط».

في الآخر خدناك عند الدكتور «لندي» وانت مستمرة في العياط، وأول ما شافك، من غير ما يكشف قال :

- دي جعانة !

- بس أنا بارضعها .

- وماله، ما يكفيهاش، عاوزة أكثر .

وفعلاً كنت بتعيطي وتفتحي بقك زي العصافير اللي مستنيين من ماما العصفورة توكلهم، أداني أكل إضافي بالبيرون وطببط لي المواعيد، وكان لازم أروح له كل أسبوع أو أسبوعين علشان يوزنك. طالبت بحقوقك بحسم، لو اتأخر شوية تجرّسني وتجّرسي البيت كله، كل دا بسبب الجوع - أكيد بتهضمي بسرعة - الصبح تصحيني بدري أنط من السرير أجري على المطبخ، والبيبرونة لازم تكون معقمة من الجراثيم فلازم نغليها من بالليل ونسيبها تبرد ونغلي اللبن ونسيبه لحد ما يبقى دافي لا سخن ولا ساقع، شغل كثير على الصبح، يا عيني جَوّ عناك. كان عندك ثلاث أشهر لما خدتك أول مرة للعزبة في الفيوم، هنا في القاهرة الأهل ما كانوا مبسوطين، أهلي مش عايزينك تبعدي عنهم وجميلة بتقول لجدو كامل أبوها :

- ما ينفعش نودّي الولاد العزبة وهما صغيرين كدا، مليانة دبان .

وفعلاً كان فيه دبان وناموس وبر اغيت، بالذات مع دخول الصيف، بس أنا حاولت أتغلب على الجوانب دي، رشينا وقفلنا ونشينا وغطينا الأكل. كان معانا أبو العينين، اخترع لك سرير من

كرسيين قصاد بعض وناموسية لبنى بأستك دايرن دايرن علشان نقدر نطلعك معنا بره في الفراندة .

وبقينا نروح بيك العزبة بانتظام، كنت باحب المعيشة بالطريقة دي، أصل فيه حاجات حلوة في العزبة، لكن في مرة صحيت الصبح لقيت عينيك وارمة ومقولة ومعصمة، كان عندك أقل من سنة والصيف داخل، غسلت لك عينيك بمية دافية زي أبويا ما كان بيغسل لنا، نغلي المية ونسيبها تبرد شوية وبحتة قطن نمسح العين بالراحة، وفعلاً عينيك فتحت، بس كانت حمرة من جوه، ويا دوب شوية والعماص يرجع وعينيك تقفل تاني، وبتعيطي، موجوعة. رجعنا مصر جري أنا وسعد ورحت على دكتور العيون مباشرة، ما رَوَحناش البيت، وانت ما تبطلش، عياط عياط عياط، أطبب عليك والناس متضايقه علشانك، فضلت شايلاك رايحة جاية باحاول أهديك، وأخيراً جه الدكتور شاف المنظر وهو داخل خلى التمرجي يدخلنا أول ناس .

- أنا آسفة يا دكتور على الهیصة .

- آسفة على إيه؟ البننت بتعيط لأن عينيهما بتوجعها وعندها رمد .

كشفت عليك على طول واداني دوا نُقَط ومرهم .

- ما تخافيش، تروحي البيت تحطيهما على حرك وتحطي الساعة قدامك، تقطي لها عينيهما بالقطرة وتحطي المرهم، كل عشر دقائق، طول الليل، النهاردا مفيش نوم لك .

وفي يوم واحد فعلاً، أربعة وعشرين ساعة متواصل الحمد لله قضينا على الحكاية دي، أصل الدكتور فهمني إن ممكن تحصل مضاعفات وحشة من الرمد .

ولكن ما بطلناش نروح العزبة .

دَخَلنا التلاجة الكهربا «الإيديال» اللي لسه موجودة في الصالة لحد دلوقت. عمك عز كان عنده قضية وسعد اللي مسكها له - كمحامي. عز الدين كان ركب المركب اللي اسمها «ندرة» في رحلة على النيل للقناطر مع هدى مراته، أظن بمناسبة شم النسيم، والمركب دي غرقت، حادثة فظيعة ومشهورة، وعمو عز ومراته كانوا فيها. ناس كتير ماتوا، بيقلوا إن الغاز تسرب من المركب وانتشر على وش المية، وكتير ناس بتعرف تعوم ماتوا مخنوقين. حصل نوع من الـ «panic» - هلع - وهدى ماتت، بس أنقذوا عز، اللي أصبح أرمل وهو شاب صغير. الحادثة دي حصلت وانا في السجن، بصينا لقينا أهل هدى رافعين قضية على عز عايزين ياخدوا العفش والشقة، عز الدين كان جاب حاجات لبيت الزوجية وكانوا عايزين ياخدوا منه كل حاجة. سعد كان محامي ومسك قضية أخوه، وتوصل إن الأجزاء اللي دفع تمناها ترجع له، فعز الدين دفع لسعد أقساط التلاجة كأتعاب، دي قصة التلاجة اللي عندنا لحد النهاردا وعمرها من عمرك بالظبط .

حبيبي يا حمايا، جدو كامل كان دايمًا سباق في الأجهزة، من أوائل المصريين اللي دخلوا التلفون في البيت من الأربعينات وبعدين التلاجة وبعد التلاجة طلعت التلفزيونات فقرر يجيب تلفزيون فوراً .

جِدُّو كان منظم حياته طقوس، ولكن يوم الدفع للتلفزيون قام صلى الفجر وما رجعتش ينام زي عادته، لبس وخذ الفلوس ونزل علشان يقف في الطابور من بدري ويدفع القسط الأول للقطاع العام في البنك، كانت أيام جمال عبد الناصر وكل حاجة كانت قطاع عام. رجعت حكي لنا إن كان فيه ناس نايمين قدام البنك من بالليل على الرصيف علشان ياخدوا دورهم في الطابور ولولا إنه راح من الفجر ما كانش عرف يحجز تلفزيون من أول دفعة. الله يرحمه، كان لسه عنده القدرة إن يقف ساعات مستني دوره لغاية ما رجعت لنا البيت منتصر بالوصل في إيده إنه دفع الفلوس. العدد محدود ومصر كلها عايزة تلفزيون. فتحو باب التسليم والاستلام كان بالدور، وجدُّو برضه اللي راح بنفسه وجاب الكرتونة الكبيرة بتاكسي، كنا مستنيين قدام باب الشقة، وخطوه لنا على البوفيه اللي جنب الباب، التلفزيون الأول، كبير ماركة «رافينا»، من بلد اشتراكية، أعتقد المجر، وصلوه ولعنناه واشتغل وانقرجنا على المحطة المصرية، المحطة الوحيدة المتاحة، واحنا واقفين ماحدش قعد. من ساعتها البيت اتملئ ناس ببيجوا علشان التلفزيون وأولهم أبويا وأمي. أبويا كان على علاقة طيبة مع جدُّو كامل علشان لعب الشطرنج، ولما جه التلفزيون اتصاحبوا على ماتشات الكورة، ساعتها كانوا بيذيعوا كورة كثير. أبويا زملكاوي بيحب «ألدو» الخواجة اللي لعب جون في فريق الزمالك وكان الزمالك اسمه «المختلط» علشان فيه خواجات كثير. عايزة أقول الحمد لله لأن إنت كنت بتعطي أقل لما التلفزيون دخل حياتنا، الدكتور «لندي» كان دخل صفار البيضة «à la coque»، نانا بتسميها «بييض برشت»، ولما وصلت لأربع أشهر أدخل تينة برشومي مقشرة مهروسة مع «بسكوتة ماري» أعملهم عجينة واحطها لك في بقلك تشبعك وتهديك وهم يعرفوا يتفرجوا على التلفزيون. الحقيقة أمي ما كانتش مهتمة خالص بالكورة بس عندها استعداد تيجي علشان عايزة تشرف عليك وتبشرك، بالذات بعد تشخيص الدكتور «لندي» إنني باسيبك جعانة، وبانام واسيبك تعيطي، ما كانتش مطمئة لي. سعد كمان ما كانش مهتم بالكورة بس بيحب اللمة، يتفرج من بعيد ويقول «جون» ويبتسم، ولو مفيش جون يسرح. بيتنا أصبح ملتقى ولما يكون فيه ماتش البيت ينملي، أصحاب سعد يستأذنوا بيجوا يتفرجوا، محمود توفيق بالذات ما كانش يقدر يفوت ماتش وانضم للمجموعة واتصاحب على جدُّو وأبويا، ومصطفى بيه مراد أبو حمادة وميمي بيجي وكنا نرصد كل كراسي البيت صفوف زي المسرح والكل يتابع الماتش. كنبه وأربع كراسي من مكتب فتحي رضوان اللي كانوا في الشقة بتاعتنا قبل ما يتقبض علينا، جابوا العفش دا هنا في البيت قدام التلفزيون. نانا لطيفة وحلوة وشاطرة تحب الناس، اللمة في بيتها بتسعدنا، تقدم بسكويت وكيكه وشاي وتعمل لموناتة مطبوخة طازة للضيوف، سعد اتعلم منها وبقي يعمل لموناتة هو كمان - للضيوف. في واحد من الماتشات كنت قاعدة في الصالة مديّة ضهري للتلفزيون متابعة الماتش على خفيف بالورب وانت على حجري، والتانيين حيتجننوا من التركيز، كان عندك ست سبع شهور، مش صالبة ضهرك لسه، والدنيا حر بنسيبك تقريباً عريانة وراسك مسنود على كتفي مستسلمة تستمتعي تاكلي البيضة، وانا على مهلي أحط المعلقة واستنى لغاية ما تبلي خالص قبل ما ادبك المعلقة اللي بعدها مستمتعة بهدوئك، فجأة كلهم صرخوا ونظروا دراعتهم لفوق «جوووون» فانت اتفضت في حضني وإيدي انتطرت والأكل وقع وعيطت وباطت الليلة. يحاولوا يهدوك وأنا أطبب عليك، خدتك ومشيت من الصالة وورايا حماتي وأمي وكل الستات مراتات الرجالة اللي بنتفرج على الكورة. واضح كان ماتش مهم لأن في اليوم دا كان فيه عدد من العائلات بنتفرج عندنا. أمي زعلت زعل، اتضايقت مننا «إزاي ناس كبار كدا ما يفهموش إن دي عيلة صغيرة وممكن

تتخض»، كانت بتزعل علشانك بشكل لا تتصوريه، مش قادرة تفهم إن الصرخة دي بتطلع غصب عنهم، مش قاصدين .

فيه حاجتين مش عارفة أفسرهم في نفسي، مواقف مهمة، الحاجة الأولى إن أنا ما سألتش ولا مرة عن أسرتي اليهودية اللي كانت كلها مولودة في مصر وساكنة في القاهرة. عرفت عن سفرهم كدا عالماشي، أبويا وأمي قالوا لي إنهم مشيوا «آه كلهم راحوا إسرائيل»، حتى «موسى روزنتال» الوحيد اللي حضر فرحنا أنا وسعد من عيلة أبويا، يعني كان موجود لحد 1954، هو كمان مشي ما حسنتش بيه، خدت الموضوع من غير تفكير. ما كانش عندي حساسية لموضوع الفلسطينيين وإسرائيل، وكان أنا نفسي اسمي مش «روزنتال» ومش حاسة إن لي أي علاقة أو انتماء غير لمصر ولأسرتي وللبيت دا اللي دخلت أعيش فيه وللقضية المصرية وكل المسائل الخاصة بمصر؛ جمال عبد الناصر والجيش وبناء السد العالي وتأميم القناة - اللي حصل وانا في السجن. اللي عمل لي ووعي بالفلسطينيين هي الست اللطيفة في سجن الأجانب سنة تسعة وأربعين - اللي بتعمل سندوتشات الموز لجوزها - وآمال عبد النور اللي قضيت معاها سنين في السجن. اكتشفت منهم مسألة الهروب، فيه ناس بني آدمين بيتهجروا بالعافية من فلسطين. بس حتى آمال عبد النور لما حكنا لنا إزاي هربت ووصلت مصر هي وأسرتها وانضمت للشيوخيين المصريين واتقبض عليها كشيوعية وبعدين اترحلت كفلسطينية، ما كانش بنتناقش في الصهيونية والقضية الفلسطينية، الموضوع دا كان مفروغ منه، المناقشات اللي كانت بيننا كانت حول الشيوعية وإيه اللي يعتبر الخط السليم في الشيوعية، خط «الحزب الشيوعي المصري» و«م.ش.م»، ولا منظمة «حدثو». منظمة «م.ش.م» كانت دايماً بتتهم «حدثو» بالترهل وإن معندهاش «العرق» أو «العصب» الشيوعي. مسألة إني ما انشغلتنش بعائلتي من ناحية أبويا محيراني بصحيح، على أي حال سنة واحد وستين ولعدد من السنوات لقدام، يعني المرحلة اللي باحكيها حالياً، الموضوع دا ما كانش لسه دخل ولا عندنا في الأسرة ولا في السهرة وسط اصحابنا كموضوع للنقاش والقلق. دا موضوع حار كز عليه بعدين، مش مكانه هنا لأنني ما فكرتنش فيه غير مؤخرًا .

الحاجة الثانية اللي حيرتني في نفسي هي أنا أي نوع من الأمهات، ودا في صميم انشغالي في الفترة اللي باحكيها دلوقت .

أنا خلفتك، وأول ما خلفتك حسيت بالقيود .

العلاقة بيني وبين سعد اتغيرت شوية بشوية، لقيت نفسي معديش الإمكانية ومش ممكن استمر في حياتي العامة مع سعد، حتى الحياة الخاصة معاه، لقيته مش قادر يستحمل إنك بتعطي بالليل وتصحيه فراح ينام على الكنب، أيوه، نفس الكنب اللي بقت سريرك لما كبرت، وحالياً أنا اللي بانام عليها. حصل شيء من الانفصال بيننا، حتى الود الوجداني أصبح له مفهوم مختلف . المفاجأة كمان إن أمي وحماتي وقفوا ضدي، صورة الأمومة عندهم إن الأم لازم، إلى حد ما ضروري، تضحي، مش ممكن تكون الأمومة طيبة وجيدة بدون كمية كبيرة من التضحية بالرغبات والتطلعات الشخصية للأم. مش بس كدا، كمان أمي هي اللي كانت ورايا ورايا في الحكاية دي حتى أكثر من

حماتي، ما كانتش مبسوطه أبدًا إنني عايزة أشارك سعد في كل حاجة، الخروجات والاهتمامات والنشاطات، وإنني باتضايق لما اتحرم منها. وسعد زي ما قلت ما كانش متفاهم، كان بيحرّضني، ما كانش قاصد حاجة وحشة، بس كان بيحرّضني إن اعتمد على أمي، واطلب من حماتي - أمه - إن تاخذ بالها منك لما تصحي وتديك البيبيرون علشان أخرج معاه بالليل ونروح المسرح مثلاً. بس مين يستحمل الحاجات دي لحد ما تكبري وتتكلمي؟ سعد ما كانش عايز يشارك خالص، لو تفتكري مثلاً رحلة النوبة الهائلة، بالنسبة لي دي كانت من المواقف اللي ما انبسطش منها. أنا حكيت المقابلات اللي من هنا والقعدات اللي من هناك وحضورى اللقاءات السياسية والفنية من موسيقى ومسرح ومن ضمنها أوبريت سيد درويش، بس تيجي لرحلة زي رحلة النوبة، أنا خلاص عندي عيّل فما اقدرش أروح، مش بس كدا، مش معزومة كمان. القصة دي ضايقتني، إن الرحلة دي تطلع وأنا مش معاهم. سعد أخذني في دوكة، دخل البيت جايب معاه أصحابه حسن فؤاد على أبو العينين على ما اعرفش مين قالوا لي حيطلعوا النوبة خلاص و «by the way» - على الماشي كدا سعد رايح معاهم، كأن حاجة بسيطة، سعد عمل شنطته طاخ، طاخ، وطاخ، وهوب! مشيوا، أنا إتضايقت بشكل، بس فاتت، حاعمل إيه؟ كان فيه رحلة تانية اتعملت للبحر الأحمر علشان يشوفوا الشعب المرجانية، بيعملوا نوع من الحصر لثروات مصر. برّضه ما رحنّش وسعد راح، دي تاني رحلة ما انبسطش منها خصوصًا إن بعد ما رجعوا عرفت إن مرات أحمد حمروش، فوزية، كانت موجودة ويوسف إدريس ومراته رجاء، أعتقد رضا ما راحتش علشان بتشتغل ومعهدهاش أجازات، بس يعني كان ممكن أروح، أنا ما سألتش سعد لو كنت أقدر آجي ولا لأ باعتبار إن مفيش زوجات، زي في رحلة النوبة. ما عرضش عليّ أصلاً، ولما رجعوا طلع كلام كثير عن يوسف إدريس يظهر قعد يبصبص لسنات أو بنات صغيرين على المركب، فمراته عرفت واتخانقت معاه. معظم الرجالة قالوا «آه طبعًا ما يصحّش يوسف إدريس يعمل كدا ولكن هل يليق بمراته إن تقضحه بالطريقة دي؟ ما يصحّش». الرجالة كانوا كلهم ضدها، أنا في قلبي كنت باقول «جدعة والله اللي عملت كدا» أصل العَملة تستاهل، بس ما دخلتّش في المناقشة علشان ما حضرتش الواقعة. وعلى أي حال ما كانش فيه فائدة علشان يوسف استمر في العيب دا لغاية آخر حياته بالرغم من كل مميزاته.

في نفس الوقت ما كنتش مبسوطه إننا نسيبك لحماتي، علشان انت لما كنت بتصحي في وسط الليل، كنت بتصحي معيطة ومش فاهمة إن العياط حاجة مؤلمة للكبار، بيبي، وبتطالبي بحقوقك ببساطة، جعانة أو عطشانة أو مبلولة، الوسيلة بتاعتك إنك تصرخي، دي طريقة الطلب عند العيال. نانا، حماتي كانت فاهمة وبتكرّر لي :

- ما تقلقيش لما حنتكلم حنتقى أحسن .

لكن لما اسبيك معاهما أرجع لأقايك مسهّراها، مش عارفة ولا تنام ولا تنيمك، وساعات تظهر لي ضيق :

- بتعيّط مش راضية تسكت .

وتحاول تفهمني إن ما يصحّش أخرج واسهر بالليل مع سعد واسبيك. أمي وحماتي، الاتنين متوقعين سعد يكمل يخرج وأنا أقعد في البيت بيك، دا كان التسلسل الطبيعي بالنسبة لهم .

دولت كانت بنتجوز حليم طوسون ولسه ما خلفوش، لكن معظم أصحابنا، ديزي وبهاء وشويكار وراجي عندهم عيال. ديزي كانت بتشتغل من أن لآخر وفي نفس الوقت ست بيت وزوجة لأحمد بهاء الدين اللي كان رئيس تحرير «آخر ساعة» بعد ما ساب «صباح الخير» و«روز اليوسف»، طول الوقت عندها ضيوف في البيت، وضيوف من بره مصر كمان. من الأول مهتمة بالاجتماعيات وواعية بالمشكلة وعارفة إن لازم يكون فيه دادة تسهر مع العيال، كان معاها ليلي بس ساعتها، الدادة تودّيها الجنيينة وتفسحها، مش ضروري هي اللي تاخذ بالها من ليلي طول الوقت. دا كان غير متوفر لي عملياً .

طول فترة السجن كانت بتجيلي مجلة «نحن النساء» هدية. من سنة 1954 لغاية سنة 1959 وانا باتابع الحركة النسائية في إيطاليا عن طريق المجلة دي. الفكرة المنتشرة في إيطاليا هي إن المرأة تكون أم، والدارج إنها تضحى، مش بس لولادها، لأ، تضحى من أجل أعضاء العيلة والزوج أولهم طبعاً، تتابعه وتتفهم إنه بيرجع من الشغل تعبان فلازم تضحى من سكات من غير ما ياخذ باله. زي عندينا. ابتدت الحركة النسائية تتكلم عن مسألة إن المرأة بتشتغل في البيت تكنس وتتصف وتاخذ بالها من العيال وتدير البيت، ويأكدوا إن ربة البيت بتكون تعبانة هي كمان آخر النهار، وراها أشغال كتير. ابتدوا يعملوا تقييم للمبلغ اللي الزوج كان حيدفعه لو شخص غريب اللي حينجز خدمات الأسرة نظير مرتب، وابتدوا يتكلموا في ماهية لربات البيوت! عضوات الحركة النسائية حاولوا يعملوا عملية مونتاج كبيرة في صورة المرأة عند المجتمع. حسبوا المرأة بتوفر للدولة ساعات عمل بكذا مليار ليرة علشان لما أبوها وأمها يمرضوا مين ياخذ باله منهم؟ خدمة مجانية إن تاخدي بالك من كبار السن ومن متاعبهم، والرعاية المطلوبة من الابنة مش من الابن، فيه أبناء بيرعوا أهاليهم لكن المجتمع بيفرض الخدمة دي على البنت. مش قادرة أفنكر كل حاجة، بس بيحاولوا يشرحوا إزاي حتى لو كانت المرأة زوجة وربة بيت متقانية، دا مش معناه تضحى بالتسلية والخروج، زي السينما أو المسرح، ولا لازم تضحى بالثقافة زي قراية الكتب من أجل خاطر خدمة الأسرة كلها، الأم بني آدم مش بس أم. بالإضافة إلى إن الأمهات أنواع، ومش كل أم اتخلفت علشان العيال الكثير. الدولة والكنيسة من ناحيتهم استمروا في السياسة الإعلامية اللي بتروج وتؤكد إن المرأة تكون مطيعة وتقوم بكل الأعمال المنزلية وما تضحيش بالأسرة من أجل وظيفة خارج البيت أو كسب فلوس. أنا كنت باتأثر بالكلام دا، لما خلفتك ما كنتش بافكر في المقالات دي بس افكرتها لما اصطدمت بموقف أمي وحماتي وسعد، وفعلاً لقيت نفسي عبدة مش بس للطلبات الطبيعية للطفلة، ولكن عبدة كمان للعقلية اللي حولي، وأمي أولهم، مش مبسوطة مني وبتحاول تغطي على أخطائي بإن تعمل هي الحاجة بدالي .

كان قدامي نموذج محبوب للأمومة لكن مش بيبعبر عني: جميلة أخت سعد، طنطك جميلة. جميلة ست متعلمة وخريجة جامعة وجوزها علي الراعي دكتور في الأدب وحيبقى مع الوقت من أعمدة النقد في المسرح والأدب العربي. جميلة اشتغلت في مجلة اسمها «مجلة الزمان» أو «جريدة الزمان» وبعد كذا صحفية في «دار الهلال» وصديقات جميلة وعلي كلهم خريجات جامعة وبيشتغلوا في الإذاعة أو في الصحافة، واحدة منهم تماضر توفيق، يمكن كلها أسماء ستات معروفة لجيلنا، بالرغم من كذا جميلة كانت بتخاف على ولادها وما تسيبهمش، ما تديهمش أي مساحة يعملوا حاجة من نفسهم. مرة راحت تصيّف بأولادها في بورسعيد مع طنط أمينة رضوان قبل ما تتوفي

بالسرطان، ومعاهم نانا وجدو، أجروا شاليهين على البحر، جميلة وطنط أمينة يلبسوا مايوه وبرنس ويروحووا يقعدوا على الشط وينزلوا المية. لما رجعوا طنط أمينة وصفت لنا جميلة :

- تمسك ولادها الثلاثة من هنا ومن هنا ومن هنا وتمشي بيهم زي الفرخة وكتاكيتهما، ما تطلعهمش من تحت جناحاتها أبداً .

ضحكتنا كلنا لأنه تشبيهه مطبوط ودمه خفيف، طنط أمينة «character» - شخصية قوية - معروفة بملاحظاتها الساخرة، كانت تترياً على نهم سعد وهو بياكل البطيخ :

- في بقه حته وفي إيده الشمال حته تانية وإيده اليمين في الطبق وعينه على حته رابعة .

بس أنا لفت نظري تعليقها على جميلة والصدى عندي إني مش عايزة أكون أم مش قادرة أطلع عيالي من تحت جناحاتي .

كان عندي عيل واحد وجميلة كان عندها ثلاثة، وكان لازم تلتحق عليهم طبعاً، مش سهل، وكان فيه صعوبة إيجاد خدم، في الأول كان عندها شابة اسمها سكينه بتعمل كل حاجة في البيت، تكنس وتنظف وتطبخ، وتأخذ بالها من العيال أثناء ما جميلة تروح الشغل ثلاث أو أربع ساعات الصباحية وترجع، وانا كانت بتساعد جميلة كثير، تروح لها تأخذ بالها من البيت ومن العيال، لكن سكينه في وقت اتجوزت، وأصبحت مشكلة. جربت أنا كمان أجيب حد يساعدي بس مش سهل الواحد يلاقي حد يعتمد عليه. كنت معجبة بقدرة جميلة على التوفيق بين الحاجات، والإصرار على التوفيق بين صورة الأم اللي عايزاها لنفسها وشغلها ونشاطاتها، بس دي ما كانتش صورة الأم اللي أنا عايزاها نفسي .

أما طنط عزيزة خالة سعد فكانت شابة لما جوزها مات وبقت أرملة، ما كانتش جابت عيال ورفضت تتجوز تاني، فلعبت دور أمومة ما لعبوش حد في حياة الناس اللي حوالها بذكاءها وحنانها وخفة دماغها. علشان ما تحسش بالوحدة أخوها فتحي رضوان خلاها تشتترك في جمعية درية شفيق، وهي اللي خدنتي عند درية شفيق في أول علاقتي بسعد في أوائل الخمسينات، قالت لي «تعالى معايا». كانت عضوة في جمعية «La Femme Nouvelle» - «جمعية المرأة الجديدة» - وبتروح تحضر نشاطاتهم. هدى شعراوي رائدة تحرر المرأة في مصر كانت ماتت ودرية شفيق ممكن نقول كانت الاستمرارية، تشجع المرأة على الخروج من عقلية الحريم وتدعمها في التعليم والاندماج في المجتمع. مجلة درية شفيق كانت بتنادي بضرورة التعليم العالي للبنات وضرورة اهتمام المرأة بالثقافة، عيب المجلة إنها كانت بالفرنساوي. طنط عزيزة كانت عايزة تعمل مقابلة صحفية مع درية شفيق خدنتي معاها وقدمتني لها ولعدد من الستات في الجمعية. درية ست شيك، رفيعة، طويلة، سمراء إلى حد ما، الحاجة اللي بتميزها كانت حواجبها، حواجب بيبضوية تطلع لفوق قوي وتنزل لتحت قوي، كأنها مستغربة على طول. ست ملفتة للنظر، لما تشوفها ما تقدرش تقولي «ست عادية»، ما اعرفش ممكن نوصفها بابه، يمكن «ست غريبة» أقرب وصف. كانت بتعمل اجتماعات وقعدات مع ستات المجتمع - اللي زوجة فلان واللي زوجة علان - كلهم زوجات وكلهم شيك وفيه واحد بيحيي يخدم عليهم: سباتس، لموناتة، عصاير طازة أو شاي وقهوة، لسه ما كنش ظهر السفن

أب والنسكافيه ويمكن ولا حتى كوكاكولا، وعلى ترابيزة في ركن من الأركان بتيفور وساليزون. دي كانت المرة الوحيدة في حياتي اللي شفت درية شفيق شخصياً، غير كدا أعرفها من الصور في المجلات. حاولت أتابع واسمع يقولوا إيه، وإلى حد ما مجموعة الستات دي ما كانتش بتشجعني أتكلم أو أقول رأيي، كلهم كبار شوية في السن، والكلام اللي قالته درية شفيق كلام عام إن التعليم مهم للمرأة وإن مش لازم تتوقف عند مستوى القرآنية والكتابية والابتدائية ومحو الأمية وفك الخط، ومش لازم نحصر تفكيرها في الزواج، وكلام عن أهمية التعليم لكرامتها واستقلاليتها وجابت أمثلة على ستات اتعلموا وهكذا بالشكل دا على طول. أدتني نسخة من مجلتها اللي بالفرنساوي. أنا حكمت عليهم إنهم برجوازيين، ليه؟ ما هو أنا في 1951 كنت لسه طالعة من السجن، وكنت طالعة من مجموعة الشيوعيين ومقتنعة إن فيه حاجات كتيرة برجوازية من ضمنها التعليم العالي. مش أنا كنت المفروض أسافر إيطاليا واكمّل تعليمي وأقنعوني إن «دي حاجات برجوازية الإنسان بيعملها بس علشان يترقى في المكانة الاجتماعية، إنما إحنا الشيوعيين يهنا نكافح من أجل الشعب كله وارتفاع مستوى المعيشة عند كل الناس»؟ فحكمت عليهم إنهم برجوازيين وما أثاروش في كثير ساعتها، الكلام دا قبل ما تتولدي بعشر سنين، باحكي القصة دي في سياق سؤال نوع الأم اللي عايزة أكونه، وطنط عريضة كان ليها تأثير كبير عليّ لكن الستات دول ما أثاروش إعجابي .

في العزبة لقيت موضوع الأمومة معقد أكثر كمان بالنسبة للستات، سواء بالنسبة للتعليم ولأ الحياة العائلية أو العلاقة بالأطفال. أول واحدة اتعرفت عليها كانت زينب مرات خليل، تيجي تساعد نانا في البيت والعلاقة بينهم كانت لطيفة، ملححة تعرف تتكلم وعندها شخصية، شاطرة تتعلم بسرعة ونانا علمتها تعمل الفول المدمس. زينب ما خلفتش، وخليل مع ذكاؤه وطيبته وأمانته وأخلاقه وخفة دمّه ما يتصورش إن العيب ممكن يكون من عنده. بعد سنة أو سنتين قال «أنا حاجوز واحدة تانية علشان أخلف» واتجوز زينب التانية، اللي انت تعرفيها وبيتا وبينها عشرة عمر. خليل جاب زينب التانية عنده في البيت، كانت أصغر من زينب الأولى في السن. زينب الأولى اتضايقت وبقت عصبية، وابتدت تتخانق، وتيجي عند نانا وتشتكي. أنا كنت في غاية الضيق من القصة دي، ولو كنت أقول أي كلمة استياء من تصرف خليل نانا تقول لي :

- همّ كدا عند الفلاحين، متعودين على كدا .

لكن الحقيقة إن زينب الأولى ما كانتش متعودة على كدا، وما رضيتش تتعود، ودا بالرغم إن ما كانش فيه قانون يديها حق تختار الطلاق لو جوزها اتجوز عليها. زينب الأولى سابت البيت وروّحت لأهلها نواحي معوض. زينب التانية كانت ساكتة وهادية، مطيعة وتستحمل، وابتدت نانا تعلمها واتعودنا عليها وحبيناها وحبيناها، لكن زينب التانية برضه ما بتخلفش. ابتدينا نتكلم بين بعض إن يمكن لازم خليل يكشف، بس خليل مش ممكن يكشف ولا كانوا يستجروا يكلموه في الموضوع. وبعد مرور سنتين تلاتة، خليل قال «فيه بنت حلوة في سيلا، عينها قد كدا وضايفرها تخينة نازلة على ضهرها لحد هنا، حاجوزها علشان أخلف» وابتدت أزمة مع زينب التانية، بتعيط مش بتخانق زي الأولى، لكن تيجي برضه تشتكي لنانا، ونانا موقفها «مفيش فايده، مسألة إن مفيش خلفه بتقع الناس إن من حق الرجال يتجوز عليها». خليل خطب فعلاً البنت التالثة، وكان حبيبها البيت لكن قبل الفرح وهي ماشية جنب بابور الجاز النار مسكت في طرف الجلابية النايلون وولعت واطحقت

ومانت. يووووه، مأساة وحادثة كبيرة وحشة وعزا. انتهى الأمر إن خلاص مفيش جوازة تالته
وخليل زعلان، في نفس الوقت سمعنا إن زينب الأولى اتجوزت ثاني وخلفت ثلاث عيال، فيمكن دا
كان - مش عارفة أقول إزاي - يمكن فهم إن فيه حاجة من عنده مش في مراتاته. ما اتجوزش تالت
أبدأ، عيي وابندا يحس بضعف ومش قادر يتحرك بسهولة .

قصة حزينة وانا كنت باحب خليل، مفيش زيه صحيح، شخصية نادرة، ما اكررتش. لكن كنت
متضايقه من طريقة معاملته لمراتاته، إن كانت زينب الثانية ولا الأولى، «قومي يا بت» «روحي يا
بت» «بس يا بت» فيه إمارة في طريقته. كان كريم ومضياف، أي حد من اصحابنا أو من الفلاحين
فايت لازم يقف عند خليل «اعلمي شاي يا بت»، وسمعت زينب بنتشكي لنانا - ولا يمكن اشتكت لي
أنا - «معدوش فلوس وراح اشترى راديو»، كريم مع الناس لكن مش منتظم جوه بيته، اشتكيت
لسعد :

- إحنا بنحبه ومبسوطين منه، لكن هو كزوج مش كويس .

- كلهم كدا، دي طريقتهم .

طريقتهم إزاي وزينب الأولى سابته والثانية بنتشكي، والثالثة مسكينة مانت محروقة؟ لكن المجتمع
شاييف إنهم واخدين على كدا .

في عيلة سعد ومجتمع طنط عزيزة الواسع كان فيه ابتعاد واضح عن تعدد الزوجات مع تكريس
للجواز والحالة العائلية للبنات، وعلاقة الست بالطفل . البنات تتجوز «مش وهي جاهلة، لازم تكون
متعلمة علشان تعرف تربّي الأولاد بشكل متقدم وسليم»، الجواز والأمومة، دا الجو اللي أنا أخذته
بشكل عام من مجتمع طنط عزيزة، وطنط عزيزة كانت بتعرف ناس كثيرة .

أصحاب سعد اللي اتعرفت عليهم وبقوا أصحابي، عائلات عائلات، رضا وحسن فؤاد، رضا كانت
بتشغل بس عيلة متماسكة، وكان في واحد اسمه علي الدالي صحفي بينتقدوه سياسياً كثير واسمع إنه
تراجع عن الماركسية، متجوز ومخلف ناهد الصغيرة، صلاح حافظ وهدى زكي هو صحفي وهي
ممثلة، دايمًا متخانقين ولكن متجوزين يججوا مع بعض ويروّحوا مع بعض، وعبد الرحمن الشرقاوي
عنده عيلة وبيت متكامل بضيوف وزوار، هو ومراته وبنتهم عزة، دلوقت طيبية كبيرة . الصورة
العائلية عند أصدقاء سعد كانت تشبه وتؤكد الصورة اللي عندي من ناحية أمي وأبوي، عائلات
صاحباتي في المدرسة «أنجيلا» اللي من عائلة اشتراكية و«مارتشيلا» اللي من عائلة ميّالة
للفاشية، «ميريلا»، هاجرت مع أهلها أستراليا وبعد ما هاجروا بعثوا لي صورتهم وقابلتها مؤخرًا
لما جت تزور مصر : برّضه أب وأم وأولاد، وواحدة اسمها «فيوريتا»، بافتكر اسمها لأنه مش
دارج، بنت ذكية وشاطرة وكنت باذاكر معاها ساعات وكانت أول مرة أجرب أمشي لوحدي كان
من بيتنا لبيتها، برّضه أب وأم وأولاد، أب وأم وأولاد، أب وأم وأولاد... كدا .

النادي الإيطالي اللي انضمت له أول ما خلصت المدرسة وقابلت فيه المجموعة الشيوعية
الماركسية اتعرضت لفكرة ثانية عن المرأة. الفكرة التقليدية إن السياسة للراجل وهو اللي يحضر

اجتماعات ويشتغل، ومراته تكون موجودة في البيت مع الأولاد تدعمه وتشجعه، لكن هي شخصياً ما تشتغل في السياسة. في النادي الإيطالي المرأة «لازم تشتغل في السياسة» ويجيبوا أمثلة لستات وبنات انضموا للمقاومة الإيطالية ضد الفاشية، الحرب العالمية الثانية كانت مآثرة على الجميع .

- طب والولاد؟

- يقعدوا مع جوزها، جوزها ياخذ باله منهم لأنه مقتنع - أصله شيوعي - إن مراته لازم تكون مكافحة سياسية زيّه .

فتبلورت عندي الفكرة في النادي الطلياني إن حرية المرأة معناها إن تخرج وتحضر اجتماعات .

أصعب فكرة، الفكرة اللي سببت مشاكل لستات جيلي هي العلاقات الجنسية الحرة، إن من حق المرأة أو البنت إن تعمل علاقة جنسية مع الشاب اللي بتحبه، قبل الجواز أو بدون جواز، يعني الخروج من شكل العائلة. الفكرة دي كان لها شعبية في العالم كله ساعتها مش في مصر بالذات ولا المجموعة الإيطالية في 1946 بالذات. في إيطاليا في الأربعينات والخمسينات ما كانوا خدوا حق الطلاق، ولا للزوج ولا للزوجة، الناس ما تقدرش تطلق، ما يمنعش إن الخلافات بتحصل بعد الجواز على طول أو بعد شوية، والمتجوزين إذا محتاجين يفوضوا العلاقة ما يلاقوش طريقة غير الانفصال - ما حدش يقدر يمنعهم ينفصلوا - بس طلاق مفيش طلاق. بعد الانفصال ممكن يحبوا ويرتبطوا بحد جديد ولكن ما يقدروش يتجوزوا تاني، ولو جابوا أولاد من الارتباط الجديد، إدارياً الأطفال كانوا يعتبروا بدون أب شرعي. الوضع دا في إيطاليا كان بيدّي جاذبية وشعبية لفكرة العلاقة الحرة والتخلص من مؤسسة الزواج، والفصل بين الجواز في الكنيسة والجواز المدني وحصلت معركة ضخمة في السبعينات وحصلوا على حق الطلاق. لكن بالنسبة ليّ أنا أعتقد إن فكرة العلاقة الحرة أنا شفتها أو سمعتها وأنا لسه صغيرة، قبل ما يكون عندي سبعناشر سنة وما خدنتش بالي قد إيه المجتمع مش مستعد لها، لأن النتيجة إن الرجل مش خسران حاجة لما يعيش مع واحدة من غير جواز، إنما اللي خسرانة في جميع الأحوال هي البنت، بتخسر حقوقها وبيوصفوها إن معندهاش أخلاق. في الجواز على الأقل المرأة عندها شوية حقوق، أما في العلاقة الحرة - لما الرجالة أو العلاقة نفسها تتغير بعد كام سنة - الرجالة يقدرُوا يمشوا بسهولة وما يلتزموش بالواجبات نحو الأولاد، أو مصاريف البيت. في جميع الأحوال تجربة العلاقة الحرة منفصلة كدا عن المجتمع مش في صالح المرأة لأن هي اللي بتدفع الثمن. لازم أقول إن الجيل دا - جيلي أنا - من الستات كان شجاع، مش باتكلم عن نفسي بالذات، لكن بشكل عام من تجاربي ومن معارفي ومن قراياتي عن إيطاليا أو فرنسا أو روسيا: ستات الجيل دا جربوا ودخلوا بشجاعة في فكرة المساواة، وتجاربهم خبرة عملية مفيدة للتفكير .

في العموم على أرض الواقع الحالة العائلية التقليدية اللي شفتها حوالين سعد وأصحابه وعيلته كانت متطابقة مع الحالة العائلية اللي كانوا بيعيشوها أبويا وأمي وكل أصحابي الطلاينة والخوات .

دا أدّى إلى إنّي عشت الأحداث اللي بعد كدا بنوع من التناقض .

استمررت أطور فكرياً في وضع المرأة وحرية المرأة والمساواة معناهم إيه، لكن ما طبقتهاش في حياتي الشخصية، اتجوزت جواز عادي تقريباً بالرغم من مسألة الأديان والنشاط السياسي، والفكرة اللي فضلت في ذهني هي إني ست بيت ومسؤولة عن الأكل والتنظيف، والتحرر بالنسبة لي إني مهتمة بالسياسة وبالوضع في البلد ومشغولة بتأييد ومتابعة أعمال جوزي، كنت مركزة ما اعملش زي بعض الستات اللي طول الوقت يحاولوا يبعدوا أزواجهم عن الكفاح السياسي .

فترة صراع بيني وبين نفسي، بيني وبين أمي وحماتي، ولو حصلت حزازات مع حماتي فكانت بتحصل حزازات أكثر مع أمي، لأن مع أمي كنت بادي لنفسي الحرية والعشم إني أجادل واتخانق واتقل عليها كمان. مع حماتي أنا كنت باعمل مجهود وباركز علشان نحفظ بعلاقات طيبة وكنت عاوزة اضرب رقم قياسي أو أضرب المثل في إمكانية المعاشرة والعيشة المشتركة مع حماتي وحمايا كزوجة الابن في نفس البيت، لأن الاعتقاد السائد إن مش حاقدراً أعيش مع حماتي وحمايا. وإلى حد ما أنا نجحت، طبعاً العلاقة ما كانتش كويسة دائماً، ولكن ما وصلش الأمر أبداً لدرجة إن اضطررنا نفكر في الانفصال عنهم. ومش لوحدي، كنت واعية وواحدة بالي إن نانا، حماتي، بتلعب دور كبير في نجاح العشرة دي، كنت مدركة طول الوقت إن حماة تانية بطبع تاني، في الغالب ما كنتش حانج أعيش معاها. المهم إن الصراع بين إني باحبك وعاوزة أكون أم كويسة وبين إني مش عاجبة أمي وحماتي وفي الغالب ولا جميلة نفسها كمان، الصراع دا خد فترة طويلة وتعيني، أصله صراع بيني وبين نفسي كمان، أنا عاوزة أكون اللي أنا مقتنعة به، وما كانش سهل أفهم أو أنفذ. ابتديت ما اكونش سعيدة وجه عليّ وقت تصوّرت إن الدنيا اتقفلت قدامي، انتهت حياتي على كدا. أبويا علشان يساعدني جاب لي غسالة مستعملة نص أوتوماتيك، وكانوا ببيجوا يساعدوني، بس ببيجوا إمتي؟ بعد الظهر. أمي كانت بتلومني، بتلاقيني مش متقبلة متاعب الطفل، كان فيه شيء من النرفة من ناحيتها :

- بس يا «ماري» هو العيّل كدا، لازم ياخذ مجهود .

عاوزة أبطل هنا علشان بيقولوا فيه نوع من الاكتئاب بيصيب الستات بعد الولادة. في الغالب دا حصل لي وما كانش فيه الوعي دا ساعتها، ولا اللي حوالياً متعاونين ولا أنا متقبلة إني ضعيفة .

أما العلاقة مع سعد، فكانت في شكل خناقات ومصالحات، خناقات خناقات، ومصالحات مصالحات .

«برتو» أخويا هاجر من مصر وراح إيطاليا وأنا جوه السجن أو بعد ما طلعت على طول، واتجوز «إيلينا» بنت خالنا سنة 1960 أو 1961 ولكن أهلي ما حضروش الفرح، شفنا صور الجواز لأن تكاليف السفر كانت غالية، بس أمي كانت عايزة ضروري تروح تشوف «برتو» بعد ما اتجوز. كانت مهمة السفرية دي لأمي، وكانوا بيجوشوا لها، وطلعت في دماغها نروح أنا وانت معاها، بالذات إني ما كنتش اتعرفت على عيلتها لسه. أهلي سألوا سعد إذا كان يرضى إني أسافر معاها إيطاليا، سعد تحمس إن حناخدك إيطاليا، وأنا ما كنتش خرجت من مصر قبل كدا، فقال «قوي قوي». أيامها كان عندك سنتين ونص، وكنت أمورة خالص، لطيفة، مش زي لما كنت ببيي ما

تقهميش حاجة وكل حاجة عياط وخلص. ابتدينا نحضر من أبريل للسفر في الصيف، أمي استخرجت باسبور طلياني لنفسها من الفصلية، أبويا كان لا يزال من غير جنسية وإجراءات خروجه ودخوله ما كانتش سلسة، وبتزداد صعوبة. كان نجح يسافر مع أمي وأنا في السجن الأول سنة 1950، استخرج حاجة اسمها «laissez-passer» - وثيقة مرور - وكانت أول مرة يسافر بره مصر، المرة دي قدم على طلب خروج فإذا بهم يرفضوا، ويقولوا له :

- تقدر تخرج، لكن ما تقدرش ترجع .

فقال :

- لا أنا ما رحش، روحوا إنتو المرة دي .

أنا كنت باجدد الإقامة كل سنة ولسه مستتية الجنسية المصرية. كان فيه لنا إدارة خاصة في الجوازات لأن كان فيه ناس كثيرة ما عندهم جنسية في مصر. زمان الناس كانت بتروح وتيجي بين سوريا وتركيا وفلسطين ومصر من غير أوراق ومن غير تحديد كثير ويستقروا مطرح ما ظروفهم تجيبهم وبعدين ابتد عصر إن يقولوا اثبتوا أوراق، واحد زي أبويا مثلاً أو أنا، مولودين في مصر وما خرجناش منها، حنثبت إيه؟ سعد جه معايا إدارة الجوازات نقابل المديرين ونقول لهم على الحالة ونشرح لهم عايزين إيه، قالوا لنا لازم أطلع باسبور مؤقت يتجدد كل سنة. «أنا عاوزة العودة» عاوزة أخرج من مصر أزور إيطاليا مع أمي بس عاوزة لازم أرجع لبيتي. تصوري أخرج وما يسيبونيش أرجع؟ عملنا إجراءات كثيرة وفي النهاية الورق وقف، واحد منهم رفض، حاجة تعسفية من عندهم ويمكن غير قانونية، بس أهه، واحد من المسؤولين قال :

- لا مش ممكن، خلاص ممنوع .

رجعنا البيت زعلانين. لقيت عند سعد ميل يستسلم :

- قالوا لأ، حنعمل إيه؟

الجميع حوالينا بيقولوا «دا غير قانوني وإن لي الحق إن اسافر وأرجع بما إن عندي إقامة ومقدمة على الجنسية»، أمي كانت متضايقة بشكل، وأبويا أكثر منها. فكرت شوية وبعدين خدت سعد في أوضة الصالون وقعدت اتخانق معاه :

- الله؟ واحد منهم يقول لأ، خلاص نسكت؟

- طب حنعمل إيه؟

- نشوف واسطة، نشوف محامي، نشوف حاجة، ما دام دا من حقي ما نسكتش .

اتخانقت معاه حنة خناقة! ما كانش عندي أمل إن الخناقة دي تؤدي إلى أي نتيجة، كنت بافضفض عن نفسي من الضيق، كنت محبطة، فإذا به يقول :

- طيب حنشوف .

واكتشفت إن سعد لما ينوي على حاجة بيبقى دؤوب وما يستسلمش للبير وقراطية والحكومة، الموقف دا ورّاني الجانب دا من شخصيته. ابتدى فعلاً يعمل اتصالات ويقول يمين ويكلم شمال علشان يلاقوا حد في الجوازات أو في الداخلية. سعد افكر إن فيه ظابط شعره أحمر بيحبه من أيام ما كانوا سوا في «الحزب الوطني» أيام فتحي رضوان فاتصل به هو كمان، جرّس العالم حوالينا. وإذا بالاتصالات اللي عملها تجيب نتيجة، الموضوع بتاعي اتعرض على ظابط تاني يشوف إن كنت حسافر وارجع ولا إيه، ظابط أكبر من اللي كان رفض يديني العودة. ما كانش عندي أمل بس قلت كويس، نحاول. كان لازم نروح للظابط مكتبه يشوفنا بنفسه، واحنا رايعين قلت لسعد :

- خلاص أنا مش متضايقه، لما الظابط دا يرفض يبقى على الأقل عملنا المستحيل .

دخلنا عند الظابط الكبير، راجل في منتصف العمر، طبعاً أنا لقيته ظابط لطيف لأنه عمل لي اللي عاوزاه وأدّاني الورق، نوع من الباسبور المؤقت بالعودة عليه. أما سعد يا حبيبي لما بينجح في حاجة وشه بينور وبيبقى زي القمر، سلمنا على الظابط الكبير وشكرته وسعد شكره، مش عارفين نشكره كفاية، وخذنا الورقة دي وخرجنا واحنا في غاية السعادة، ولما رجعنا البيت سعد قعد مدة على التلفون يشكر خاله والظابط اللي شعره أحمر وكل الناس اللي ساعدونا، وبيبلغ، أصل كان في عدد كبير من الناس متابعين المحاولات، واعتبروا الحكاية دي نوع من الانتصار وجابت شيء من البهجة حوالينا في العيلة وبين الأصدقاء والزملا والقرايب .

*

وجه يوم السفر .

ركبنا المركب أنا وأمي وانت، الطفلة الصغيرة، زمّارة كبيرة واتحركت المركب وقعدت تبعد عن الميناء وعن سعد وعن أبويا ويمكن نانا وكان فيه أصحاب سعد، كان فيه مجموعة من الناس جُم يُودّعونا في اسكندرية .

المركب كانت الوسيلة الطبيعية للسفر لأوروبا، المركب اللي ركبناها كان اسمها «سوريا»، وكان في مركب تانية اسمها «الجزائر»، مراكب مصرية رايحة جاية من وإلى أوروبا، تتحرك من اسكندرية ساعة المغرب، وتوصل لإيطاليا الصبح بعد ثلاث ليالي، تمر على جزيرة كريت في الطريق إلى «نابولي». إنت اتعودت على المركب على طول، يا دوبك تعرفي تقفي وتجري، لسه ما تعرفيش تمشي، كان فيه پار صالون فيه فوتيهات وكنب، وعلى البار كان فيه كراسي مدورة عالية من غير مسند، خذناك حطيناك على كرسي من الكراسي وشربناك كوكاكولا، انت شفتينا نقول

كوكاكولا والرجل اللي في البار يسمع كلامنا ويجيب كوكاكولا، فكنت عايزة ترجعي القاعة دي عمال على بطل، تجري وتتشعبي وتطلعي لغاية فوق تقعد على الكرسي وتقولي للبارمان :

- كوكاكولا !

الريستوران كان كبير، وكل ترابيزة عليها 6 كراسي وبالنمر محدد لكل واحد حياكل فين، وجه حظنا في أسرة شامية، كنا بناكل معاهم على السفرة كل يوم. الحقيقة انت ما كنتيش متربية كويس، ما عرفتش أربيبك، لا تاكلي بنضافة ولا تقعد ساكتة، أمي كانت بتأخذ بالها منك كتير بس برضه كنا مُحرجين من الناس اللي معانا بسبب تصرفاتك. أول يوم اتعشيت وما اتعشيتش، أكلت شوية وسبت شوية ورميت شوية، تنزلي وتطلعي، مش قادرة تثبتي، لحد ما شالوا الأكل وجابوا سلطانية سلطة فزاز مليونة كريز أحمر. الطبق كان قدامنا المفروض كل واحد ياخذ السدس علشان إحنا 6 أفراد من غير ما نورّي إن فيه حد مفجوع وابتدينا ناكل بأدب، إنت شفت المفرش أبيض وطبق الكريز أحمر، طلعت على الكرسي ومن الكرسي على المفرش الأبيض وقعدت على الترابيزة وسحبت السلطانية وحطتها بين رجلك وابتديت تاكلي، أنا وأمّي انقلنا :

- مش كدا يا نادية، غلط .

ونحاول نشيلك أو نسحب منك السلطانية علشان الناس التانية تاكل، مفيش فايدة، يظهر منظره كان لطيف، وهم أكيد ناس مهذبة لأنهم ضحكوا وسبناك تاكلي الكريز لوحده، وخلصته .

أمي ما كانتش بتسيبك تعملي ولا خطوة واحدة على المركب من غيرها، والحقيقة دا كان ضروري أصل المراكب ساعتها في الدور اللي فوق، على سطح السفينة، وفي البلكونات اللي بيحطوا فيها شزلونج دايرن داير في كل دور، السور كان عبارة عن درابزين مفتوح، مجرد ماسورتين خشب بالعرض، الدرابزين التحتاني أعلى من راسك كان ممكن تمشي تقعي في البحر من غير ولا شعبة ولا شقاوة، أنا نفسي ما كنتش مرتاحة وانا باقرب أبص على البحر، كنت خايفة اترحل .

كنت سعيدة بس كنت داخعة، مش مصدقة نفسي إن حصل وسافرت .

أول مرة أسافر بره مصر، وأول مرة أروح إيطاليا، وأول مرة أركب مركب كبير، سفينة .

في مصر كانوا بيقلوا عليّ «الطليانية»، أصل شكلي كدا بيضة شوية وبتكلم طلياني والعربي بتاعي فيه لكنة مكسر، بس أنا ما كنتش خرجت من مصر. في الأول كنت مشغولة بالسياسة ومش دريانة بالدنيا، وبعد كدا كان مستحيل لأنني كنت في السجن، المهم الرحلة الأولى بره مصر كانت في 1964 وكان عندي 33 سنة وكنت خلفتك .

وصلنا إيطاليا، ولقينا «برتو» أخويا مستتينا في ميناء «نابولي»، كان أول مرة يشوفك، سافر قبل ما تتولدي .

الإجراءات طالت جوه المركب وتأخرنا، طلعنا من السفينة لقينا «برتو» متوتر شوية، حاجز تذاكر قطر وعلى وشك يفوتنا فطلعنا من المينا وركبنا تاكسي باستعجال ورحنا المحطة وربنا ستر لحقنا القطر وقعدنا .

القطر قام وانا ابتديت أبص على المنظر من الشباك .

خرج القطر من مدينة «نابولي» على منظر جبال، من ناحية بركان «فيزوف» ومن الناحية الثانية البحر وجناين ومزارع. مناظر حلوة. حبيبي «برتو» محضر ساندويتشات بس أنا فضلت اتفرج على المناظر مدة طويلة، بعد شوية أمي ما قدرتش تستنى .

- «Che impression ti fa l'Italia?» (إيه انطباعك عن إيطاليا؟) .

- «molto bella» (حلوة قوي) .

الحاجة اللي كانت مستولية على انتباهي هي إن الصورة صافية، كأن الهوا نضيف مفيهوش تراب، منظر الجبال واضح .

- المنظر نضيف .

- نضيفه؟ دا مفيش أوسخ من شوارع إيطاليا، أوروبا كلها بتقول كدا .

- لأ نضيفه انتو مش فاهمين حاجة .

«برتو» بيتكلم عن نظافة الشوارع وانا باتكلم على نقاء الرؤية .

اتأثرت من صفاء الرؤية، وأعتقد السبب بسيط: إيطاليا مفيهاش تراب في الهوا زي عندنا في القاهرة، معندهم صحرا ولا جبل تراب المقطم، وعندهم مطر بيغسل الخضرة والبيوت، النتيجة إن الألوان صافية، الجو أوضح. على كل حال صفاء الرؤية دخل مزاجي واتسحرت من المنظر الحلو دا وحسيت كأن نظري أصبح أقوى وفضلت اتفرج طول السكة، ساعات طويلة من «نابولي» لـ«فلورنسا». أخيراً وصلنا إلى «سكانديتشي»، ضاحية من ضواحي «فلورنسا»، وقابلت «إيلينا» بنت خالي لأول مرة، بنت خالي ومرات أخويا. أنا ما كنتش لسه قابلت أي حد من عيلة أمي، «برتو» أخويا الشخص الوحيد اللي أعرفه من قبل السفر فكل السفرية كانت مقابلات تعارف، أمي فرحانة أخيراً بتقديم بنتها وحفيدتها للعيلة، وبتزور ابنها في بيته لأول مرة بعد ما اشتغل واتجوز وفتح بيت في «فلورنسا». كانوا ساكنين في الدور الثالث، «إيلينا» نزلت تستقبلنا في الشارع، حاجة لطيفة، وقدمونا لبعض :

- «ماري» بنتي. «إيلينا» بنت خالك «أوليفو» .

ودخلنا البيت. بناكل في المطبخ، دي العادة عندهم أو ممكن نقول إن المطبخ في أوضة المعيشة، ودي حاجة لطيفة وعملية، عجبتني. كان عندك جزمة برقبة عالية علشان علاج «الفلات فوت»، بطن رجلك مسطح مش مقوّس كفاية، أبويا وأمي قبل السفر راحوا محل دكتور «شول» جنب السفارة السويسرية في شارع عبد الخالق ثروت وجابوا فرشاة حديد مخصوصة بتتحط جوه الجزمة علشان رجلك ما تريحش، وجابوا جزمة مخصوصة برقبة وجلد ناشف من عند جزمجي جنب سوق التوفيقية متخصص في الجزم المخصوصة، ورحنا إيطاليا وانت لابسة الحديدية والجزمة الهاف بوت الدبشة دي وبنحطك بالجزمة على ترابيزة المطبخ علشان قلّعها ولبسها شغلانة، وتاكلي. بتاكلي كويس وأخويا كان بيألس عليك يطبطب على بطنك ويقول: «الكرّوش الكرّوش».

كل دا كان ظريف بس أنا بعد يومين ثلاثة في البيت ابتديت أزهدق وعاوزة أشوف البلد. «سكانديتشي» مفيهاش حاجة، حي سكني من ضواحي «فلورنسا». خدتك ونزلت، ركبنا الأوتوبيس سوا ووسط «فلورنسا» بعيد، فعقبال ما وصلنا كنت تعبت وزهقت وخلص عايزة تروّحي، مش عاوزة تشوفي متاحف وتمشي في الشوارع مهما أعمل، جبت لك بيتزا قعدت كلتيها بس مقريفة، رحلة متعبة ليّ ولك، إنت ما انبسطيش وأنا ما شفنتش حاجة، فأمي لطيفة قالت لي :

- سيبني لي البننت وانزلي انت روعي شوفي واتقري .

و عملت كدا فعلاً .

نزلت وسط «فلورنسا» لوحدي، وانبهرت بشكل ما كنتش أتصوره، يظهر ما كنتش متوقعة انبهر، ومش عارفة أوصف لقيت البلد جميلة قد إيه. ما عرفنتش أروح فين ولا آجي منين، قعدت اتسكع زي ما تيجي، أي حتة أتلفت من هنا أو من هناك ألاقي حاجة أروح رايحة ناحيتها. فيه أغنية مشهورة أنا اعرفها من أمي، «Sull'Arno d'argento»، بتقول :

Sull'Arno d'argento

si specchia il firmamento

mentre un sospiro e un canto

.si perde lontan

Dorme Firenze

sotto il raggio della luna

ma dietro ad un balcone

.veglia una madonna bruna

«شعاع الغروب بينعكس على سطح نهر «الأرنو» الفضي زي المرايا، «فلورنسا» نايمة بين دندنة وتتهيدة منسية في ضوء القمر، ولكن العذرا مريم بشعرها الأسود سهرانة عليها من ورا الشباك»: ترجمة تقريبية، كنت عارفة الأغنية دي وباغنيها لغاية النهاردا وتصورت في خيالي شكل النهر الفضي اللي ميّته زي المرايا، بصيت على «الأرنو» دا واستغربت استغراب، ضيق، بالنسبة ليّ دا مش نهر دا ترعة طويلة، أنا جاية من النيل هنا في مصر. بعدين شفت الكباري، جميلة ومدهشة، كوبري منهم بالذات مشهور، «بونتي فيكيو»، من على ضفاف النهر الكوبري مبني بيوت وشبابيك بعرض النهر، مشيت عليه البيوت على الناحيتين ما تشوفيش المية، لكن مش فاضل حد ساكن، حوّلوا البيوت إلى بوتيكات ومحلات. «فلورنسا» من أعلى المدن في إيطاليا ويمكن في أوروبا، بيبيعوا السوفونير بأسعار غريبة بالنسبة ليّ والبوتيكات شيك على الموضة، فمشيت من هناك. وبعدين دخلت على الميادين، ابتديت بأول ميدان أظن اسمه «سانتا كروتشي» جنب نهر «التيير»، وبرج «جوتو» الجميل، لوحده منفصل جنب الكنيسة، وفيه الكاتدرائية الرئيسية في «فلورنسا» كاتدرائية «سانتا ماريا دل فيوري»، وحمّام أبيض يبجي على السلام والعب معاه وانفرج على الناس بتأكله. وانا معدية لقيت نفسي جنب قصر جميل كنت شفته في الكروت «بالاتزو فكيو» - اسمه كدا - كنت باقرا عن أسرة «الميديتشي» ومتحف «الأوفتزي»، من أكبر متاحف العالم بس مش مشهور عندنا في مصر. والميدان اللي قدامه - ميدان «السنيوريا» - فيه تمثال «داود» وتمثال هرقل - «ميكلانجلو»، تماثيل مشهورة من نحائين مشهورين، وأنا سامعة عن «ميكلانجلو»، وعارفة قيمته، ويمكن شفت حاجات كثيرة له في الكتب ولكن اتفاجئت لما شفت التماثيل على الحقيقة، وخصوصًا تماثيل «اليوم» مجموعة من أربع تماثيل: الفجر والنهار والمغرب والليل، كنت باقعدهم كل تماثيل مش قادرة أشيل عيني من عليه، واتمنى لو أقدر أشوفهم تاني .

ابص على دا الاقي جنبه دا يوديني لدا لحد ما لقيت نفسي في وسط ميدان ومش عارفة ليه بصيت تحت رجلي، لقيتني واقفة على بلاطة برونز، معدن أصفر في وسط ميدان حجر، مكتوب عليها «هنا في المكان دا بالظبط حرقوا «سافونارولا» سنة كذا»، بأمر من بابا الفاتيكان القرن الخمستاشر في أواخر العصور الوسطى. كنت قريت عن «سافونارولا»، موجود حتى في كتب التاريخ بتاعتك في المقرر المصري، راجل طالب بتحديث الفكر وخصوصًا تحرير العلم، زي «جاليليو جاليلاي» و«جوردانو برونو». في العصور الوسطى العلم كان متعارض مع مفهوم الكنيسة، فيتهموا العالم بالكفر. إن انا الأقي نفسي واقفة برجلي فوق البلاطة دي وسط الميدان ومكتوب كدا، جالي إحساس ما اقدرش احكيه، دُخت، استعدت الأحداث التاريخية ومش عارفة ازاي ابتديت أحس إن الأحداث دي حقيقية، كنت باسمعها وبقراها قبل كدا في الكتب ودرستها في المدرسة كأني مش مصدقها .

جاتلي حالة نهم واستمرت انفرج بهمة على «فلورنسا» كلها .

اطلع من سوق أخش كنيسة لميدان لقصر وبعدين من غير ما ابص، والله، دخلت كنيسة من الكنايس الكثيرة، الكنيسة دي تتوصف إنها غنية زي الكنايس الكاتوليك، زخارف مذهبة ولوحات وعواميد، شكلها مهجور شوية فدخلت أخذ نفسي، أريح رجليا واتشرب بصمت الكنيسة والجو الرطب، بعد شوية عينيا ابتديت تاخذ على العنمة، على يميني قبر بابا مشهور للفاتيكان مكتوب إن «ميكلانجلو» كان في جدل متواصل معاه، وجوه الفاترينة تمثال للبابا المدفون نايم كدا كأنه ميت وتمثال ملاك

بيعيّط على البابا من الزعل، عجبني تصوّر الفنان إن الملائكة حزينة على البابا، ضربت بعيني جنب قبر البابا لقيت قبر «دانتي أليجييري»، «يا خبر! «دانتي أليجييري»!»، قمت وقفت من مكاني، وقربت منه، لقيت على القبر جملة :

Nel mezzo del cammin di nostra vita

mi ritrovai per una selva oscura

.ché la diritta via era smarrita

جملة البداية من «الكوميديا الإلهية»، حفظناها صم في المدرسة الطلياني، كنت صغيرة والمعاني بتاعتها ما اثرتش عليّ، لكن في «فلورنسا» وانا لوحدي الجملة دي ضربتني في الصميم، حسيت إن أنا فعلاً «في منتصف مسيرة الحياة» عندي ثلاثة وثلاثين سنة تقريباً و«وجدت نفسي في غابة مظلمة» «وقد ضللت الطريق». الجملة وقعت زي الصاروخ على نافوخي، وأصابنتني حالة وجودية، «smarrita» - يعني ضل أو تاه - ياخبر دا أنا «smarrita» فعلاً. أبص على قبر «دانتي» وافكر في نفسي، أنا حصل لي كدا، مش عارفة فين سيكتي. «دانتي» بيقول في «الكوميديا الإلهية» إن هجموا عليه ثلاث وحوش الأسد والفهد والذئبة، رموز الغرور والرغبة والطمع، العيوب الوحشة اللي ممكن الواحد يقول إن كل الأديان بتدينها وبتقاومها، كانوا حياكلوا «دانتي» واللي أنقذه هو «فيرجيليو»، الشاعر. مرة تانية ممكن نتكلم عن «الكوميديا الإلهية» وعن «دانتي»، لكن أنا ساعتها مسكني التفكير، إيه التلات وحوش اللي بيهاجموني؟ الغرور؟ الرغبة؟ ولا الطمع؟ ولا حاجة تانية؟ أنا ما عرفتش أفسر نفسي واقدم تحليل معقول لحياتي، ولكن قلت لازم أفكر في الموضوع، لازم اتوقف، لازم أعيد التفكير في حاجات كتيرة، وسبت قبر «دانتي» وانقرجت على باقي الكنيسة. لقيت أهم رجال إيطاليا من «فلورنسا»، مش بس «دانتي»، «تشيليني» أهم صايغ ذهب وفضة في التاريخ، و«باجاني» أشهر عازف كمنجه في التاريخ، يا خبر! حتى «باجاني» من «فلورنسا»؟ وكل دول مدفونين هنا؟

كنيسة ساكنة، فاضية، أنا والمدافن والناس دي اللي اعرفها .

خرجت من الكنيسة وانا في حالة من الهيام، كان لازم أروّح لأن كنت اتأخرت، لكن أنا عملت جولة جميلة ويوم مليون ورجعت لبيت «برتو» و«إيلينا» وانا شبعانة أحاسيس وأفكار. مسحت المدينة بالطريقة دي، اشتريت كتاب دليل، وخذت حريتي وانبسطت من الجولات اللي عملتها، حسيت إن دا أثنائي، الحاجات اللي شفتها ملهمة للفكر والأحاسيس .

اتضايقوا في البيت وابتدوا يشتكوا إن «ماري سايبية البننت ودايرة في الشوارع تتفسح»، فبطلت خروج شوية. بعد كام يوم من غير خروج افكرت مجلة «نحن النساء» الإيطالية اللي كانت بتيجي لي في السجن و اتعرفت عن طريقها على أخبار وأفكار الحركة النسائية في إيطاليا، وفي مرة نزلت معاك ومع «إيلينا» نشترى شوية بقالة من جنب البيت، ولقيت كشك الجرايد بيبيع المجلة فاشتريتها،

وعرفت من البياع إن مقر المجلة في «فلورنسا»، واحنا راجعين شفت فرع الاتحاد النسائي والمجلة على مبنى من المباني :

- يا «إيلينا» خدي نادية واستيني هنا دقيقة .

دخلت الفرع واتكلمت معاهم وسألتهم على عنوان المقر الرئيسي للاتحاد النسائي في «فلورنسا» نفسها، طلعت لقيت «إيلينا» متضايقة، فضلت واقفة مستتية وانت على إيدها يظهر ما شافتش أنا اختفيت فين، ولما رجعنا البيت اشتكت مني .

أنا باحكي لك الحاجات الوحشة اللي عملتها في سبيل إن أنا انبسط وانمي ثقافتني وروحي .

نزلت وسط «فلورنسا» للمقر الرئيسي للاتحاد النسائي وقابلت ستات واتفقت معاهم عن قضية المرأة، ما كانش عندي أي هدف، ما كانش فيه علاقة بين تنظيمات إيطاليا وتنظيمات مصر، كان عندي بس نهم للمعرفة والفهم، الحوارات دي بتديني إحساس بالرضا، بانبسط وباحس إن باتقدم. في الفترة دي كتاب «سيمون دي بوفوار» ، «Il Secondo Sesso» - «الجنس الثاني» - كان اتنشر واتشهر بعمق أفكاره .

مش عارفة يا نادية، أظن كفاية كدا أصل أنا تعبت. يلاً، «Ciao Tesoro» ، نكمل كلام المرة الجاية، عمري ما كنت أتصور إنني حاقعد احكي التفاصيل دي كلها واحكيها لك انت بالذات. لما كنت صغيرة أول ما ابتديت تفهمي أي حاجة كنت باحكي لك حاجات كثيرة وباشرح لك إيه هي الديمقراطية وإيه معنى الشيوعية والكفاح المسلح والشعوب والتقدمية، دا في الغالب كان بيعمل ارتياح عندي. كان عندي في ذهني إن أنا ادبيك المعلومات وانك تستفيدي بكل ما أعرفه، من بدري، ما نستناش تكبري والغريبة إنك ما كنتيش بتلمي. يمكن كانت مبالغة مني، بقيت أصب اللي عندي عليك انت، كل ما افكر حاجة أقولها لك، واشرحها لك، وانت كنت بتسمعي - مش عارفة كنت بتفهمي إيه منها، هل كنت بتفهمي حقيقي ولا لا - بس من وانت عندك ثلاث سنين، وبعدين أربعة، وبعدين خمسة، وستة، وبقيت تفهمي أكثر وأكثر. كان عندي رغبة إن الحاجة اللي أنا أتعلمها أو أدركها، أحب ادبها للثانيين علشان يستفيدوا منها، مش بس معاك يمكن كمان مع الناس الكبار اللي اعرفهم ولكن رغم صغرك انت أكثر واحدة كان عندك صبر، كنت بتقدي قدامي على السرير لما تيجي تنامي، وتسمعيني، وكنت باغني لك كمان. وبعد كدا لما اتصاحبت انت وليلى بهاء، وكانت بتبات كثير عندنا، كنتو بتطلبوا مني إنني أغني لكم أغاني القديمة «القديسة لوتشيا»، و «Evviva l' mar» - «يحيا البحر» - وكنتو بتسمعوني وتطلبوا ثاني وانا كنت باغني وكنت مبسوطة إنني أصب عندكم اللي في صدري. ريحتوني. لما كبرت شوية بقيت مش عاوزة تسمعيني، يمكن احتجت مساحة - ويمكن ما كنتش باكملك كفاية عن حياتي الخاصة، حياتي أنا الخاصة - كنت باحكي قليل عن نفسي وانا صغيرة، كنت باكملك أكثر في السياسة، كنت باشرح لك الديمقراطية إيه زي ما فهمتها من خلال قرابة الجرايد .

أخيراً وصلت قرية أمي. مسافة مش صغيرة بين «فلورنسا» و«ريبيا»، مئات الكيلومترات، وبنقطع إيطاليا بالعرض ونخترق سلسلة جبال الألب، «برتو» أخويا جه معنا وصلنا «ريبيا» بنفسه ورجع «سكانديتشي» على طول علشان شغله. «ريبيا» قرية فوق جبل على البحر الأدرياتيكي في شرق إيطاليا، لما الجو يبقى حلو ممكن نشوف يوغوسلافيا في الأفق، قرية قديمة عمرها يمكن أكثر من ألف سنة اسمها «ريباترانسوني» واختصاراً بيسموها «ريبيا».

نص القرية قر ايب أمي والنص الثاني يعرفوها شخصياً. نزلنا عند خالتي وجوزها وابنهم القسيس «دون فيتوريو» وبنتهم «مارا» المدرّسة، الاتنين تقريباً في سني، في الثلاثينات، مش متجوزين، عابشين مع أهلهم في بيت في الميدان الرئيسي، ميدان غويط وفيه مدفع وانت على طول رحى تتشعطي عليه وبقي لعبتك المفضلة. البيت قديم لكن مش متهاك، فيه تراس تحزن مليانة ورد وزرع، لفت نظري صيانتهم للبيت، ما كانوش أغنيا بالمرّة لكن بيبيصوا ويصلحوا. نظام الميئة كان لسه بين خزانات محلية قديمة ومواسير جديدة بتمدها الحكومة، من وقت لوقت الميئة تتقطع، ويرجعوا لنظام الخزانات جوه البيت ما كانش سهل، بس لفت نظري إني ما حسنتش بمعاونة بخصوص الميئة بالرغم من الأعطال المتكررة، البلدية تدي خبر قطع الميئة فيملوا الخزانات، بس كان فيه شيء من النظام المعقول. لفت نظري كمان العناية والنضافة وسط تفاصيل فقر وتخلف، تركيبة جديدة عليّ في «ريبيا».

خالتي «جيجيتا» كانت بتطبخ كل يوم أكل طازة، حاجة ظريفة ودلع كبير لأن اعتمدنا عليها وبقينا ننزل نروح البحر أنا وانتِ وأمي و«مارا» بنت خالتي، الأوتوبيس بينزل من على الجبل في طريق ملتوي ومناظر جميلة ينزلنا مدينة «جروتاماري»، خطوتين يا دوب نعدي شريط القطر نلاقي نفسنا على البحر. مدينة صغيرة فيها كام محل وشوارع، أكبر شوية من قرية «ريبيا». نروح على البلاج، الشماسي والشيزلونجات مترصين جاهزين، الواحد يأجر شمسية ويقعد. «مارا» بنت خالتي تختوخة وعاززة تخس بالطريقة القديمة فكانت بتشتري فاكهة، تين وكمثرى ونفاح كثير وتقعده في الشمس. ما تقعدش في الضلة أبداً حتى في محطة الأوتوبيس تقف تستنى الأوتوبيس في الشمس، و«ماريزا» بنت خالي الثاني قابلتنا على المحطة وبرضه راحت وقفت جنبها في الشمس :

- لازم نتتقع في الشمس يوليو وأغسطس وإلا جسمنا ما يستحملش الشتا الطويل «L'organismo non c'e la fa».

على الساعة واحدة نسيب البحر علشان نلحق أوتوبيس الظهر وفي المحطة نجيب لك بيتزا تصبيرة. مشينا على النظام دا يمكن أسبوعين في بيت خالتي القديم، كان نظام مثالي لك .

حلوة المقابلة الأولى مع عائلة أمي، ومع مجتمع من إيطاليا ما كنتش اتصور إنه موجود، قرية نائية، واختلافات صغيرة، مثلاً الكمثرى كانت صغيرة وناعمة ولها قطعة غير وطعم غير، والتين البرشومي مش نوع ولا اتنين، أنواع كثير، نوع منهم كبير قد الكف، قشرته خضرا وطرية ومن مياصته البياعين مش بيعرفوا يرصوه على بعض وسموه «Fico fallacia» يعني التينة «الفشلة»، التينة الكسلانة، الكسلان بيقولوا له في إيطاليا: «قوم فز هز طولك يا فشلة واعملك شوية همة». أمي كانت بتشاكسني في مصر وتقول لي يا «فالانتشا» علشان تختوخة طالعة لأبويا، شفت بقى

التينة اللي بتسبّهني بيها. العشا بدري، ناكل والدنيا لسه نور، خالتي لازم تطلع علينا بطبق شوربة خضار وشعرية مع إننا كنا في الصيف وحر، وتحضر شفشق ميّة تعصر عليه نص لمونة وتغطيه بحة شاش أو قماش طرحة متزوّق بترتر وخرز علشان الشاش يثبت فوق الشفشق. حتى اللمون كان أضراليا أصفر وكبير قد البرتقانة، ما شفتوش في مصر وما لقيتس في إيطاليا اللمون البنزهير بتاعنا .

أخذتني أمي على مقابر القرية علشان تعرّفني على أفراد عائلتها اللي ما لحقتس أقابلهم، أمها وأبوها، جدي وجدتي اللي عمري ما شفتهم، وأخوها «نينو» اللي مات صغير، وقفّت قدام صورته على القبر تحكي :

- «نينو» كان بيساعد أبويا في المخبز، الدنيا كانت حر وعرق قدام الفرن خرج من المخبز عرقان ما حسش بالبرد وكانت الدنيا شتا تلج بره، مشي في الشارع بالفانلة عرقان وراح الكانتين وطلب بيرة ساعة وشربها مرة واحدة جاله التهاب رئوي على طول، سُخنية عالية، ومات في ثلاث أيام، كان في عز شبابه، وساب 3 بنات ومراته «أدالجيزا» صغيرة يا عيني، واللي مسك الفرن أخويا الثاني «أوليفو» أبو «إيلينا» مرات أخوك .

من ساعتها أمي كل سفريّة لازم تاخذنا المقابر وتقول قدام قبره وتحكي لنا .

طلع إن عندي عيلة كبيرة في إيطاليا، خالتي وخالين وعائلاتهم. «جيجيتا» اللي نزلنا عندها و«ألبينا» اللي هاجرت الأرجنتين، و«أوليفو» اللي استلم الفرن أبو «إيلينا» مرات أخويا وأخيرًا «جوردانو» أقرب أخ لأمي. ومراتاتهم واجوازهم «بييترو» «دومينجو» «سيسينا» و«ماريا» وولادهم «ماريزا» و«لينا» و«مارتشيللا» و«إيلينا» و«ليليو» و«ياولو» و«أنريكو» والأولاد هم كمان ابتدوا يتجوزوا، واحدة متجوزة صاحب محل ملابس أطفال وواحدة متجوزة شرطي رايح جاي بالموتوسيكل في الشوارع وحاسس نفسه حاجة كبيرة، و«أنريكو» متجوز «ماريزا» موظفة في البلدية، وكمّان عندهم أطفال في سنك تفتكري منهم «فابريزيو» و«لوتشيا». اتعزّما على كذا مكرونة، أول مكرونة ابتدينا نلف السباجتي بالشوكة وانت ما عرفتيش تُلّفي المكرونة، ف«أنريكو» ابن «جوردانو» بص لي حنة بصة :

- إيه دا يا «ماري»؟ إنت ما علّمتيش بنتك تاكل سباجتي؟

وسّخت نفسك مش عارفة تاكلي ورافضة تسيبي حد يأكلك، عاوزة تاكلي لوحديك . الموقف دا مخليني عاوزة أبتدي أعلم نبيل حفيدي أكل المكرونة قبل ما أخده إيطاليا، نبيل كبير دلوقت عنده سبع سنين وممكن يتعلم، انت يا عيني ما كانش عندك ثلاث سنين وقعدنا نضحك عليك. لما الواحد يقعد على الأكل شوية ويشرب شوية نبيت بتحصل يرّضه حالة من البهجة، نضحك ونحكي حكايات ونكت، واحنا قاعدين نضحك على السفرة سمعنا خناقة وعايط بين العيال في الأوضة الثانية، جرينا نشوف لقينا «لوتشيا» بتعيّط ودم بيخُر من راسها، وانت واقفة قدامها وماسكة فتاحة النبيت، «يا دي المصيبة» أنا مش عارفة أودّي وشي منك فين، عندي بنت سُخّلية ما بتعرفش تُلّف مكرونة سباجتي وفتحت دماغ العيال، طب أعمل إيه؟ «لوتشيا» عيّطت وانا ضربتك وخليتك تعيّطي انت كمان .

حطوا لها مطهر على الجرح ونزلنا كلنا بسرعة بالعيال معيطة في الشارع علشان نلحق نتفرج على موكب استعراضى بالأعلام بمناسبة عيد المحافظة. أعلام كثيرة، كل مركز أو قرية في المحافظة عندهم علم خاص بيهم، العمدة ومراته والقضاة وكبار موظفي المحافظة يمشوا في الموكب بالملابس التاريخية وبعضهم على الأحصنة كمان، وموسيقى مارش نحاسية وحركات بهلوانية بالأعلام، الشباب يتمرنوا طول السنة علشان اليوم دا، يلفوها ورا ضهرهم ويطلعوها وينزلوها ويلفوها تاني كلهم مع بعض، منظر مدهش، وصواريخ في الهوا بالليل، وبعد الاستعراض الجمهور يرقص ويأكل ويشرب في الميدان لحد انصاف الليالي .

جه وقت الرجوع لمصر، «دون فيتوريو» ابن خالي القسيس وصلنا المحطة وقطع التذاكر وركب معنا أنا وانتِ وأمي. قطر مرسوم عليه من بره نقوشات جميلة زي الدانتيل يشبه القطرة اللي بنشوفهم في أفلام الكابوي الأمريكية، عربيات قديمة مفيش قزاز على الشبايك وكل أربع أنفار قاعدين قصاد بعض. القطر يروح مدينة «باري» في الجنوب عند كعب الجزمة، يلف حولين سلسلة الجبال ومن هناك يخترق إيطاليا بالعرض في اتجاه «نابولي»، مفيش لسه أنفاق تخترق الجبال اللي في وسط إيطاليا. الركاب أغلبهم فلاحين، والفلاحات لابسين جونلات طويلة ومناديل على راسهم يخشوا يقعدوا ويناولوهم أسبنة فيها طيور وخضار من الشباك، هيصة كأننا في مصر. كنت متسلية قوي، بس بعد شوية ابتدينا نزهق لأن طلع القطر قشاش بيقف في كل المحطات، مش دقيقتين تلاتة وتوت توت ويمشي، لأ، بيقف بالربع ساعة في كل محطة والكابينة ضيقة ومفتوحة ودوشة. ساعات وساعات، يوم كامل بالطريقة دي، وصلنا «نابولي» مدشدشين على المغرب، «دون فيتوريو» اطمن علينا وروح على طول، سافر السفيرية دي كلها علشان يوصلنا المركب، أخذنا معاملة ملوكي من العيلة في استقبال «لياندر» - أمي - وإنجازاتها - أنا وانتِ .

سعد وانا حماتي وأبويا وعدد من أصدقاء سعد كانوا في انتظارنا في المينا في اسكندرية، وانتِ على طول أول ما شوفتِ نانا اترميت في حضنها وابتديت تحكي لها مغامراتك - بالطللياني. نانا حصل لها ذعر «البننت نسييت العربي» افكرت خلاص مش حتعرف تكلمك وحترطني لها بالطللياني، بس انتِ لوحذك كدا يظهر حسيت إن نانا مش فاهمة فبعد كام جملة طلع الكلام من بُقك بالعربي تاني، كانت حاجة ظريفة كأنهم مش لغتين بالنسبة لك .

نانا يا عيني في الحقيقة تاهت بيني وبينك، من ناحية أنا وحكاية إني مش عاوزة أكون زي الأمهات التانيين، وانتِ صغيرة وعنيده وعارفة عايزة إيه، إنتِ اتغيرت لما كبرت وبقيت تتردددي، بس وانتِ صغيرة ما كانتش فيه تردد كان فيه عند بس، التيتينة حطتها في بُقك ومش عاوزة تشيلها، كانت مأساة نانا تحاول تشيلها من بُقك وانا مش عارفة اتحكم فيك، غير حكاية البنطلونين اللي رجعنا بيهم من إيطاليا. «كونشتو» جوز «ماريزا» صاحب محل هدم الأطفال في «ريبيا» جاب لك بنطلونين صوف للشتا هدية، واحد نبيتي وواحد كحلي وكانوا هايلين بيليقوا على كل حاجة، لبستهم وعلقت عليهم مش عاوزة تلبسي أي حاجة تانية، باحاول ألبسك فستان وانتِ مش راضية. على طول بالطريقة دي، لما كبرت شوية، أربع أو خمس سنين، يعني قبل ما تدخل المدرسة كنت بتنزلي تلعب كورة مع الولاد في الشارع، وبالذات واحد فيهم اسمه محمد متجوز وعنده عيال دلوقت ولسه ساكن في البيت اللي قصادنا، كنت باتفرج عليك من البلكونة والحقيقة تصرفات الولاد كانت عادية

وبريئة، لكن نانا وجميلة وعلي جوزها وأمي وأبويها كانوا مش مبسوطين من الميول الشوارعية عندك :

- واحنا معقول نسيب بنتنا تلعب كورة في الشارع مع الولاد بالطريقة دي؟

سعد من ناحيته كان بيشجعني، بيقول لي :

- خليها تاخذ على الناس، تتعامل مع الشارع .

جمال عبد الناصر كان في يوغوسلافيا عند تيتو أوائل الستينات، بيحكوا إن فيه شخص نجح يحط ورقة لتيتو في إيده وهو قاعد مع عبد الناصر مكتوب فيها «واحد من الشيوعيين في مصر مات في المعتقل بسبب التعذيب». شهدي عطية. تيتو قرأ الورقة وبص لعبد الناصر :

- فيه واحد شيوعي مات عندك في المعتقل .

- معنديش خبر .

بيحكوا إنها كانت كسفة كبيرة لجمال عبد الناصر، المفروض بطل من أبطال «ياندونج» للسلام وعدم الانحياز والاشتراكية وبيعمل صفقات مع بلد اشتراكي بينما المعتقلات مليانة شيوعيين والتعذيب شغال. عبد الناصر بعث يعزل الأمور اللي حصلت الحادثة دي تحت إدارته وشالوه من السجن، ما عملش مراجعة لجهاز التعذيب والمباحث .

عبد الناصر في الفترة دي كان بيحاول يبني السد العالي وعمل الجمعيات الاستهلاكية والقطاع العام والحديد والصلب والإصلاح الزراعي، وإجراءات اجتماعية كثيرة زي حق التصويت للمرأة ومحو الأمية، بعد ما مسك وتمكن من الحكم عمل خطبة مهمة ابتدا يتكلم فيها على بناء مجتمع جديد، مجتمع عادل وتوزيع أراضي وتأميم. أول مرة أسمع عن تحديد النسل من مسؤول في الدولة كان من بقة، في واحدة من الخطب قال ما معناه «لازم نحدد النسل في مصر، كنا أيام الملك حاجة زي عشرين مليون أصبحنا ما اعرفش كام مليون بعد خمس سنين، إن ما كناش نحط حدود وننظم العملية دي بشكل متحضر، سنتحول إلى شعب من الشحاتين، من المتسولين»، كان بيقول «إحنا بنينا مدارس كثير ومستشفيات كثير وبرضه ما يكفيس، اللي بيتولدوا أكثر كثير من اللي بيتبني من مستشفيات ومدارس». كررها بعد كذا والرؤساء اللي بعده كرروها كثير لأسباب مختلفة، وعملية تحديد النسل ما بتجش عندنا، طلعت معقدة ومش مناسبة لظروف الناس والناس مش متجاوبة، بس ساعتها كان فيه تصور إنها مجرد مسألة وعي، وعبد الناصر طرح الفكرة دي في حدود وعينا ساعتها وفي صميم النية على الاستقلال الاقتصادي والسياسي، في صميم التقدم. كانت تعتبر إجراءات نحو الاشتراكية، وفعلاً اتوصف نظام جمال عبد الناصر إنه «مش رأسمالي» لو كان نظام رأسمالي ما كناش يعمل إصلاحات وكان زمانه ماسك في سياسات رأسمالية مع الاستعمار، فكانوا

بيسموا نظام عبد الناصر نظام «البلاد النامية نحو الاشتراكية»، يعني دولة ما وصلت للاشتراكية نفسها لأنها في مرحلة نمو ماشية نحو الاشتراكية، مصيرها تبقى اشتراكية في يوم من الأيام .

وصل «خروتشوف» للحكم في الاتحاد السوفيتي، وفترة «خروتشوف» أدت إلى انفراجة كبيرة، مش بس في الاتحاد السوفيتي بل في العالم كله، وابتدينا نسمع عن ممارسات «ستالين» وحاجات مش مطبوعة بتحصل. شخصية «خروتشوف» اتحبّت في العالم كله يمكن أكثر من أي زعيم سوفيتي ثاني، أكثر حتى من جورباتشوف اللي جه في الثمانينات. «خروتشوف» فلاح وشعبي ومقتنع بالشيوعية، يبدو عليه الصدق وعنده شخصية قوية، ابتدى يعمل حاجات ملفتة غير متوقعة ولا من الاشتراكية ولا الرأسمالية. رئيس الفلبين قام قال حاجة ضد الاتحاد السوفيتي في الأمم المتحدة، بلد ضعيفة بتغازل أمريكا على حساب الاتحاد السوفيتي، الرد بتاع «خروتشوف» كان إنه قلع الجزمة وحطها قدامه على الترابيزة في الجمعية العمومية للأمم المتحدة، ورد وهدد بالجزمة في إيده، منظر «خروتشوف» والجزمة محطوطة قدامه جنب الميكروفون طاف العالم سبع مرات. أعتقد الناس حبّت خروتشوف لأن بتقهم لغته: «بالجزمة، على جزمتي، إنت فاكرك نفسك مين». حركة ثانية عملها إنه راح زار أمريكا، ممكن أول واحد يعملها وممكن الزيارة دي كانت بداية لمرحلة جديدة. في أمريكا طلب يزور المزارع ويتكلم مع فلاحين علشان هو فلاح، الطريقة اللي اتناقش بيها معاهم والطريقة اللي مسك بيها الفرخة أثبتت أنه فلاح بصحيح وإيده في الشغل، التفاصيل دي بهرت الأمريكان. أمريكا كانت لسه طالعة من فترة المكارثية اللي اتشهرت بمحاكم تقنيش ثقافية وكثير من الفنانين الأمريكان عانوا من الاضطهاد وأبعدوا عن العمل ومنهم اللي انتحر من الاضطهاد والعزلة، بسبب وبدون سبب. لأتفه الأسباب كان الراجل مكارثي دا بيشكك في ميول المتقف وبتهمه بالشيوعية والجاسوسية والعداء للوطن، وبعضهم كان متعاطف فعلاً مع الاشتراكية منهم «شيرلي ماكلين» وأخوها «وارن بيتي». «شيرلي ماكلين» قابلت «خروتشوف» وكان حدث عالمي وقعدت تهزر وتتكلم معاه بالأمريكاني وهو نكت معاهما أظن بالروسي، بس يعني رئيس الاتحاد السوفيتي بيقول نكت، مش بس كدا، هي قالت له تعال نرقص ورقص معاه. خروتشوف كسب شعبية كبيرة في العالم كله بسبب شخصيته وشجاعته في التغيير، جاب شوية أمل. في نفس الوقت انقسمت آراء الاشتراكيين والشيوعيين في أنحاء العالم حول خروتشوف: «إزاي «ستالين» بطل الاشتراكية يكون عمل حاجات وحشة؟ مش ممكن». بعض الناس مش مصدقين، وبعضهم مش عاوزين يصدقوا اللي «خروتشوف» قاله عن «ستالين»، ولكن فيه جزء من الناس وممكن أقول أنا منهم ابتدوا يفهموا ويفتحوا عينيهم ويحللوا وتذكروا انتحار «ماياكوفسكي» وتفاصيل ثانية .

خروتشوف كان بيعمل جولة في العالم، كل البلاد عابزة «خروتشوف» يزورها، اللي يعزمه هنا واللي يعزمه هناك، وكان على علاقة كويسة مع جمال عبد الناصر وجه يزور مصر، أثناء الزيارة لاحظت على وش عبد الناصر إنه بيحب «خروتشوف»، يبص له بإعجاب، وخروتشوف على سجيته زي ما هو في كل حنة وجاي مصر في مزاج المنتصر. أدى دعم للقضية المصرية بصفة عامة، وتأييد لحركة الجيش والحكومة المصرية بالتحديد، وأعلن عن تأييده للقضية العربية ومصر ضد إسرائيل، وكان موقف حلو، وأعلن عن توريد أسلحة لمصر للوقوف ضد إسرائيل في بداية الستينات بعد اشتراك إسرائيل في الحرب ضد مصر في 1956، وقرار دعم السد العالي كمان كان له علاقة بالفترة دي .

المعتقلين في فترة 1959 إلى 1964 كانوا يتعرضوا لعنف كبير، وشهدي عطية اتقتل في الفترة دي، كان فيه سوء معاملة وضرب وتعذيب ممنهج. ظروف السجن، أقصد المعتقل، كانت أوحش من ظروف الحبس بتاعنا، وفضلت سيئة لغاية ما جه «خروتشوف» رئيس للاتحاد السوفيتي، جه وقابل جمال عبد الناصر، بكلمتين جاب سيرة المعتقلين وصفقة السلاح والسد العالي، أسمع إن المعاملة اتحسنّت شوية بعدها. القصة اللي سمعناها هي إن «خروتشوف» قال لجمال عبد الناصر وهو بيزور مصر «بتوزع أراضي على الفلاحين وتأمم شركات للقطاع العام وتأمم القتال وعايز تبني السد وتعمل علاقات مع البلاد الشيوعية، معقولة إن الشيوعيين اللي عندك، الناس اللي نادى أصلاً بكل الإصلاحات دي حاططهم في المعتقل؟».

عبد الناصر وعده إنه حيفرج عنهم، وأفرج عنهم بالفعل، بالكلام مع سعد أكد لي إن جمال عبد الناصر أفرج عن أغلب الشيوعيين المعتقلين ساعتها بل وبعض الإخوان - مش كلهم. ومن ساعتها ولمدة سنتين ثلاثة أعتقد ما حصلش اضطهاد كبير للتقدميين ولا للشيوعيين بالشكل اللي حصل في العشر سنين اللي قبلها .

الفترة دي كانت كمان فترة شديدة في الصراع الفكري والسياسي في مصر لأن الحكومة كانت طالبة إن الشيوعيين يحلوا أحزابهم كتنظيم سياسي ويدخلوا في الاتحاد الاشتراكي، تنظيم الحكومة. فما أقدرش أوصف الخلافات كانت عاملة إزاي بين التنظيمات الشيوعية وجوه التنظيمات نفسها يعني بين أعضاء «حدثو» وبعض، سعد فكرني امبارح إن المسؤول في الفترة دي كان كمال عبد الحليم، كان فيه خلافات داخل «حدثو» حتى بعد ما «حدثو» حلت نفسها. سعد كان رأيه إن حتى لو حلوا الشكل التنظيمي لازم الحركة تستمر بشكل ما ويكون لهم رأي مستقل عن رأي الدولة، رفعت السعيد كان معارض تمامًا وكان رأي الحل يكون فعلي للتنظيم والحركة. نرجع لسعد في الحاجات دي قد ما نقدر إحنا الاتنين لأن أنا ما كنتش متابعه أبدأ الناحية التنظيمية، مين المسؤول ومين قال إيه ومين عمل إيه. انتهى الأمر إن «حدثو» حلت نفسها كتنظيم شيوعي وجزء من أعضائها دخلوا الاتحاد الاشتراكي بالفعل، وجزء تاني اترفع عنهم الحظر واتفق لهم إمكانية التعيين في المؤسسات الصحفية والثقافية، فؤاد حداد مثلاً اتعين في «روز اليوسف» بماهية صغيرة وجه يشتكى لسعد على أساس إن سعد يعمل محاولة يزودوا مرتبه لأن فؤاد كان متجوز وعنده ثلاث عيال ووراه مسؤوليات. فؤاد حداد كان موهوب ولطيف وحساس وفي نفس الوقت واعى بقدراته، خليط غريب من الحساسية والثقة، كان بيشرح لسعد بمنتهى الجدية :

- أنا أكبر شاعر شعبي في مصر حالياً، مش معقول يعاملوني بالطريقة دي .

بس سعد كان ملصم حاله في «الأخبار» أصلاً بصعوبة فما اعتقدش قدر يعمل حاجة .

بالإفراج عن المعتقلين الشيوعيين أصحابنا حسن فؤاد وأفريد فرج وصلاح حافظ و«ألبيير أربييه» وحليم طوسون وزكي مراد وغيرهم خرجوا. منهم كانوا خلصوا الحكم اللي عليهم لكن ما أفرجوش عنهم زي صلاح حافظ، سمعت إن لما خرج كان بقاله عشر سنين في السجن، خلص 8 سنين حكم وما طلعهوش، فضل معتقل سنتين فوق البيعة، خرجوا عدد كبير في نفس الوقت من دفعة 1954

ودفعة 1959. ومن ضمن اللي أفرج عنهم كان «هنري كوهين» اللي جه زارنا مؤخرًا مع ابنه
علشان يسجل ذكريات سعد عن سجن الواحات .

عملنا احتفال كبير بمناسبة الإفراج عن الشيوعيين، وكل الناس دُول اتوجدوا مرة واحدة عندنا في
البيت هنا في الدقي، واحنا اللي نظمنا الحفلة، حفلة شاي بكيكة وبتيفور بعد الظهر وفتحنا أوضة
الصالون على أوضة القُعاد، وليلتها صلاح حافظ غنّى لسيد درويش زي أيام تحية كاريوكا وحركة
السلام، صوته جميل ومؤدي موهوب. الحفلة دي كان لها طبع شبه سياسي، حد قام قال كلمة - في
شكل خطبة صغيرة كدا - عن المستقبل، وأكلنا وشربنا، كانوا مبسوطين. وقفنا أنا وسعد قدام
الفاترينة جنب شباك البلكونة فرحانين بوجود الناس دي وسعداء إنهم واخدين راحتهم عندنا في
البيت ينتقلوا من حطة لحطة، فسعد حضني كدا من كتافي ووقفنا نتفرج سوا على اللمة دي واحنا
مبتسمين، زكي مراد لقط المنظر دا وقال :

- إنتو عايزين صورة .

ما كانش فيه كاميرا، فأنا صورتها في دماغي، أجمل صورة، باشوفها على طول .

*

حكاية إن أبويا ما قدرش يسافر معنا إيطاليا وما أدلوش إذن العودة كانت القشة اللي قطمت ظهر
البعير زي ما بيقولوا وخلت أبويا وأمي يسيبوا مصر. أبويا عاش واشتغل على أساس إنه مصري،
«خواجة» مصري، ولما اشتغل في «النمرو»-3، كان على أساس إنه مصري مش أي حاجة تانية.
أسطى كهربائي بيسموه «مهندس»، مبسوط من الشغلانة، وصل لدرجة مدير وأدوا له عربية واتعلم
سواقة وبقي يسوقها، فلما ابتدا يقرب من المعاش وأصبح واضح إن عمره ما يحصل على ورق
الجنسية ويعيش عادي زي بقية الناس في مصر، ابتدا يفكر بجدية .

أخويا كان سافر هو كمان من غير أوراق الجنسية المصرية والكلام داير بين اصحابه إن الوضع
مقفول بالنسبة للخواجات، صعب تلاقي شغل وصعب التقدم في الوظيفة وفي التعاملات المالية
والممتلكات، حيتهم معاملتهم كأجانب. «برتو» كان بيفكر في السفر من زمان، شاب صغير بيبتي
مستقبله، لما راح إيطاليا قرر يتجوّز «إيلينا» وخذ الجنسية بسهولة على أساس إن أمه طليانية
واستقر هناك وجاب شغل في «فلورنسا» كمهندس تبريد ووضع استقر هناك بسرعة نسبيًا. الحقيقة
ما اعرفش التفاصيل لأن أنا كنت في السجن ولما طلعت كان على وشك السفر وانا كنت مشغولة في
وضعنا أنا وسعد ووضع البلد واصحابنا. وجود أخويا في إيطاليا ومنع أبويا من السفر بحرية شجع
أبويا في اتجاه الهجرة. بالنسبة لأبويا كان قرار هجرة، من ناحية أمي كانت تفضل إيطاليا جنب
عيلتها، ابتدت تفكر في السن الكبير وكانت ابتدت تتعب وتشكي من الوساخة والتراب والزحمة في
مصر. الوضع مش واضح بالنسبة للخواجات وأغلب أصحابهم وجيرانهم سافروا والبلد فضيت
حواليهم، دي الظروف اللي أبويا قرّب فيها من سن المعاش. في «النمرو» خيروه بين إنه ياخذ
مكافأة نهاية الخدمة أو يكمل يشتغل ويدفعوا له معاش شهري في المستقبل. واحد من المسؤولين
الأمريكان في الشغل قال له :

- إنت لسه بصحتك وتقدر تشتغل، واحنا عندنا مركز «نمرو» كبير في «نابولي»، ممكن أوصي عليك وتاخذ المكافأة وتكمل تشتغل هناك، أنا ممكن أنقل لك المبلغ إلى إيطاليا .

أكيد أمي وأبويا حسبوها مع بعض لقوا إن دي أضمن حاجة. لو ما سافروش ممكن بعد كام سنة برضه يضطروا يسيبوا البلد لأن الأوضاع مش مستقرة، وساعتها مش حيلاقوا العرض دا، وجود العرض دا حسم الأمر. لكن في النهاية يُعتبروا سافروا بخُطْرُهم، السلطات المصرية ما رحلتهمش ولا طردتهم زي ما حصل لناس تانية، ضيقت عليهم فقط، وبسبب الشعور العدائي ضد الأجانب الـ «Xenophobia» ، مش مرتاحين كخواجات فسافروا لتوضيب أوضاعهم بشكل أفضل. أمي كان صعبان عليها تبعد عنك إنت :

- البننت الصغيرة دي، يارب عايزة أعيش لغاية ما اشوفها متجوزة. يارب إحنا دايماً طماعين، في الأول بنقول نشوفها كبيرة وبعد كدا متجوزة وبعد كدا مخلفة، يعنى مش عاوزين نموت أبداً .

خدوا القرار ونفذوه في 1965، وغفش أهلي طلع من جنب كوبانية النور من أبو العلا في صندوق خشب كبير وركب سفينة من اسكندرية استلمه «برتو» في «نابولي» في إيطاليا وأهلي سابوا مصر. فيما بعد غفش بيت أبو العلا راح مع «برتو» من «نابولي» إلى قرية «ريبيا» وموجود هناك في بيته لحد النهاردا .

وقت سفر أبويا وأمي أنا كنت غرقانة لشوشتي في الحياة الثقافية المصرية بعد ما أصحابنا خرجوا من المعتقل. حسن فؤاد كان ألف مسرحية غنائية اسمها «الشاطر حسن» وأفريد فرج كان بنى مسرح في سجن الواحات وقرروا عايزين ينفذوا الإنتاج الفني اللي عملوه في الحبس. حسن فؤاد خد بيتنا مقر لتنفيذ الأوبريت هنا في الأوضة دي، أوضة الصالون مع فنانين غير محترفين، لَمَّ حواليه مجموعة من الفنانين والأصوات الجميلة - حسن ميّال لكل الفنون مش بس الرسم - ما كانش شاعر ولكن بيكتب حلو، وفيما بعد أصبح رئيس تحرير «صباح الخير»، وكتب سيناريو وبيضرب مزىكا كمان، واستخدم كل مواهبه دي في «الشاطر حسن». كل ليلة تقريباً مجموعة «الشاطر حسن» يجتمعوا هنا، الكنبة والفوتيلات وكرسي من هنا وكرسي من هناك دايرن داير الأوضة وبعضهم يقعد على الأرض، ويحضر عدد كبير من الناس من ضمنهم واحدة جديدة على المجموعة اسمها نجلاء كانت بنتشغل في مسرح العرايس مع بدر صوتها حلو وعملوها بطلّة المسرحية - بعد كدا نجلاء اتجوزت سمير عبد الباقي اللي أصبح مدير «المركز الثقافي السوفيتي» - مش فاكرة مين كان بيلعب دور «الشاطر حسن» والتلحين والإخراج والتمثيل كان في ساعتها. وأنا ورضا مرات حسن وصلاح جاهين وسيد مكاوي وبدر حمادة مصممة العرايس مرات بهجت عثمان الكاريكاتيريست وغيرهم كانوا بيحضروا معنا هنا في البيت بروفات «الشاطر حسن» على قعدة بسيطة، حسن يجيب شوية حاجات واحنا نحضر شوية حاجات. بالطريقة دي كل ليلة، جدو ونانا يقعدوا في أوضتهم، مش سايبينهم يناموا، واحنا متكديسين هنا في الصالون، وحسن فؤاد بالساعات يضرب مزىكا بالزيلوفون ويعمل مخرج. ممكن أقول لك إن احنا استمتعنا في الوقت دا كتير لدرجة إنني ما اعرفش انتهت على إيه البروفات دي، اتعرضت ولا ما طلعتش في الآخر أوبريت «الشاطر حسن» كمسرحية غنائية للجمهور، اللي ظهرت واتشهرت كانت «الليلة الكبيرة»، فنانين من نفس المجموعة اللي عملتها . في الفترة دي - أوائل الستينات - طلعت مسرحية «الرافير» ليويسف

إدريس . نسيت اللي كان عامل دور الفرفور عبد السلام محمد؟ المسرحية دي نجحت قوي جماهيرياً. نجاح «الليلة الكبيرة» و«الفرافير» كان انتصار لنظريتنا، إن الجمهور لو يتعرض للثقافة يصبح مثقف . وصدرت أول مسرحية لسعد وهبة، أنا حبيته من قبل مسرحية «سكة السلامة». المسرحية الأولانية اللي اشتهر بيها، قصة خاصة بالظباط، بين المأمور والظابط، قصة يظهر عايشها بنفسه فقدر يصورها كويس ويكتب إزاي مرات المأمور بتؤمر. سعد وهبة ظابط وكانوا بيقولوا «شوفوا حتى بين الظباط في مواهب فنية». ومسرحيات ألفريد فرج كانت ناجحة في المسرح القومي بأحسن الممثلين وأشهرهم. نعمان عاشور عمل «الناس اللي فوق» و«الناس اللي تحت»، ومن أوائل الروايات اللي اتمثلت في السينما في الفترة دي «الحرام» ليوسف إدريس فيلم فاتن حمامة وهي بتعيط وبتقول «جدر البطاطا»، حاولت تسقط نفسها وجالها حُمى وحتموت، وفتحي غانم طلع رواية «الجبَل» اتعملت في السينما. كانت حالة من الانتعاش الفني والثقافي تشبه حالة بداية الخمسينات، دا الجو اللي كان لا يمكن ينتعش في وزارة عبد القادر حاتم، دي كانت أجواء ثروت عكاشة. أغلب الناس دي كانوا مسجونين ومنبوذين، ولما خرجوا الجرايد ابتدت تكتب عنهم وتحققي بأعمالهم الفنية وتقريباً كل ليلة نروح حدث ثقافي جديد كأنهم ما كانوا محبوسين. حاجة حلوة، فترة ثرية مليانة حرارة وحماس وحب لنظام جمال عبد الناصر، خلانا برضه ما نفكرش إنه نظام دكتاتوري، الأضرار كانت كبيرة ما حسيناها بيها في ساعتها .

وضع سعد استقر في جريدة «الأخبار» شوية ومن ناحيتي حسيت إن الدنيا اتغيرت والمفروض يكون معايها شهادات أعلى، وإن أصحابنا الطلائية اللي كانوا بيقولوا «الكفاح الكفاح» و«التعليم فكرة طبقية وتطلعات برجوازية» وخلصوني أسيب التعليم وادخل السجن، أصحابنا دول مشيوا. كانت حاجة مش سهلة ليّ - من غير شهادات - في مصر. في محاولة من المحاولات فكرت اشتغل في الإذاعة على أساس إن في الراديو بعد الظهر فقرات بالإنجليزي والفرنساوي والألماني واليوناني ونص ساعة إيطالي، فقلت لسعد، وسعد نجح يدبّر مقابلة مع عبد الحميد الحديدي مدير اللغات في الإذاعة والمحطات الأجنبية. الحديدي بعثني يعملوا لي امتحان الإذاعة علشان اشتغل مذيع في البرنامج الإيطالي. لبست ورحت في الميعاد وامتحنوني: قرأت لهم حاجة بالطللياني، وبعدين اختبار ترجمة، ومع إنني كنت فاهمة العربي والإيطالي اللي مكتوب حسيت إنني ما قدرتش أترجم كويس، مسألة إن الواحد يترجم من لغة للغة عاوزة شيء من التدريب، أعمل جملة واسيب جملة، اتلخبطت شوية وانتهت فترة الاختبار .

- عندك شهادات إيه؟

- ثانوي تجاري .

حسيت إنه قليل، مش جامعة، دا غير إن الشهادة اسمها ثانوي لكن هي المقابل للإعدادي .

- عندك عيب في حرف الـ «S» بيطلع صفارة في التسجيل .

أنا كنت عارفة إن عندي عيب في الـ «R» ما كنتش أعرف عن عيب في حرف الـ «S» كمان .

- آسفين، ابقى ارجعي نعمل لك اختبار في أشغال ثانية .

رجعت لسعد :

- ما نجحتش .

- معلىش خلاص .

- طيب ...

قررت أدخل التعليم من أول وجديد، حسيت إن ممكن أكمل دراستي وانا كبيرة. ابتديت أفكر واتكلم مع سعد «أخذ ثانوية عامة بالعربي؟» كنت حاسة إن سهل عليّ أمتحن ثانوية عامة من منازلهم، وساعتها ما كانش فيه كل الصعوبة دي في اختيار الكليات، أنا كنت احب أخش جيولوجيا زمان، فشوية أحلام جت لي في ذهني إن انط في الزمن وارجع تاني واحققها. راجي عنايت وحسن فؤاد ساعدوني في البحث عن إزاي الواحد يخش في موضوع تعليم الكبار، الجهة المسؤولة إيه؟ وإجراءات القيد فين؟ واروح لمين؟ اكنشفنا إن مش ممكن اخش امتحان الثانوية العامة إلا لو عندي الابتدائية العربي، يعني شهادتي مش محسوبة، ما تعادلش حتى ابتدائية مصري. نصحوني أمتحن ابتدائي للكبار اللي فاتهم سن المدرسة. أنا ساعتها كان عندي أكثر من ثلاثين سنة .

- مش ممكن الثانوية إلا بالابتدائية، اهه، الفصل اهه، وبكذا فلوس في الشهر، لازم تحضري .

- مش ضروري الحضور أنا أخذ الكتب وادرس في البيت وامتنح .

- لا ما ينفعش لازم تحضري .

راجل رزل تاني زي الراجل بتاع الجوازات اللي ما كانش عايز يديني حق العودة قبل السفر لإيطاليا .

ابتديت أحضر فعلاً وجبت الكتب بس كان شكلي غريب، كنت أكبرهم، أغلبهم عنده حوالي 14 سنة. كان فيه واحدة أو اتنين كبار إلى حد ما، بس بطلوا ييجوا، يئسوا؟ أو يمكن بيتصلوا بالمدرسين وبالمدير، أنا لأ، كنت من غير توصية ولا علاقة من تحت لتحت فكنت باروح كل يوم. استمرت لشهور بس في فترة معينة ظهرت عندي صعوبة في الجبر والهندسة، بين الإيطالي والعربي كان فيه اختلاف وكان محتاج شغل كثير مني ويمكن مساعدة لغاية ما أخذ على الرياضيات بالعربي. لا زالت لغاية دلوقت الأرقام في دماغي بالطلاني، وبعد كدا «الشؤلة» - العلامة العشرية اللي اسمها «virgule» بالفرنساوي - كانت بتلخبطني علشان كانت عكس. الحكاية كانت عايزة عزيمة أكثر، اتدرب واستمر ويكون عندي التصميم إن أخلص، أنا الحقيقة ما عملتش دا، وفي الامتحان الأخير ما قدرتش. حصل لي نوع من اليأس وكمان شيء من الخجل إن أروح زي التلميذة الصغيرة بشنطة

تحت باطي وانا لابسة ست كبيرة واقعد في وسط التلاميذ الصغيرين دُول، استمريرت الشوية دول
وبعدين سبت .

سبت كمان لسبب تاني .

في التوقيت دا جت شغلانة «دار الهلال» .

ظهرت في حياتنا صحفية اسمها حُسن شاه بتشتغل في مجلة «آخر ساعة»، تعرف سعد من مؤسسة
«الأخبار»، وابتدت تفكر تكتب عن المرأة، وجات لنا البيت نتكلم عن قضية المرأة واللي أعرفه عن
الحركة النسائية في إيطاليا وأوروبا، كانت محررة ممتازة واهتمت بكل اللي حكيتة لها. في نفس
الوقت «دار الهلال» كانت بتصدر مجلة «حواء» وأمينة السعيد كانت مؤسّسة المجلة ورئيسة
تحريرها، مجلة ناجحة وبتدخل كل البيوت لدرجة إن أنا لما اتجوزت وجيت هنا في البيت لقيت
حماتي بتشتريها من يوم ما ابتدى إصدارها وعندها كل الأعداد محتقظة بيهم، ما ترميهمش. رئيس
مجلس إدارة «دار الهلال» كان صديقنا أحمد بهاء الدين، اتصل بي وقال لي إن محتاجين صحفيين
جداد في «حواء» وبعنتي لأمينة السعيد، بهاء بالرغم من إنه صديقنا لكن عمرنا ما كنا اتكلمنا مع
بعض وما كانش عنده فكرة إن عندي شيء من الثقافة في قضية المرأة، هو استشار حُسن شاه وهي
رشحتني. السبب في الحركة دي في «حواء» إن مصطفى وعلي أمين كانوا على وشك يطلعوا مجلة
للمرأة اسمها «هي» من «أخبار اليوم» أعتقد بالاشتراك مع مجلة «Elle» أو «هي» الفرنسية
المشهورة، ياخدوا صور منها، ف«دار الهلال» قلقوا من المنافسة وفكروا يدعموا «حواء» بناس
جديدة ويعملوا تغييرات. ما اعرفش حُسن شاه قالت لبهاء إيه عني، بس احنا كنا اتكلمنا عن سيمون
دي بوفوار في فرنسا وحركة إباحة الطلاق في إيطاليا، وحركة إباحة الإجهاض في فرنسا، بشكل
عام الحركة النسائية كانت بتتمو وبتأسس في أوروبا وانا كنت متابعة .

رحت قابلت أمينة السعيد :

- تحبّي تكتبي عن إيه؟

- طب ما ننشر صور للملكات والأميرات والحاجات اللي زي دي .

أنا مش قادرة أنسى رد فعلها، سكتت خالص .

- دي حاجات الناس بتحب تقرأها وحتى اللي ما بيقراش يحب يتفرج على الصور. المجلات زي
«Elle» و «Epoca» في إيطاليا، مليانة صور للعائلات المالكة .

ما قلنتش إن أنا بالذات باحب اتفرج قلت «الناس بتحب تتفرج»، أمينة السعيد الله يرحمها بصت لي
كدا وقالت بهدوء :

- بس مش تفتكري الحاجات دي فات أوانها ومش وقتها؟

- آه يمكن عندك حق، بس لسه الناس بتحب تتفرج عليها .

أكدت قالت عليّ ست مجنونة، أنا جاية لها بتوصية على أساس إنني مناقلة كبيرة خالص وشيوعية ومتشددة وطالعة من السجن وبعدين أقول لها نحكي حكايات الملوك والأميرات؟

بعد شوية سألت تاني :

- طيب، تقترحي إيه موضوعات غير كذا؟

- أحب اكتب عن حاجة خاصة بالمرأة في إيطاليا .

ما كانوش اخترعوا بامبرز جاهزة، الأمهات كانت بتجهّز تحت قماش وكنا بنخيّطها على اليد أو على المكنة وبنغسلها وننشرها، كانت حاجة مرهقة والغسالات ما كانتش فول أوتوماتيك والصابون ما كانش بيرغّي ولا بيتشطف زي دلوقت، وكنا بنستعمل الدبابيس الإنجليزي علشان الكافولة ما تفكّش من على العيّل ولازم الواحد ياخذ باله لاحسن الدبوس يتفتح ويشكشك بطن البيبي. مجلة «نحن النساء» نشروا باترون لطريقة سهلة للربط بدون استخدام الدبابيس، وانا نفذت الكافولة دي علشانك، جبت قماش البافطة وقصّيت الباترون وخيّطت الحروف على المكنة وأمي صممت أعمل 12 كافولة قبل ما تتولدي، وطلعوا ناجحين بصحيح. قدمت لأمينة السعيد الفكرة دي :

- هاييل، كويس .

وسمّيت المقالة «رسالة روما: طريقة مبتكرة لعمل الكافولة» والمقالة نجحت وأعتقد إنني احتفظت بالعدد دا من «حواء».

مع كل شيوعيتي وكل الجمود اللي كان عندي في البداية ولفترة طويلة، ما بطلتس أهتم بما يكتب عن العائلات المالكة، وتقريباً أعرف أسامي معظم البرنسيسات والأميرات بتوع أوروبا. ولغاية دلوقت لو فيه مقالة عن الملوك القدماء أو الحاليين أقرأها على طول. قصصهم بتعمل لي راحة والحكاية دي بتضحكني على نفسي. ولما جيت البيت هنا لقيت حماتي محتقظة في درج من الأدراج بالمجلات اللي كانت بتنشر أخبار الملوك، واحتفظت بيهم بسعادة ولسه موجودين. برّضه دا فيه نوع من التناقض مع الشدة والجدية اللي خدت بيها الفكر الماركسي والشيعي والكفاح لأن المفروض الملوك برجوازيين، أعداء الشعب. ممكن هم أعداء الشعب فعلاً، لكن المتعة دي مش موقف سياسي، أنا باحب الحواديت. عمومًا الجو هنا في مصر كان ماشي عكس الحواديت، الجو كان بناء الاشتراكية والطبقة العاملة وعدد الكراسي في البرلمان، كام كرسي للعمال وكام للفلاحين .

تاني حاجة نشرتها هي الكولونات شرابات طويلة توصل لحد الوسط زي الملابس الداخلية، كان اختراع جديد. الستات عادة يلبسوا «jarretière»، اللي هو حزام على الوسط فيه شرايط بتنزّل منه لأول الفخد تشبك في الشرابات الحريمي وتمسكها علشان ما تقعش والحقيقة إنها كانت طريقة مش مريحة في اللبس. الكولون نجح وانتشر واللي يعرف حد مسافر بره يوصّيه يشتري كولونات.

طلعوا أنواع كولونات دانثلة وكروشييه ومزركشة وبرضه دا كان تجديد، الشرابات الحريمي كانت سُودة للخروج بالليل أو ببيج لون الجلد بالنهار. انتشر الكولون اللي ابتدا من فرنسا في العالم كله. قدمت صور من الكولونات المزركشة، وبرضه المقالة دي عجبت القراء فطلبوا مني أفكار من النوع دا. أنا كنت راجعة من أول سفريه لإيطاليا، وكنت مبهوره، مثلاً أول مرة أركب السلم الكهربائي، اتخضيت وخُفت ومسكت الدرازين، حاجة جديدة الواحد يطلع وينزل والسلم بيتحرك تحته. أنا دلوقت بافكر إني اهتمت أكتب عن مواضيع الكافولة والكولون وحتى السلم الكهربائي بشكل عفوي لأنهم سهّلوا حياتي وساعدوني أوفر شوية طاقة ووقت لاهتماماتي الثانية، كنت مشغولة بدوري كأم وعندي اهتمامات سياسية وثقافية فباكتب مواضيع بترد على احتياجات واحدة عايزة تكون أم كويسة وفي نفس الوقت عندها اهتماماتها العامة. بعد كام مقالة ما لقيتتش في تفاصيل البيت الأوروبي مادة أكثر تهمننا، بقوا يعملوا جاهز وأتوماتيك فياه معنى إن أنا أقعد أنشر صور مطابخ ممتازة مليانة مكن مش متوفر في مصر؟ فترة جمال عبد الناصر الاستيراد كان ضعيف وما كانش فيه حاجات من بلاد بره، ولما ابتدئ الاستيراد في السبعينات الحاجات دي دخلت بس برضه مش في متناول الناس، ومش كلها مفيدة فيه حاجات استهلاكية، فزهقت من الموضوع وجذبتني الكتابة عن الحركة النسائية. مرة أو مرتين أمينة السعيد سألت :

- ما عندكيش أفكار زي أفكار الكافولة؟

وانا لما كنت بالاقى حاجة مفيدة كنت بانشرها، بس سببت نفسي لأخبار وأفكار الحركة النسائية في فرنسا وفي إيطاليا زي كلام سيمون دي بوفوار، والحكاية استمرت بالشكل دا وما رجعتش تاني لمواضيع الموضة .

دي قصة بداية الكتابة في «حواء» كان فيه ناس لطاف في المجلة زي إيفون رياض، سكرتيرة تحرير استقبلتني كويس وفضلنا اصحاب، صداقة عمر، وكان فيه مدير تحرير عرفت بعد كدا إنه كان من التقدميين زمان، تعاطف معايا ونشر الباب بتاعي وشجعني للأسف مش قادرة افكر اسمه. رعاية النمر دخلت «حواء» في نفس الوقت معايا، كانت تخصص ديكور وخبيرة في الفنون والحلي الشعبية، أدوها صفحة علشان تكتب وتنشر صور، أنا ورعاية اتصاحبنا وبقت صداقة عمر واتجوزت أبو العينين على إيدنا أنا وسعد، وكان فيه إيفون ماضي بنت زوزو ماضي الممثلة المعروفة اللي قابلتها في السجن، ملكة جمال سابقة ومصممة أزياء، وكان فيه واحدة تالته، كنا أربعة جداد ككل. مش كل الناس كانوا لطاف، كان في واحد متضايق مني وبيحاول يضايقتني من أول يوم، اسمه أحمد زكي عبد الحليم، لقيته في «حواء» لما ابتديت اكتب وكان محرر صغير، بعد كدا بقى مدير تحرير وبعدين على المعاش وعنده الصفحة بتاعته لغاية دلوقت في «حواء».

وفي يوم في سنة 1966 ضرب جرس الباب في البيت هنا، اتنين ظباط - تاني .

- السيدة نايلة كامل؟

نايلة كامل؟ قبل كذا كثير من موظفين الإدارة المصريين كانوا يصمّموا ضروري ينادوني «ماري روزنتال» مع إني كنت غيّرت اسمي وأسلمت من سنة 1954. المرة دي الضباط سألوا عن «نايلة كامل»، فأنا وسعد رحنا نستقبلهم مع بعض على الباب :

- مبروك الجنسية. الجنسية المصرية اهه .

من كتر فرحته سعد حاول يدخلهم :

- طب تشرخوا حاجة، ما يصحّش .

- لا متشكرين قوي متشكرين قوي .

الضباط كمان كانوا مبسوطين، أصلهم ضباط جايين خبر حلو، بيلاقوا ناس مبسوطين، بدل ما يروحوا يقبضوا على الناس، بيلاقوا ناس بيعيطوا. المهم ما رضوش يدخلوا بس كان وشهم مبتسم ومنور، سعداء بينا، نزلوا ومشيووا فرحانين. دفتر الجنسية دا موجود، الجلدة بتاعته وحشة قوي بتلرق في كل حاجة كأن فيها صمغ، فحطيتها في ورقة فلوسكاب عادية فلزقت فيها برضه ومش راضية تطلع ومش عارفة حاصلها ازاي. بس إيه خلاص خدت الجنسية المصرية، أنا كنت عشت بالإقامة أكثر من 5 سنين وانت اتولدت في الأثناء دي وحاجات كثير حصلت. ومن ساعتها ما قابلتش أي مشكلة إدارية ولا بسبب الدين ولا بسبب الجنسية، باطلع جواز السفر عادي زي بقية الناس. كنت ساعتها ابتديت اشتغل في «دار الهلال»، وكانوا عارفين إن ما معايش الجنسية المصرية، فرحت لمسؤول الإدارة سعيدة وقلت له :

- أنا حصلت على الجنسية المصرية خلاص، قيّد كذا عندك في الدفاتر .

كنت عاوزة أجيب خمس أو ست عيال، نص دسطة، واعمل شوية زي «جولي أندروز» في فيلم «صوت الموسيقى»، باحب الأولاد وقعدت أتمرن في تربية مها بنت جمال عمك ولميس بنت جميلة عمك، ولكن طلع إن الواقع غير كذا. العناية بطفل صغير حاجة كبيرة، ومش كل الأطفال زي بعض، طفل مليون حيوية وإرادة للطلبات البيولوجية زيك، جعانة أو أي حاجة، بتطالب بالصرخ، والصرخ كان بيدوس على أعصابي وانت مش دريانة بي. شوية الخناقات اللي كانت بتقوم بيني وبين سعد في الحياة اليومية العادية زادت، إحنا نحب الثقافة والسياسة والحياة العامة بس من غير ما ناخذ بالنا أنا كنت باطلب منه يكون زوج ليّ وأب ليك في صورة تشبه لأبوي، راجل إيد في البيت يساعد ويصلح ويخطط، بس سعد كان العكس خالص. وهو كمان كان بيطلب مني إني أكون صورة من أخته جميلة في علاقتها مع علي الراعي، أو نانا مع جدو بس دا ما كانش متاح. لما ابتديت تتكلمي قلت لنفسني «ولا خمسة ولا ستة، هو عيّل واحد وبس» وقررت لو يبجي حمل ثاني حامل إجهاض، وحصل، وفعلاً عملت إجهاض. لما عملت إجهاض ما كنتش اعرف لو كنت حامل في ولد ولا في بنت، ما كانش لسه فيه التكنولوجيا دي، بس حماتي كانت مقتنعة إن أنا نزلت ولد، ما كانش مبسوط من اللي عملته وما قالتش حاجة. على أي حال أنا ما سألتش حد، وسعد قال لي اعلمي زي ما انت عايزة. اللي ساعدتني صاحبتني سهير، حكّت لي إن هي وجوزها من النوع اللي ما نفعلش

معاهم أي نوع من موانع للحمل، يتحمل من الهوا وبتحلف إن جوزها بس يعدي جنبها بتحمل، وكنا بنضحك. دلّتي على دكتور بيعمل لها العملية دي في ميدان السيدة زينب وما بيسألش «ليه» أو ينصح «ما بلاش»، أدّتي العنوان ورحت لوحدتي والراجل ما سألش فعلاً وعملت العملية في صُبحية في بحر ساعتين تلاتة، على بعد الظهر كنت رجعت البيت، وخلص انتهت المسألة وأنا ما فكرتش في الموضوع. ابتدى يبجي لي صداع وكانت يتمسكني حالة نوم، أنام في وسط النهار كدا. شريف حتاتة قال لنا على د. أبو شادي الروبي زميله في الكلية :

- دكتور كويس، مش مسألة يحفظ ويذاكر ويطلع الأول في الكلية، بيستعمل ذكاؤه .

وفعلاً أبو شادي الروبي سمعني كويس .

- بانام كثير، مثلاً كبس عليّ النوم هنا في العيادة عقبال ما اخش عندك ونمت وأنا قاعدة .

- إهيه؟ نمت دلوقت؟

عمل أشعة على المخ وعلى الجمجمة وكشف على العينين علشان يستبعد شوية حاجات :

- عندك كسل في الغدة الدرقية .

هو اللي اكتشف المشكلة دي وودّاني عند أخصائي، وابتدت بقى المسيرة الطويلة بيني وبين الغدة الدرقية. وبقى عندي ثقة كبيرة في أبو شادي الروبي، وبقيت آخذ عنده الناس، فضيلة مرة عيّت فقلت أنا حأخذك عند أبو شادي الروبي، وخذتها وودّتها. ولما عيي خليل في العزبة ما كناش فاهمين إيه تشخيصه، كان عنده بلهارسيا وراح مستشفى الفيوم وأدوا له أدوية ومفيش تحسن، فخذت خليل وديته عند أبو شادي الروبي. أبو شادي الروبي استغرب إن أجيب له عيّن من الفلاحين، كشف عليه بدقة وقال لي عنده مرض نادر، فيه نوع من الزيوت بينقص في مراكز الأعصاب، وبيؤدي إلى شلل بطيء، مفيش دوا له إلا إنه يتعمل عليه أبحاث، وكتب له دخول القصر العيني وعملوا شوية تجارب وما جابتش نتيجة، حالته زادت مع الوقت. خليل كان المسؤول عن الأرض كلها، فلما عيي كدا جابوا واحد يساعده اسمه محمد علي، شاب صغير وابتدا محمد علي الشغل تحت إشراف خليل. أنا كنت مستمرة في المرواح للعزبة وكنت متابعة الناس هناك وهم ابتدوا يتابعوني وطلعت لي واحدة اسمها أم حسين مرات عم عبد الله، لسانها طويل جريئة ومقتحمة أكثر من أي ست تانية هناك، تبجي لي البيت :

- سلاما لااه ...

هم بيتكلموا كدا في الفيوم، الكلمة تدوب في الآخر وتختفي قبل ما تخلص بكذا حرف، مثلاً نفوسة ينادوا عليها «يا بالاه... يا نفوووه...» يعني «يا بت يا نفوسة». المهم إن «مُحسأه...» - أم حسين - تدخل عليّ البيت وتسلم وتقع من غير عزومة، تتكشني وتهزر معايا، خواجاية بقى ومش فاهمة

الهزار بتاعها بسهولة وهي تقول حاجات نص جد نص هزار. يملكو حاجات محدودة، بهيمة أو بهيمتين، ومرة جابت لي كام بيضة وقالت لي :

- أنا جبت لك دح .

أنا ما اعرفش الدح دا إيه، فضلت تضحك عليّ إن ما اعرفش الدح وضحكت عليّ العزبة كلها، والفروجة اللي هي الفرخة وكلمات تانية، اكتشفت إن أنا مش فاهمة كل كلامها فتعاكسني وكانت تضحك عليّ كل حاجة أنا مش فاهماها، نص جملة هنا وكلمة هناك، كلمات كتير لها معنى وإيحاء تاني، فإذا أنا مش عارفة المعنى الأولاني أكيد مش عارفة المعنى التاني، وتضحك. كتير مصريين ما يعرفوش الكلمات دي، كلمات محلية وممكن مناطق تانية من مصر بيسمّوها حاجة تانية، وبالذات في المدن ما يعرفوش، بس هي كانت تحب تعاكسني. إنت كنت بتسافري العزبة مع نانا تقعدني معاها بالشهر، تروحي لأم حسين تلعب مع بناتها وكانت بتتكشك كتير انتِ كمان. عم عبد الله جوز أم حسين راجل طيب ولطيف وفلاح قديم بيقيم في الزراعة لما جدو جه سيلا جابه معاه هو وعشري ومسكهم مسؤولية الزراعة فنيًا، كانوا فلاحين مَهرة، دا بالمقارنة لخليل اللي ما كانش «فلاح» وانما «من العرب». كان اكتشف إن مش كل الفلاحين فلاحين، بيقولوا «خليل من العرب، بيربّي الغنم، مش فلاح»، ومع ذلك مدير الزراعة في العزبة ومساعد جدو علشان «عنده أمانة». خدوم يعرف يتعامل مع العيال، ولما نتشاقى كنا نقول له :

- يا خليل خلّي بالك من نادبة شوية .

يشيلك ويكلمك وياخدك معاه على الجرار، كننو بتحبوه. حاجة تانية بتميز خليل إنه كان بيسمع الراديو، ناس العزبة والقرى اللي حوالها بيجوا يسمعوا الراديو معاه، ذكي ومتقف، ولما الضيوف تيجي وبالذات أصحاب سعد يحب يقعد معاهم يسمع ويتناقش ويسأل .

أم حسين عندها ثلاث بنات، واحدة منهم اسمها نادبة، اتجوزوا كلهم، وأولادها حسن وحسين ويوسف ما حدش فيهم طلع فلاح، أعتقد حسين اتوفى زمان، اتعرفنا على يوسف ابنها وهو ولد صغير عنده عشر سنين وكان وشه مدور وجميل، نانا جابته لبيت الدقي متصورة حتعلمه يساعدها في البيت زي ما علمت محمد السنوسي، يوسف ما استحملش مش عاوز يتعلم يكنس، بالنسبة له شغلانة مش للرجالة. محمد السنوسي من النوبة أو من الواحات، فيه عنده شيء من المرونة والثقة، عادات وثقافة مختلفة. أشرف حفيد أم حسين كان بيحي لي هنا أساعده يذاكر إنجليزي وفرنساوي علشان يقضي الامتحانات، وبعدين كبر وبيشتغل سباك وعنده ولد وبنت .

في فترة خروج المعتقلين وبداية شغلي في «حواء» وحصولي على الجنسية وسفر أهلي ابنت العيال تكثر حواليك، عدد كبير من العائلات الشابة، حلمي التوني ونادية-إيفون مخلفين ريم، بهجت عثمان وبدر حمادة عندهم هشام ووليد، سميرة شفيق وإيهاب شاعر خلفوا شهد وياسمين، راجي عنایت وشويكار جايبين جمال وليلى ومنى، وطبعًا بهاء وديزي كان عندهم ليلي وزياد. ليلي بالذات، كانت يا دوبك أكبر منك بسنة، وابتديتوا تلعبوا وتتخافوا على طول من أول مرة قابلتوا بعض. ساكنين جنبنا وبيسعدني إن ديزي تسبب ليلي تيجي تبات معاك لما كانت ديزي عندها

التزامات اجتماعية مع بهاء، وفي أعياد الميلاد تجيب قرايبها في بيتها وعيال كثير وانت من ضمنهم. أنا خدت على ديزي وهي خدت عليّ، عرّفت إزاي تعاملني وتدخّلي في مجتمع من المجتمعات المصرية، مصر فيها مجتمعات كثير مختلفة وأنا ما كنتش بافهم الفروق، فكنت باكتشف على إيد الناس اللي حواليّ. أحمد حمروش قال لسعد :

- اشترك في نادي الجزيرة، أرحك وتبقى عضو، دي حاجة مريحة للعيلة وبتساعد العلاقات الاجتماعية .

اشتركنا ورحنا حمّام السباحة أنا وديزي، كنتو صغيرين ودخلناكم البيسين الصغير انت وليلي، وقعدنا نسلي بعض، فجأة ديزي قالت :

- ليلي، ليلي، ليلي .

ودخلت البيسين بصندلها وانتشلت ليلي، أتاري ليلي شرقت وابتدت تكح وتغطس في الميه وأنا مش واخدة بالي، من ساعتها ما رحناش ثاني من غير دادة، حتى لما كنت باخدكم لوحدي ومش حانشغل في الكلام، ديزي كانت بتبعك معايا الدادة احتياطي علشان لو أنا سرحت. ديزي خلفت زياد لما كان عندكم 4 و5 سنين ورحتوا المستشفى انت وليلي مع بعض وشلتوا النونو الجديد وكنتو متحمسين أنا خدت بالي وسكت، برّضه ما جبّتش عيال ثاني. انت دخلت الحضانة وابتديت تقولي لي :

- أنا معنديش اخوات ليه؟

وبعدين في مرة رحنا صيّفنا في أبو قير مع شلة أصحاب، ونسيم هنري صديقنا النّحات قعد يبص لك وانت بتلعب في الرمل ويرسم البروفيل بتاعك على الرمل، وقال :

- بروفيل ملايكة «ميكلانجلو» اللي في الفاتيكان .

كنت هديت ونسيت الموجة الأولى من العياط والصريخ اللي الحب فيها بيكون نظري شوية، كبرت شوية ولما العيل يكبر الأم والطفل ياخدوا على بعض، العيل يحب الأم أكثر، والأم تحب العيل أكثر، وقلت يلا نجيب عيل ثاني، كان متأخر شوية بس مش قوي .

*

في نفس صيف 1966، نانا وجدو راحوا يصيّفوا في راس البر زي كل سنة وسعد قال لجّدو :

- ما تاخدوا «ماري» ونادية معاكم؟

وأنا علشان أعرف آخذك قلت لديزي :

- ما ناخذ ليلي معانا؟

لطيف من ديزي يكون عندها ثقة تسبب بنتها تسافر معنا، ولطيف من نانا وجدو ياخدونا في المغامرة دي. السفر كان بالقطر لغاية دمياط ومن دمياط ناخذ تاكسي لعشش راس البر، جدو عارف السكة والإجراءات، كبر في السن بس نشيط ورئيس رحلة، مش يقف وما يقاش عارف يتصرف، لأ، قائد مريح. سكننا في عشتين جنب بعض، نانا وجدو في عشة، واحنا في عشة. العشة فيها سريرين إنتو في سرير وانا في السرير الثاني وفيها دُش وكابينيه وفراندا. إنت وليلى برطعتوا في الرمل ولا همكوا إن الشط زلط وان الرمل إسود، كنتو بتجروا بين الميه والشط طول النهار وبعد الضهر نركب الطفط ونروح السوق. اشترينا كابوريا، وبياع الكابوريا عنده فرن سويها عنده ورجعنا العشة متأخر والدنيا كانت ضلمت والكابوريا عايزة نور علشان مش سهلة، قعدنا في فراندا العشة على اللبة السهاري اللي فوق باب الأوضة، ونزلنا فصفصة ومصمصة في العتمة. بعد ما نرجع من البحر لعبتكم المفضلة كانت إن تتطوا من بلكونة عشتنا لبلكونة عشة نانا وجدو، لحد ما ليلي وقعت من على السور والحيطه كانت خشنة فاتخربشت واتعورت، أنا قلت «يا دي المصيبة الأجازة باظت» بس ليلي ما همهاش، نضفنا الجرح وكل ما تنزل البحر المالح توجعها شوية وتكمل تلعب وتتيسط، ما كانتش بتعيط بسهولة. شعر ليلي كان طويل ما شاء الله لغاية وسطها، وغزير، جيت اسرّحه ما قدرتش عليه، فقررت مش ضروري نسلكه كل يوم، تنزل الميه بالضافير وننشفها وخلص. أخذنا شوية صور في منطقة الجربي على اللسان اللي بي فصل بين مية البحر ومية النيل، ورجعنا بالسلامة وانا ما حسيتش بتعب كبير رغم إنني كنت حامل في الشهر السادس تقريباً .

يظهر إنني كنت في حالة نشاط لأن في نفس الصيف بعد راس البر أخذتك أنت وليلى وعيال جميلة الثلاثة لميس وليلى وأحمد، ودينا كمان في بطني، ورحنا اسكندرية في بيت ديزي، وكان عندها كابينة على البحر في سيدي بشر 3، زياد كان بيبي صغير فقع مع أمه في مصر، وسعد كان مشغول بيحضر ويسعى للثقافة الجماهيرية. خدتمك لوحدي. ركبنا الأتوبيس الصحراوي واخذنا تاكسي في اسكندرية ودخلنا بيت ديزي خمس عيال وأنا، خليتكم توضعوا معايا وتتضفوا، مأموريات بسيطة على قدكم وانتو كنتم متعاونين، لميس كانت الكبيرة، عشر سنين ونص ما تمتش حداش، شاطرة وتعرف تشغلكم، وليلى الراعي بنت جميلة تمن سنين وسميها ليلي نمرة 1، وأحمد أخوهم الصغير ست سنين، وليلى بهاء بنت ديزي - ليلي نمرة 2 - خمس سنين وانت كنت أصغر واحدة أربع سنين .

- يلاً يا ولاد نروح السوق نشترى أكل ونرجع، كلنا حنشيل .

رحنا سوق خالد بن الوليد على رجلينا ما حسيناش بالتعب، وكنتو مطيعين، حاجة غريبة. ابتدينا نشترى كل حاجة نحبها، شمّامية، بطيخاية، وأنا الكبيرة العاقلة اللي فيكو ما فكرتش في الرجوع، جنبنا عيش وجبنة ولحمة وأكيد كنت ناوية أعمل مكرونة، حاجات كتيرة، كل واحد فيكم كان شاييل شيلة أكبر منه والبطيخة ثقيلة. حنرجع ازاي بالشيلة دي؟ مش لاقين ركوبة، ولا تاكسي ولا أتوبيس، زحمة خروج الموظفين واضطرينا نرجع على رجلينا لغاية البيت، وصلنا ميّتين من التعب ولكن جايبين ثروة. عايزين كمان لازم نروح البحر نفس اليوم، هو احنا حنقعد في البيت؟ ما طبخناش جنبنا فطير، يعني اللي نفسنا فيه عملناه، كنا بحرّيتنا خالص، وانا كنت باحس روحي... مفيش فرق بيني وبينكم، يا إما عقلي كان صغير للدرجة دي يا إما إنتم كنتم سعداء بشوية الحرية وشوية المسؤولية اللي واخديتها مع بعض، فعقلكم كبر، المهم إن كنا شغالين كويس سوا. مشينا لغاية

الكورنيش ولازم نعدّي الشارع، أنا عاوزة آخذ إيديكو كلكم، فاخذت كل اتنين في إيد، ولميس قدامي
علشان نعدّي الشارع وعدّينا. الكورنيش ما كانش زحمة زي دلوقت بس واحنا راجعين لميس
ابتكرت طريقة : هي الصول أو الطابيط في أول الطابور وانتم العساكر ورا بعض والأقصر في
الآخر خالص وأنا ورا الكل :

- واحد اتنين واحد اتنين .

- قف .

- إلى الأمام سر .

- للخلف در .

جابت أفاظ الجيش والإيقاع وبقينا نعمل كدا على طول، ما نمشيش إلا بالطريقة دي في كل حطة،
لميس الرئيسة أو القائد وانتم وراها زي الألف وانا في آخر الطابور والعربيات تقف والناس تبتسم
لنا وتشاور لنا. جوه البيت وزعنا المسؤوليات أحمد يحط ويشيل السفارة، ليلي 1 توضع السراير،
لميس الأكبر تكنس وتنصّف، أنا أطبخ، ومين يغسل الطبقان؟ ليلي 2 ونادية. إنت وليلي ما
توصلوش للحوض، فلميس اللي ما عندهاش 11 سنة عندها حل لكل حاجة، جريت جابت طشت
غسيل كبير من الحّمّام، قلبته وحطته قدام الحوض. الطشت ضخم لدرجة إن انتو الاتنين وقفنوا عليه
جنب بعض قدام الحوض وغسلنوا الطبقان بالصابون والليفة وشطفنوهم. عندكم 4 و5 سنين
وعملنوا العمل بالكامل والله .

يظهر جميلة ونانا في مصر كانوا برضه قلقانين، خصوصًا جميلة فضلت تقول لسعد :

- ما تروح تقعد معاهم شوية مش معقول «ماري» لوحدها بكل العيال .

ما كانش فيه تلفون في بيت دبزي فكنا نتصل نطمّنهم من السنترال كل يوم، في يوم اتكلمنا قالوا لنا
سعد جاي لكم بكرة. اتلمّينا كلنا نستناه في الشباك ولما التاكسي وصل وسعد نزل منه جريتوا كلكم
على السلم وخرجنوا جري من باب العمارة تستقبلوه وانتو بتصرخوا: «خالو» «أنكل» «بابا»
فالسواق لما شافكو تتشعلقوا على رقبة سعد قال :

- ربنا يخلي! ربنا يخلي!

آخر يوم في الرحلة ما كفناش السوق أول مرة، نزلنا تاني واشترينا كابوريا. اشترينا الكابوريا
صاحية والراجل وهو بببيع لي كان بيحرّكهم علشان يوريني إنهم طازة، كنتم مبهورين اننا واخدين
كابوريا صاحية البيت. الواحد يسقط الكابوريا في الميه المغلية على طول وهم لسه عايشين، وقعدنا
نقزقز كابوريا. تاني يوم الصبح واحنا بنجهز للمرواح ليلي نمرة 1 جت تجري من المطبخ :

- الحقوا الحقوا .

ورحنا كلنا وراها لقينا كابورياية صاحبة بنتمشى جنب الحوض، عملت لنا حالة من الحماس الكابورياية الشاطرة اللي هربت منا. يا ترى عملنا بيها إيه؟

*

سعد كان اتعین مع صلاح حافظ مدير تحرير مجلة «آخر ساعة»، بابا في الوقت دا كان عامل هيصة بقدرته إن يخلي «آخر ساعة» مليانة حيوية، مثلاً فاكرة إنه بعث كمال القلش على صندل في النيل لمدة كذا يوم يعمل تحقيق صحفي، ومستمر يشارك في المجلس الاستشاري لثروت عكاشة لتجديد برنامج وزارة الثقافة، وكنا مستنيين صدور قرار رسمي بإنشاء هيئة الثقافة الجماهيرية وتعيين سعد كأول مدير عام، يعني يأسس الهيئة، فكرته وتصوره ورؤيته، مستنيين بس جمال عبد الناصر يمضي على قرار. فوجئنا بجواب جاي لسعد «أمر بإيقافه من العمل في «آخر ساعة» لغاية صدور أمر مختلف». تلفونات من هنا وتلفونات من هناك، إيه بس الحكاية؟ الأمر جاي من الرئاسة، يعني إيه؟ من جمال عبد الناصر شخصياً؟ إيه كدا؟ حصل إيه؟ الحكاية دي قعدت يوم واحد، الليلة اللي بعدها جه أمر بإلغاء الإيقاف وعودته للعمل. تصوّرني إن أنا لغاية دلوقت مش فاهمة حصل إيه؟ كل حاجة بتحصل ورا كواليس الحكم، وأنا كنت مشغولة، حمل وطفلة وبيت والموضوع عدّي بسرعة فما عرفتش التفاصيل. هيكل كان أهم مستشاري الحكم وهو بس اللي يقدر يكتب الحاجات اللي بيكتبها في صفحة مشهورة أظن كان مسميها «بصراحة»، وكان رئيس تحرير «الأهرام» كمان .

بس كانت صدمة .

حسن فؤاد كان بيشتغل مع عبد الرحمن الشرقاوي على سيناريو فيلم «الأرض». الشرقاوي متعود يأجر بيت في آخر شارع خالد بن الوليد من ناحية البلاج ويصيف فيه، حسن فؤاد أجر شقة أوضتين على السطوح تقريباً على بعد خطوتين منه ونقل هو ورضا على اسكندرية. ما كانش عندهم آلة كاتبة، الشغل كان بالإيد. رحنا نقضي كام يوم معاهم ورضا ست بيت ممتازة، وكويسة مع الضيوف، جابت معاهما سيدة الست اللي بتساعدهم في مصر، مقيمة عندهم ومع رضا من سنين وربّت منى بنتها، ست شاطرة بتشهّل كل حاجة. رضا تقوم الصبح بدري قبل ما نصحى وتروح مع سيدة البحر تعوم، يرجعوا نكون يا دوبك بنقوم من النوم. سيدة تحضر لنا الفطار وبعدين ننزل شاطئ سيدي بشر، ورضا تيجي معانا بس تقعد على الكرسي تحت الشمسية وتشتغل برودري أو بيتي بوان - شغل إبرة - ما تنزلش البحر تاني، نرجع نلاقي سيدة محضرة الغدا. في هذه الأثناء حسن يروح لعبد الرحمن أو عبد الرحمن يبجي له ويقعدوا على الترابيزة الوحيدة في شقة المصيف ويشتغلوا على السيناريو، طول النهار شاي وقهوة، وبالليل ننضم لهم للشرب والعشا. قعدنا معاهم يومين لحدّ ما خلصوا السيناريو وكانوا سعداء واحتقلنا. خدنا حسن ورضا ورحنا مرسى مطروح نقعد أسبوع في لوكاندة اسمها «الليدو»، مش رخيصة بس الفندق الوحيد اللي نعرفه. القطر من اسكندرية لمرسى مطروح كان بياخذ تمن ساعات، وصلنا اللوكاندة وطلع مفيش مكان، كومبليه. استتينا كثير لحدّ ما لقوا لنا حل، حطونا في الـ «annex» - الملحق - بعيد شوية عن اللوكاندة. شاليه أربع أوض بصاله، على البحر على طول، علشان ناكل لازم نمشي مسافة للاستقبال. 8 ساعات قطر وساعتين انتظار ولما رحنا نتعدى جابوا لنا غدا لأربعة أنفار بس مش خمسة، أنا وسعد فكرنا

حنديك من طبقنا، كل واحد يديك شوية على أساس مش لدرجة وجبة كاملة، مفيش لزوم نعتبرك إنسان كامل، لكن يظهر البحر فتح نفسك :

- عايزة دا .

وأخدتِ طبقي، أنا قلت :

- أيوه حنديك حنديك .

- لأ أنا عاوزة دا كله .

- نقسمه بين بعض .

كنت مكسوفة إني باتفاوض معاك، وانتهى الأمر إن الطبق راح عندك وانتِ بس اللي تاكلي منه. بابا قال :

- خدي من عندي .

- لأ ما أنا حآكل معاها .

ورضا تقول :

- أنا مش حآكل كفتايتين، دا كتير عليّ خدي يا «ماري» .

بس الحقيقة أكل اللوكاندة كان قليل، كفتايتين ورز وشوية خضار وسلطة، طبق منظر وخلص، وأنا حامل وجعانة . في الآخر الحمد لله استسلمنا «طيب خلاص» ودفعنا زيادة مع إننا مفلسين وجابوا لنا طبق كمان وأكلت وشبعت .

حامل على آخري وما اقدرش أوطي أغير لك المايوه فكنت باوقفك على كرسي أقلعك وانشفك واعمل لك كل حاجة وانت على الكرسي، حسن رسمنا على طول، انتِ عريانة بالمؤخرة باينة من ورا وانا ببطني الكبيرة موطية شوية عليك، وطبع لنا الصورة دي على طبق وبعتها هدية لـ«برتو» أخويا. حسن كان خرج من المعتقل بقي له سنتين وبيمارس كل أنواع الفنون بنهم، فرسم سعد كمان، نقعه في الشمس ويغير وضع الكرسي علشان الشمس تفضل ضاربة في عينيه طول النهار ويرسم، كان عايز الشمس تضايقه في عينه. أنا شايفة إنه قدر يلقط حالة سعد ساعتها : خارج من السجن بقاله 6-7 سنين انطرد من مجلة «نهضة أفريقيا» ومن مجلة «السينما»، وببشتغل صحفي وعضو في المجلس الاستشاري لوزير الثقافة، وبيرشح ناس لكل المناصب المهمة لوزارة الثقافة لكن بيتكلم عن مشروعه للثقافة الجماهيرية بقي له سنين، مترقب قرار رسمي بتأسيس الثقافة الجماهيرية، مفيش حاجة نجحت في حياته لكن عنده ثقة إنه حيكمل وحيعمل، القرار اتأخر لكن عنده التصميم إنه يعمل حاجات كثيرة وفيه حاجات كثيرة ضده، حسن عرف يلقط حالة التأهب دي. سعد ما كانش

مرتاح وتقريبًا عمره ما حيكون مرتاح، دي شخصيته، نشيط وببشتغل كثير وذهنه ببشغي بالمبادرات، عنده رؤية ثاقبة، مش دايمًا عنده حق، لكن عنده لمحات معينة في السياسة تطلع مطبوة لدرجة إن إحسان عبد القدوس قال له :

- إنت اللي بيقولوا عليه «animal politique» بالفرنساوي - موهبة سياسية فطرية - اوعى تياس، اوعى تسيب .

أنا ما اعرفش إذا كانت الجملة دي أضرت سعد ولا نفعته، لكن على أي حال حسن فؤاد عرف يسجل جزء من نفسية سعد، شخصيته من جوه .

اتعرفنا على د. علي ماجد جارنا في الملحق، دكتور مسالك بولية، بس طلع مهتم بالسياسة والوضع العام. دخل مناقشات يومية حامية واشترك في التفكير في اللي حيتعمل في الثقافة الجماهيرية، الأفكار كثير والحماس كبير. حسن كل يوم يروح اللوكاندة يكلم مصر ترنك يسأل لسعد على الأخبار .

كنت مشغولة بالولادة فانتهزت فرصة إننا اتصاحبنا على د. علي ماجد وحكيت له على كتاب «الولادة بدون ألم»، بص على الكتاب وضحك وقال لي :

- بس يا «ماري» دا مش علشان الحوامل، الكتاب دا علشان الدكاترة .

ودا صحيح لأنني ما كنتش فهمت حاجة من الكتاب إلا فصل خاص بالتنفس فهمته وحاولت أطبقه على ولادتك .

جه الخبر ان القرار امضى ورجعنا من مرسى مطروح بالطيارة، أنا وانت وسعد ودينا في بطني .

كل دا سنة 1966 تصوّري؟

- أنا بكرة الصبح حاعمل ازاي؟ أروح كدا وانا ماشي أخبط على الباب واقول أنا سعد كامل أنا المدير؟ بيحصل ازاي؟

فبهاء ضحك :

- لا طبعًا ما تروحش كدا، إنت تتكلم في التلفون من النهاردا وتطلب مدير المستخدمين وتقول له «أنا سعد كامل، أنا جاي بكرة الصبح الساعة تسعة تكون جمعت الموظفين تستقبلوني».

دي كانت أول مرة سعد يستلم منصب مدير وبهاء كان مدير خبرة استلم قبل كذا كذا منصب في «روز اليوسف» و «دار الهلال» وبعد كذا «الأخبار» ومن «الأخبار» لـ «الأهرام» ، وكان صديقنا، فسعد كلمه يستنجد به وعمل زي ما بهاء قال له بالظبط. اتصل في التلفون والصبح اللي بعده راح الإدارة العامة للثقافة الجماهيرية وقصور الثقافة اللي هو قصر السينما حاليًا في جاردن سيتي، وفعلاً الموظفين كانوا في انتظاره وعلى راسهم مدير المستخدمين عرفه عليهم واحد واحد، ووروا له فين أوضة المدير، أوضته، أوضة كبيرة أكثر من اللازم، على اليمين .

وابتدا عملية تعيين مديرين لقصور الثقافة الجماهيرية .

في بداية الشغل في الثقافة الجماهيرية، قبل ميعاد ولادة دينا بتلات أسابيع ابتديت أحس بأوجاع، أوجاع مختلفة عن أوجاع الحمل الأول، مغص ومش قادرة أعمل أي حاجة والصبح إنت في المدرسة ونانا وجدو في الفيوم وسعد مشغول، أنتهز فرصة إن مفيش حد في البيت وأروح أمدد على الكنبة إياها اللي بنتنقل كل شوية في حته، الكنبة كانت ساعتها في الصالة، أروح أمدد جسمي واحط مخدة على بطني، والوجع مستمر ، لمدة ثلاث أيام ورا بعض وبعدين قلت لسعد أنا لازم اروح عند الدكتور علشان تعبانة :

- طبعًا روعي .

فكلمت الدكتور اللي بيتابعني :

- أنا بقى لي ثلاث أيام تعبانة ومش عارفة أعمل إيه .

- تجيني فورًا .

رحت الساعة ستة بعد الظهر، مش عارفة ودّيتك فين ولا ازاي، خدت بعضي ورحت عند د. أحمد رياض وهو الأخ الصغير لعبد المنعم رياض رئيس القوات المسلحة بتاعتنا، دخلني على طول قبل الناس اللي مستنية وواحدة مواعيد :

- يا مدام إنت بتولدي، مش حتروّحي البيت، رُوحِي على المستشفى دُوغري، كلّمي أهلك من هنا ييجوا لك فورًا، وانا حاحجز لك أوضة في المستشفى اليوناني اللي في العباسية .

وقعد على الكرسي وكلم المستشفى قدامي :

- احجزوا أوضة لمدام نايلة كامل، هي جاية لكم في الطريق .

وخلّاني أكلم سعد في التلفون من على مكتبه :

- الدكتور بيقول آخد تاكسي واروح المستشفى فورًا أصل انا باوّلِد، هات لي الهدوم على المستشفى اليوناني .

- طيب .

وقفلنا السكة، كنت على وشك إن انزل وآخد تاكسي، إلا إن سعد كلمني في ساعتها :

- استتيني، أنا وعلي الراعي حنيجي ناخذك ونودّيك المستشفى بعربيتّه .

طلعت بره مكتب الدكتور استتّى. سابوا اللي في أيدهم وجم خدوني المستشفى. دخلت الأوضة، وعلى الساعة عشرة بالليل الدكتور خلص العيادة وجه على المستشفى على طول، الممرضة قعدت جنبي، إذّاها شوية أوامر وابتدت الولادة. وهو بيولّديني د. أحمد رياض سألني أنا عملت إيه في الصيف :

- أه! يبقى طيارة مرسى مطروح هي اللي سبّقت الميعاد .

ولادة دينا ما خدتش مدة طويلة، تاني طفل بيخرج أسرع زي ما قالوا لي، على حدّاش ونص بالليل :

- مبروك .

مبروك بس؟ أنا مستنية عاوزة اعرف ولد ولّا بنت، ما قالوليش، عارفين إن عندي بنت وفي الغالب متخيلين إن الأسرة عاوزة ولد .

- ولد ولّا بنت؟

فالدكتور أحمد رياض قال لي :

- بنت زي القمر .

- غريبة ما كنتش اتصور إني حاجيب بنت .

كان عندي اعتقاد في دماغي إن بالضرورة بعد البنت حبيجي لي ولد، فكنت مندهشة. حماتي في البيت قالت لي :

- ربنا أدّاك الولد، انتِ اللي نزلتيه .

كانت متضايقه لما عملت إجهاض من كام سنة، ما قالتش حاجة ساعتها بس كانت مقتنعة إني نزلت «الولد»، أنا ما كانتش تفرق معايا ولا في أول ولادة ولا في ثاني ولادة .

جابوا البيبي دينا أخيراً وشفتها كانت صغيرة وحلوة قوي، واستريحت .

أول زيارة الصبح اللي بعده جت سهير ومحمود توفيق، سهير جايباك معاها، شعرك منكوش وايديك وسخة وهدومك مبهدلة ووشك مقلوب، جاية تتعاركي، إزاي أنا أبأت بعيد عنك طول الليل؟ وتيجي واحدة زي طنط سهير تلبسك علشان تروحي المستشفى، مش بس، وكمان ماما دي ولدت أخت حلوة. الكلام دا ما دخلش مخك خالص، كان شكلك مش معقول، فاجئتيني لدرجة إني مش فاكرة الناس التانيين، أول ما دخلت الأوضة جيت جنبني على طول فأنا طبعًا حضنتك وبوستك، بس انتِ لزقت في السرير ما رضتنيش تتحركي ولا تسرّحي شعرك ولا تغسلي وشك. وبعدين جابوا البيبي المسكينة دينا علشان تبتدي ترضع من صدري، ما خليتنيش أهتم بيها تقريبًا، ولما جه الوقت اللي لازم تمشي من المستشفى، رفضت، حبوا يشيلوك بالعافية، أظن أنا في الآخر قلت :

- معلش سيبوها حانيمها جنبني في السرير، مفيش طريقة تانية .

وفعلًا دا اللي حصل، إنتِ نمت معايا في المستشفى .

أما دينا من ناحيتها فمش عاوزة ترضع من صدري، أجيبها على صدري «واء واء»، تبعد، فطلبت دكتور أطفال المستشفى اليوناني، لأن دكتور الولادة خلاص ملوش دعوة بالطفل بره بطن أمه. دكتور المستشفى كشف على دينا لقي عندها آفت - فرح - في بقها من جوه وقال لي دا التهاب عادي ببيجي ساعات مع الولادة ولازم نحط لها مس أزرق، ما حسسنيش بالثقة ولقيت دا مش كفاية، مش عارفة قال إيه اللي ما أفنعنيش، وانتِ قاعدة في الأوضة معايا في المستشفى مش راضية لا تغسلي إيديك ولا تتسرحي، فعلى تالت يوم الظهر قررت لازم أخرج من المكان دا. ما اعرفش حتى فلوس المستشفى اندفعت إزاي بس أنا خدتك وخذت دندونة الصغيرة ومشيت لوحدي بتاكسي، ما كانش عندنا عربية، كان بعد الظهر وأعتقد رحنا على د. صفوت شكري على طول. د. صفوت شكري كان من أشهر دكاترة الأطفال في مصر وعنده سمعة حلوة بيدخل الأكل البلدي للطفل، الدكتور

«لندي» السويسري اللي أشرف عليك مات، ومع حبي له للأسف كان ماسك في بسكويت «ماري» و البيض المسلوق والتينة المهروسة، أما صفوت شكري فبيدخل للطفل أكل مصري زي الفول المدمس المتصفي، حاجات موجودة أصلاً على السفرة بتاعتنا. دخلنا على الدكتور إحنا الثلاثة وانت ماسكة جونلتي لأن أنا دراعاتي مشغولة شايلة دندونة، الدكتور اتجه لك يسلم عليك على طول فاكر إن انت اللي عيانة، حطيت دينا على سرير الكشف، تراييزة مفروشة بملاية بيضة :

- البننت دي مش راضية تاكل، ما كلتش خالص لغاية دلوقت، أعمل إيه؟

فهو قرّب وبص على اللفة :

- بس دي صغيرة خالص عندها قد إيه؟

- ثلاث أيام .

كان مذهول إن واحدة تخرج من المستشفى بعد الولادة بتلات أيام تروح عند الدكتور لوحدها، يبص لي ويبص لك ويبص لدينا، وفي الآخر كشف على دينا ولقاها كويسة الحمد لله .

- المس الأزرق كويس، المشكلة إنه بطيء والقرح بتوجعها مش قادرة ترضع، ما نقدرش نستنى من غير أكل لحد ما القرح تخف، حنضطر نديها ببيرونة علشان حلمة البيرونة طويلة واللبن بينزل بسهولة من غير مجهود كبير في المص، صدر الأم الحلمة عايزة شغل، البيبي لازم تستخدم كل بقها علشان تطلع لبن .

وكتب لي اللبن وادّاني فيتامينات .

- بس دا معناه إن هي مش حترجع ترضع منك ولبن صدرك حيقف .

وإدّاني تعليمات لازم أعمل إيه لما ينقطع اللبن. رجعت البيت بالروشتات دي، إجراءات مش بطّالة وفعلاً دينا رضعت من البيرونة، وابتدت تكبر شوية أصلها ما كملتش تسعة اشهر في بطني فنزلت صغيرة في الحجم .

قربت عن نفسية الطفل الأول، بيتجنن ويعمل حاجات وحشة لما يبجي الطفل الثاني، وقررت احاول اتفادى إنك تتعبي من وجود طفل ثاني، حاوزع اهتمامي وحاركز، سعد مشغول في الثقافة الجماهيرية ومش حيديك أي تركيز. بعد خمس سنين إمراطورة لوحذك علي وعلى الأسرة وعلى البيت وعلى الناس صعب تقبلي إن حد ثاني ياخذ اهتمامي. اللي ساعدني الحقيقة هي دينا نفسها، كانت طفلة سهلة من أول يوم، مفيش تجريس ومش بتحتاج غذا إضافي لأن الدكتور اداها غذا مكثف وكويس من البداية. محمد السنوسي النوبي اللي كان بيساعد نانا في البيت راح يتجوز وأصبح بواب في مدرسة ابتدائي في امبابة وأدوا له أوضة يسكن فيها مع مراته فسابنا، وحت تساعدني بنت اسمها فاطمة قريبة سيدة اللي بتساعد رضا في البيت. فاطمة جت من البلد على عندنا

على طول وكانت بتنام معاكو في الأوضة، صغيرة ومش متجوزة بتحب العيال ونفسها تكون دادة. فاطمة احتضنت دينا وكانت بتطلبها «هايتها عايزة أديها البيبرونة» «هايتها عايزة اشيلها شوية». شاطرة بتساعد في الطبخ وتنظيف البيت وتأخذ بالها من دينا، لما كانت بتتنظف تقول لي :

- سيببها لي علشان تأخذ عليّ .

تحط دينا في ركن بعيد وتكلمها وتلاغيها وهي بتتنظف ودينا تسمع صوتها طول الوقت وما تحسش أبدأ إنها لوحدها بينما فاطمة بتكنس وتنظف أو تطبخ، الحنة اللي تروح فيها فاطمة تأخذ دينا وتحطها جنبها مش عايزة تسيبها أبدأ، ومصاحبك وانت بتحببها وتتكلمي معاها وتلعب معاها آخر النهار بعد المدرسة. أعجبت بفاطمة وكانت مريحاني. لما دينا أصبح عندها سنة ونص رحنا نزور أهلي في إيطاليا علشان يتعرفوا عليها وفاطمة قعدت مع نانا وجدو هنا، واستنتني لغاية ما رجعت وقالت لي :

- أنا جالي عريس وحاجوز، حاسيب البيت هنا .

ومشيت. لكن فاطمة ساعدتني كثير طول فترة وجودها معانا، عملت هدوء نفسي في البيت، لدرجة كان ممكن اسيبها مع دينا وتصحى بالليل الساعة اتناشر علشان تعمل لها البيبرونة الأخيرة. رجعت لي إمكانية إن من وقت لآخر أخرج أسهر بره مع سعد اللي كان في فترة سهرات متواصلة، بره أو في البيت عندنا. بفضل فاطمة قدرت أحضر بعض نشاطات الثقافة الجماهيرية، لولاها كان راح عليّ كثير من التجربة دي. كنت بالاقبها منتظمة في الواجبات، ويعتمد عليها، حبيبتها، ولازم أقول إنها علاقة ما اتكررتش ثاني .

*

في هذه الأثناء كانت بتتم عملية إنشاء قصر ثقافة في كل مدينة في مصر، مش بس القصور الموجودة في المدن الرئيسية، وعملية تعيين مديرين في قصور الثقافة من المثقفين والفنانين .

أول تعيين كان لست فنانة شابة، سعد عين رعاية النمر مديرة لقصر ثقافة الجيزة، وابتدت رعاية شغلها ودخلت معركة مع المدير القديم للقصر، تقريباً ما كانش عايز يسلمها الشغل .

كانت بداية فترة ذهبية لكثير منا ومن أصحابنا الفنانين والمثقفين، بما فيها فاروق حسني دا، كان لسه متخرج من فنون جميلة وما اعرفش موظف ايه في وزارة الثقافة، سعد عين مدير قصر الأنفوشي، أصغر مدير سنأ في القصور، من وقت لوقت فاروق كان بيحبيب سيرة سعد في المقابلات الصحفية ويقول إن سعد كامل هو اللي عينه في موقع مسؤولية في بداية حياته. عموماً سعد انشغل في موضوع التعيينات لأن قصور الثقافة كثيرة وهو عايز الحركة توصل لأكبر عدد من الناس، مش مدينتين تلاتة وخلاص ولا حيين تلاتة وخلاص وعايز حيوية مش موظفين. كان بي فكر كثير في التعيينات وبعدين يقرّر تعيينات فيها جرة كبيرة .

الفكرة اللي بعد كدا إن الثقافة المحلية والعالمية تلف وتطوف وتروح تعرض مش بس في المدن إنما في حتت مختلفة في القرى، في الأقاليم والمحافظات. من خلال الاتفاقيات الثقافية نستضيف فرق أوركسترا ومعارض، سعد اهتم خصوصًا بفرق الباليه بالنسبة للبلاد الأجنبية، باعتبار الباليه أسهل للجماهير من الموسيقى الكلاسيك أو الأوبرا .

تأسيس مشروع الثقافة الجماهيرية خد شغل كثير ، وانضم معظم فنانيين مصر للعملية دي. أكثر واحد مشدود للرسم والفنون التشكيلية هو بهجت عثمان، خد المسؤولية دي وعمل حتة شغل! رائع. ينقل المعروضات من حتة لحتة ويعلقها ويحافظ عليها ويلمها تاني ويحملها ويسافر معاها ينقلها حتة تانية، حاجة مش بسيطة. فنانيين كثير اشتركوا بلوحاتهم في المعرض التشكيلي الطواف دا، من ضمنهم بيكار وهبة عنايت ولكن بهجت تألق في موضوع تنظيم المعارض في أنحاء مختلفة من مصر، مجهود غير معقول. بهجت فنان، مفيش شك إنه فنان كاريكاتير كبير ومتميز وساب أثر كبير، بالإضافة عنده مواهب عملية كبيرة، مثلاً لما كنا نقعد مع بعض، ينزل يجيب خيار وجبنة بيضة، واية مش يشتري ويسيب، لا، يدخل المطبخ يدور على الطبقان ويسخن العيش ويحطه في طبق ويوضب الجبنة والخيار في طبق تاني، ويجيب الحاجة على الترابيزة قدام أصحابه. كان دمه خفيف، بيعمل الحاجات دي وهو ساكت خالص والناس بنتكلم مشغولة، يخلص توضيب ويأخذ كبايته ويقعد في وسطهم وهو ساكت، يستنى لحد ما حد يمد ايده بيندي ياكل :

- إيه دا؟ مش تشكروني؟ هو أنا بادللكم ليه؟ مش علشان تقولوا «الله إيه الحلاوة دي؟» وتمدحوا في شوية؟

في الرحلات هو اللي ينصب الخيمة ويصلح العربية البايطة والكرسي المكسور ويولع النار ويعمل ماجور ويطبخ كمان، وفي المعارض يشيل ويحط ويركب ويقيس ويدق مسمار. كان النوع دا من الرجالة. أبو العينين كدا كمان، وحكيت لك على يوسف إدريس، القدرة دي عند الرجالة دايمًا بتلفت نظري .

هبة عنايت كان لسه راجع من الصين، قعد مدة هناك يدرس فنون جميلة ويعمل ماجستير وتماضر مراته فنانة تشكيلية، اتعين مدير قصر ثقافة أسيوط وكل زمائلهم بما فيهم أخوه راجي ومراته شويكار قالوا «تماضر مش حترضى تسكن في أسيوط»، ففوجئنا كلنا إن تماضر عملت الشنط على طول وقفلت البيت في القاهرة وسافروا وراحوا يعيشوا في أسيوط يديروا قصر الثقافة. تماضر ما لهاش صفة رسمية، لكن طبعًا هبة مش ممكن حيدر من غير دعمها، يخوضوا التجربة مع بعض، مشروع كبير لزوجين بالطريقة دي. مش قادرة أفنكر الأسماء، فنانيين كثير، من بره وزارة الثقافة، انضموا بحماس لحركة الثقافة الجماهيرية وقصور الثقافة وحطوا فيها روحهم وعملوا حاجات جميلة. الفنانيين والمتفقين انتشروا في أرجاء مصر يعرضوا شغلهم ويتعرفوا على الناس ويتعلموا منهم. بالنسبة لسعد التجربة دي كانت بلورة لرؤيته للمشهد الثقافي، الدور اللي كان بيقوم به من سنين من ساعة ما طلع من السجن في 1959 وبالذات بعد انفراجة 1964، كان زي الدينامو في الحياة الثقافية، والمشروع الثقافي كان بيتوضح أكثر وأكثر في ذهنه، فلما تولى تأسيس الثقافة الجماهيرية كان عنده رؤية كبيرة، والطاقة الثقافية في البلد كانت قريبة منه، وحاطين عينهم عليه، كنت باشوف سعد في عينهم .

عبد الناصر عزم على واحد اسمه «ليبرمان» اقتصادي روسي سوفيتي اشتهر باقتراح تجديد الاقتصاد الاشتراكي في الاتحاد السوفيتي، تغيير في اقتصاد القطاع العام الصارم المقبول اللي كان موجود ساعتها، نوع من الاقتصاد المختلط، شوية اقتراحات علشان الاقتصاد الاشتراكي ينتعش ويبقى متقدم ومتطور. أفكار من انعكاسات وجود «خروتشوف» في الحكم في الاتحاد السوفيتي. «ليبرمان» جه يدي محاضرتين واحدة في اسكندرية وواحدة هنا في مصر كضيف لوزارة الثقافة، وسعد كان مسؤول شخصياً عن رحلة «ليبرمان»، راح معاه اسكندرية وعلى آخر النهار سعد دخل البيت مع عدد من أصحابنا، منهم لويس جريس وسناء جميل. إحنا كنا اتصاحبنا عليهم إلى حد كبير بعد ما شفنا تمثيل سناء لمسرحية أفتحي رضوان وحبيناها، بس برضه فيها شيء من المفاجأة إنهم يوصلوا مع سعد، وسعد قال :

- ما تتخضيش، ما تتخضيش، مفيش حاجة .

وكرر ها لحد ما خلاني اتخض فعلاً وخذت بالي إنه لابس الجاكيطة بكتف واحد وابتديت اتلخم. العربية اتقلبت بيهم وهم راجعين في سكة اسكندرية، لقوا نفسهم راسهم تحت والكراسي فوق. ما حصلنش حاجة وحشة، الحمد لله مفيش حد مات ولا إصابات كبيرة، اتصرفوا طلغوا من العربية بطريقة ما، وسعد اتصرف وقف عربية فايطة وطلب منهم يبلغوا، ووزارة الثقافة بعنت عربية إسعاف علشان الضيف الأجنبي، وخدوهم كشفوا عليهم في المستشفى الحربي. عضمة الترقوة اتكسرت، ما حسش به لحد ما وصلوا المستشفى، كل اللي كانوا في العربية رَوَّحوا إلا سعد احتفظوا بيه، مش ممكن تجبيس الترقوة، كتَّفوا له دراعه في جسمه بحيث الكتف ما يتحركش ويا دوبك الرقبة تتحرك شوية، وقالوا له إن حتوجه. ما حدش قال لي، سعد ما رضيش يكلمني في التلفون علشان ما اتخضش، الحادثة حصلت الظهر وعقبال ما جابوهم من الصحرا وراح المستشفى وخرج كان الوقت متأخر والليل دخل، أصحابه اللي جابوه نصحوا إنه يرتاح لأنه مرهق :

- مفيش حاجة بس ياخذ مهدئ ويرتاح .

لكن ما مشيوش، وأصحاب غيرهم ابتدوا يتصلوا وييجوا يطمنوا، وبيتنا اتملئ ناس، ديزي وبهاء وبعدين بهجت وبدر ووراهم رعاية وأبو العينين، وغيرهم. وبعدين ثروت عكاشة كمان بعث يقول إنه جاي، وإذا به ييجي بعريبات الوزير والسرينة، سوق سليمان جوهر وشارعنا حارة سد، عملها بطريقة رسمية إن «وزير الثقافة» بيظمن على «مدير الثقافة الجماهيرية»، واحنا في أوضة نوم صغيرة ومليانة ناس ما لقينش مكان أقعده وماحدش قام علشان «الوزير» يقعد، فطلعت من الأوضة وسبتهم يتصرفوا مع بعض .

أنا الحقيقة ضربت لخرة شوية، كنت لوحدي، نانا وجدو في سيلا وفاطمة سافرت البلد في الأجازة الشهرية توذي الفلوس لأهلها، ودينا بيبي عندها حوالي أربع أشهر، بتعيط محتاجة تعير وترضع وتنام، والضيوف عايزة على الأقل لهم شاي، والتلفون بيرن، وجرس الباب، فديزي لحقتني :

- والنبي سبيبي لي دينا يا «ماري»، باموت في العيال في السن دا، ما بيتحركوش كثير وباحب أشيلهم في حضني .

وفعلًا ديزي خدت مسؤولية البيبي الصغير دينا .

ليلة الحادثة كان أول شتا في حياة دينا وكان حوالينا ناس كثير، وكل يوم لغاية بالليل وَخري حداثر اتناشر أصحابنا في أوضة النوم حوالين سعد وجنبي وكل اللي نازل يسأل :

- مش محتاج حاجة؟ حنسأل عليك بكرة .

*

وصلت عربية كارافان هدية من بلد اشتراكي للثقافة الجماهيرية، فيها ماكينة عرض سينما، ومكان لشوية حاجات علشان العروض والمعارض تدور وتعرض في البلاد. ودخلنا بقى في مشروع «قافلة الثقافة»، وكان هدفها الخروج من المدن، تروح القرى الصغيرة المنتطورة هنا وهناك. حضرت قافلة الثقافة هنا قريب في قرية جنب بنها، رحنا بالعربية وكان معايا رعاية واتنين ممثلين مشهورين، حمدي غيث ونعيمة وصفي، وصلت عربية الثقافة، وقفت في ساحة فاضية جنب البيوت على مدخل القرية، مكان السوق، وندھوا الناس بالميكرفون، اللي عايز يبجي يتفرج يتفضل يبجي. كان فيه كام كرسي مرصوصين قدام وانا قعدت علي كرسي منهم، بسرعة الميدان اتعلي ناس معظمهم صبيان ورجالة، لاحظت غياب الستات، فكرت «أكيد حاجة جديدة في القرية فمش الستات اللي حيسيبوا البيت ويروحوا يتفرجوا». كان فيه عيال كثير، مش صغيرين، صبيان، صبيان، صبيان، يمكن كان فيه شوية بنات، ووراهم فلاحين رجالة كثير زي النمل، جم منين؟ فكرت «يمكن من قرى تانية». في الأول عرضوا حنة من فيلم تسجيلي تعليمي عن العناية الصحية، الحقيقة لقيت إنه اختيار مش ناجح، أنا فاهمة إن حيعرضوا حاجة بحقيقي، برروا إن دا برضه مهم لأن «الفلاحين» مابيشوفوش «ولا حتى دا». صحيح التلفزيون ما كانش منتشر زي دلوقت في القهاوي والبيوت، بس أنا تخيلت الفيلم دا يبجي سيلا الفيوم عندنا مع «الفلاحين» اللي أنا اعرفهم وما انبسطش. قام حمدي غيث، مش عارفة ازاي كان معروف كدا مع إن مفيش تلفزيون، يمكن الراديو؟ صفقوا له كثير، حمدي غيث قال كلمتين بالصوت المسرحي بتاعه :

- أنا باحبكم، أنا مبسوط، أنا حاجي كثير، أنا عايز اتكلم معاكم زي الأصدقاء وتقولوا لي الشكوى بتاعتكم .

كلمة فارغة من النوع دا، وبعدين واحد ما اعرفوش قام عمل نوع من الخطبة، وبرضه هات يا تصقيف، نعيمة وصفي كانت قاعدة جنبي، تخينة ومعروفة من المسرحيات الكوميديا، قامت نكّنت وهزرت مع الجمهور وقالت جزء من واحدة من مسرحياتها، نعيمة كانت أفضل من حمدي شوية. بس أنا حسيت إن كله كلام فاضي، وان الناس دول بتوع قافلة الثقافة دول مش معاهم أفلام تانية وفي الغالب أول مرة بتحصل لهم حاجة زي دي وما عندهمش فكرة عايزين يعملوا إيه وما عندهمش أي فهم للفلاحين، الحقيقة كنت أتصور حاجة غير كدا. إنما خدوا حنة نجاح ما اقدرش أوصفه واتكتب عليهم في الجرايد تاني يوم واتنشرت صور الجماهير اللي جت علشان تتفرج. أنا باعتبار إن حظي مش كويس إن رحت مع المشاهير دول، تجربة الثقافة الجماهيرية عايزة صبر

ووقت، اللي أنا شفته دا أقرب لمدرسة عبد القادر حاتم اللي المفروض إحنا جايبين نعمل غيرها .
كنت أفضل أحضر تجربة من تجارب بهجت بمعرضه التشكيلي الطواف مثلاً .

جت فرقة أوبرا وباليه غالبًا من الاتحاد السوفيتي وقالوا حيودوهم أسوان، عدد كبير من الفرق
الممتازة بتيجي مصر، الفرقة دي جت تقدم «بحيرة البجع» في قصر ثقافة يا أسيوط يا أسوان. ناس
كثير من هنا راحوا مع الفرقة علشان يساعدوا على تنفيذ المشروع، كانت تجربة جريئة، الصعايدة
حينقبّلوا الباليه ازاى؟ ورجلين البنات وهي بترقص في بحيرة البجع؟ سعد سافر مع الفرقة والمحافظ
استقبلهم، كان محافظ متعاون للأسف مش فاكرة اسمه. فرقة الباليه راحوا عاينوا مسرح قصر
الثقافة والمدير الفني الروسي قال الخشبة ناعمة خطر على البالييرينات والرقاصين، ممكن يتزحلقوا
يقعوا يتكسروا، وشرحو لنا إن لازم الخشب يكون خشن، فالمحافظ تدخل، كان محافظ هايل، وكان
سعيد بصحيح إن التجربة دي تحصل في قصر ثقافة محافظته، جاب نجارين وابتدوا يخشنوا خشبة
المسرح تحت إشراف الفرقة. العملية دي كانت محتاجة تتعمل في بحر ساعات لأن العرض في
نفس الليلة. سعد بيحكى إن في لحظة معينة المحافظ خد أدوات من النجارين وركع على الأرض
واشتغل معاهم، كان منظر فريد، المحافظ دا أظن بقى رئيس وزارة بعد كدا، يمكن ممدوح سالم؟
المنظمين كانوا فاكريين إن ناس قليلة حتيجي وإن ممكن يمشوا في وسط العرض، لكن الناس جت،
صعايدة بالعمّة والقاعة اتملت على الآخر، ناس واقفة في كل ركن وفي الممرات، ابتدا العرض،
الجمهور بيتفرج باهتمام وكل ما تخلص حته يصقفوا بحماس غير متوقع. ما كانش فيه صحافة
بتغطي الحدث دا لكن بعد نجاح العرض نزلت بعض كتابات في الجرايد بما معناه «مين اللي قال إن
الشعب المصري متخلف ومنتزمت؟ دا الشعب المصري متعطش ثقافة، بس ادوا له فرصة وانتو
تشوفوا» كلام من النوع اللي بيتكتب في الجرايد .

حسن فؤاد صورّ صورتين لسعد لابس بالطو وبيشرف على قافلة الثقافة، إيديه في الجيوب بيراقب،
مش متوتر ولكن مستعد، متأهب، «يا ترى حيحصل إيه؟ حينتهي كويس؟» صور حسن فؤاد لسعد
كانت دايماً لقطات حلوة، أصدقاء عُمر وبيحبوا بعض .

في نفس الوقت كان فيه جو مقاومة، مش كل المحافظين زي المحافظ اللي شمّر وركع على رُكبه
يخشن خشبة المسرح بإيديه علشان أهل البلد تتوفر لهم فرصة يشوفوا حاجة جديدة، مش كل
المحافظين تقبلوا غزو الثقافة لمحافظتهم. ظاهرة الثقافة الجماهيرية عملت اختراق لسلطة المحافظ
نفسه، الناس بتروح قصر الثقافة وقصر الثقافة بيقدم نشاطات ومدير القصر حُر والناس يتفرجوا
ويشتركووا والمحافظه ما بتديش الإذن، مفيش وسيط بين الناس والمتقنين والفنانين. عز الدين نجيب
واحد من مديري قصور الثقافة الشباب في بحري، أظن كفر الشيخ. كتب كتاب مشهور عن تجربته
مع محو الأمية هناك، كمدير قصر الثقافة كان عنده الحرية إن يعمل الأنشطة اللي هو شايفها، جاله
محافظ متضايق منه ومن الثقافة الجماهيرية من الأول خالص، مثلاً عز الدين نجيب ابتدى يصلح
القصر من جوه والمحافظ مش عايز يصرف الفلوس، ولا عايز يبجي القصر أصلاً. وبعدين عز
الدين نجيب أنشأ فصول محو أمية فالناس اتهلبت عليها لكن المحافظ ابتدا يعاكسه ويبعت شكاوى
ضده إنه بيعمل اجتماعات شيوعية وسعد يتدخل عند وزير الثقافة، وثروت عكاشة يرد على سعد،
وسعد يروح ويرجع. كانت معركة، والحمد لله إن عز الدين نجيب حكاها كويس في الكتاب بتاعه .

وغيرَ القصر دا ومعركة عز الدين نجيب، بشكل عام كان فيه معركة في كل قصر ثقافة، اللي كان بيدخل التجربة كانت عناصر عندها استعداد للانفتاح والحاجة الجديدة اللي بتوفرها الثقافة الجماهيرية في قصور الثقافة، أما اللي خايفين على نفوذهم أو عقليتهم بيروقراطية فكانوا ضد مشروع الثقافة الجماهيرية دا خالص .

مع بداية رمضان حطوا شادر في الحسين، وزكريا الحجاوي أخذ مسؤولية إحياء ليالي رمضان. زكريا الحجاوي خبير أصوات بالممارسة، يحب الموسيقى وأصبح مؤلف موسيقي وخبير أصوات، مش أصوات أوبرالية متدربة، لأ، خبير أصوات شعبية على الطبيعة. عمل أوبريت اسمه «أيوب المصري» قصة ناعسة اللي شالت أيوب على راسها وباعت كل حاجة حتى ضفرتها الحلوة وهي بتعالجه، أصل أيوب كان مليون أمراض، هو اللي اختار الأصوات والأوبريت اتذاعت في الإذاعة وانتشرت لمدة طويلة. غيَّة زكريا إنه يلف البلد، دا كان حُبُه، يلف مصر يسمع الناس ويكتشف أنغام منسية وأصوات متميزة بين الفنانين الشعبيين في الموالد والأفراح. كان بقى له سنة من محافظة لمحافظة ينقى أجمل وأحلى الفرق والمواهب من كل محافظة، يقدموا عرض في ليالي رمضان في الحسين. كل يوم موهبة أو فرقة، أحسن ما شافه من فنون شعبية في مصر كلها. رحت حضرت واحد من استعراضات سرادق ليالي رمضان وانبهرت بالطريقة اللي بيشرح بيها ويقدم اكتشافاته. فلاحه من بني سويف :

- اسمعوا الصوت دا كويس علشان دا صوت نادر، أنا قابلت «...» في بني سويف وجاييها لكم هدية تسمعوها .

وطلعت على المسرح، جت زي ما هي، لبسها يشبه لبس ستات الفيوم، ما هي بني سويف جنب الفيوم، المنديل على راسها والصفيرتين، والجلابية قصيرة ثوية فوق الكعب وفتحة الصدر مدورة واسعة، سمرا وجميلة فكرتني بنفوسة بنت عم رياض من العزبة عند جدو. البنت دي شافت الجمهور تحت المسرح ماليين الشادر، ناس كتيرة، اتلخبطت وكانت عايزة تمشي تروح فزكريا الحجاوي قال لها بهدوء وثقة :

- ولا تخافي، دول جايين يسمعوك، عايزين يعرفوا انت صوتك دا ازاي، دُول كلهم إخوانك .

طريقة كلامه معاها كانت ممتازة، هائلة، ومعجب بها بحقيقي وعنده ثقة فيها، وفعلاً غنت الموالد بتاعها، تون صوتها اللي بيتغير من قرار لعالي حلو وسحرنا كلنا. اعتقد إن صوتها يعتبر «mezzo» في التصنيف الإيطالي للأصوات، زكريا الحجاوي قال إنه صوت دارج بين بعض القبائل العجورية الموجودة في مصر والمنطقة من زمان. أما خضرة محمد خضر، أكثر واحدة اتشهرت من التجربة دي، زكريا اكتشفها وخلّاها تغني أغنياتها «اللزونة فين» وأغاني شعبية تانية، ونجحت لدرجة إن في نهاية أي عرض لازم الجمهور يطلب من خضرة «اللزونة فين». كانت بتيجي لابسة جلابية قطيفة مرة نبيتي ومرة زيتي والمنديل على راسها والكحل، أهم حاجة الكحل، جميلة وعندها حضور، الأجمل في القصة إن زكريا وخضرة اتجوزوا .

أنا حبيته، زكريا الحجاوي، أصل عنده حتى حضور على المسرح، كل ما يشوف ممثل أو نجم له اسم أو شهرة وسط الجمهور يقدمهم ويبسطهم ويبسط الناس، عنده القدرة يقطع في الوقت المناسب بين الاستعراضات، يعرف كل الناس وعنده لباقة، «master of the show» درجة أولى يدير العرض ويعرف يقدم النمرة، فالجمهور يكون متهيأ. ابتدت السفارات الأجنبية تبعت وفود يتقروا ويشوفوا إيه ظاهرة سراق رمضان دي والجمهور الكثير دا اللي بيجمع كل ليلة في وسط الشارع في مصر، وزكريا يقدمهم :

- إنا النهاردا عندنا ضيوف بيشر فونا من سفارة كذا .

والجمهور هايص بين الفقرات والضيوف، يخلي الجمهور يتفاعل طول الليل ما يسيبوش يسرح .

آخر ليلة في رمضان، الليلة اللي مش حاقدر انساها، سموها «الليلة الكبيرة» وحصل نوع من الحشد والترقب. جمهور ضخم وضيوف كثير وعدد من السفراء الأجانب. سيد مكاوي كان واحد من الضيوف جاي يتقترح، طبعًا زكريا الحجاوي لا يمكن يحيي سيد مكاوي بكلمتين وخلص، سابه لآخر وطلعه على المسرح بعد النمر ما خلصت، والناس حيتية كبيرة وطلب منه يغني، الجمهور حافظ بيغني معاه الأغاني من الأول للآخر. أنا كنت موجودة ليلتها مع سعد، وغنى «الورد والياسمين» لزكريا أحمد، وأغاني كثير تانية. غنى قاعد بالورب قعدة العود، نص بروفي، وهو ما بيشفوش انت عارفة، تقريبًا كان حيتجن، مش عارف يحيي الأصوات اللي بتيجي له ازاي ويكمل يعزف ويغني ازاي. في الآخر الجمهور طلب «يا صلاة الزين» وهو ابتد يغنيها من هنا والجمهور صقف وصفر وهلل زي في ماتشات الكورة، ولما وصل لكوبليه «يا مداحين» الجمهور كله قاعد مستني يرد «هيه» لما وصل لآخر كوبليه الجمهور وقف على رجليه يغني معاه، ما تسمعيش صوته من صوت الناس والغنا مطبوط تمام، فقام هو كمان بالعود بتاعه واتفقت ناحية صوت الجمهور وعاد الأغنية من الأول جماعة، لغاية ما والله أنا كان متصور لي إن الشادر حيقع علينا من الأصوات والحماس. الحماس اللي أنا حسيت بيه ليلتها وحماس الناس حوالى شوية زي جنون جماعي مسك فينا كلنا، كان... كان بيعبر إلى حد ما عن إحساس بانتصار المشروع الوطني والقومية العربية، انتصار جمال عبد الناصر والأمال اللي جاية معاه، فاهمين إنا منتصرين، وانتهت الليلة دي .

ابتدت تتكون حاجة اسمها «التنظيم السري»، كان فيه الاتحاد الاشتراكي واظن أنا اتكلمت قبل كذا عن الخلاف بين الشيوعيين حول دخول الاتحاد الاشتراكي وحل الأحزاب الشيوعية. الخلاف دا استمر مدة طويلة، بس «حدثو» بالتحديد اختاروا يحلوا التنظيم ويضموا قوتهم مع النظام الوطني الموجود والاتحاد الاشتراكي على أساس تطويره شوية بشوية. سعد ما كانش مبسوط وكان بيكرر إن حل الحزب الكامل مش مطبوط، رأيه الحركة تستمر بغض النظر عن التنظيم السري، يكون فيه إمكانية تقييم وتكوين رأي في النظام ومجريات الأمور، خصوصًا إن مفيش طريقة علنية لممارسة السياسة. التنظيم السري فكرة طلعت جوه الاتحاد الاشتراكي نفسه مش عارفة ابتدت ازاي وليه، إن لازم يكون فيه تنظيم سري لإدارة البلد، حاجة زي إن الدولة تعمل تنظيم سري جوه الاتحاد

الاشتراكي لأن الاتحاد الاشتراكي حاجة مفتوحة، اجتماعاته علنية وأعضاؤه معروفين ومعروف بيقولوا إيه، حاجة شعبية عامة، يظهر مش منظم أو في الأغلب مفيش تحكم كفاية فيه، على أساس المخاطر اللي جاية من بره ومؤامرات الاستعمار. يعني مش بس التنظيمات تحل نفسها وما يبقاش فيه إلا الاتحاد الاشتراكي، حتى الاتحاد الاشتراكي مش ممسوك كفاية ومش مريح السلطة، عايزين يتحكموا أكثر. أنا باقول الكلام دا دلوقت، لكن ساعتها الرؤية كانت مبهمة وما كنتش أقدر أشوف أي صورة بوضوح. مش عارفة التنظيم السري اتعمل إمتى، والحكاية ما كانتش سهلة، لأن بالفعل كان فيه استقزازات ومعارضة من الأوروبيين للقومية العربية، ومن الرجعية المصرية للمشروع الاشتراكي وكثير من البلاد العربية كانت بتضايق عبد الناصر. اللي أقدر افكره هو إن جمال عبد الناصر كل شوية يشتم في حد من الزعماء العرب، مرة الملك حسين، مرة فيصل ومشاكل مع سوريا ومع العراق، والتنظيم السري عبارة عن مجموعات أفراد مضمونين أوفياء للنظام في محيط جمال عبد الناصر، ويكون عندهم التزام مش حسب الظروف والمزاج. وابتديت اسمع جمل زي «فلان مش في التنظيم» و«فلان في التنظيم». سعد ما طلبش ينضم هم اللي طلبوه ودا العادي في أي تنظيم سري، وأصبح واحد من كوادر التنظيم السري أيام الثقافة الجماهيرية كموظف كبير في الحكومة، بس استمر لفترة قصيرة، ما استحملوهوش، وأعتقد حسن وأبو العينين وغيرهم كمان دخلوا التنظيم في الفترة دي. كان فيه نوع من عدم الوضوح والتخبط من ناحيتنا بس الأهم عدم الوضوح في القرارات بتتاخذ ازاى في الدولة .

في الوقت دا كنت باكتب في مجلة «حواء»، طبعًا بمساعدة سعد، من غير سعد أنا كان لا يمكن أكمل اكتب لعدة أسباب: أولاً: فيه صعوبات اللغة، باتعلم وباكتب وانا مش متأكدة من نفسي، كان بيطمّني إن سعد يراجع معايي. ثانيًا: الكتابة صعبة عمومًا، لازم الفكرة والأسلوب يتوضحوا، باحتاج أناقش سعد في الفكرة. سعد شجعني دايماً :

- إنت مش متصورة مقالتك دي بتأثر على كام ست وفين وإمتى .

كان عنده ثقة كبيرة، وكان بيرجع لي الثقة ويخليني استمر. لما كان بينشغل كان بيزهق بسرة واحنا بنصيغ الكلام وانا كنت عاوزة شوية دقة وهو مش دقيق .

- طب ما تكتبي إنت .

- ما هو دا اللي باحاول اعمله وانت عايز تخلّص .

كنا بنتخانق شوية على الحكاية دي. لو أعرف اكتب لوحدي ما اطلبش منه، لو اعرف أقول اللي أنا عاوزة أقوله، لكن فيه مواضيع باحتاج استشارة في الفكرة. كنت باستخدام حسن فؤاد واخيه يساعدي شوية لما سعد يتعب أو ينشغل. بس أنا اعتبرت إن شغلي في «حواء» والكلام اللي كنت بانشره عن الحركة النسائية في العالم دا زي تكليف من الكفاح، بدل ما الواحد ينضم لخلية ويكون عضو في الحزب، الكتابة تكون مشاركتي السياسية في المجتمع، وبكدا أصبحت مهمتي فدّام نفسي إنني أكمل انشر الباب بتاعي في مجلة «حواء» تحت كل الظروف .

الأمر مشيت بالطريقة دي لغاية صبحية خمسة يونيو 1967، أعتقد إن لما قمنا من النوم يوم خمسة يونيو وسمعنا الخبر بالهجوم على الطيارات بتاعتنا، حصل تحول جذري في عقليتي، في الفهم، في التفكير، بس قبل ما اغرق في 5 يونيو، لازم احكي إن مع تكوين التنظيم السري لجمال عبد الناصر، كان فيه إشاعات بفساد هنا وهناك، كلام عن عبد الحكيم عامر وضده، وابتدينا نسمع من بعض أصحابنا القريبين إشاعة إن انطلب من أحمد عكاشة يدخل واحدة ست وواحد راجل مستشفى الأمراض العقلية، معارضين معروفين، فسعد قال :

- ما اعتقدش إن دا صحيح .

أحمد عكاشة صاحبه وكان فيه بينهم تاريخ فكان صعب عليه يصدّق، ببيجوا يسهرنا عندنا واحنا نروح عندهم، وأنا و «جنيفر» مراته بنخرج بالعيال. حاجة تانية حصلت، في يوم من الأيام سعد حكى لي إن واحدة ست جت له مكتبه في الثقافة الجماهيرية بدوسيه في أيدها، وحكت له قصة مرتبطة بعبد الحكيم عامر وبين حد من قرأيها اتقبض عليه واتحط في مستشفى الأمراض العقلية، سعد حاول يتصل مش عارفة بمين وحاول يعمل إيه، ولكن القصة انتهت بشكل غامض، أكيد ما كانش مطلوب ولا مرغوب ولا ممكن إن سعد يتدخل في المواضيع دي، ولكن زي ما تقولي بالطريقة دي الشك ابتدئ . لما خلصت الفترة مع حرب 1967، وموت جمال عبد الناصر بعدها بفترة قصيرة وخروج الأقطاب زي شمس بدران وكثير من الأسماء اللي كانوا في المسؤولية في الوقت دا، بدأنا نفهم ونتأكد إن كان فيه شيء من الصحة في أغلب الإشاعات اللي كانت بتدور بين الناس اللي ببيجوا لنا البيت .

الحالة كانت مليانة توتر، القومية العربية كفكرة كانت بتلهب الحماس عند الناس واطن حرب اليمن تُعتبر نتيجة للحماس والقومية، وكان فيه تهديد من إسرائيل وأمريكا بالذات لسوريا ويمكن لبنان كمان، بس سوريا لازقة في ذهني علشان عملت الوحدة مع مصر، وحتى بعد الانفصال كنا معتبرين إن فيه نوع من التشاور ومن الوحدة الوجدانية. تهديد سوريا والهجوم على سوريا اعتبرناه هنا في مصر تهديد لنا وهجوم علينا وتهديد للمشروع الوطني المصري وعلى راسنا جمال عبد الناصر. كنا مقتنعين بقيادة عبد الناصر، بعد ستة وخمسين اتعمل مجهود كبير لإعادة بناء الجيش وتسليحه بأسلحة حديثة وكنا مقتنعين إننا حننتصر على الاستعمار في يوم من الأيام ولا مفر من الموضوع دا .

وفي نفس الوقت كمان مفيش شك إن من يوم ولادة دينا في أكتوبر 1966 والصيف اللي قبله لما رحنا مرسى مطروح وجه القرار بتعيين سعد في الثقافة الجماهيرية لتأسيسها وإدارتها، لغاية خمسة يونيو 1967، كانت أحلى الأيام وكانت مليانة شغل للثقافة الجماهيرية، أنا حكيت لك حاجات حلوة، زي المحافظ اللي شمرّ يخشن المسرح بإيده علشان يستقبلوا فرقة الباليه الروسي وحادثه الخبير الاقتصادي السوفيتي، لما سعد كسر الترقوة، والأوضة دي اتملت ناس بما فيهم ثروت عكاشة الوزير وأنا ضربت لخرة، وحكيت لك الاستعراضات والمسرحيات وقصور الثقافة وقافلة الثقافة، وسعد مشغول لشوشته، والبلاد التانية اهتمت بظاهرة الثقافة اللي بتنتشر في مدن وقرى الأقاليم بدل ما تبقى مركزا في القاهرة، وابتدوا يعزموا سعد أسبوع هنا، عشرة أيام هناك، ألمانيا وتشيكوسلوفاكيا وفي فرنسا قعد مدة عملوا له جولة كبيرة في مراكز الثقافة في المحافظات

الفرنسية. بالليل بيتنا كان دائماً مليوناً ناس، فنانيين وشخصيات ومشاريع وأفكار ومناقشات على المجتمع المصري. المجتمع كان بيفور حيوية .

كل دا كان موجود عشية يوم خمسة وستة يونيو .

جمال عبد الناصر أعلن إن الاعتداء على سوريا حيعتبر اعتداء على مصر، ويمكن حصلت مقابلة مع سوريا ومضوا على اتفاق للدفاع المشترك وعدم الاعتداء، كان فيه قوات الأمم المتحدة على الحدود بين سينا وإسرائيل لمنع قيام حرب تاني بعد عدوان ستة وخمسين وفاهمين في اللحظة دي إن حنخش بالجيش ونحارب ضد إسرائيل وعبد الناصر طلب رفع القوات الدولية من سينا باسم الحكومة المصرية .

يوم خمسة يونيو إنت رححت مدرسة «الليسيه» عادي، وأيلي بهاء راحت مدرستها «المير دو ديو» عادي، وكنا أيامها بنشوف ديزي كثير عادي، وبهاء كان عنده سفريات عمل كثير عادي - يومها كان في فرنسا. عقبال ما فقنا الصبح على الساعة تسعة ابتدينا نسمع في الإذاعة إن هجموا علينا وإن طياراتهم جاية. المفاجأة: فيه فعلاً طائرات في السما ويمكن سمعنا صفارات إنذار. في الإذاعة نسمع إن إحنا بنرد على الهجوم وبنوقع طياراتهم، خصوصاً إذاعة «صوت العرب»، مذيع نسييت اسمه، عنده طريقة مستقزة، طريقة خطابية وبيزعق ويحمس، وأسقطنا خمس طائرات، أسقطنا عشر طائرات، كل ربع ساعة بالطريقة دي .

كان فيه عربية بيتيجي تاخذ سعد يروح الشغل، جت العربية وسعد راح الشغل عادي لكن على تسعة ونص عشرة كلمني في التلفون :

- اشتروا ورق أزرق وغطوا القزاز، فيه هجوم إسرائيلي وبالليل مش حنقدر نولع النور، «-Black out» كامل، اشتروا شمع .

نزلنا جرينا نشترى ورق أزرق من مكتبة «الجمهورية» في سليمان جوهر ونلزم على الشبابيك، شوية وسعد اتصل تاني :

- لأ، الورق الأزرق مش كويس، الطريقة المثالية إن تشتروا قزازة صمغ وتحطوا حبر أزرق على الصمغ وتدهنوا قزاز الشبابيك بالصمغ الأزرق، إحنا بنعمل كذا في الثقافة الجماهيرية وفي كل حنة في مصر، كل البيوت .

بصينا حوالينا في البيت، فاطمة ومحمد السنوسي ونانا، عندنا شبابيك قزاز كثير حتى باب السكة فيه قزاز. محمد السنوسي نزل جاب صمغ وحبر وابتدينا ندهن. إحنا بندهن فاهمين إن الحرب حتطول سنين وإن حياتنا من هنا ورايح حرب .

بعد ثلاث أيام الحكاية انتهت .

وفضل القزاز لونه أزرق عشرات السنين نحاول نشيل الأزرق دا بكل الطرق بما فيها مية النار .

ديزي كلمت سعد طلبت منه ياخذ ليلي من المدرسة لأن الثقافة الجماهيرية جنب مدرسة «المير دو ديو» في جاردن سيتي .

- اتفقنا حاجيها عندنا في البيت مع ناديه، وانت تيجي تباتي عندنا .

اعتبر نفسه مسؤول عنهم على أساس بهاء مش في مصر والطبيعي إنه يضم أسرته على أسرتنا، خد ليلي وفات على «الليسيه» خدك انت كمان. ديزي استحملت يوم واحد بعيد عن بيتها، ثاني يوم روحت، بهاء اتصل من فرنسا :

- ارجعي البيت مفيش حرب، خلصنا، انهزما خلاص .

وهي قالت الكلام دا لسعد وروحت .

الوجه المألوفة كانت موجودة حوالينا، أبو العينين ورعاية وممكن حسن ورضا وراجي مش فاكرة الوشوش بالتحديد لأن ذكريات اليومين دول تايهة. أنا وسعد عرفنا الحقيقة من ديزي غالباً يوم 6 يونيو بالليل، شوية شوية كلنا عرفنا في البيت مع مجموعتنا من الأصحاب إن فيه مشكلة، محطة «صوت القاهرة» ابتدوا يظهروا حماس أقل على يوم 7 يونيو ولكن أحمد سعيد، أيوه المذيع اسمه أحمد سعيد، على راديو صوت العرب لسه بيعد الطيارات اللي بنوقعها، استمر يقول إن «إحنا بنوقع الطيارات الإسرائيلية» أظن لغاية 9 يونيو. على ثالث يوم الاتحاد السوفيتي طلب وقف إطلاق النار في جلسة طارئة في الأمم المتحدة ورد الفعل في مصر كان «ليه وقف اطلاق نار؟ لازم نستمر» وديزي بتقول «نستمر بايه؟ مفيش ولا طيارة». الناس بتسمع من الإذاعات الأجنبية إن الجيش الإسرائيلي وصل للقناة وتقول «إزاي بس؟» مش قادرين نفهم ولا نصدق وبنقول «حنقاوم حنقاوم» مهما كان ومقتنعين إن حنرد، عارفين الحقيقة بس مش مستوعبينها، إن الأسلحة راحت فعلا .

معظم الشعب فوجئ يوم 9 يونيو .

اجتمعنا نفس المجموعة بتاعتنا قدام التلفزيون هنا في البيت، طلع جمال عبد الناصر على الشاشة وقعدنا نسمع له: «أنا أتحمّل مسؤولية اللي حصل وحاستقيل، وأتمنى لمصر التماسك وللقادة الجديدة إن تقدر تستمر». منهار خالص، بيتكلم كأنه حيعيط، مهزوز. بيقول «دا واجب، لازم أعمل كدا» كأنه بيكلم نفسه. ما كانش خلص الخطبة لسه، سمعنا أصوات في الشارع، سبنا جمال عبد الناصر بيخطب وطلعنا كلنا البلكونة، الدنيا كانت ليّلت، شفنا أشباح مظاهرات ماشية في شارع سليمان جوهر في اتجاه ميدان الدقي، مجموعات من الناس بتزقق، مش مفسرين بيقولوا إيه، واظن أثناء ما احنا في البلكونة عبد الناصر ادّى السلطة لزكريا محيي الدين وخلصت الخطبة .

وقفنا كدا محتاسين، راجي عنايت وأبو العينين وسعد، يمكن حسن فؤاد، وناس تانيين، «نعمل إيه؟»، سعد مسك في التلفون يتصل يمين وشمال، ناس في جرنال «الأخبار»، ثروت عكاشة «إيه

اللي بيحصل؟» ما حدش عرف يرد عليه، سمعوا الخطبة زيّنا، وسمعوا زيّنا من «البي بي سي» إن «الجيش المصري بيهرب في سيناء» «الجيش الإسرائيلي محاطهم» «العساكر المصريين تايهين في سيناء مش لاقيين سكة يرجعوا» «إسرائيل حتهاجم مدن القناة»، «ممكن يوصلوا للقاهرة في بحر ثلاث ساعات!» «الجنود مش عارفة ترجع بيوتها؟ ازاي نقاوم؟ ازاي نوقفهم؟».

الرجالة قالوا «مش ممكن نقعد في البيت» ونزلوا .

رجعوا على نص الليل «البلاد كلها مظاهرات رفض الاستقالة» «مش عارفين إيه اللي بيحصل».

إحنا الستات اتفقنا «إحنا كمان حننزل نتظاهر الصبح»، كنا بنسمع الإذاعة وبيصوّروا في التلفزيون مجاميع غفيرة من الشعب رافضة الاستقالة .

«عايزين نقاوم» «عايزين نحارب» «مش ممكن» «مش حنستسلم».

تاني يوم سبناكم - انتم العيال - مع محمد السنوسي ومع دادة عزة، دادة ليلي بنت ديزي وبهاء، «حنروح بيت الرئيس» نرفض الاستقالة ونقول مستعدين للمقاومة ونطالب باستكمال الحرب وعدم الاستسلام. ركبنا عربية ديزي: أنا ورضا ورعاية وديزي تسوق. وصلنا شارع «الملكة نازلي»، الشارع اللي بيروح لمحطة القطر اللي فيه مصلحة التلفونات على الشمال، اسمه إيه الشارع دا؟ الشارع اللي جاي من كوبري ستة أكتوبر علشان نروح مصر الجديدة؟ «رمسيس»، أيوه رحنا شارع «رمسيس» ومشينا فيه مدة طويلة مع الناس - بالعربية - زحمة، أتوبيسات جاية من الأرياف مليانة ناس، ناس ماشية على رجليها. مفيش سكة، ولا للعربية ولا للبي آدمين. عساكر المرور يقولوا :

- ارجعوا، مفيش سكة .

ديزي بتترد واحنا بندعمها من جوه العربية ونقول معاها :

- عاوزين نوصل لبيت الرئيس .

- مليون مليون ناس، مش حتقدروا تقربوا أكثر من كدا .

فضلنا واقفين مع المتظاهرين وفي لحظة ما قررنا نبتدي نروح، أصل حنعمل إيه؟

كاميونات عساكر جيش راجعين من سيناء، قاعدين كدا، تعبانين، ما بيتكلموش، بيصّوا للجماهير مدهولين، مش إعجاب، لا، مبلمين، ذهول التعب، وجوم. يرّضه ما خدناش بالناس كويس منهم، أنا افكرتهم بعد كدا وأنا باستوعب الأحداث، ناس كتير ماشية في وسط الشارع في كل حتة لغاية ما دخلنا الدقي. ديزي فضل عندها شوية وعي في وسط الحماس :

- مفيش فايده، الهزيمة هزيمة، كارثة .

رَوَّحت بيتي وديزي رَوَّحت بيتها ورضا رَوَّحت بيتها ورعاية رَوَّحت بيتها .
ما اقدرش احكي كويس .

لخبطة فكرية، مش عارفين نحس بايه، مش عايزين نستوعب حكاية الهزيمة .
بهاء بعت يومها من باريس «فتحوا المطار أنا جاي في أول طيارة» .
بس .

وابتدى الجزء اللي بعد كدا .

الإذاعات الأجنبية: «معقولة؟ القائد ودَّاهم للكارثة وهما يقولوا لأ لازم يرجع ويودينا لكوارث أكثر»
«لازم يستقيل» «مفيش شعب يعمل اللي بيعمله المصريين» .
إحنا: «ضربوا عبد الناصر علشان بيتمثلنا» «مش حنستسلم» .
على أي حال عبد الناصر رجع .

سحب الاستقالة .

هو ما كانش هو .

كنا بنشوفه .

التغيّر .

فين جمال عبد الناصر في الخطب القومية قبل خمسة يونيو؟

وشتايم نازلة من كل ناحية، من البلاد العربية، من أوروبا... وطبعًا من إسرائيل .
واستمرينا .

الثقافة الجماهيرية استمرت تعمل الأنشطة بتاعتها ولكن في حالة «shock» - صدمة كبيرة .

لغاية الوقت دا سعد كان في معركة مع عدد من المحافظين بيقاوموا الانتعاش الثقافي وثروت
عكاشة بيدعمه في الصراعات ويشجعه على الاستمرار. ثروت كان عنده «carte blanche» أو
ضوء أخضر من جمال عبد الناصر. بعد هزيمة 1967 حصل فنور. نغمة المحافظين عليت وثروت
عكاشة ابتدا يتهز، وابتدت اتهامات المحافظين تلاقي ودن عند جمال عبد الناصر، اعتقد حصل له

انهيار في الثقة، وابتدت تكثر المواقف اللي بتتحسم ضد نشاطات الثقافة الجماهيرية، بعد الهزيمة بشوية عبد الناصر ابتدئ يشيل الشيوعيين والتقدميين اللي كان حطهم في مناصب .

يا ترى ثروت عكاشة حيعمل إيه في سعد والثقافة الجماهيرية؟

ثروت كان متوقع إن سعد حيستقيل ويعد لوحد، سعد قال له :

- مستحيل، إحنا لازم نستمر .

ولكن دي ما كانتش رغبة السلطة ولا الوزير .

- لازم تستقيل .

- إنت ارفدني، أنا مش حاستقيل .

واتخافوا مع بعض .

سعد رجع البيت يستنى .

جه الأمر بنقله لدار الكتب، وكان يُعتبر محظوظ. أيامها المتقنين كانوا بيتنقلوا من مناصبهم لحتت غربية، إدارة بتصنع جزم في وزارة التجارة، أظن كمال القليش انتقل للصوامع والغلال وعلي الراعي ومصطفى درويش وغيرهم .

التفاصيل الدقيقة ممكن تلاقيها عند حد ثاني غيري .

حصل نوع من التطهير لوزارة الثقافة .

سعد استمر ياخذ ماهيته مدة من دار الكتب، رفض يروح احتجاجًا على النقل التعسفي، الإدارة اعتبرت إنه ما بيشتغلش وجاله جواب استغناء .

أصحابه اللي ما فقدوش شغلهم بما فيهم أحمد بهاء الدين جمَّعوا له ميت جنيه في الشهر علشان تستمر مصاريفنا في البيت، نوع من التضامن مع موقفه .

ماهيته قبل كذا كانت وصلت لحاجة زي سبعميت جنيه، كانت ماهية كويسة .

دي قصة الثقافة الجماهيرية .

من أغسطس 1966 لأوائل 1968 .

نسافر إيطاليا أشوف أهلي ويشوفوا دينا؟ وسعد بيجي معانا؟ معدوش شغل. تكلفة بالنسبة لحالتنا .
كنا محتاجين نغير جو بأي طريقة .

يونيو 1968 موسم امتحانات، أزمة في كل حاجة بما فيها التاكسيات، صحينا قبل الفجر والدنيا
ضلمة علشان الطائرة 7 الصبح، نزل سعد مع محمد السنوسي يدوروا على تاكسي، الشنط قدام
الباب، أنا بالعيال في البلكونة، فاطمة شايلة دينا، بيبي عندها حوالي سنة ونص . مستنيين التاكسي
يظهر، مفيش تاكسي أبدًا. كلمنا أصحاب سعد، اللي مش موجود واللي نايم مش بيرد، أخيرًا حطينا
إيدنا على ديزي، «فيات/نصر» 1300 أو 1100 .

- يا خبر! عربيتي بايطة بتسخن !

لكن جدعة، عندها قدرة على تقدير الموقف، تصحى وتقوم وتجري، عربيتها بايطة بس لازم نتقذنا.
خدتنا وجرينا على المطار وعقبال ما وصلنا المطار العربية كانت ولعت وما اعرفش ديزي رجعت
ازاي، سبناها في عربيتها وجرينا حتى ما سلمناش عليها. الطابط على مدخل المطار .

- يا خبر! يلاً! يلاً! يلاً!

الشنط إيد هنا وإيد هناك، سعد طائر بالباسبورتات وانا وراه ساحباك وفاطمة ورايا شايلة دينا على
دراعها ويلاً وعدينا. سمعت فاطمة :

- هي البننت دي مش تبعكم؟

خطفت دينا من فاطمة وطبببت عليها وشكرتها بسرعة وبوستها وجريت وانت مسكت في فستاني،
وركبنا الطائرة. اتكسفت كسوف، مش معقول توصل اللخمة إنى أنسى حد من عيالي. فاطمة دي
كانت بنت ما تتعوضش. أكيد رجعت البيت مع ديزي في العربية البايطة .

في «نابولي» عند أبويا وأمي انت بقى عشت حياتك، اتصاحبت على أولاد الجيران «باتريزيا»
و«أنا-ماريا» و«فينشنسينو» و«بينو» و«لوكا»، وكنت بتلعب معاهم في حوش العمارة، ما كناش
بنشوفك طول النهار .

في السفرية دي اكتشفنا الكلام الفظيع اللي كانت بتكتبه الجرايد الأجنبية اللي مانعينا تدخل مصر،
أبويا وأمي كانوا شايلين لي الجرايد، حكوا لي شوية وقريت كثير وصف هروب الجنود المصريين،
آثار المصريين في الصحرا راجعين على رجليهم حافيين على الرمل من آخر سينا للقناة، كثير منهم
وقعوا في الأسر، الوصف كان كارثي .

عملنا رحلة مهمة لباريس. سبنا دينا مع أمي لأن كان عمرها يا دوب سنة ونص على أساس ما اقدرش اسبيكم إنتم الاتنين لأهلي، كتير عليهم. مش متأكدة إن دا كان قرار مطبوط، دينا ساعات بتعتبر إنني ما كنتش باحبها كفاية وباسيبيها. أمي تبقى جدتها صحيح بس ما تعرفهاش، دينا كانت واخدة على فاطمة ودا كان أول لقاء مع أبويا وأمي، تصورت إن وهي صغيرة كدا مش حتتاثر وأهلي حبوا يقضوا وقت معاها ياخدوا عليها وتأخذ عليهم. دا كان تقديرنا .

أخذنا القطر، ورحنا باريس عن طريق «تورينو».

لما القطر وقف في محطة «تورينو» نزلت اشتريت جوز شرابات لأن الجو ساقع بالرغم إنه صيف، شراب غالي ومش حلو وقضيت السفرية كلها بشراب مش مريح. القطر عدى الحدود البرية، البوليس طلع في القطر وشافوا الفيزا. اللي جه ياخذنا من المحطة في باريس كان «هنري كوريل». ما كنتش قابلت «كوريل» شخصياً في مصر، أصغر منه في السن، أنا عضوة في قاع هرم التنظيم مش ممكن أقابله في اجتماع مثلاً، وما كانوش بيحبوا سيرته كتير في الاجتماعات اللي حضرتها. أقصد أقول إن ما كانت عندي خلفية كفاية عنه علشان أكون «impressed» - منبهرة - كما يجب وانا باقابلة. سعد كان عنده معلومات عنه وعن تاريخه وكان قابله في سفريات قبل كدا. سلمنا عليه، لقينته طويل، أطول مننا، أطول من سعد، رفيع، حاطط جاكطة على كتافه أو معلقها بيده على كتف، والإيد الثانية في جيب البنطلون. كنا مسافرين طول النهار وتعبانين فأخذنا على مطعم علشان نتعشى، المطبخ كان قفل فاتفاوض معاهم «ضيوف ولازم يتعشوا»، وفعلًا جابوا لنا ناكل، أثناء الأكل لاحظت إنه بيتكلم كأنه بيعمل محاضرة، من غير رزالة، كأنها أفكار بتخطر على باله بس مفيدة، مثلاً «إن الطريقة الصحية للأكل إن الواحد ما يستناش إن يجوع بشدة علشان ياكل، ولما ياكل يبطل قبل ما يتملي، ياكل كمية معينة ويقوم، ولازم الإنسان يشرب حاجة على الأكل». أنا ما اقدرش أنسى الكلام دا، أصل دي تعتبر المعلومات اللي ما عرفتش انفضها طول حياتي. «كوريل» هو اللي أسس «ح.م» - «حركة مصرية» اللي بقت «حدثو» «الحركة الديمقراطية للتححر الوطني» - ودا يهمني طبعاً لأن دي المنظمة اللي أنا كنت انضمت لها ودخلت السجن على أساسها. أعرف إن «هنري كوريل» انطرد من مصر بالرغم إن كان عنده الجنسية المصرية، سمعت إن سحبوها منه فراح استقر في باريس ودي حاجة تهمني لأنني كنت مهددة بالترحيل. من باريس «كوريل» استمر يهتم بشؤون الشرق الأوسط ولعب دور كبير مع الوطنيين الجزائريين، وحاول ما يقطعش العلاقة مع الناس اللي يعرفهم هنا في مصر لدرجة إن في 1956 سمعت إن جت له معلومة تخص الهجوم الإسرائيلي، وبلغ المعلومة لجمال عبد الناصر عن طريق حمروش وعبد الناصر ما خدهاش جد .

«كوريل» قابلنا بالمجموعة اللي في فرنسا، واتعرفت على سوسو حزان ونادية حزان أخته، سعد كان يعرف سوسو من قبل كدا. بالكلام عن الذكريات بعيداً عن السياسة عرفت منهم إن «أوديت» الرئيسة القاسية بتاعة «م.ش.م» كانت على علاقة مع مراد المستكاوي الدكتور اللي رحلت له في مستشفى الهلال الأحمر بجواب من «لي لي دايان» بعد ما طلعت من السجن، بتسأله على مستقبل علاقتهم، ومراد كان في منتهى البرود معاهما وما شكرنيش حتى على توصيل الجواب. أتاريه مراد دا دخل في علاقة مع «أوديت» وأهمل «لي لي» وبيحاول يتخلص منها، وافتكرت ازاي «أوديت»

استقصدها في السجن. بعد السجن «أوديت» اتجوزت مراد دا وهاجروا وراحوا سويسرا الاتنين وعاشين هناك وسابيين كل ما له علاقة بالكفاح والشيوعية. اتعرفنا على ريمون إسطمبولي وعيلته وعزمونا على العشاء، عنده بنت تقريبًا من سنك ومع ذلك ما كنتيش راضية تسيبيني في حالي وكان صعب اتابع الكلام اللي بيقولوه وانت معانا، كان لازم اقعد معاك على الكنية أتكلم معاك واسليك وهم كملوا يتكلموا في السياسة بالتأكيد وعن الوضع في مصر الوضع اللي كان مش كويس بعد حرب 1967. «هنري كوريل» دايمًا هادي ويتكلم بصوت واطي ومسموع ولكن ريمون، شرب براحتة شوية لأنه صاحب البيت ومش حيسوق بعد العشاء، فاتحمق واتكلم بصوت عالي وهاجم بحماس .

رحنا حفلة «لومانيتيه» جرنال الحزب الشيوعي الفرنسي، نوع من المهرجان في مكان مفتوح، كتب ومطاعم وخيم فيها مسرح أو معرض ومحاضرات، وبنت ريمون اسطمبولي جت وركبت المراجيح معاكو وكنت بامسككم انتم الاتنين، واحدة من هنا وواحدة من هنا خايفة واحدة منكم تقع مني. وكان معانا «هنري كوريل» وواحدة اسمها «روث» ومرات ريمون. «كوريل» اشترى عدد من مجلة «بيف»، أسبوعية للأطفال، وأداها لك، خد باله إنها شدتك فراح جاب لك شنطة فيها المجموعة الكاملة 3 أو 4 مجلدات، المجموعة دي موجودة عندنا لغاية دلوقت ودينا لما كبرت اتفرجت عليها وحببتها. حضرنا أجزاء من ندوة سياسية و«كوريل» انتهر الفرصة في وسط الكلام علشان يقول :

- عيب كبير عند الشيوعيين بشكل عام ما بيهتموش بالثقافة والفن والأدب والفلسفة، يهتموا بس بالسياسة والموضوعات السياسية، ودا مش كفاية. الثقافة والفن والأدب مش بارافان أو تمويه للعمل في السياسة، دي ثروة الإنسانية أنتجتها على مدى قرون لولادها والأجيال الجاية، فالشيوعيين لو عاوزين يكونوا مفيدين ولهم دور مميز لازم يهتموا بيها يستوعبوها ويشربوها ويتأثروا بيها، مش كفاية السياسة والنظرية الماركسية وتاريخ الحزب الشيوعي والتحالفات الإستراتيجية والتكتيكات والحاجات اللي من النوع دا .

شوفي مثلاً التعليق دا أنا ما اقدرش انساه، بيقول الأفكار بشكل عابر من غير ما يكون رزل، بتلاقي صدى عندي وبتعلق معايا .

«كوريل» عزم علينا في بيته وقابلنا مراته «روزيت» وعملت لنا سبانخ بوريه، حاجة خفيفة حلوة كويسة للصحة. انت كنت بتتكلمي وانا باحاول اتابع الحوار فمش كل حاجة تقوليها باسمعها، «كوريل» بطل كلام وبص لك كذا وقال :

- آه عندك حق، دي ملاحظة مطبوطة .

فسكتنا كلنا نسمع الدرر اللي حيقولها لك، كنت واقفة قدام الشباك وقلت :

- كل العربيات دي ماشية تحت مش سامعة صوتهم .

وشرح لك إنهم مركبين في بيتهم نوع فزاز زي الترموس، الصوت ما يفوتش منه، علشان يقدرُوا
يناموا لأن الشارع مزعج. أنا انبسطت منه بشكل، في العادي بس الأم - أنا - أتابعك والتانيين
مشغولين بـ«كلام الكبار» لكن هو عينه وودنه عليك. زوجة ريمون عرضت عليّ أجيبك تقضي
النهار مع بنتها في البيت، واروح اتفسح أشوف اللوفر أو أي حاجة وأجي أخذك بالليل. قبلت
العرض على طول و«روزيت» مرات «كوريل» خدتي وِدتي أزور قصر وجناين «التويلري».

- روجي انتِ انقرجي، أنا شفته ستميت مرة حاستناك بره، ولما تخلّصي الجولة ما تتسيش تدي
المرشد عشرة فرنك، معاكِ فلوس؟

أنا ما كانش عندي تقريباً فلوس خالص هناك، سعد بيتولّى الصرف فطلّعت لها اللي معايا علشان
تشوف .

- أيوه دا كفاية .

لما رجعت أخذك آخر النهار لقينك زعلانة ومتخائقة مع البنت الصغيرة وما سمعتيش الكلام. ما
كنتيش سهلة معاهم، تعبتهم وتعبت. تصورت إنك بتروحي «الليسيه» وتعرفي شوية فرنساوي
وحتتاهمي، افتكرت إن يحصل كويس بس ما حصلش كويس، دا اليوم الوحيد اللي سبتك ما
عرفتش اسبيك تاني، جيت معايا في كل حة. كان حلو والله لقبتها لفنة ظريفة وانبسطت إنه عملوا
معايا مجهود، خدوا بالهم إني ما اعرفش حاجة في أوروبا وبيساعدوني اتصرف لوحدي. سعد خدنا
نزور «برج إيفل»، بس ما رضيش يطلع .

- أنا طلعت وشفته قبل كدا اطلعوا انتو .

طلعنا وقابلنا في الأسانسير ناس سمعونا بنتكلم بالعربي أنا وانتِ فسألونا :

- منين؟

- من مصر .

- إحنا من سوريا. البنت اسمها إيه؟

لاعبوك وكانوا لطاف والست خدت معنا صورة، والصورة دي عندنا، بعثوها بالبوسطة .

سعد كان مشغول في مقابلات سياسية وأظن دا كان محرك الرحلة إلى باريس .

مع سفريات سعد لفرنسا وبرلين وتشيكوسلوفاكيا أيام الثقافة الجماهيرية دخلت في حياتنا شخصية
أحمد حمروش. أحمد حمروش من الطباط الأحرار اشترك في حركة الجيش وأصبح رئيس أو مدير
المسرح في فترة الستينات، سعد كان يعرف حمروش واصحاب من زمان من أيام التنظيمات بس
بقي يقابله بانتظام أكثر في فترة الثقافة الجماهيرية. وابتديت أسمع عن «مبادرة روجرز»، كلام

لتنظيم مبادرة لإنهاء الخلاف مع إسرائيل على أساس إن إحنا - مصر وجمال عبد الناصر ونظام جمال عبد الناصر - مش ضد اليهود وإنما ضد الاستعمار. يظهر إن حمروش كان رجل ثقة عند جمال عبد الناصر وزى مندوب الحكومة ومندوب عبد الناصر في الموضوع، بشكل غير رسمي أو نص رسمي، يمكن بسبب علاقته القديمة وقوية بـ«كورييل»، نظموا مقابلة مع واحد أظن اسمه «وينبرج» كان رئيس الطائفة اليهودية في العالم ساعتهما، ما كانش إسرائيلي، يمكن أمريكاني؟ قابل جمال عبد الناصر لمحاولة الوصول إلى تصوّر. تفاصيل «مبادرة روجرز» مش عندي، سمعت حاجات عنها لكن مش فاكراها، اللي أعرفه إن مرة أيام الثقافة الجماهيرية سعد راح فرنسا وقابل «هنري كورييل» لتوصيل كلام من جمال عبد الناصر عبر أحمد حمروش وانطباعي إن الكلام دا ابتدى قبل حتى الهجوم الإسرائيلي في يونيو واستمر بعدها. بمعنى إن نشاطات الثقافة الجماهيرية كان موازي لها بالنسبة لسعد مهمة تواصل مع «هنري كورييل» وبين عبد الناصر من خلال أحمد حمروش وثروت عكاشة فيما أصبح اسمه «مبادرة روجرز» بعد كدا. الصلة بين «كورييل» وأحمد حمروش قديمة و«هنري كورييل» كان على علاقة مع الطباط المصريين الثوريين من بعد الحرب العالمية الثانية من قبل حركة الجيش في 1952 وامتدت بعد ما «كورييل» خرج من مصر وعمل مجموعة للشيوخ المصريين في الخارج، اسمها مجموعة «روما» ولكن هي في باريس، وسمعت وما اعرفش إلى أي درجة صح، إن عبد الناصر فضل على اتصال بـ«كورييل». كان فيه مواقف من النوع دا بتحصل لعبد الناصر، علاقته بالشيوخ عيين كان فيها خليط من النفور والانجذاب. الحكايات دي أكيد أحمد حمروش حكاها مطبوط في أحد كتبه. لكن رحلتنا لباريس كانت مربوطة بالكلام دا بشكل أو بآخر، حبيت أوضح انطباعي، النكسة كان عدى عليها سنة يا دوب وسعد كان لسه مرفود من الثقافة الجماهيرية والأوضاع كانت مهزوزة .

ممكن نقول إن المنظمات والأحزاب رجعت تنشط تاني، والأسئلة على الموقف من نظام الحكم رجعت تاني في المناقشات، بس كان في حالة من الصدمة بين الشيوعيين. ابتدت الحركات الطلابية تتحرك من 1968 على طول بعد النكسة وتطالب بالحريات ومزيد من الديمقراطية والشفافية. أنا الحقيقة ما عرفتش أتابع الناس دول وما عرفتهمش كويس، ابتدى جيل تاني، وجوه جديدة في الثقافة شعلت على نهاية حكم جمال عبد الناصر بعد موته سنة 1970 ووصلت لقمته في 1972. ظهر شاعر شعبي اسمه أحمد فؤاد نجم ومتجوز صحفية مثقفة وجريئة اسمها صافيناز كاظم، وشيخ اسمه الشيخ إمام بيلحن ويغني شعر نجم، وانتشرت أفكار التمرد عن طريق الأغاني والتجمعات حولها. نجم والشيخ إمام راحوا سيلا الفيوم مع سعد مرة يسجلوا الأغاني على كاسينات علشان تنتشر. سمعت كمان عن عطيات الأبنودي مخرجة أفلام تسجيلية بتقرّب من الناس وتحكي مشاكلهم بجرأة وتتهاجم. قبل ما يموت جمال عبد الناصر كان اتوصف إنه ديكتاتور، والحكم إنه قامع للحريات. حرب الاستنزاف كانت مستمرة بقى لها كام سنة، وجمال عبد الناصر زود مجهود تسليح الجيش بعد الهزيمة، فالتلات سنين من 1967 لغاية ما مات المجتمع كان في أزمة، البنية التحتية بتتهار، مفيش أماكن في المدارس، والتعليم بيتدهور مش بيتصلح، أزمة البطالة والمساكن بتزيد بعد تهجير مدن القتال التلاتة، والتلفونات بايطة والخدمات كلها واقعة مفيش ميزانية للصيانة، وكل شوية تظهر أزمة جديدة، مرة نسمع إن التجار بيلمّوا الفكة ويسّحوها ويبيعوها معادن مفيش فكة، ومرة مشكلة البطيخ، عاملين تسعيرة والتجار عاوزين يزودوا الأسعار، فاختقى البطيخ من السوق وكنا بنسأل

راح فين البطيخ؟ وسمعنا إن التجار مخبيينه في مداخل العمارات، عايزة اجيب كبريت مالاقيش كبريت، عايزة شاي مش لاقية شاي، سكر، رز .

*

ما كنتش باعمل حاجة سياسية، ما حدش اتصل بي من ساعة ما خرجت من السجن الأول في 1949، ولا من الشيوعيين ولا من النظام. طلع قرار بالسماح للمرأة بالانتخاب والترشيح لأول مرة في تاريخ مصر، واحدة اسمها راوية عطية رشحت نفسها وانتخبت عن الجيزة ودخلت البرلمان، مجلس الشعب. عملت حملة لمحو أمية الستات، تعلمهم وتشجعهم يستخرجوا البطاقة الانتخابية ويشاركوا في الانتخابات. الستات كانوا عموماً على الهامش، مفيش حماس ولا فهم بالمعنى الكبير اللي بيحصل في البلد، ما عدا شوية مثقفات طبعاً. ابتدت راوية عطية الحملة وطلبت من معارفها ينزلوا يشجعوا الستات في الأحياء الشعبية على استخراج البطاقة الانتخابية. أنا اتحمست في البداية، رعاية النمر كانت لسه مديرة قصر الثقافة في الجيزة وقلت لها :

- ما تيجي نشترك في الموضوع دا؟

- بس نروح فين؟

فكرت في محمد السنوسي اللي بيساعد نانا في البيت، ساكن جنبنا في بين السرايات، حنة شعبية ورا جامعة القاهرة، طلبت منه نقابل مراته وجيرانها ستات الحنة. وفعلاً رحنا أنا ورعاية، أنا اتكلمت الأول :

- لازم الستات يهتموا بأمر البلد وينتخبوا ويقولوا إن كانوا مبسوطين ولأ، ويقولوا عايزين إيه .

شوية كلام كدا، حسيت إنهم منتبهين للهجتي ولوني وشكلي ولبسي أكثر ما متابعين الكلام اللي باقوله، قلت في نفسي معلش الموقف جديد علينا كلنا. بعدين رعاية اتكلمت وشرحت أكثر وبشكل أحسن ومن غير لهجة بس برضه بيقلوا «أه، أه، أه» حسينا إحنا الاتنين، أنا ورعاية، إن الموضوع مش نافع في قعدة أو قعدتين، عايزين نكون شعبيين ونساعد الشعب وستات الشعب، لكن موضوع الانتخابات دا مش مناسب. الستات مش شايفين أهميتها ومهما نقول بالكلام إن المشاركة في الانتخاب حتكون في مصلحتهم، ازاي حيرج لمصلحتهم؟ وينتخبوا ناس كويسين ازاي؟ أصلاً ما يعرفوش مين الناس الكويسين ومين الناس الوحشين، ولا إحنا إلى حد كبير، عالم الانتخابات صعب، بتتعمل ازاي ومين بيترشح وازاي بيكسب فكلام نظري مش مقنع بالنسبة لستات إيديها في الحياة اليومية. تراجعنا. دا كان التحرك الوحيد اللي حاولت عمله في السياسة وسبته على جنب ورجعت ركزت في الباب اللي باكتبه في «حواء».

هنا نيحي بقى لإسرائيل، أنا أتصور إن من بعد سبعة وستين حصل تغيير في الوعي عندي وعندنا كلنا وفي نوعية المناقشات. إسرائيل عدو دا مفروغ منه واننا متضامنين مع الفلسطينيين بشكل إنساني ووجداني دا طبيعي وفي صميم مشاعر القومية العربية ومبادئ التحرر الوطني. في يوم كنا

عند رعاية وأبو العينين في بيتهم وكان فيه عدد كبير من الناس، بهاء جايب معاه اتنين فلسطينيين باين عليهم متجوزين والبنات شكلها بيغكرني برندا سنيورة صاحبتنا من القدس، وجات قعدتي جنبها. الوضع السياسي في مصر متوتر ومش واضح، واحنا بطريقتنا بنشرب وبنضحك وننكت وكلام داير ومناقشات على الفن وعلى الأوضاع في مصر. فجأة بهاء سأل الست الفلسطينية :

- انت متضايقة من الضحك دا؟ حاخليك تتكلمي دلوقت استني شوية .

انتبهت إن فيه اتنين جنبي ساكتين وهي بالذات متضايقة، وشها فيه وجوم. حسيت انهم اعتبروا اللي بيحصل في القعدة بتاعتنا نوع من الفساد، مش واضح لها إن دي طريقة كلامنا. بهاء قدّمهم :

- النهاردا معانا في وسطنا اتنين من فلسطين جايبين من الأردن، حصلت مجزرة .

ما اعرفش وصفها ازاي بالضبط بس هي كارثة كبيرة حصلت في الأردن، والفلسطينيين اضطروا يهربوا واللي ما هربوش اتقتلوا في الشوارع. كلهم سكتوا، انتبهوا، مفيش ضحك. ضيوف بهاء شرحوا الوضع: فيه تحرك من ناحية الأردن، قالوا عليها خيانة من الملك حسين ومن أشخاص تانيين قالوا لنا عليهم بالاسم. السهرة انتهت بمناقشات «ممكن يتعمل إيه؟». عايزين تأييد مش بس تعاطف. ما شفتهمش تاني. حاجة بارزة في اللقاء دا إن المجتمع المصري مش متابع كفاية، واللي انتبهت له شخصياً في السهرة دي إن إسرائيل فتحت جبهة سياسية، يعني من هنا ورايح مش بس أخبار إسرائيل العسكرية اللي تهمنا .

المذبحة دي اتعرفت بعد كذا باسم «أيلول الأسود»، لأنها حصلت في سبتمبر .

بعدها بمدة قصيرة جمال عبد الناصر مات .

أنا واخده بالي إن بأقول كلام كثير ملوش رابط غير صدمة 1967، بس معلى خُدني على قد عقلي ونستمر .

سافرت إيطاليا أزور أهلي تاني سنة 1970، جدو كامل كان تعبان وسعد كان رجع يكتب في «الأخبار» بصعوبة وبعد اتصالات ومساعي عدد من الناس، ومحطوط تحت ضغوط ومش بينشروا له بانتظام فما جاش معانا. سافرنا أنا وإنت ودينا لوحدا بالمركب. المرة دي رحنا «ريبا» مش «نابولي» لأن أبويا وأمي كانوا خلاص صفوا أمورهم في «نابولي» ونقلوا «ريبا» بشكل نهائي. كانوا عايشين على معاش بسيط، حبايبي كانوا بيحوشوا ليل نهار علشان يحتقوا بينا ويدلعونا لما نيجي نزرورهم، أنا ما كانش معايا فلوس. آخر يوم لنا في الزيارة دي جالنا خبر موت جمال عبد الناصر، واحنا مع أبويا وأمي في «ريبا». أبويا ساق بينا لـ«فينيسيا»، كانوا غيروا مسار البواخر «سوريا» و«الجزائر» ونمر من مضيق «كورنثوس» في اليونان. المركب كانت مليانة مصريين، ستات لابسة إسود ورجالة وشباب والجميع بيعيط، فيه شابين فضلوا طول الرحلة متشعبطين على سلم بيحاولوا يجيبوا إرسال تلفزيون في وسط البحر عايزين يلقطوا إرسال من أي بلد، مش مصدقين الخبر. علي الراعي جه يستقبلنا في اسكندرية بالعربية، وصلنا البيت لقيناها مليون ناس،

أصحابنا ملمومين عندنا لسه بيتابعوا الأخبار، مش فاكرة منهم بالاسم إلا رعاية، لابسة اسود وبتعيط بلا توقف ونانا حماتي، أم سعد، واخداها عندها في الأوضة تططب عليها وتحاول تهديها. ثاني يوم جت فاطمة دادة دينا علشان تسلّم علينا، لابسة اسود وصوتها رايح من كتر الصويت وبتحكي على الجنازة، فاطمة حضرت جنازة عبد الناصر .

من أوائل الإجراءات اللي خدها السادات لما جه الحكم فيما يخص الصحافة منشور إن سعد كامل ممنوع من الكتابة هو ويجوز صلاح حافظ. سعد كان يا دوب رجع يكتب في «الأخبار» بعد ما شالوه من الثقافة الجماهيرية، عبد الناصر مات ومنشور السادات دا نزل وسعد بطل يكتب ثاني، المرة دي استمر ياخذ ماهيته من «الأخبار» ولكن ممنوع من الكتابة نادراً ما نشروا له، واستمر المنع لغاية ما السادات اتوفى، لغاية ما اغتالوا أنور السادات .

سعد كان اشترك في قضية اغتيال أمين عثمان مع أنور السادات في الأربعينات، الإعلام كان بيروج لصور بطولات السادات وإنه قاوم الإنجليز والاستعمار في شبابه زمان، فالناس كانوا متصورين إن فيه نوع من الزمالة القديمة بينه وبين سعد، بالذات إن السادات حب يجيب حواليه الناس اللي يعرفهم زي محمد إبراهيم كامل زميل سعد برضه في اغتيال أمين عثمان يستشيريه وانتهى الأمر إن أدّى له منصب كبير في الخارجية، فكان فيه ناس متوقعة إن دا ممكن يحصل مع سعد، بس حصل بالعكس .

فترة السادات كانت فترة وحشة بسبب إبعاد سعد من الأول خالص كدا .

جمال عبد الناصر مات يوم 28 سبتمبر 1970 وأنور السادات عمل انقلاب داخلي كبير في 15 مايو اللي بعده يعني 1971. قبض على القريبين من جمال عبد الناصر واللي عندهم مراكز قوة أو أي نفوذ تحت عبد الناصر، سواء عندهم منصب أو لا. ناس لهم نفوذ من تحت لتحت بدون منصب محدد في الدولة، قبض عليهم وحطهم في السجن، بعضهم أخذ أحكام كبيرة زي خمستاشر سنة والتهمة بيحضروا لانقلاب ضد السادات. الحكاية دي معروفة وممكن الواحد يقرأ عنها في الكتب والأبحاث .

نظام جمال عبد الناصر كان مليون شرطة ومباحث ومراقبة تلفونات، فالسادات قبض على شمس بدران والبوليس السياسي اللي تحت جمال عبد الناصر، كانوا مسجلين أطنان من الأشرطة وهم بيتجسسوا على الناس، واتحرقت الأشرطة دي كنوع من التصحيح، وطلعت شعارات «من غير خوف» «المواطنين الأحرار». وإلى حدّ ما إحنا كنا مبسوطين من التخلص من مراكز القوى ومن حرق الشرايط ومن كلامه عن الديمقراطية وإعادة تكوين الأحزاب، كل دا كويس، ولكن في الواقع الخلاصة هي إن الإجراءات دي كانت استعراضية علشان يغطي على الانقلاب السياسي، لأن البوليس السياسي فضل زي ما هو والمعارضين في السجن أو زي سعد، موقوف من الكتابة وممنوع عن وزارة الثقافة. مسألة إن يقبض على الناس دي كلها بدون تمييز معناها إنه ضد عبد الناصر مش مسألة حريات ومراكز قوى ولا حاجة زي ما بيدّعي. فعلاً ابتدى ينفذ سياسة ثانية،

كنا بنشتم القطاع العام هنا في مصر، طوابير في الجمعيات وفساد وسوق سودة وما تلاقيش دا وما تلاقيش دا وناس تسافر وتهرب فلوس، لخبطة كبيرة، الغلط في فساد المسؤولين في الجمعيات وفي الشركات وفي السرقات، وكان فيه محاولة لمحاربة الفساد بالبوليس بس دا ما بينفعش، ناس الفساد أشطر من إن تحاربيهم بالقوة، على أي حال السادات انتهز الفرصة وابتدى يصفي القطاع العام بدل ما يصلحه. أنا زرت بنفسى مصنع الألومنيوم في جنوب قنا في رحلة ثقافية نظمتها نقابة الصحفيين مع عدد من الأصدقاء جميل شفيق ومحمد عودة، رشدي أبو الحسن كان المنظم، قالوا لنا إن دا تالت أكبر مصنع ألومنيوم في العالم كله وجه نتيجة لكهربة السد العالي، واللى بيديره هندسيًا وتقنيًا واحد من كبار المهندسين الروس. لكن الروس رفضوا تسليح السادات، واضح ما كانش عندهم ثقة يدوا له أسلحة هجومية، إدوا له أسلحة دفاعية فقط، فعمل خطبة وقال «إحنا مختلفين مع الروس في الإستراتيجية وانا ما حدش يملي عليّ شروط» ولغى معاهدة عدم الاعتداء. العلاقة مع الاتحاد السوفيتي كانت كبيرة في مجالات كثيرة، الخبراء الروس مش بس في الجيش، في السد العالي وكثير من الشركات والمصانع والمؤسسات الإنتاجية منها مجالات مفيدة، الهدف منها التقدم الصناعي والزراعي والسياسي، يبجي بقى أنور السادات يقطع العلاقة مع الاتحاد السوفيتي ويطلب من الخبراء الروس اللي كانوا موجودين هنا يسيبوا البلد في بحر 24 ساعة، ومشياوا فعلاً فوراً. وابتدى إجراءات الانفتاح الاقتصادي، أنا مش فاكرة الإجراءات اللي ابتدى بيها لكن ابتدى يحول البلد إلى قطاع خاص. عمل تقارب مع النميري في السودان، والنميري كان عامل حملة مسعورة على الشيوعيين وقبض على صديقنا عبد الخالق محجوب بعد انقلاب فاشل. سعد كان حيتجنن. هو منبوذ من السادات هنا وبيحاول ينقذ عبد الخالق محجوب من الإعدام في السودان. كلم طوب الأرض يتوسل يتدخلوا. وصل إنه اتصل بهيكل قالوا له رايح اسكندرية، جري على المحطة ركب وراه القطر، دور عليه وقعد جنبه وابتدا يحكي له عن عبد الخالق محجوب علشان يقنعه يتدخل. هيكل وقفه في نص الكلام وقال له :

- خلاص، حصل، أعدموه النهاردا الصبح .

سعد اتصدم ورجع لي منهار .

- لما صحينا الصبح كان مات، بادور على هيكل في القطر ومحجوب ميّت .

وبالنسبة للقضية الفلسطينية ابتدى السادات يقول إن 99% من الأوراق في إيد الأمريكان، مع إن إحنا عارفين إن «الأمريكان بيأيدوا إسرائيل، واحنا عندنا الاتحاد السوفيتي والمعسكر الاشتراكي بيدعم قضية مصر والعرب»، فإزاي 99% من الأوراق في إيد الأمريكان؟ انقلاب على سياسات التحرر الوطني والاشتراكية وبيسميها ثورة تصحيح وحريرات. القذافي لسانه طويل وتحركاته غريبة وبعد ما مات عبد الناصر أظن قال كلام ضد مصر أو ضد السادات، فالسادات شتمه وهدده، وجالنا إحساس من الخطب والمقالات إن السادات بيهدّي مع إسرائيل ولا عاوز يحاربهم ولا حاجة، واحتمال كمان يخش حرب ضد ليبيا. إشاعات كثيرة انتشرت والبلد اتملت احتجاجات. في الجامعة بيطالبوا بالحريرات وبال حرب ضد الاستعمار الممثل في إسرائيل وأشهرها اعتصام 1972، وفي المصانع إضرابات عمالية بسبب الإجراءات اللي بياخذها السادات شوية بشوية ضد القطاع العام والدعم وحقوق العمال. قصاد جو الاحتجاجات دا السادات راح عزم نيكسون، الرئيس الأمريكي،

وظلعت يفظ «يحيا الرئيس نيكسون» و«تحية للشعب الأمريكي» و«الشعب المصري يحيي الرئيس الأمريكي»، وابتدى يدعم الإخوان المسلمين والجماعات الإسلامية ضد الشيوعيين في الجامعة بالذات ويديهم ضوء أخضر، وابتدت تجلينا أخبار زي إن في أسبوط مجموعات إسلامية طلّعوا المطاوي ودخلوا في معارك مع الطلبة اللي بيحبوا سيرة جمال عبد الناصر والحكومة مغمضة عينها، بعد كدا سياسة تغميض العين عن الإخوان امتدت للمدارس بين المدرسين وفي المؤسسات والنقابات، لكن أول مرة أسمع عنها كانت في احتجاجات الجامعة. التحركات دي اتبلورت بالذات بعد حرب 1973، لكن بواورها كانت موجودة من قبلها، دا السبب إن الهجوم على أنور السادات كان كبير بين أصدقائنا، واحنا كنا ضده، أنا كنت ضده وسعد كان ضده .

متضايقين من التحركات دي كلها وحاسين السادات مودّينا في داهية ومش عارفين نعمل إيه .

كان فيه دعوة إن الوطنيين والثوريين والشيوعيين يسيبوا البلد علشان الوضع في مصر مش مضمون سياسياً ومش ماشي، عدد كبير قرروا يهاجروا ويبعدوا عن البلد، سعد ساعتهما خد موقف إن «لا، ولما الناس الكويسين - من وجهة نظرنا - اللي عندهم سياسة تقدمية ديمقراطية تسافر، يسيبوا البلد لمين؟ دا نوع من الهروب من المشاكل اللي سابها جمال عبد الناصر». دا كان رأيه، هل مطبوط ولا لأ كفكرة مش متأكدة، في التاريخ الإنساني حصل إن الناس اضطرت تسافر وتكمل من بره ويرجعوا تاني. المهم عدد كبير من المثقفين واليساريين راحوا اشتغلوا في العراق، والعراق كان بيكسب المصريين ويدعمهم في موقفهم المعارض بأن يدخل أولادهم في جامعاته مثلاً. فاكرة على سبيل المثال إن حد من ولاد يوسف إدريس كان عايز يخش كلية الطب، وباعتبار يوسف إدريس من المعارضين لنظام الانفتاح ومش محبوب من نظام السادات، فأولاده دخلوا كلية الطب في العراق. معظم المصريين اللي كانوا بيايدوا نظام جمال عبد الناصر والشيوعيين اللي بيايدوا الاشتراكية هُجوا من البلد علشان حسوا إن مش قادرين يمارسوا أي نشاط سياسي، لكن أهه دا كان رأي سعد، رأي مَلُوش شعبية ولا حتى عند المعارضين، فكانت فترة مش مستقرين فيها، ووضعها المهني مهزوز، والحالة المادية برضه مهزوزة، عندنا فلوس قليلة، أو اسمها ما عندناش فلوس .

ابتديت أحس إن فيه صعوبة إن سعد يستمر يشتغل في الحياة العامة، بياخد بانتظام موقف مش مع الناس ولا مع الحكومة، اقترحت عليه بيني وبينه إن ضروري يستقر في عمل ويفصل شوية ارتباطاته الشخصية عن النشاط العام، يفصل الدخل الشهري اللي هو بياخده عن إمكانية العمل السياسي، يبعد شوية عن السياسة، بس سعد ما كانش مقتنع، ما كانش عاوز خالص .

- يعني أعمل إيه؟

- تروح العزبة مثلاً، انت عندك أرض ممكن تشرف على الأرض .

- أنا مش مزارع .

- مش مشكلة فيه ناس مش مزارعين، أولهم أبوك، كان مدرس وبعدين مفتش في التربية والتعليم وبعدين اشترى الأرض وابتدى يشتغل فيها ويشرف عليها .

- أنا عندي أخين، جمال وعز الدين الاتنين مهندسين زراعيين، ياخذوا بالهم من الأرض .

- ما يجراش حاجة، مطبوط، بس دلوقت إن إنت ما عندكش حاجة تعملها في مصر، مفيش مسؤولية معينة، الحكومة بتألفظك وانت مش مقتنع إنك تسافر وتسيب البلد، فممك تتهتم شوية بالأرض .

هنا ظهرت فكرة طماطم للتصدير، كانوا ابتدوا يشجعوا التصدير من ضمن سياسة الانفتاح، فنزرع اللي بيتصدر مش اللي بناكله. إحنا عندنا نوع طماطم بيتزرع في مصر اسمه «بريتشر» وأنواع تانية كانوا بيقولوا لي على أساميتها بس أنا نسيتهما، على أي حال كلها أنواع بتسرح على الأرض والطماطامية تكبر راقدة على التربة، والمحصول محدود بمساحة الأرض، يجيب كذا طن في الفدان. وصلت من بره بذور اسمها «ماني ميكرو»، اسمها كدا، «مكنة الفلوس» على أساس بتجيب محصول كبير لأن زرة الطماطم بتتمو بالطول معلقة في الهوا وتدّي فرصة لعدد أكبر من حبّات الطماطم تنمو على نفس مساحة الأرض، يعملوا قوائم من الخشب ويمدوا بينها سلك، تشبه تكعيبة العنب في إيطاليا في قرية أمي، وكل ما النباتات تطول يعلقوها بدوبارة في سلك أعلى، ما يسيبوش الزرة تدلّ أو تنام على الأرض. الطماطم دي مش بتستوي بسرعة وتفضل جامدة زي طماطم السّلطة مدة طويلة وتستحمل السفر، مناسبة للتصدير. سعد قال خلاص حاروح اشرف على مشروع الطماطم دا. إنتو عندكو المدرسة فمش ممكن اروح معاه، لازم يروح لوحده يقعد في العزبة وييجي القاهرة مرة في الأسبوع. الاكتاب كان ابتدى يخش جسمه ومش يقدر يقعد لوحده عايز لازم حد معاه. بهجت من ناحيته كان يحب يروح يقعد يومين ثلاثة علشان يرسم، يقعد مع سعد يونسوا بعض، ودينا راحت قعدت معاهم مرة وانبسبت مع بهجت، ومشينا على الوضع دا مدة .

طماطم التصدير ما تتحطش في الأفقاص زي محصول الطماطم العادية اللي بينزل السوق، لا، لازم كراتين مخصوصة تنقل ولها خروم تهوية. وقبل التعبئة فيه الفرز، لازم الطماطم تكون نفس المقاس، الكرتونة فيها فراغات بحجم الطماطامية «المظبوطة»، فالأولاد والسنتات اللي بيشتغلوا في الموضوع يحطوا الطماطامية لو تريح في الفراغ تبقى كويسة، لو صغيرة أو كبيرة يستبعدوها، واللي بيستبعد ينزل السوق في مصر، مش بيتزرمي. مصاريف في الدوبارة والسلك والقوائم الخشب والكرتون والأنفار اللي بتشتغل. حنة كبيرة من الأرض انزرعت «ماني ميكرو» والحكاية دي شغلت عدد كبير من الفلاحين ومن الأولاد والسنتات، عمل زي مهرجان، الناس تشتغل وهي فرحانة، وابتدت أول قطفة وتاني قطفة، كذا قطفة على كذا شهر علشان الزرة تجيب المصاريف اللي اتصرفت وبعدين تيجي أرباح. حاجة جديدة والفلاحين انبسطوا وسعد اندمج في التجربة بسبب فضول الفلاحين وحماسهم أكثر من الربح المنتظر ييجي منها، مسألة إن يعمل حاجة جديدة ويحس إن المشروع عامل انتعاش في المنطقة بدل المحاصيل التقليدية كان مهم بالنسبة له. الفيوم واحة ومحاطة بالصحرا فدرجة الحرارة ممكن تنزل للصفر بالليل، ببسموه الصقيع، ودا بيحصل يوم أو يومين بالكثير في السنة، لكن ليلة واحدة صقيع خطر على المحصول، حبة الطماطم في الليلة دي تتجمد والمية اللي فيها تتحول إلى تليج ولما ييجي الصبح والحرارة تتحسن التليج يسيح والطماطامية تكون باظت ولونها يبقى زي الدمل، لا تستوي ولا تكبر ولا تحمر. الصقيع فاجتنا والطماطم اللي على الزرع باظت ولازم تترمي وتتخلع والمشروع ما نجحش وطلع بخسارة. إزاي ما فكروش في الصقيع قبل ما يبتدوا الزراعة؟ بس أهه. سعد حكى لنا وانت تفكر في دا يا نادية إن كان مطلوب

يولعوا نار بالقش حوالين أحواض الزرع ليلا من نص الليل لحد الفجر طول موسم الصقيع، حوالى شهر، لكن مفيش فلوس للتدفئة وطبعًا ما كانت فيه ميزانية لإعادة التجربة. أتصور إن لو فيه رأس مال كبير كان ممكن في خلال سنتين تلاتة يبقى فيه خبرة وبيندي المشروع يشتغل ويبقى مُريح، لكن إحنا كنا بنغامر، يا نفع يا ما نفعش، وما نفعش .

سعد زعل زعل، معنويا باتكلم، الفشل كان أفضح من خسارة الأرباح، ساب الفيوم ورجع مصر وقال «أنا مش خارج اشتغل في الفيوم تاني» وكان عند وده، ما رجعتش للاهتمام بالزراعة أو بالأرض أو بأي مشروع خاص بالأرض في الفيوم، يروح للزيارة ودايمًا يحدد «أنا جاي علشان أستجم، أتفسح، مش علشان أشتغل».

*

متعودين ننام بعد الغدا شوية ونصحى نشرب شاي بعد الظهر، مش عارفة مين دخل علينا واحنا بنشرب الشاي وقال الجيش المصري عبر القنال. قطعوا الإرسال، كان رمضان ولغوا كل الفوازير والمسلسلات وخطوا أغاني وطنية. حرب مفاجئة. نزلت على طول أشتري شاي وسكر، ما لقتش في أي بقالة في الدقي ولا سكر ولا شاي، فيه ناس كانت عارفة الحكاية دي قبلنا، أو على الأقل البقالين أول ما سمعوا الأخبار دي خبوا الزيت والسكر والتموين الأساسي وانا كنت عاوزة شاي وسكر بالذات .

اليومين اللي بعد كدا كانوا مليونيين حماس قاعدين جنب التلفزيون والراديو، ابتدينا نشوف أول صور جت من العبور بالكباري والزوارق والدبابات، والطائرات وهي رايحة تحارب، وبيانات عسكرية بان عبروا ونجحوا في العبور ودخلوا سينا وبيكسروا «خط بارليف». ونتفرج على خط بارليف في التلفزيون. لقطات لمجموعة أسرى إسرائييين، صَوَّرُوهم، واللقطة اتعادت ستميت مرة في التلفزيون المصري. عدد من أصدقائنا كانوا متحفظين، ما كانوا بيعبروا بس يقولوا «نستنى نتأكد». وكنا بنسمع الأخبار من المحطات الأجنبية في الراديو علشان نتأكد .

لينا صديق شيوعي قديم اسمه عثمان غالب دكتور عيون كان عزمنا في بيته على قعدة - أظن في العجمي في صيف 1973 - قبل الحرب حكى لنا إن ابنه نزل إجازة من الجيش والظابط اللي بيدربهم قال لهم قبل ما يمشوا :

- لازم تفهموا إن العدو في الشرق مش في الغرب .

الحكاية اتحكى زي سر كبير وكنا كلنا مذهولين، أظن كان فيه عز الدين وبهيرة في القعدة دي، «إوعوا تنسوا إنكو بتدربوا علشان العدو اللي في الشرق». ما صدقنا هوش. ما صدقناش كلام الظابط .

رحنا نقابل الناس اللي راجعة من الجبهة، فتحى مراد ابن طنط أمينة خالة سعد في سلاح المشاة ومن أوائل المجموعات اللي عبرت، يعني من الجنود اللي خطوا العلم في سينا. حكى لنا على

الحماس لما عبروا الناحية الثانية وقدروا ينزلوا الحاجز الترابي «خط بارليف» بخراطيم المية ويعملوا طريق والدبابات المصرية تمر قدامهم. وحكى إن أدوهم صواريخ روسي وقالوا لهم اضربوا، في الأول ما كانوا عارفين يستخدموها لكن لما الدبابة الإسرائيلية جت في وشهم ضربوا الصاروخ عليها زي ما تيجي مش قادرين ينشئوا فإذا بالصاروخ يروح في اتجاه الدبابة ويصيبها وفعلاً تولع نار، جالهم حماس وشجاعة إن يستمروا ويخشوا وما يخافوش ولا من دبابة ولا من عساكر ولا من أي حاجة، بيحكي إن قدام الخطر على الجبهة نسيوا التدريبات والتعليمات وبقوا يجروا الأقدام ويصرخوا «الله أكبر، الله أكبر» مش مصدقين أنفسهم ولا حاسين بحاجة، الطريقة اللي فتحي بيحكي بيها حمستنا أكثر وأكثر. محمد الرملي جوز عزة بنت فتحي رضوان كان في الصحرا متحاصر في منطقة الثغرة في سينا وكان فيه صعوبة يخرج، وعزة عاشت حالة من الضيق والتوتر لغاية ما أخيراً رجع بيته ورحنا نزوره على طول. محمد الرملي مهندس من اللي عملوا كوبري العبور، فكان متحمس للسادات وللجيش المصري على الجبهة وبيحكي لنا إزاي اتدربوا بحماس شديد على بناء الكوبري اللي عبروا به القتال .

دا ما منعش إن سموها الثغرة، وان إسرائيل اخترقت الجبهة المصرية وحاصرت القوات في منطقة اسمها الدفرسوار، وأظن الاتحاد السوفيتي طلب وقف النار، والسادات قبل على طول. اللي ضد السادات قالوا إن ما كانش لازم يقبل وقف إطلاق النار وكان لازم يستمر في حرب طويلة، ولكن مهما نقول إنه ضيع فرصة، العبور كان رد اعتبار ورجع المعنويات المصرية اللي كانت محبطة من أيام 1967 بطريقة لا تُحتمَل .

كان موقفنا إيه سعد وأنا؟ كنا مترددين. كنا ضد السادات لأكثر من سبب، بالذات علشان كنا مضطهدين بشدة وسعد ممنوع من الكتابة ومغضوب عليه والغضب طول وابتدى كثير من الأصدقاء يبعدوا عنا حتى ديزي وبهاء خدوا نوع من المسافة. ودخلنا العزلة .

بعد عبور 1973 أنور السادات انطلق في مشاريعه السياسية، كان بيقول عاوز يعمل صدمة كهربائية في ذهن المصريين وعايز يعالجهم ويعالج البلاد العربية. وعمل الانفتاح الاقتصادي والسلام مع إسرائيل. نصحى الصبح نلاقه طلوع قرارات اقتصادية وزيارة نيكسون، ونصحى الصبح نلاقه راح يزور إسرائيل. عمل الخطبة بتاعته في الكنيست وبعدها اتعملت معاهدة السلام في «كامب ديفيد» في أمريكا، والعرب رفضوا وابتدت مقاطعة العرب لمصر، كثير من التقدميين المصريين انضموا لحركة السادات، والمصريين كانوا منقسمين انقسام كبير في الآراء. مقاطعة إسرائيل في مصر خدت شكل جديد، احنا بنقاط بعض، والبلاد العربية بتقاطع مصر .

انتعشت لبنان وأصبحت تغري الكتاب والفنانين المصريين يروحوا يشتغلوا فيها، على أساس فيها حرية أكثر وشغل أكثر بينما هنا فيه ديكتاتورية السادات وموقف متخاذل من إسرائيل. بهجت عثمان راح على لبنان، وللأسف الموضوع دا خسر العلاقة بينه وبين سعد. بهجت وغير بهجت، راحوا لبنان يهاجموا اتفاقية السلام والسادات، وسعد فضل في مصر ولما رجع يكتب كتب كذا مرة إن ما يصحش نتنازل عن فكرة السلام ولا عن العدل، موقفه من «كامب ديفيد» كان فيه كثير من التأمل والتساؤل. على فكرة سعد له موقف قديم من الحرب مع إسرائيل، كان ضدها، وفي أوائل السبعينات راح ظهر في التلفزيون الفرنسي مع صحفي إسرائيلي اسمه امنون كابلوك له مقالات بينتقد فيها

سياسة إسرائيل، سعد تعمد إنه يسلم عليه في البرنامج، وقال له ما معناه: «الموضوع مش موضوع نسلم ولا ما نسلمش بالإيد، الموضوع هو إنكم محتلين أرض، حنتصرفوا إزاي في حقوق الفلسطينيين الضائعة؟». دا كان موقف ما حصلش، ممكن نقول عليه ريادي، زعلوا منه السلطة والمعارضة. كان كدا ما يستأذنش قبل ما ياخذ مبادرة فكرية. القصة دي حصلت قبل حرب 73 وقبل زيارة السادات للقدس وقبل «كامب ديفيد». سعد ما استفادش حاجة من موقفه دا، كان بيعبر عن سؤال حقيقي وبيطرحه، كان عنده إحساس إن مناورات السادات سياسية، عقدت الموقف، وإن الرد عليه مش لازم ينزلق في الدعوة للحرب. في موضوع الحرب بالذات أنا مدينة لسعد بوضوح رؤيته. على أي حال، فيما بعد إسرائيل انسحبت من سيناء واحنا فضلنا ضد السادات، ولكن لغاية الآخر للأسف، سعد وبهجت فضلوا إلى حد ما زعلانين من بعض بسبب المواقف السياسية، ودي أكبر خسارة .

بعد زيارة القدس ومعاهدة السلام ابتدينا نخش في المناقشة عن القضية الفلسطينية وعن إسرائيل بطريقة مختلفة والصراع لمعارضة أو تأييد أنور السادات ما بقاش طبقي وتحولت المناقشة والصراع إلى «حرب ولا مش حرب مع إسرائيل»، كان فيه مسألة الانفتاح كنظام اقتصادي وسياسي في الخلاف ولكن الأساس أصبح «فلسطين أو ضدها» «مالنا ولا مالناش» وانتهى الأمر إنه بقى «مع الحرب ولا السلام»، أسئلة مش في محلها بالنسبة لي، القضية الفلسطينية بالمعنى دا دخلت في صميم حياة المصريين من 1977 مش من 1967 اللي حصلت فيها الهزيمة، القضية الفلسطينية في 1967 كانت مفروغ منها إنسانياً ومبدئياً، سياسياً كانت من بعيد لبعيد .

السادات بعد ما أبعد سعد عن الكتابة في «الأخبار» باعتباره شيوعي وبتاع جمال عبد الناصر، وبعد مدة طويلة وبعد أحداث كثير بعت له بدون مناسبة علشان ينضم لأصدقائه ولفكره بإن يأيد النظام الجديد، الانفتاح والصلح مع إسرائيل وحاجات من النوع دا. السادات بعت لسعد ينضم لمؤيدي النظام، وسعد رفض، كان مطلوب منه الانضمام بشكل مش محدد، ومن غير حساب، مطلوب إعلان تأييد لأنور السادات شخصياً وخلص، فسعد قال «لأ» ورفض يروح يقابله، وانتهى الأمر إن أبعد أكثر وأكثر .

أنا مش عارفة الموقف دا حصل إمتى، فترة أنور السادات ملخبطة في ذهني، مش فاكرة بالظبط الأحداث حصلت إزاي ولا ترتبها .

لكن أقدر أقول لك إنها كانت فترة صعبة .

فترة فيها مواقف وحشة باستمرار .

نوقف هنا وخلييني افكر حاقول إيه تاني عن الفترة دي .

*

سعد رفض يتقرب من النظام ومن أنور السادات شخصياً، ودي كانت حركة من الحركات اللي أنا باسميها نبقى واقفين عند المبدأ، أفكارنا تكون هي هي، من غير ما يكون عندنا شيء من الخطة للتعامل مع الوضع. هو ما استشارنيش في دا، أنا مليش ذنب أو فضل في دي بالذات، في رفض مقابلة السادات، لكن لما حكى لي الموقف قلت له «كويس ما دام مش مقتنع مش لازم تروح». ما حصلش مثلاً إن حسن فؤاد وصلاح حافظ وعبد الرحمن الشرقاوي إن اتخطوا في نفس الموقف، والتانيين خالد محيي الدين وكل مجموعة «التجمع»، إسماعيل صبري عبد الله، فؤاد مرسي، كان مطروح عليهم شيء محدد، منصب، حزب، مسؤولية، أما سعد فكان مطروح عليه إن يعلن تأييده فقط، نوع من إعلان التراجع عن تاريخه. أنا كنت باشتغل في مجلة «حواء»، واستمرت اكتب بفضل أمينة السعيد، ولكن سعد وضعه كان مقفول .

موسى صبري كان بيكتب كل يوم ضد الشيوعيين في «الأخبار» لكن كان متعاطف مع سعد حتى وهو ممنوع من الكتابة، لما كان يصادف يقابلنا في العزومات النادرة اللي كنا نتواجد فيها عند بهاء وديزي مثلاً كان يعامله بجنيّة ويتكلم معاه يحميه من حالة العزلة اللي كان فيها، ولما سعد جاله شيء من أزمة قلبية ساعده على طول يسافر يتعالج في لندن على حساب الجرنال. دي كانت أول مرة أزور لندن، وهناك محمود السعدني ساعدنا نلاقي شقة في المنطقة اللي هو ساكن فيها «ميدا فيل». من ضمن المصريين اللي اتعرفنا عليهم في الرحلة دي صحفي اسمه إسماعيل بيشتغل في جرنال عربي في لندن. إسماعيل طلب من سعد يكتب صفحة بحالها من مصر ويبيعتها وهو ينشرها، الجرنال دا تمويل العراق بس أنا ما كنتش واعية قوي بموضوع التمويل العراقي. رجعنا مصر بعد العلاج وسعد ابتدى يكتب، وطبعاً مفهوم إنه هيكتب في السياسة، أمال هيكتب في إيه؟ العراق في الوقت دا دخلت حرب مع إيران، وناس كتيرة في مصر واقفين مع العراق على أساس معارضة صدام للسادات، أنا كنت شايفة إن العراق ملهاش حق، بتهاجم وحطت إيران في موقف دفاع عن النفس، إيران فيها عيوب كتير والوضع مش مستقر، ولكن في موضوع الحرب، العراق اعتدت على إيران، وإحنا أصلاً في حالة حرب مع إسرائيل، حيقعد يدخل حروب تانية؟ ناس تموت وفلوس تضيع ومعاناة، حاجات كتير في المجتمع بتخسر أثناء الحرب .

قعدنا نتناقش سعد وأنا :

- آخذ موقف شكله إيه؟ مع إيران ولأ مع العراق؟ في شرح الموضوع، أنا ضد الحرب على أي حال .

- كويس، لازم ضد اعتداء العراق على إيران .

طيب، أنا على الأقل مش واخدة بالي إن الجرنال تمويل عراقي، لكن يروح سعد بقى يكتب في أول مقال إنه من حيث المبدأ شايف إن العراق ملهاش حق؟ المقالة ما كانتش هجوم على العراق أو شتيمة ولكن معنى المقال كان بيعكس رأيه بدقة: «مفيش داعي للعراق وهي أغنى بلد في المنطقة العربية، وعندها تاريخ قديم وتراث وما اعرفش إيه، تضيع ثرواتها في شن حرب وتخسر بني آدميين وأسلحة وفلوس وغيره مع بلد زي إيران، ممكن يكون عندنا أعداء يستحقوا الحرب زي إسرائيل» مقالة صفحة بحالها. دا بقى الغريب في سعد، أصل أكيد هو واخذ باله من خلفية إن

العراق بتموّل الجرنال. إحنا كنا بننتقد السادات إن مفيش ديمقراطية وانه ماشي في طريق الانفتاح الاقتصادي وضد الاشتراكية وضد القطاع العام ومع الرأسمالية وسعد ممنوع من الكتابة ففي الغالب عنده تصور إن فيه شيء من الديمقراطية ومن حرية الرأي خصوصاً في جرنال طالع في لندن. بعثت المقالة وكل شوية يجيب الجرنال العراقي ويدور والمقالة ما بتنتشرش، إحنا كنا محتاجين الفلوس، دخلنا كان محتاج دعم، دخل سعد من مؤسسة «الأخبار» كان محدود حوالي 300 أو 400 جنيه وانا كنت باخد فلوس رمزية من «حواء» 15 أو 20 جنيه على المقالة لما تنتشر - يعني بالحنة - ما كنتش متعينة .

- أكلمه في التلفون؟

- آه، كلمّ إسماعيل .

اتصل به في لندن فإسماعيل رفع السماعه :

- أنا سعد كامل وكنت عاوز اسألك عملت إيه في المقالة ...

إسماعيل دا تقريباً ما ردش ورمى السماعه، رمى السماعه وساب السكة مفتوحة! ما قفلش السكة إلا لما سعد قطع الخط، أظن سعد حاول يكلمه مرة ثانية، ما بيردش وخلاص، وانتهت العلاقة. أظن سعد فهم بعد كدا، أو حد فهمه، إن مش معقول إنه ينتقد العراق في الجرنال دا. أعتقد إن لما فهمت اتندمت على المناقشة اللي ناقشتها مع سعد، هو كان متردد في اتخاذ موقف ضد العراق وانا اللي أصريت، يمكن كان غلط يمكن كان ممكن يكتب في موضوع ثاني خالص في أول مقالة. ضيّع واحدة من الفرص اللي كان ممكن تسندنا إحنا كنا مزنوقين بصحيح .

في فترة تقارب مع الشيو عيين العراقيين، سعد كان راح العراق زيارة، وجت قعدته جنب صدام في عرض مسرحي، ما كانش صدام وصل الحكم، وانكلموا مدة طويلة، وكان انطباع سعد عنه إنه كويس، بعد كدا لما بان على حقيقته سعد كان بيقول باستمرار «غريبة ما كانش باين عليه كدا أبداً، مش بالطريقة دي» ودا يمكن يفسر شوية ليه لما كتب في الجرنال العراقي كتب مقالة فيها نقد، كان عنده شوية افتراض حسن نية أو عشم بسبب انطباعه من المقابلة دي. الناس اللي حوالينا كان حالها ماشي بشكل أو بآخر، ناس كويسين وما عليهمش غبار، علي الراعي مثلاً راح اشتغل في الكويت على أساس يبعد عن الوضع المصري وبينشر كتب عن المسرح، عن النقد، سافر الكويت وابتدا يستعرض أدب البلاد العربية، والوضع الثقافي والكتاب الجداد في البلاد العربية، بما فيها العراق والعراق عنده تاريخ ثقافي كبير. سعد كان بيتناقش معاه إزاي يسيب البلد، بس اللي علي عمله مجرد تحاشي للكلام عن الحاضر، سواء للسادات أو صدام وركز على مشروع كبير ومهم عايز يعمله أصلاً. أما بهاء فكان أسلوب ثاني خالص في المعارضة، حذر ويحاول ما يخسرش المعركة اللي بيدخلها، هدفه ما يخشش في معارك ويخسر، يعمل مجهود اجتماعي وعلاقات عامة ويجيب في بيته ناس من مستويات واتجاهات سياسية متنوعة، بهاء كان رأس تحرير عدد من المجلات والجراند الكبيرة منها «روز اليوسف» و«صباح الخير» و«الأهرام» و«الأخبار» وبعد كدا مجلس إدارة «دار الهلال»، اجتماعياً بهاء كان مستقر وسياسياً كان معترف به من الجميع، سواء من الحكومة،

الرسميين وغير الرسميين، ومن المعارضة كواحد من الوجوه السياسية والثقافية في مصر، كفاءة سياسية فردية عالية وفريدة. بهاء أصبح مستشار لأنور السادات فيما بعد لفترة، لكن في البداية الناس بتوع جمال عبد الناصر بدون تردد اتشالوا من مكانهم، اللي سافر هنا واللي راح هناك وبهاء سافر الكويت. أنا ممكن أعمل فاصل عند الثقافة الجماهيرية وإيعاد سعد عن وزارة الثقافة وعزله، دي كانت نقطة تحوّل أساسية لإن المشاكل ابنتت قبل ما يموت جمال عبد الناصر. لغاية الثقافة الجماهيرية سعد كان نجم صاعد في المجتمع، بواجه الصعوبات وهو جاهز واقف لها على رجليه، يجذب المثقفين من فنانيين وصحفيين وسياسيين وله كلمة ونوع من السلطة الأدبية، يعني إلى حدّ ما رأيته بيتسمع باهتمام، عنده أفكار ودرجة من روح المغامرة، مقدام. كان في ذهننا إن إحنا بندخل معارك على المواقف بدون تنظيم لقوتنا الاجتماعية أو حسابات للخسائر. باستمرار بيتواجد في موقف معارض، ولو أفكر كويس يمكن الأقي إن كان عنده حق تقريباً كل مرة بس دا مش مهم، كان بيتعزل بسبب مواقفه، سواء زملاؤه في السياسة أو زملاؤه ورؤساؤه في الشغل، كانوا بيبعده كدا ببساطة، وكانت نتيجتها الحقيقة إن قعد يغرق في الاكتئاب أكثر وأكثر. للأسف أنا لعبت دور في الموضوع دا، لأن أنا نفسي ما أدركتش فكرة «اختيار المعارك» إلا بعد فوات الأوان، وإن ممكن مش وقته على المستوى الشخصي، شيء من اللباقة أو التخطيط اللي لاحظتهم بعد كدا عند الناس اللي حوالينا، دا كان ناقص عند سعد، وأكثر وأكثر عندي أنا. كان بيكرر مبدأ أنا اقتنعت به «أنا مش باشتغل علشان اكسب فلوس، يجوز أقدر أعمل حاجات مربحة أكثر، بس عندي حاجات عاوز اقولها، ودي فرصة أعبر عنها وناس كتيرة تستفيد منها»، وإلى حدّ ما دا كان مضبوط بالنسبة لي، وفعلاً كتير ناس كانوا بيمدحوا لي في المقالة اللي باكتبها عن أخبار كفاح المرأة في أوروبا، كنت باتقاضي في بعض الأحيان ناس باقابلهم بالصدفة لأول مرة، أغلبهم ستات، بس مش كلهم، بيقرروا الباب اللي أنا باكتبه، ملاحظينه ومتابعينه. فالفكرة دي كانت معششة عندنا أنا وبابا، وساعدنا بعض عليها بشكل ما.

سعد تلقى ضربات كثيرة، ضربة مجلة «نهضة أفريقيا» ومجلة «السينما»، وإلغاء حركة السلام، وحل تنظيم «حدثو» وتجربة الثقافة الجماهيرية نفسها على نجاحها انتهت بسرعة وبشكل صادم، فجأة انتزعه من الثقافة الجماهيرية وجابوا سعد وهبة مدير أظن، لكن حركة الثقافة الجماهيرية ماتت على كدا، المؤسسة فضلت موجودة وتوسعت لكن الحركة ماتت. أعتقد إن دي الفترة اللي سعد انكسر فيها، أو نقول ابتدى ينكسر، ما كانش عنده خمسين سنة لسه وابتدا يخش في الاكتئاب، ما بيجيلوش نوم، ويحاول يهدا من التوتر وما كانش بينجح فابتدا يزود في الشرب. ما اعرفش حنقّم ازاي في النهاية، إلى أي درجة كان مضر أو مش مضبوط طريقتنا دي، من ناحية إن في المحصلة يمكن الخسارة ما كانتش على مستوى الحياة الشخصية بس، قدرته على المشاركة في الحياة العامة اتقصفت. هل كان عايز شيء من ال...، مش من اللباقة، نسميه «التخطيط» على المستوى الشخصي في التعامل مع الأحداث ومع الحياة؟

ما خدتش بالي إن الاكتئاب حاجة طبية، مرض ولازم علاج، في السبعينات الاكتئاب ما كانش لسه بيتعامل معاه بشكل علمي، مش بس في مصر، على مستوى العالم كله. تفسيره ساعتها لحالته إنه ضعيف، كنت باكرر في نفسي «هو شاطر، هو ذكي، أنجز حاجات كثيرة، طيب، صادق في المواقف السياسية» ودي كانت حاجة مهمة بالنسبة لي، إن الشخص اللي قدامي يكون صادق

ومخلص مع نفسه، «ضعيف، معندوش القدرة على المقاومة». مش حاطة في اعتباري إنه ابتدى يقاوم ويكافح من أيام ما كان عنده أربعتاشر سنة، يتسجن ويطلع، يُعتقل ويطلع، يخش معارك ويستحمل ضربات، يترفد وينطرد ويتم تجاهله مش مرة ولا اتنين، تقريباً كل مرة، فأعصاب الإنسان تُستهلك بصحيح لما الفترة تكون طويلة. سعد ابتدى يشرب سجائر من أيام ما كان عنده أربعتاشر سنة من ورا ابوه، عيب الشاب يشرب سجائر قدام ابوه فجدو كامل سايبه يدخن على شرط مش قدامه، ولكن السجاير بتستهلك الأعصاب والصحة، والسجن بالذات المُدد الطويلة بتستهلك. الرجالة مروا بفترات صعبة في معتقلات سجن طرة وبعد كذا سجن الواحات. سعد اتعرض لضغط عصبي خصوصاً في الفترة القصيرة في السجن الحربي في 1953 لمدة شهور قبل ما يتحكم علينا في 1954، حصل تعذيب وضغوط، سعد بيقول إن ما عذبوهوش شخصياً ولكن عذبوا ناس تانية حواليه في نفس الفترة، كان بيسمع الأصوات، وكان فيه كلام إن بينفخوا الناس .

يلاً، مش عاوزة أشتت نفسي في الموضوع دا .

محاولات الوحدة بين الفصائل المختلفة للشيوعيين في مصر فشلت كلها. سعد كان محسوب في مجموعة فيها محمود توفيق وكان بيختلف كثير، مش مع محمود توفيق بالذات لكن مع زملاء الشيوعية، اجتماعات وخرافات طول الوقت. قيادي من الحزب الشيوعي السوري أو العراقي كتب مقالة هجوم على سعد شخصياً أظن اتهمه باليمينية، ومرة سعد كان عنده ميعاد في سفارة الاتحاد السوفيتي مع واحد من المسؤولين الروس وخلوه يستنى كثير، وواحد جه بعد منه ودخلوه وخلوا سعد يستنى كمان، لطعوه، عمل خناقة على الحكاية دي، وابتدت تنتشر عنه سمعة إنه مشاغب ومتعب. بينما أصحابنا اللي عندهم قدرة أكثر على التعامل مع الحكومة بيتباعدوا .

الصدقاة بين د. أحمد عكاشة وسعد استمرت مدة بالرغم من أزمة الثقافة الجماهيرية مع ثروت أخوه، فلما سعد ابتدى يكتب في السبعينات كانوا بيتناقشوا وأحمد عكاشة نصحه قدامي ياخذ أي دوا علشان ينام، وجاب له منوم اسمه «فاليوم»، دوا جديد ساعتها، علشان يقاوم الأرق والتوتر، قال له «بياخدوه حتى الناس اللي شغلها ناجح». سجائر وكحول، ومهدئات وضربات نفسية بانتظام، أعتقد إن دا اللي تمكن من سعد بعد محطة الثقافة الجماهيرية .

ابتدينا نتخانق، أنا كنت متضايقه، وزى ما قلت ابتديت اعتبر حالته ضعف، باكلّمه واحاول أشجعه، بس الكلام ما بيحبيش نتيجة في الحالة دي، داخل في الاكتئاب، محتاج علاج طبي مش كلام، وكمان ما كنتش عارفة أستشير ولا اتكلم مع أي حد باعتبار باداري عليه. وصل لدرجة إن ابتدى يعيط، بيجي بعد الظهر ويعيط :

- مش عارف اعمل إيه يا «ماري»، مش عارف اعمل إيه .

ويعيط تاني، وانا باطبطب عليه :

- إنت لسه حتعمل الكثير .

دلوقت متضايقية إن ما ساعدتش أكثر من كدا. اللي كان شاطر هو إنت، في وقت معين كلمت صاحبك أمانى الرشيدى، أظن في الثمانينات، وأمانى أدت له لأول مرة علاج ضد الاكتئاب، مش مجرد منومات ومهدئات، لكن بعد إيه؟ مش أقل من 20 سنة بدون مساعدة، كان وصل لدرجة كبيرة من النزول .

*

أنا عشت موقفين لهم علاقة مباشرة بأجواء السادات الوحشة، بعد حركة 15 مايو اللي قلت لك عليها، السادات شمال بهاء من «دار الهلال» على أساس إنه من بتوع جمال عبد الناصر، بهاء كلمني في التلفون وقال لي :

- أنا حاسيب «دار الهلال».

وقال لي ما معناه إنه متوقعني أسيب أنا كمان. أنا شكرته لأن له الفضل ان دخلني في العمل الصحفى، بهاء كان نقطة تحول في حياتي، عمري ما كنت حافكر أخش في الكتابة، بالذات في جريدة كمحررة وبالعربي إلا بفضل الفرصة اللي آدأها لي بهاء في الستينات، ولحد النهاردا بافتكره بالخير وباحس بالامتنان ناحيته، لولاه كنت حافضل ست بيت لغاية النهاية. بس أنا ما اعتبرتتش إن لازم اسيب «حواء»، أنا ما كنتش فاهمة الموضوع بالطريقة دي، ساعتها سعد كان ممنوع من الكتابة ومعزول عن وزارة الثقافة، وانتم صغيرين، فرديت على بهاء :

- لازم امشي أنا كمان؟

- طيب معلىش .

وسكت .

يمكن كان مفروض أسيب كنوع من التضامن معاه؟ لكن أنا ما تصورتش إن لازم ابطل اكتب في «حواء» مع إني كنت متضامنة مع بهاء فعلاً، أصل أنا باكتب بالحنة وما باخدش فلوس تقريباً، يعني مش حاستقيل حتى مثلاً واعمل موقف، حسيت إني حابطل انشر سكتي، فطيس، وانا عايزة اكتب .

الموقف التاني سنة 1975 كنا بنبيض البيت لأول مرة من ساعة ما سكننا فيه وما بيضنا هوش تاني لغاية النهاردا، أصحاب البيت كانوا بيعلوا العمارة دورين ومدخلين سقالات في حيطان البيت وبوظوا لنا الحيطان والعملية طوّلت شهور. جميلة وعلي كانوا بيشتغلوا في الكويت، فنقلنا بيتهم نقعد مع ولادهم. كنا على أعتاب القرارات الاقتصادية والانفتاح والبلد كانت مليانة احتجاجات وإضرابات، حصلت حملة وقبضوا علي عدد كبير من الناس، من ضمنها حملة ضد الشيوعيين تاني. سعد جاله خبر وهو بره البيت، كلمني وقال لي انه مش حيقدر يروح وهرب. البوليس راح

بيت الدقي ما لاقوش حد، جم عند جميلة أخته، لميس بنتهم الكبيرة فتحت الباب وقابلت المخبرين وقالت لهم :

- عندكو إذن من النيابة؟ مالكمش الحق تخشوا جوه البيت .

ما كانش عمرها 20 سنة، سعد ما كانش موجود في البيت، لكن انا كنت قاعدة وسامعة لميس، واضح ما يعرفوش اننا مقيمين عندهم ومش واخدين بالهم أنا مين، مشيوا . أنا أعجبت بلميس بشكل، في الظروف دي بالتخم واتصور إن ما يكونش عندي سرعة البديهة .

البوليس راح العزبة في سيلا يدوروا على سعد على أساس يمكن مستخبي هناك، لقوا مين؟ خليل طبعًا، قبضوا عليه وبات الليل في القسم، والصبح ابتدوا يستجوبوه وخليل عنده ردود ذكية وواعية :

- إنت شيوعي ولا إيه؟

- لا، أنا خليل ناظر العزبة، أنا مش سعد كامل .

- عارفين إنك مش سعد كامل، لكن إنت شيوعي مش فلاح .

ووقع خليل في حيص بيص، بس خليل كان معروف أكثر من أي حد والبلد كلها جت القسم يشهدوا إن هو بالفعل خليل مش واحد شيوعي متنكر، وانتهى الأمر ان سابوه .

في الفترة دي أنا بطّلت كتابة مدة فعلاً بس مش إضراب أو احتجاج، بطّلت لأن سعد لما اختفى في الهروب ما عرفتش أكمل اكتب، الحمل ثقل عليّ . جميلة وعلي رجعوا من الكويت في أجازة نص السنة، خدتكم ورجعت لبيت الدقي، البيت هنا كان لسه في حالة بياض وكنا بنام على الأرض في الصالة وبابا مختفي ومش عارفة هو فين وحاطين حرس تحت البيت علشان لو سعد رجع يقبضوا عليه والوضع كان وحش قوي. إنت كنت بتبعتي للراديو رسائل المستمعين لأصحابك في برنامج الأغاني الفرنسي اللي بيقدمه نيكولا بركات، وسعد كان بيستمع البرنامج من مخبئه ويضمن علينا، إنت ولا على بالك في سن المراهقة لكن يا عيني هو كان بيفرح لما يسمع اسمك وأسامي أصحابك .

عدّوا ثلاث اشهر من غير ما اكتب وابتعت لحوًا، حسيت إن خلاص بانسى الكتابة. سعد كان بيسنديني في اختيار الموضوع ومناقشة الفكرة وكنت باكتب وهو بيراجع اللغة، كان بيثجيني ويديني ثقة .

وفي يوم التلفون رنّ، إيفون رياض زميلتي بتكلمني من «دار الهلال»:

- إنت ما بتبعتيش الموضوع بتاعك ليه يا «ماري»؟

- مش قادرة .

- لا! ما تسمعيش كلام حد انتِ تبعتي الموضوع، وضعك زي ما هو في المجلة مفيش حاجة معاك .

- متشكرين، طيب حافكر .

بعد نص ساعة كلمتني أمينة السعيد ذات نفسها :

- إيه دا يا نايلة هو إحنا تابعين لاجوازنا دايمًا في كل حاجة؟ سعد كامل حاجة وانتِ حاجة، هو شغله حاجة وانتِ شغلك حاجة. معندناش كلام من دا، مش علشان جوزك عنده وضع معين إنتِ تبطلي تكتبي، بالعكس لازم تشتغلي أكثر واكثر في الظروف دي .

أنا بقى انهزت وقعدت أعيط لها في التلفون. مش متصورة إن أمينة السعيد تكلمني بنفسها تدعمني بالطريقة دي. قالت لي الكلام اللي أنا مقتنعة بيه، الستات برضه المفروض يكون عندهم شخصية مستقلة يدعموا اجوازهم بإن يستمروا ويكون لهم كيان، بس أنا ما كنتش بانفذ الكلام اللي بافكر فيه :

- متشكرين خالص، متشكرين خالص .

- على طول تبعتي الموضوع، بلاش دلج .

عندها الحس دا، تدعم وتدّي ثقة وقوة في وقت الضعف، حاجة صعبة إن الواحدة تكمل تشتغل وتكون موجودة في المجال العام لما جوزها يبقى منبوذ، فعلاً عايزة دعم. أنا مش عارفة كمّلت ازاي ومين كان بيراجع لي اللغة ولا مين ساعدني وكمّلت اشتغل واشتغلت مدة طويلة في ظروف وحشة .

في يوم اتصلت بي رعاية وقالت لي فيه واحدة صاحبتنا قوي عايزة تشوفني - مفاجأة :

- حنيجي لك بكرة وصاحبتنا حتكون لابسة جلابية تطريز من عندي، وشهيرة اللي حتسوق .

ممکن تكون مين صاحبتنا اللي طلعت لنا في الظروف دي؟ رعاية جت لي ثاني يوم الصبح وانتو في المدرسة وفهمتني إنهم حيجيبوا سعد متتكر علشان لو فيه مخبرين ما ياخدوش بالهم. أنا فعلاً صدقتها في الأول، وقعدت تضحك عليّ، بس كانت عصبية شوية، كانت بتجازف. إنتو كنتو عارفين إن بابا هربان من الاعتقال لكن صغيرين، إنتِ كان عندك 14 سنة ودينا 9 فكنت مشغولة حتعملوا إيه واحنا بندخلكم في السرية كدا فجأة غصب عنكم. قلت لكم بابا جاي يقعد هنا بس حيبقي مستخبي برضه ولقينا الشقة وقررنا مع بعض إنه ياخذ الأوضة اللي كانت بتاعة جدو وانا. اعتقد في نفس الفترة دي نانا كانت عيانة قوي وقاعدة عند عمك جمال لأن احنا ظروفنا كانت اتلخبطت على الآخر سنتها. في الأول رحنا عند جميلة وعلي وبعدين سعد أصبح في وضع هروب، فجمال أخوه يا حبيبي أخذها عنده علشان محتاجة رعاية احنا مش قادرين عليها. بالليل حاولتو تستنوا سعد علشان تستقبلوه، دينا نعست وانت استنيت على الكنبة وبعدين نمت انتِ كمان، كنتو «excited»

علشان قلت لكم إنه سيكون لابس جلابية تطريز زي اللي بتلبسهم طنط رعاية، متتكر علشان يفكروه واحدة صاحبته .

سعد وصل شكله مش معقول، حالقين له حواجبه وحاطين له مكياج، وهو كان متجهم، كان قرار خطير إنه يستخبي في بيته. الصبح قلت لكم إنه جه بس نايم ورحتوا المدرسة وابتديت أحاول انظم الوضع الجديد. سعد كان حاسس إن المخبرين شافوه وهو جاي وكل ما يسمع صوت أو حد يخبط على الباب ينزل تحت السرير. قفلنا كل الشيش وبقينا نتحرك كأننا خايفين حد يسمعنا، حاجة مش منطقية، بس سعد كان في حالة ممكن نقول انهيار عصبي من الوحدة. رجعتوا من المدرسة ونبهتوا إن بابا حالق حواجبه علشان التتكر وتعبان علشان بقاله فترة بره البيت .

أنا حاروح الحمام علشان اعرف أكمل .

ما كنتش مبسوفة من وضعنا كله .

حصل فتور بيني وبين سعد. بطلنا نحب بعض بصحيح. كأنه عايز يخلص مني. يقول لي: «أنا مسافر»، نقعد ساكتين، زعلانين، مُمَيَّان كلام وعتاب وتحديد. وصل بي الأمر إنني أفكر أروح اشككي لأصحابه، راجي عنايت صديق قريب لنا احنا الاتنين وممكن يساعديني أفهم - هل أنا عملت حاجة غلط؟ ديزي مرة قالت لي :

- ما تفصلي هدوم جديدة .

كثر خيرها كان عندها الشجاعة تقول لي حاجة زي كدا، أهملت في نفسي من الزعل وتخنت كمان. بس ما قدرتش افتح قلبي لحد غير طنط عزيزة رحت لها أعيط لها. كنت مجروحة لأن بقيت زي الستات اللي على طول زعلانين وغيرانين. قعدت أسألها: «إحنا ممكن نحب بعض تاني ولا خلاص؟». كنت تعيسة جدًا ومش فاكرا ردت قالت إيه، أكيد قالت حاجة لطيفة ريحتني وشجعتني. جه في ذهني إن نسيب البلد ونسيب المسائل دي كلها ونروح فرنسا ونقعد هناك سنة سنتين، وقلت «أقدر اشتغل باعرف فرنساوي كويس، هنا العربي بتاعي مش مية في المية، وممكن أكمل أرسل حوًا من فرنسا»، سعد اتحمس «أيوه أيوه»، وعزم إيهاب شاكرو سميرة شفيق على العشاء، كانوا قعدوا في فرنسا ثلاث اربع سنين ولسه راجعين. جم البيت هنا علشان نسألهم رأيهم في إمكانية إن الاقي شغل، قالوا :

- أه طبعًا ممكن، صعب لكن ممكن، وفيه عنصرية كثير في المدارس للأولاد .

ومشيوا. حسيت سعد بيتكلم عنِّي مش عننا، كأنه متوقع إنني أسافر وابتدع عن شغل لوحدني، وانتم تيجوا معاه بعدين؟ ولا يقصد إنتو تيجوا معايا من الأول؟ الحكاية ما عجبنتيش، وقعدت أحدد معاه

في الكلام فما اتفقناش، وخلص، أنا سببت الموضوع وقلت «مش دا بالظبط اللي كنت اقصد». أنا عاوزة نساfer كلنا مع بعض، هو يشتغل وانا أشتغل، إحنا الاتنين. دا اللي قادرة أفكره .

من كتر الخناقات معاه جالي إحساس في وقت إن عاوزة اتطلق مش قادرة استمر، أروح عند ابويا وأمي في إيطاليا أشتغل واخدكم معايا، «إحنا ما نقدرش نستمر بالطريقة دي» واعتقد قلت لكم حاجة من النوع دا. أكيد نوع من الانفجار أو الحالة العصبية حصلت لي من غير تفكير عميق. بعد شوية لقيت معنديش فلوس خالص وعاوزة اخدكم معايا، مدرستكم هنا. انتو كنتو مدهولين انت ودينا. ما قولتوليش ولا أيوه ولا لأ، كنتو مستنيين وبتحضروا الخناقات. كنا بنتخانق كثير قوي انا وهو. وابويا وأمي مش حينبسطوا، أكيد حيزعلوا قوي. صالحني، كلمة كويسة من هنا وكلمة كويسة من هناك تراجعت بقى عن الفكرة، أروح نحو المجهول خالص؟ أبويا وأمي ساكنين في قرية صغيرة في إيطاليا مفياهش شغل، كان في ذهني إن احب اشتغل في مجلة «نحن النساء». أروح مدينة؟ أروح فين؟ وعند مين؟ المهم ان المشروع انتهى وسكت .

*

الحاجة الثانية الأساسية اللي حصلت هي إن السادات قرر يسمح للأحزاب تتكون ويقول إن اسمه رجّع الديمقراطية، وحدد: حزب لليسار وحزب لليمين وهو أخذ حزب للوسط وسماه الحزب الوطني الجديد، وأدى فرصة لزعماء الأحزاب دول إن يشرحو برامجهم في التلفزيون. أنور السادات واضح إنه كان لئيم، ما سابش الشيوعيين واليسار يتصرفوا بين بعض على أساس فرصة يمارسوا السياسة بشكل علني، لأ، عين الزعماء ونقى مجموعة معينة، اختار من تيار «حدثو» خالد محيي الدين يبقى رئيس حزب اليسار الجديد وعين من تيار الحزب الشيوعي فؤاد مرسي وإسماعيل صبري عبد الله وزراء في الحكومة. المفروض كل الشيوعيين يشتركوا والأقطاب والفصائل المختلفة يكونوا ممثلين في حزب «تجمع اليسار» مع التيارات الثانية زي التيار الناصري بالإضافة للشخصيات اليسارية العامة. وابتدوا يكونوا اللجنة التأسيسية، والطبيعي في الحالة دي إن سعد يكون من المؤسسين، يكون من قيادات الحزب الجديد. علي الراعي جه عندنا في البيت :

- فين سعد؟

- مسافر .

- كلميه وقولي له يبجي حالاً، بياسسوا حزب اليسار العلني .

سعد كان في فرنسا، سوسو حزان وريمون اسطمبولي كانوا بيحاولوا يدبروا له شغل، كان ناوي يقعد مدة طويلة، سنة مثلاً، في محاولة من المحاولات إن يقتنع إن مفيش فايدة في العمل في مصر ولو مؤقتاً واحنا كمان ناخذ هدنة في البيت. بعث له تلغراف أو كلمته بالتلفون، وفعلاً جه على طول، لكن ما حدش اتصل بيه رسمياً ولا حاول يتصل بيه بأي شكل. عملوا الاجتماع التأسيسي الكبير وهو ما كانش موجود، وانتخبوا اللجنة التأسيسية واسم سعد ما جاش في حاجة خالص. سعد زعل. وبعد كدا لما كانوا بيقابلوه في الأماكن العامة يقولوا له «الله؟ ما بتجيش «التجمع» ليه؟». هو كان

المفروض يكون في اللجنة التأسيسية أو القيادية. غلط ولا صح؟ ما اعرفش بس بالتأكيد حصل نوع من التجاهل المتعمد. سعد حظ زعله عليّ :

- مش انت بعثت تقولي لي تعال حالاً، كان على أساس إيه؟

- دا كلام علي الراعي .

فاتت الأيام وبعد مدة طويلة سعد عرف إن تم استبعاده من تأسيس «التجمع»، رفعت السعيد ماسك قائمة طويلة من الأسماء المقترحة، قائمة فيها أكبر مجموعة من الزملاء من مختلف الاتجاهات والفصائل لتأسيس الحزب، يقرأ الأسماء واحد واحد ويسأل موافقين ولا مش موافقين، مثلاً «خالد محيي الدين رئيس، موافقين؟» يرفعوا كلهم أيديهم، جه عند سعد كامل ما قرأش اسمه، نطه، وقال على الاسم اللي بعده، كدا، ببساطة . ما قرأش اسم سعد من الأساس. سعد اعتبر دي جريمة من رفعت السعيد ضده وضد المجموعة بتاعته زي محمود توفيق ورشدي أبو الحسن و«أنصار السلام» القدام، نقدر نقول مجموعة يوسف حلمي. يوسف حلمي كان مات لكن اللي لسه عايش من المجموعة تم استبعادهم، ومن ضمنهم سعد. الخلاف دا استمر ولا يزال لغاية دلوقت. مسألة إنه اتشطب كدا بكل سهولة وما اتعرضش اسمه من الأساس، والموضوع بيتحكي كأن سعد هو اللي ما رضيش يشارك في «التجمع».

حياسب مين ولا مين بالطريقة دي، بس دي أكبر ضربة خلت سعد يمشي في الانعزال أكثر ما يمكن .

ويمكن دي كانت الضربة الأخيرة .

في سنة رابعة دينا جالها ملحق في الرياضة والدين، أنا استغربت شوية بس يا عيني عكنت عليها الأجازة، عملت مجهود في الصيف وذاكرنا معاها ودخلت امتحان الملحق ورحنا انا وانت وهي نجيب النتيجة لقيناها ناجحة في الرياضة وفرحنا، بس فوجئنا إنها حتعيد السنة علشان ما نجحتش في الدين. أنا فقدت أعصابي وطلبت أشوف المدرس اللي سقطها في الدين «مش موجود» - بيقلوا لي - فطلبت أشوف المسؤول لحد ما وصلت للناظر أو المشرف بتاع ابتدائي، فضلت أزق أزق وأدّتهم محاضرة :

- انتو حتعدوا لي البننت علشان مادة الدين؟

- الدين مادة مهمة يا مدام .

أنا صوتي بقى أظن كانوا بيسمعوني في ميدان التحرير :

- والدين بيتعلموه في المدارس؟ إنت اللي حتعلمها الدين؟ إنت مين؟

وكلام من النوع دا .

- ما تقدرش نغيّر نمرة الامتحان .

- ما تقدرش تغيّر نمرة الامتحان لكن تقدر تخلي بنت معندهاش عشر سنين تعيد سنة علشان مادة الدين؟

واديته فكرة إني مش حامشي إلا لما يتراجع. توصلت في الآخر إن الناظر المصري والناظر الفرنسي نزلوا لي الاتنين يشوفوا فيه إيه. فجأة ابتدوا كلهم يعتذروا ويقولوا إن حصلت غلطة وإن دينا أصلاً ناجحة الحمد لله و «هدّي نفسك يا مدام».

قابلت باحثة فلسطينية عن طريق حسناء مكداشي من «دار الفتى العربي» بتعمل دراسة عن السجن، نوع من التحليل لعبارة «السجن يخلق الأبطال»، قلت لها «يمكن فيه ظروف وظروف، ممكن ظروف احتلال وحرب وتهجير الواحد يخرج من السجن في فلسطين يكون اكتسب عزيمة لأنه عايز ينتقم مثلاً، ويمكن ملّوش علاقة بفلسطين ومصر، يمكن حاجة خاصة بيّ. المدة الطويلة في السجن، صعب أعبر، لكن أكلت منّي - مش عزيمة الفكر أو المبدأ، لأ، أنا طبعاً شيوعية وأستمر أكون شيوعية باحب المساواة والحرية وكل دا - لكن القدرة العصبية والنفسية للواحد راحت في الاستهلاك اليومي للحبس». المدة الطويلة في السجن بتكسر، مش المعنوية إنما الإرادة، الواحد

يبيحط طاقة كبيرة في قوة التحمل، لازم يكون متماسك، ما يستسلمش للألم والضيق وما يسبش نفسه يعيط مثلاً المقاومة دي بتأخذ كثير من المخزون من غير تعذيب جسدي ولا ظروف صعبة زي اللي كنا بنقرا عنه في معتقلات النازيين أيام الحرب العالمية الثانية في معسكرات «بوخنفال» و«تريبلينكا» وغيرهم، طبعاً إحنا ما كانش عندنا الفطائع الشديدة دي، واحنا الستات عانينا أقل كمان من الرجالة. مع ذلك الواحد يخرج يكون استهلك كثير من نفسه، خمس سنين ورا بعض، أعتقد الواحد ياخذ وقت يستعيد طاقته، وممكن ما يستعيد هاش تاني أبداً. أنا باتكلم عن نفسي، لأن يظهر السجن مش بياثر على الناس بنفس الطريقة دائماً. أنا اتحمست في الكلام معاها لكن ما اعرفش الست دي عملت بكلامي إيه؟ حطت كلامي في البحث بتاعها ولا لأ .

لما ابتدينا نساfer إيطاليا مع بعض أنا وسعد بعد صدمة النكسة والثقافة الجماهيرية في 1968، تابعنا حدث خطير ما كانش ممكن نتابعه من مصر، مظاهرات تشيكوسلوفاكيا، جالهم رئيس اسمه «ألكسندر دوبتشيك»، فكر يغير في النظام شوية، ويدخل زي شيء من الفكر الديمقراطي في الانتخابات وفي الحكم. الاتحاد السوفيتي كان بيعتبر إن أي محاولة تغيير في البلاد الاشتراكية نوع من العداوة والخروج من سيطرته. استدعوا «دوبتشيك» يزور القيادة في الاتحاد السوفيتي وفهموه إن الإصلاحات اللي عايز يعملها غير مقبولة، و«أقنعوه» إنه يستقيل. «دوبتشيك» رجع زي ما طلبوا منه واستقال بعد أقل من سنة في الحكم، ولكن الناس فهمت الرسالة وطلعت مظاهرات كبيرة في شوارع «براغ» ضد الاتحاد السوفيتي، فالإتحاد السوفيتي ما كان منه إلا إنه دخل بالدبابات علشان يسيطر على الناس. الواقعة دي أثرت فينا قوي، علشان سعد خلافاته الفكرية كانت بتواجه من زملاؤه بالشك في إخلاصه للاشتراكية، ودا كان بيهز نفسية سعد، كان بيجد نفسه مع أفكار زملاؤه بيرفضوها أو مش متماشية مع الخط الرسمي للحزب. متابعة تشيكوسلوفاكيا في إيطاليا غيرت أفكارني، تعاطفنا مع «دوبتشيك» والشعب التشيكي، عرفنا إن الصراع موجود داخل الاشتراكيين .

عجبنا الحكاية أنا وبابا، مسألة إن نروح «ريبيا» عند أبويا وأمي ونتابع صراعات العالم. استحلينا السفر إلى إيطاليا وبقينا كل سنتين ثلاثة اربعة، يعني كل اما نقدر نشترى تذاكر ناخدكم ونروح .

إيطاليا فتحت عيني. أنا كنت زي ما انا على نفس الأفكار الشيوعية كأن احنا أيام «لينين» و«ستالين». الحزب الشيوعي الإيطالي كان ثوري ساعتها، ثوري في الفكر، واخدة بالك؟ يعني مش ثوري إن عايزين يعملوا ثورة فياخدوا السلاح أو ينزلوا يعملوا ثورة في الشوارع، لأ، ثورة فكرية. الحزب الشيوعي الإيطالي انتخب رئيس جديد اسمه «برلينجوير»، كان عنده أفكار متفتحة، من غير عداوة للاتحاد السوفيتي كبلد، أو كنظام شيوعي في العالم، حاطط على الساحة الفكرية احتمال إن الواحد يختلف معاهم، يختلف في الفكر، في الرؤية، في السياسة، بل وفي التطبيق كمان، مش أي واحد يختلف مع الاتحاد السوفيتي يبقى خاين أو انتهازي أو عميل، دي كانت أفكار جديدة عليّ، الحزب الإيطالي وصل لدرجة انتقاد النظام السوفيتي في فشله في رفع مستوى الاقتصاد. الاتحاد السوفيتي نظام المفروض ماوراهوش شغل غير رفع مستوى معيشة العمال والمواطنين كلهم، إلا إن مستوى الفرد في الاتحاد السوفيتي أقل من مستوى العامل الإيطالي في إيطاليا تحت النظام الرأسمالي. «برلينجوير» طرح المقارنة دي مع الديمقراطية كسلاح ضد الرأسمالية، الديمقراطية

هي اللي بتسمح بالكفاح في إيطاليا من خلال النقابات والحزبين الشيوعي والاشتراكي لاكتساب حقوق للعمال ومنع صاحب العمل من استغلالهم، كلام جديد من النوع دا عن الديمقراطية. الرأسمالية لو عليها تشيل الديمقراطية خالص - بيقول. وكان فيه راجل هايل في الحزب الاشتراكي اسمه «بيترو نيني»، عنده أفكار اشتراكية أصيلة، حرية ومساواة وتحرر وطني، تعاون مع «برلينجوير»، الأهداف واحدة من غير وحدة مع الحزب الشيوعي تلخبط حزبه، صمّم يحتفظوا باستقلاليتهم. شخصية ظريفة أسطورية، مات «بيترو نيني»، وعملوا له جنازة ضخمة في الشوارع، بطل اشتراكي اعتبروه بطل قومي، على نطاق إيطاليا كلها، حكومة وشعب، أفنكر كنت معايا وشفنا برنامج على التلفزيون، جماهير كبيرة، والتلفزيون الإيطالي سجل وإيطاليا كلها تابعت الجنازة، انقلنا قوي، أصل لما خرج النعش من الكنيسة الجماهير ابتدت تصقف للنعش وانتشر التصقيف بالتدريج في الميدان والجماهير الكبيرة في الشوارع اللي جنبه لدرجة إننا صققنا في البيت عند أهلي. الأفكار الاشتراكية الجديدة دي وصلت إن الحزب الشيوعي كسب 34% من الأصوات في سنة من السنين، مش سهل أتصور مجتمع وصل إن أكثر من ثلثه اشتراكيين وشيوعيين وناشطين سياسياً في مجتمع ديمقراطي. زمان الإضراب كان بيحصل ازاى؟ في أجواء من السرية العمال المطحونين يتوشوشوا لحد ما يضمنوا عدد معقول من المؤيدين يتفقوا على يوم صاحب المصنع يصحى يلاقي العمال ما جوش والمصنع واقف. يفضلوا مضربين لحد لما صاحب العمل يضطر يعمل تنازلات علشان المصنع يرجع يشتغل. في أجواء الحرية والديمقراطية عنصر المفاجأة كان ممكن إعادة النظر فيه، جربوا يعملوا إضرابات قصيرة كاستعراض واستفتاء على المطالب، قبل ما يدخلوا في «bras de fer» - وصراع نهائي - والإنتاج يقف والخسائر تبقى على الجميع. الإضراب أصبح نوع من الإنذار والتمهيد لأصحاب العمل، ابتكار لخطوة وسطية وتصعيد والمفاوضات تستمر مع أصحاب العمل. الطريقة دي عجبتني بتشارك المجتمع كله، تعرض مطالب العمال وتستعرض شعبيتها وتفرض أصحاب العمل. أنا مشيت في بعض المظاهرات دي أنا وسعد، لأنني عمري ما كنت اشتريت في مظاهرة قبل كدا. وبعدين «برلينجوير» دخل في عمق برنامج الحزب الشيوعي الإيطالي اللي زي ما هو من أيام السرية و«لينين» و«ستالين»، فكان الوصول للاشتراكية مش ممكن إلا عن طريق الاستيلاء على الحكم بالقوة على أساس إن الرأسمالية حاكمة بالقمع ومش حيسيبوا الحكم إلا بالقوة، لكن في بلد زي إيطاليا فيه ديمقراطية برلمانية ما يصحش الاحتفاظ بفترة الاستيلاء على الحكم بالقوة في برنامج الحزب الشيوعي. وأعاد النظر في «ديكتاتورية البروليتاريا» إزاى ديكتاتورية واحنا عايزين الديمقراطية؟ وظهر مصطلح «ديمقراطية البروليتاريا». بالإضافة إن البروليتاريا في إيطاليا ما بقتش بروليتاريا، العمال نجحوا في انتزاع حقوق رواتب ومعاشات وأجازات وغيرها كثير، يعني أصبح عندهم مكاسب ممكن يفقدوها، مش زي زمان إن «معندهمش إلا أغلال يفقدوها» وأدخل مفهوم «الطبقات العاملة»، إن البروليتاريا مش بس عمال المصانع والفلاحين المزارعين، إنما كل العاملين اللي عايشين على مرتب ثابت، أدخلوا الموظفين كعاملين، اتغيرت الألفاظ من عمال وموظفين إلى «عاملين» وداخل فيها موظفين الدولة والبنوك يعني كل الموظفين اللي بيقدوا على المكاتب مش بس العمال اللي واقفين على مكن. وأهم حاجة دخل السؤال على الديمقراطية المركزية، وابتدوا يشتغلوا على مزيد من الديمقراطية جوه الحزب. كل دي تجارب اشتراكية، بالنسبة لنا أنا وسعد «برلينجوير» دخل عنصر الاختلاف والتجارب والتطوير في الفكر الشيوعي، من غير ما نعرف ننظم أفكارنا قوي كنا بنغرق لشوشتنا واحنا بنتابع .

الممثلة «ميلينا ميركوري» ممثلة مسرح تراجيديا يونانية مشهورة - اليونانيين عندهم مسرح تراجيديا عظيم وعندهم رصيد كبير من المآسي الإغريقية القديمة - و«ميلينا» دي زي سعاد حسني أو تحية كاريوكا عندنا، ممثلة عظيمة وبالرغم من شهرتها منفية وممنوعة من الرجوع لبلدها بسبب مواقفها السياسية مع الحريات ضد الفاشية. سنين وهي رايحة جاية بين أمريكا وفرنسا وإيطاليا تعمل دعاية ضد الحكومة الفاشية في اليونان، اتجوزت مخرج فرنساوي «جول داسان» وأخرج فيلم «لا يمكن يوم الأحد»، وغنت أغنية لطيفة «أطفال البيرييه» - ميناء جنب أثينا. نجاح الفيلم ونجاح الأغنية كان أكبر دعاية عن منع «ميلينا» من العودة والوضع السياسي في بلدها. ومن ضمن المنفيين موسيقار أغنية «زوربا اليوناني» بالرقصة المشهورة من الفيلم، «ميكيس ثيودوراكيس»، أما «ياني ياكو» على ما أفكر اسمه، كتب كتاب عن الوضع في اليونان في الفترة دي وترجموه لجميع لغات العالم، وانا قرينته بالفرنساوي أو بالطلاني، كتاب جميل، وغير هم عشرات وعشرات من المنفيين والفنانين والسياسيين اليونانيين المغضوب عليهم من الحكومة الفاشية منفيين في جميع دول العالم، يطوفوا في البلاد ويغنون أغاني يونانية ويعملوا دعاية وحققوا مقاومة كبيرة ووعي عالمي ضد حكومة الجنرالات الثلاثة - الفاشية العسكرية في اليونان. وفي يوم من الأيام في السبعينات سقطت حكومة الجنرالات وكنا في إيطاليا. في نفس اليوم اللي سقطت فيه الحكومة الفاشية، الطائرات والسفن راحت اليونان من جميع أنحاء العالم شايلة معارضين يونانيين راجعين أثينا، في نفس يوم خبر سقوط الحكم وصلوا بلدهم من غير باسبور. التلفزيون الإيطالي بعث يغطي الحدث دا، فاحنا في إيطاليا قاعدين قدام التلفزيون، وانت كنت معايا ساعتها وكنت فاهمة شوية كان عندك حوالي 12 أو 13 سنة، شفنا مع بعض الشعب اليوناني رايح يستقبل المعارضين المنفيين في المطار والمينا، الجماهير في الشوارع ماسكة قرنفلة بمبي، القرنفلة الحمراء أو البمبي رمز الاشتراكية في اليونان وأسبانيا والبرتغال وفي كتير من البلاد. المشهد بالليل في سكة المطار مترصين على الأرصفة شايلين شموع ومشاعل واقفين بالساعات مستنيين في الشوارع وكل طيارة توصل الناس تستقبلهم بالأغاني، والتلفزيون في إيطاليا ينقل اللي نازل والمذيع يعلن ويعرفنا دا فلان رجع دي فلانة رجعت ويقول حاجة عن تاريخهم، وفي المينا، أيوه شفنا المركب - طبعًا - المركب اللي وصلت ميناء «البيرييه» جايبة «ميلينا ميركوري» والناس مستنيينها وبيغنون لها أغنية «أطفال البيرييه» اللي كانت في الفيلم. منظر جميل، ما شفتوش ثاني لكن انطبع في ذهني .

ساعتها بقي اللي قعدت احلم، لما فلسطين تتحرر وبيبتدوا الناس يرجعوا من غير باسبور حاروح واکون من ضمن الناس اللي حيستقبلوهم هناك، ويعيشوا معاهم اللحظة دي .

إيطاليا بقت زي الأكسوجين بالطريقة دي، أفكار وخيالي بينطلقوا وانا باتابع التطورات السياسية والثقافية في المجتمعات الثانية بالحرية دي، وبقيت احتاج السفر إلى إيطاليا، مش بس علشان أشوف أمي وأبوي. وبالنسبة لسعد كمان، كانت بتساعده يكمل كتابة، الكتابة هي الحاجة الوحيدة اللي استمر يقاوم من خلالها، لحد نص التسعينات لما صحته ابتدت تتلخبط قوي .

*

في رحلة لندن اللي عملناها في أوائل الثمانينات لما سعد جت له زي أزمة قلبية، حسن فؤاد كان عايش هناك وخذنا على سفينة على نهر «التايمز» فسحة طول النهار، وخذنا «الهايد بارك» كمان،

ولما رحنا بيته في لندن لقيت لوحات كثيرة من رسمه، قلت له :

- أنا عايزة صورة .

- اختاري اللوحة اللي انت عايزاها .

هو يمكن توقع إن حآخذ منظر طبيعي عن النهر والطبيعة اللي في انجلترا، مليانة خضرة ودي حاجة بتبهرنا دايماً كمصريين، لكن أنا اخترت «auto-portrait» - راسم نفسه .

- إنتِ اخترت دي بالذات ليه؟

- بتعجبني الصورة اللي انت عملتها لنفسك، فيها حيرة .

لحد دلوقت بابص للوحة دي وباشوف إنه متحير، شكاك، صح ولا مش صح اللي بيعمله؟ فيه سؤال، أو أنا اتصوره كدا، بافكر وانا بابص للصورة وعارفة ماضيه فتعجبني حيرته، مش مرتاح ومش قادر يقول حاجة نهائية ولا عن نفسه ولا عن الدنيا مش متأكد، أعتقد دا بيوصف شخصية حسن كويس. مش باتكلم عن موهبته في الرسم، هو موهوب مفيش كلام وموهوب في الكتابة كمان والموسيقى، باتكلم عن موهبة إن يمسك الطبيعة الحائرة في نفسه ويعكسها في لوحة، علقت بورتريه حسن فؤاد وبورتريه سعد وهو منتظر قرار إنشاء الثقافة الجماهيرية وبورتريه رضا مرات حسن الست الجميلة الصبورة دي، كله بريشة حسن هنا جنب لوحة جدو كامل بريشة صلاح طاهر في أوضة الصالون بتاعتنا .

في 15 مايو - انقلاب أنور السادات ضد «الناصرين» اللي سمّاه «ثورة التصحيح» - محمود السعدني كان رئيس تحرير مجلة «روز اليوسف» أو «صباح الخير»، قبضوا عليه وجابوا حسن فؤاد رئيساً للتحرير مكانه، كان مدير السينما الوثائقية وأصبح رئيس تحرير «صباح الخير»، سعد انتقده علشان قبل، ناس كثيرة اتهمته بشيء من التخاذل؟ اتهموه إنه من أنصار السادات علشان قبل منصب «صباح الخير»، وهو مش عاوز يكون من أنصار السادات ولا يقطع علاقته بأصحابه القدماء، سعد وغيره من التقدميين. المنصب أعتقد كان مغري، هو اتربى في «صباح الخير» وأكد عنده تصوّر يديرها ازاي، كان رأيه الواحد لو عاوز يشتغل لازم يكون موجود في منصب يقدر ياخذ قرارات وينفذ ويتكلم ويكون مؤثر «إيه فائدة إنه ياخذ الموقف بالامتناع ويبقى مركون وما يتسمعش صوته؟» دا كان «grosso modo» - بصفة عامة - موقف حسن فؤاد. لكن أعتقد إن حسن تعب في المنصب دا، وعلى أي حال اتشال منه، غالباً ما استحملوهوش، قرر يسافر ويسيب البلد هو كمان زي ناس كثير من المثقفين قرروا يهاجروا ويبعدوا عن الوضع السياسي، مش قادرين ياخذوا موقف ضد النظام وهم في مصر ولا عارفين يشتغلوا. حسن فؤاد راح انجلترا واشتغل شوية مع بلاد الخليج، بالذات السعودية، كان فيه موجة من الجرايد الخليجية اللي بتصدر في لندن. وبعد «ثورة التصحيح» والانفتاح جت كمان زيارة القدس ومعاهدة «كامب ديفيد»، فالمثقفين والفنانين اللي كانوا ببيجوا كثير عندنا في البيت في فترة الستينات - قبل الثقافة الجماهيرية وأثناءها - المجموعة دي حصل فيها انشقاق كبير، حصل انشقاق في المجتمع المصري كله. المثقفين

والتقدميين اللي حَبُّوا يحتفظوا بكوبري مع السلطة ما يقطعوش العلاقة تمامًا على أساس إن الحوار لازم يستمر، أخذ وعطا، خدوا انتقاد كبير من التقدميين والمتقنين اللي كانوا ضد التواصل بشكل قاطع مع حكم أنور السادات، جزء من المجموعة دي سميناهم بعد كذا «الناصريين» أو المتمسكين بالقومية العربية فقط، وأغلبهم عملوا كوبري مع السلطة بعد كذا. كانت فترة - والله مش الوحيدة - اللي أنا عشتها لجدال وخرافات سياسية وخلافات في الموقف وتخوين - بس كانت عنيفة. رحلة لندن كانت في أوائل الثمانينات بعد موت السادات، وبعدها حسن رجع مصر ورجعنا نشوفه بس مات فجأة في أواخر الثمانينات وبابا فقد واحد من الأصدقاء القليلين اللي كان بيرتاح لهم في الوقت الصعب دا .

فؤاد حداد كمان مات فجأة، ما كناش بنشوفهم ولا نتقابل، بس لما مات جت مراته وطلبت مني ومن سعد نوضب مكتبته، اتأثرت قوي، هي بسبب حنة القماش اللي اشتراها لها فؤاد بمساعدتي قبل ما يتجوزوا في الخمسينات كانت بتفكرني على طول. بس الحقيقة ما عرفناش نحقق، ما نجحناش، كان لازم أنا أقوم بالمهمة دي لأن بابا معندوش قدرة إن يقعد يوضب وينظم كتب. يمكن كنتم صغيرين في السن أو شاغليني، أنا دلوقت متضايقه، خبيت أملها. حسن فؤاد وصلاح جاهين وجمال كامل وعبد المنعم القصاص كمان ماتوا وقبلهم زكي مراد ويوسف حلمي .

بعد موت السادات، كنا لسه بنحاول. طلعت فكرة تجميع لعدد من المثقفين وإحياء التأييد الشعبي للسلام كامتداد لـ«باندونج»، بما فيها حسن فؤاد وأحمد حمروش وصلاح حافظ وعدد من ستاتهم من ضمنهم أنا، كان فيه كمان جيل جديد ظهر وكانوا عاوزين يورثوا أحمد حمروش، اللي كان سكرتير عام التضامن الآسيوي الأفريقي، إن ممكن يتعمل حاجات شعبية مفتوحة - خارج الحكومة - مثلاً انت كنت كبرت واتعرفت على رندا شعث و اتصاحبتوا، و اتعرفنا على مامة رندا - صفاء زيتون - قالت أحب أبقى أحضر الاجتماعات دي. يوسف إدريس قال تعالوا عندنا في البيت نعمل اجتماع لتأييد فلسطين، كانت 1982 وكان فيه حرب، إسرائيل هجمت على لبنان وعلى منظمة التحرير وعلى الفلسطينيين هناك وحاصرت بيروت أكثر من شهر. يوسف إدريس كان نشر أعمال كثيرة وبقى شخصية بارزة في الأدب على قدم المساواة مع نجيب محفوظ فكان لها أهمية ومعنى إنه يستقبل الفكرة دي في بيته، حسيت إن دي علامة برضه إن المجتمع عايز يتنفس. المهم رحنا عند يوسف في بيته اللي على النيل ورجاء مراته عملت لنا حفلة جميلة مليانة مأكولات، ناس كثير وزحمة بالنسبة لمساحة البيت، جابوا كراسي وفوتيهات بيت يوسف ورجاء كلها وأحمد حمروش قعد على كرسي بره الصالون شوية من كتر الزحمة، وحسن فؤاد وأبو العينين ورعاية قعدوا على الأرض وحسن مسك أجندة، يظهر حسوا إنه ممكن يستعيدوا جو زمان وان الاجتماع يكون ممتع وناكل ونشرب ونهزر، كل واحد يقول فكرة أو اقتراح ونكتب. حسن فؤاد عنده روح قيادية يلخص شوية حنعمل كذا وفلان حيعمل كذا ويكتب، فجأة صلاح حافظ قال :

- وسعد حيعمل إيه؟

يوسف إدريس قال :

- لا، سعد دا أنا اللي حاحكي لكم عليه .

حكاء ممتاز بنشرب من بقه الكلام شرب :

- زمان كان في حاجة اسمها حركة السلام، «أنصار السلام»، وسعد كامل كان صغير ورفيع ورئيس تحرير مجلة «الكاتب» واحنا كنا كلنا حواليه، كوّن مجموعة مننا نروح نحضر مؤتمر للشعوب في النمسا... الوفد كان فيه هدى زكي مرات صلاح حافظ ساعتها ويوسف إدريس وزهدى تمن شباب مصريين ما شافوش أوروبا قبل كدا وحتجّنن نساfer. في بداية حياتهم ما عندهمش فلوس، وسعد نظم الرحلة وسبقهم علشان يرتب حيسكنهم فين وحيسقبلهم ازاي والبرنامج ايه، وهم يحصّلوه. ياخدوا مركب وينزلوا في «جنوا» في إيطاليا ومن هناك ياخدوا قطر للنمسا. نزلوا من المركب في «جنوا» ما لقوش حد مستنيهم في المينا، ما يعرفوش طلياني وما عندهمش فلوس وما معاهمش حتى عنوان مكتوب. يوقّفوا الناس في الشارع ويقولوا : «Partigiani della pace»، يعني «أنصار السلام» بالطلياني، ما يعرفوش أي كلمة تانية ومستنيين إن الجملة دي تتقّدهم بأي شكل، الناس في شوارع «جنوا» ما يعرفوش ايه «أنصار السلام» دي. يا عيني مشيوا في الشوارع يائسين، وفاتهم القطر اللي مفروض ياخدوه علشان يقابلوا سعد. في الآخر سواق تاكسي وقف من غير ما يشاوروا له - يظهر لقي شكلهم غريب - الدنيا برد ولا بسين صيفي، جايين من مصر زي ما هم كدا بالهدوم اللي عليهم ماشيين مبلولين في المطر دراعاتهم على صدرهم وحاجة مأساوية خالص. «إنتم عايزين ايه؟». «بارتيجاني ديلا باتشي». ركبهم كلهم معاه في التاكسي واتصرف يسأل ويدور هو على «بارتيجاني ديلا باتشي» دي لحد ما لقي المقر، وفعلاً «أنصار السلام» فرع «جنوا» في إيطاليا استلموهم وجابوا لهم تذاكر ووصلوهم المحطة وركبوهم القطر وقالوا لهم اسم المحطة اللي لازم ينزلوا فيها في النمسا، وهناك بقى المفروض إن سعد يكون مستنيهم. في القطر استمروا جعانيين وبردانين خايفين ما يلحقوش يقروا الياقطة وينزلوا لأن القطر كان بيقف مدة قصيرة في المحطات، أو - ودا الكابوس - يوصلوا وما يلاقوش سعد ويحتاسوا في النمسا. سعد في الوقت دا كان راح يستناهم في المحطة مع شاب مصري اسمه محمد برادة، يعرف سعد من أيام «الحزب الوطني» وفتحي رضوان قبل حركة السلام، بيدرس فيزياء في النمسا، بعد كدا بقى واحد من العلماء المشهورين بتوعنا. لما الشباب ما وصلوش حصل لسعد وبرادة دعر: «يا دي المصيبة، جرا لهم ايه؟ حنلاقيهم ازاي؟». استنوا القطر اللي بعده والدنيا برد، محمد برادة ابتدا يفقد الأمل: «مش حيجوا!». «ما عندهمش فلوس وما يعرفوش حد، حيجوا». «حيجوا ازاي؟». «جايين جايين، يوصلوا يلاقوني مستنيهم». رفض يمشي من المحطة واستنى ساعات وساعات. دخل الليل وسعد مع كل قطر يوصل يطلع من الاستراحة يقف على الرصيف .

يوسف إدريس بيحكي إن من ناحيتهم كل ما القطر يهدّي يطلعوا كلهم برؤوسهم من الشبابيك يقروا اسم المحطة، لحد ما يوسف في مرة طلع يبص م الشباك وشاف راس سعد من بعيد واقف مستنيهم على الرصيف لوحده بيتز عش :

- لحد النهاردا ما شفتش وش أحلى من وش سعد في اليوم دا .

نزلوا وحضنوا بعض وسكنوا وأكلوا واتدفوا، سعد اتصرف جاب لهم جاككات، والبرنامج مشي وحضروا المؤتمر وزاروا أوروبا ورجعوا. يوسف إدريس حكى القصة وهو منفعل وخالنا كلنا

ننفل معاه وننيسط ونضحك، هيصنا وصقفنا لما وصل للحنة اللي بيقول فيها إن شاف وش سعد في المحطة وبصينا لسعد وحسنا ان وشه حلو فعلاً، سعد استغرب :

- آه فعلاً، أنا كنت نسيت الحكاية دي خالص .

أنا حببت يوسف إدريس لما حكى القصة دي، أصل كان فيها إعجاب بسعد، قصة قديمة لما كانوا كلهم لسه صغيرين وسعد كان الدينامو، عرف بحدوته صغيرة زي دي يحيي اعتبار سعد اللي كان أصبح منطوي قوي في التمانينات. يوسف كان كويس معانا دايماً ولطيف ويحبنا، دا اللي قصدي ا قوله، كان عنده نوع من الولاء، مش كل الناس كانت بالعذوبة دي معانا .

مجلة «روز اليوسف» في الخمسينات كانت بتشغي بالشباب التقدمي، وأنشأوا «صباح الخير» مع إحسان عبد القدوس، والمجلتين تخصصوا في اكتشاف المواهب والقدرات في الرسم والكتابة والقصة من غير تردد ومن غير تفكير، ما بيسألوش على شهادات عليا، ولا يهمهم ماركسيين ولا مش ماركسيين. صلاح حافظ كان في طب تحت ضغط ابوه، ابتدا يكتب في «روز اليوسف» وعمره ما خلص طب، صلاح جاهين كان زجال وشاعر شعبي وكاريكاتيريست خدوه على طول في «روز اليوسف»، جمال كامل إدوا له صفحة بحالها يرسمها، بقى بعد كذا أشهر رسام بورتريهات في مصر. زهدي معلم في الكاريكاتير السياسي وأبو العينين وأحمد بهاء الدين وفتحي غانم وحسن فؤاد، كلهم بيدينوا للست «روز اليوسف» ومدرستها. سعد استوحى من الروح دي لما مسك «الكاتب» مجلة «أنصار السلام» قبل إلغاء الديمقراطية، كان فيه وعي إن الديمقراطية بعد الثورة مهددة، ومسألة إن ساييين حركة السلام وساييين الأحزاب والمتقنين يعيروا مسألة لازم الاستفادة بيها للأخر وبسرعة. سعد جمع المتقنين الشباب اللي كانوا ميالين للتقدمية معاه في «الكاتب» ودعموا المجلة وبقت حاجة جميلة، وبقوا يفرحوا بيها في المجتمع المصري. سعد حكى لي مؤخرًا إن «الكاتب» خضعت للرقابة بعد الثورة بـ6 شهور، والرقيب كان أنور السادات وكان بيحيب سعد البيت ويناقشه وجيهان تجيب عشا، لكن كانت رقابة، ومهمة السادات إنه يعرف إيه اللي حيتنشر قبل ما يتنشر. يظهر إن السادات كان بيربي نفسه سياسياً فكان بيكثر في المناقشة ويتمادي فيها. اللي عايزة ا قوله إن سعد ما كانش فنان ولكن ما كانش سياسي نظامي، كان حاجة لوحده، واللي حوله كانوا عارفين قدراته. تنظيمياً بيتهاجم علشان شغله في العلنية والفنون والأدب وفي ثقافة الجماهير، معدوش الشخصية أو الميل إنه يتألق في السرية أو يلتزم سياسياً بخط معين على أساس خط الحزب. في فترة من الفترات اشتغل معاهم شوية في الاجتماعات كانوا بييجوا هنا يجتمعوا ويدوا له مسؤولية، لكن الشغل المنظم من جوه الحزب ما كانش بيطلع مواهبه، كان بيقهره ويكتمه. الحياة العلنية والنشاط العلني المفتوح بالطريقة دي كانت بتعرضه في نفس الوقت لقمع من الحكومة والبوليس السياسي كان حاطط عينه عليه وكان فيه طول الوقت «suspense» أو توتر، كانت فترة مصيرية وكنت شايفة إنها فترة منفتحة، مش بس سياسياً، لكن اجتماعياً وفنياً وثقافياً. وانا كمان، زي سعد، عجبتي الحياة بالطريقة دي أكثر من السرية. من هنا بقى القصة اللي حكاها يوسف إدريس كانت مهمة بالنسبة لي، أنا كنت لمست شخصية سعد لما اتعرفت عليه قبل السجن، وشفت ازي سعد كان بيحوز على احترام وتقدير الناس دول، كبار وصغيرين، وإلى حد ما يقترح وهم يوافقوا وينفذ. يمكن علشان شغل سعد ملوش جسم، ولكن شغله وموهبته لهم تأثير على كل زميله وعلى

المجتمع لكن ملهاش مُنتج محدد. كنت حاسة في كثير من الأحيان إنه مظلوم وانه خلاص انتسى، فيوسف إدريس لما حكى القصة دي في التمانينات رد لي الاعتبار في ثقتي في سعد .

مات السادات، ساعتها بس سعد رجع يكافح بشدة علشان يسمحوا له بالنشر، كان بودهم في الجرنال إنه يفضل على كدا، ياخذ ماهيته وما يكتبش لكن هو أصر لغاية ما لقوا له مساحة ينشروا له فيها وجهة نظره، مقالة أسبوعية في باب «الرأي للشعب» وسعد سمى مقالته «خواطر سياسية». حاول ينتظم، وإلى حدّ ما انتظم لحد نص التسعينات .

كويس إن سعد دخل في معركة الكتابة في «الأخبار» على الأقل، لأنه كان اكتأب للدرجة... أنا حاحكي، مع إن الحكاية اللي حاحكيها دي حتخلّيني أنا حاموت. مبارك كان صديق صلاح حافظ، اتعرف عليه لما كان نائب للسادات وانبسط من شخصيته وقعد ياخذه مستشار خاص، صلاح كان رجع للصحافة وكان بيكتب باب اسمه «قف». لما مبارك يسافر ياخذ صلاح حافظ معاه، وفضل يستشير صلاح حافظ لفترة بعد ما بقى رئيس للجمهورية، وأظن صلاح حافظ في الفترة دي اتعين رئيس تحرير مجلة «روز اليوسف»، وعبد الرحمن الشرقاوي كان أصلاً رئيس مجلس إدارة المؤسسة. الوضع لان شوية بموت السادات، وعبد الرحمن الشرقاوي وصلاح حافظ وضيوا مقابلة لسعد مع مبارك. غرضهم إيه عبد الرحمن الشرقاوي وصلاح حافظ؟ أعتقد تصورهم إن سعد يقول لمبارك عاوز يعمل إيه، يختار مجال ويقدم مشروع، زي أيام إنشاء الثقافة الجماهيرية مثلاً، سعد اشتغل على مشروع الثقافة الجماهيرية أكثر من عشر سنين يوصفه ويشرحه ويتكلم عنه ويطوره ويتصوره ويسعى له، من وهو أيام ما كان في السجن أواخر الخمسينات لحد ما اتحقق في 1966. بعد فشل مشروع الطماطم سعد كان بلا شغل، قاعد في البيت زعلان، متضايق. صلاح وعبد الرحمن اصحاب سعد وبيحاولوا يساعده يوضّب وضعه، عارفين إنه كان منبوذ أيام السادات، وعارفين إن سعد عنده رؤية وأفكار وعارفين الدور اللي لعبه في وزارة الثقافة، وإن ضروري حيكون مفيد كمستشار، يمكن مش مستشار سياسي، ولكن في أي مجال من مجالات المجتمع والثقافة بالذات. وفعلاً الرئاسة اتصلوا بسعد وكان سعد في الفيوم، ولقوني أنا في البيت، السكرتير اللي كلمني قال لي :

- إحنا رئاسة الجمهورية، الرئيس مبارك عاوز يقابل سعد كامل .

- هو مش هنا، في الفيوم وأدي نمرته .

ضربت لخرة طبعاً، مسألة إن يكلموني من رئاسة الجمهورية، فادّيت لهم نمره سيلا غلط والسكرتير كلمني تاني وقال لي النمره دي غلط، فاعتذرت له وقلت :

- أنا آسفة، فعلاً النمره دي غلط .

واديته النمره مضبوط. كلموا سعد :

- معنديش عربية وما اقدرش آجي اقابل الرئيس في بحر ساعة .

فحددوا له ميعاد بعد يومين، وبعثوا له عربية للبيت وخذوه يقابل مبارك. دي كانت المرة الوحيدة اللي سعد قابل فيها مبارك والمقابلة ما كانتش مثمرة بالمرة، مبارك اتكلم عن نفسه وقال لسعد «إنه راجل بسيط ويحب إن حال الشعب المصري يتحسن، ومعدوش طموحات كبيرة، وإن حالة البلد الاقتصادية هي أهم حاجة بالنسبة له، وإن الوضع الاقتصادي وحش بعد الحروب اللي مرينا بيها بما فيها حرب ثلاثة وسبعين وإن لازم المستوى العام يرتفع وما ينفعش الشعب يستمر في الحالة دي» وإن «مراته كمان معندهاش طموحات وست بسيطة»، أظن عاوز يقول إن مراته ما بتعملش زي الستات التانيين اللي بيروحوا فرنسا وانجلترا ويجيبوا هدومهم من كريستيان ديور ويحملوا ميزانية الحكومة مبالغ ضخمة، وإن هي - مرات مبارك - «تعرف خياطة صغيرة هي اللي بتفصل لها الملابس حتى بعد ما بقت مرات رئيس الجمهورية» دا مبارك اللي بيتكلم. بعد كدا سأل سعد :

- إنت بتعمل إيه دلوقت؟

- ولا أي شيء .

- بتعمل إيه في الفيوم، مش عندك عزبة؟

- ولا أي حاجة .

- مش بتشتغل؟ بتزرع؟

- لأ أنا باستجم ما باعملش أي حاجة .

- طيب إيه مشاريعك؟ إنت عاوز تعمل إيه؟

- أنا مش عاوز حاجة .

- إنت كويس كدا؟

- آه أنا كويس كدا أنا مش عاوز أي حاجة .

ومشي ورجع البيت وحكى لي الحكاية بالطريقة دي .

المقابلة مع رئيس الجمهورية من وجهة نظري انتهت بشكل وحش، أنا ما زعلتتش على الفرصة، لأن مين عارف كان حياقي إيه وحيصل له إيه لو أخذ مسؤولية في عهد مبارك، بس أنا فوجئت برد فعل سعد، مشاعري كانت وحشة تجاه الحكاية دي، كان لسه عندي أمل يرجع يتحمس ويشغل والمقابلة دي تخرجه من الاكتئاب .

دينا كانت بتجيب ملاحق، ما كانتش بتحب المدرسة أبدًا، كنت قلقانة عليها على طول. كانت حلوة ولذيذة، طفلة مش متعبة. لما ابتدت تكبر وتعرف تتكلم مش عايزة تسمعني، باحاول احكي لها حواديت زي ما كنت باعمل معاك، بتخاف مش عايزاني أكمل وبعدين ابتدت هي عايزة تحكي. ترجع من المدرسة عندها حكايات وتتأخر وتقول و... و... وتسرح وانا اسرح... ما اتقاهمناش أبدًا أنا وهي في موضوع الحكايات. ولا هي حبت تسمعني ولا انا عرفت أتابع بتقول إيه. حظها في المدرسين كان وحش وابتدت في فترة مش عايزة تروح. كل يوم الصبح مشهد مقاومة للمدرسة. أنا كنت أيامها تعبانة في البيت. دخلنا كان بسيط جدًا وكان لازم أعمل تدبير منزلي كبير، نانا وجدو كانوا اتوفوا وسعد كان مكتئب وانت كنت دخلت في المراهقة وبقيت مجنونة باصحابك ومش بتوضبي أوضتك وتسمعي نفس الأغاني «جون بايز» ليل نهار، بتذاكري وتنجحي بالصدفة. كنت قلقانة على دينا على طول مش عارفة أساعدها في المدرسة ازاي. حسيت إني مش قادرة عليها. سعد اقترح عليها تلبس لبس المدرسة من بالليل، وهي فعلاً نامت مرة بلبس المدرسة والشنطة على ظهرها. إنت حاولت برضه شوية تكوني أخت كبيرة، الصبح تصحي وتصحى وتتنزلوا مع بعض كأنكم رايعين فسحة. كنت باسمع صوت عياطها وانتو بتحاولوا تركبوا أوتوبيس المدرسة. كنتو بتصعبوا عليّ انتو الاتنين، مش عارفين تتصرفوا ازاي. ابتديت أنادي عليها فجأة وانا قاعدة ساكنة «دينا!» وكنتمو بتتريقوا عليّ، مرة كنت قاعدة ساكنة فسعد ضحك وقال :

- دلوقت «ماري» حتهتف «دينا!».

وحتى هي، دينا، لما كبرت شوية اترقت عليّ :

- إيه؟ ساكنة بقالك كثير مش حتقولي «دينا!»؟

كانت حزينه من المدرسة. اتخانقت لها مرة وانتين بس الخناق حيصلح إيه ولأ إيه؟ كل حاجة كانت بتتدهور في نظام المدرسة. مرة راحت العزبة مع سعد وبهجت، وبهجت خلاها ترسم معاه والحكاية دي استغرقتها أكثر من أي حاجة تانية، دينا يا حبيبتى عندها الميل دا، ارتاحت مع عالم بهجت وارتبطت به، بعد كذا لما كبرت فضلت تروح له تسأله وتتعلم منه، بس بهجت نفسه اكتب .

إنت دخلت ثانوية عامة وجبت مجموع مش بطل فوق الـ80% ولكن لازم عايزة ضروري تدرسي طب وسينما، سعد استجمع قوته وعلاقاته علشان يدخلك كلية الطب في الجزائر. لما كان بيحس إنه ممكن يبقى مفيد كان ببشحن قدراته وينفض الاكتئاب، بيبقى سعيد لما ينجز وروحه المعنوية ترتفع، زي لما نجح في تعيين انتصار بنت عم رياض في قصر ثقافة الفيوم، ياااه على الفرحة. وفعلاً إنت رحبت تقيمي لوحدك في الجزائر وكنت قلقانة عليك إنت كمان، ما عندكيش 17 سنة .

الصعوبات في البيت كانت بتخليني مستمرة في تمسكي بالباب في «حوا» ومتابعة قضية المرأة، الحاجة المميزة اللي عندي وفي أيدي وباعملها وانا مبسوطه. مجلة «نحن النساء» اللي كانت بتيجي لي في السجن بطلت توصل لكن أنا كنت باحاول احصل عليها بانتظام، اشتريت فيها بس كانت بتضيع في البوسطة في مصر، فاشتركت على عنوان أبويا وأمي في إيطاليا وطلبت منهم يحوشوا لي الأعداد، بس برضه كانت مكلفة علينا فما استمرتش، اكنفت اشتريها لما اروح إيطاليا. عمري

ما عرفت مين اللي اشترك لي في مجلة «نحن النساء» الإيطالية وانا في السجن؟ باخمن إن مجموعة «كوريل» اللي كانوا في المنفى في فرنسا، فكروا يبعثوا لي اشترك المجلة على السجن على أساس يكملوا تنقيفي .

سنة 1975 قرئت عن طريق مجلة «نحن النساء» عن أول مؤتمر تنظمه الأمم المتحدة لحركات المرأة في العالم، توصية نهاية المؤتمر في المكسيك إن «أي قضية من قضايا الإنسانية بنخصص لها سنة في الأمم المتحدة لتقديم دراسات والبحث عن حلول، قضية المرأة تحتاج عشر سنين بحث وتكثيف جهود من الأمم المتحدة، بسبب تعقيدها وتوغلها في جميع قضايا حياة الإنسان» ، وبناء عليه الأمم المتحدة قرروا إن من 1975 إلى 1985 سيكون «عقد المرأة». جرايد كتير كتبت وكتب كتيرة طلعت وأبحاث ونشاطات ومؤتمرات وابتدوا يحضروا لـ«مؤتمر نص المدة» 1980 في كوبنهاجن. في صيف 1979 وانا في «ريبا» قرئت في المجلة إن تقرر إقامة منتدى شعبي موازي للمؤتمر الرسمي لأن المنظمات الأهلية لها دور كبير على الأرض، ليه المؤتمر يكون حكر على الحكومات؟ الأمم المتحدة كانت متعودّة تنظم مؤتمرات للدول والمنظمات الأهلية تحضر الجلسات كمرقبين وملمّش حق التصويت. السنات والمنظمات غير الحكومية اتلمّوا على بعض وابتدوا ينظموا منتدى شعبي موازي تحت رعاية الأمم المتحدة، قرئت عن لجنة من 44 منظمة غير حكومية مهمتها تساعد الأفراد والمؤسسات الصغيرة على الاشتراك علشان ما يبقاش المؤتمر حكر على اللي معاه فلوس. ما كنتش مرتبطة بأي تنظيم وعلى أي حال ما كنتش باشوف حوالي غير عقلية التنظيمات الشيوعية القديمة، فاطمة زكي مثلاً والشيوعيين الماركسيين كانوا بيعتبروا قضية المرأة ثانوية بالنسبة للقضية السياسية الكبرى كأنها - المرأة - قضية ثانوية أو صغرى، وساعات كانوا بيعتبروها مضرّة لقضية الطبقات أو التحرر الوطني وبيتهموا المهتمين بالمرأة بتشتيت الجهود وحاجات تانية أو حش، أنا كان حصل لي تغيير كبير في تفكيري بالتدريج بعد مدة طويلة وعدد كبير من حوارات غير تنظيمية وقرارات وتأمّلات. قدمت طلب - بالإنجليزي - للجنة المنتدى الشعبي في كوبنهاجن اللي نشرته مجلة «نحن النساء»، وقلت لهم أنا ممكن آجي على حسابي بس «لو تقدروا تقدموا مساعدة للإقامة أنا أحب أشترك» قدمت بشكل فردي من عنوان البيت بصفتي صحفية في مجلة «حواء». جالي الرد فيه عنوان لأسرة متطوعة تستقبلني انزل عندهم. وجود إقامة شجعي وأداني حماس إنني حاعرف اشترك. ما كنتش حضرت مؤتمرات قبل كدا، كنت حضرت مرة اجتماع صغير في روما أو «نابولي» في سفريّة من السفريات، حاجة على مستوى الحي، بينكلموا عن مشاكل المرأة. ردّيت على اللجنة :

«لسه ما عملتش أي إجراءات وحابقي أقول لكم على الميعاد اللي حاوصل فيه».

«إحنا مستنيين تدّينا أخبارك».

كله بالبوسطة، الجواب ياخذ أسبوعين رايح والرد أسبوعين جاي، ما كانتش فيه حاجة اسمها إنترنت ساعتها ولا حتى فاكس .

بس أنا كنت قلقانة عليك في الجزائر وعايزة لازم أروح اشوفك. شعرنا، أو شعرت أنا إن انت كنت... أنا باقول في أزمة، ما كنتيش ماشية كويس في الدراسة. عندك 17 سنة وقضيت وقتك في

الجزائر تتدمج في حاجات ثانية واتوجدت في مناخ من الكفاح السياسي الشبابي عطلك عن المذاكرة والتركيز في الدراسة. دينا كانت أخذت الابتدائية وابتديت اطمئن عليها - وضبت لها أسافر لوحدي واسيب دينا مع سعد في مصر الصيفية دي - أقعد شهر في الجزائر معاك واطلع من الجزائر على إيطاليا أشوف أهلي أسبوعين وبعدين أروح الدانمارك أحضر المؤتمر، خصوصاً إن امتحاناتك كانت قرّبت ومتصور لي إني أقدر اساعدك تتفرغي. بعث أسألك لو في مكان انام فيه وبكام .

رحت سفارة الدانمارك علشان آخذ الفيزا وقلت لهم حاحضر مؤتمر في 16 يونيو :

- تعالي قبل المؤتمر بأسبوع .

- ما ينفعش علشان حاروح في الجزائر عندي بنتي هناك .

وحكيت لهم القصة كلها :

- وبعد كدا حاروح إيطاليا لمدة 15 يوم وبعدين في الآخر حاروح الدانمارك، فلأزم فيزا الدانمارك دلوقت .

كنت متحمسة فاقنتعوا وابتدوا يفكروا :

- طيب تعالي بعد يومين ثلاثة .

بعد يومين ثلاثة :

- أول ما توصلي إيطاليا روعي سفارة الدانمارك في روما وخُدي الفيزا من هناك .

- مش حيرضوا يدوها لي، الفيزا لازم من بلدي .

- ما تخافيش حنبت اسمك .

- بس ما تتسوش أصل حيكون فات وقت طويل .

- ما تخافيش .

وقعدوا يضحكوا عليّ إني خايفة ويطمنوني، اضطريت أصدقهم ورحت خدت فيزا من سفارة الجزائر، وفيزا لإيطاليا. وطبعاً سعد ساعدني في الإجراءات دي كلها، باقول لك سعد لما يحس إن فيه حاجة حلوة ممكن يفيد فيها بيصحح وتجيله أفكار وأهم من الأفكار الهمة للتنفيذ. ساعدني في الإجراءات وكلم صلاح حافظ اللي كان رئيس تحرير مجلة سعودية بتاعة سميرة خاشقجي. ست سعودية غنية أخت خاشقجي المليونير المشهور. بعد مؤتمر المكسيك بتاع 1975 ابتدت موضة في العالم إن الناس تكتب عن قضية المرأة. سعد حاول يخليني أكتب في المجلة دي عن طريق صلاح،

كُتبت مقالة واحدة ودفعوا لي فلوسها، بس يظهر الطريقة اللي أنا باكتب بيها ما كانتش تنفع لمجلة غنية وورق لو كس، صلاح كان بيسافر على حساب المجلة مع سميرة خاشقجي يشترى الورق بنفسهم من أسبانيا، وأنا ما استريحتش لمعاملتهم، فما نفعتش، واستمريت في «حواء» طبعًا . المهم إن سعد اتصل بصلاح قبل ما اسافر وقال له :

- «ماري» حتسافر لوحدها لكوبنهاجن تحضر مؤتمر المرأة .

- الله؟ حتسافر ازاي؟

- على حسابها فيه لجنة للمؤسسات غير الحكومية حيستقبلوها وحيسكنوها .

- لا، استنى، أنا حاحاول اعمل حاجة .

صلاح اتصل بأمانة السعيد، كانت رئيس مجلس إدارة «دار الهلال»:

- نائلة كامل حتسافر تحضر مؤتمر المرأة في كوبنهاجن، وعايزين ورقة من «دار الهلال» أو مجلة حوا إن هي مندوبة، علشان التسهيلات هناك .

شوفي مثلاً ما فكرتش أقول لأمانة السعيد من نفسي، وما طلبتش فلوس، يعني غالبًا ممكن أطلب يساعدوا شوية في التكاليف . أمانة السعيد كتبت لي الورقة دي على طول واتخمت من «دار الهلال»، ما معناه إنني بامتل مجلة «حواء» ومندوبة صحفية عنها وطالبة يقدموا لي المساعدات والتسهيلات الممكنة لممارسة العمل الصحفي وحضور المؤتمر، ورقة حلوة .

كثر خيره صلاح .

جيت لك الجزاير ولقيت إجراءات الدخول والخروج صعبة، مثلاً الواحد يسبب الشنط للتفتيش وبعدين ياخدها من حطة تانية ما يعرفش عملوا فيها إيه، مش بيفتشوها قدامك . الحمد لله إنت خلّيتني اقع ببلاش في بيت اصحابك فوزية وبلهادي وصباح، ولكن أنا تأكدت في الزيارة دي إنك مش حتعرفي تذاكري وإن مهما اقول لك «ذاكري» مش ممكن يحصل، دا مخك كان في حطة تانية خالص . كنت باجبرك تقعدني على المكتب وباشوفك قاعدة تبحلقي في الكتاب وشكلك حزين، محبطة، مش محبطة بس زهقانة وتقعدني بالساعة والساعتين ما تقرّيش ولا سطر واحد، فكتبت جواب لسعد قلت له «أنا في غاية اليأس، أنا فشلت كل الفشل، مش حيحصل إنها تذاكر . أنا حآخذ البنيت معايا إيطاليا واروح عند أبويا وأمّي واسيبها معاهم». جيت أقول لك تعالي معايا إنت ما رضيتش خالص مع إن الامتحانات كانت خلّصت، أحاول اقنعك من هنا ومن هناك إن تسافري معايا، مفيش فائدة . أنا كنت عاوزة اضمن إن انت بين أيديا وفي نفس الطيارة معايا . سعد كان حذرني قال لي أمشي على التعليمات «ما تروحيش كدا ولا كدا وما تعمليش أي حاجة غلط أو خارج النظام بتاعهم، بلد بولييسي» لدرجة إن معايا شوية دولارات وأصحابك عاوزين يغيروها لي بسعر حلو، محتاجينها «لا يمكن أنا حاغيرها من البنك بالسعر الرسمي» وخسرانة كثير فيها، وصاحباتك

ثقة يعني مفيش خوف منهم بس مفيش فايده أنا ما رضيتش، زي بعضه معلش وفلوس الرحلة خلصت ولازم امشي .

ما اعرفش قدرت تصرفيني وتتخلصي مني ازاى، بس انتهى الأمر إن مشيت فعلاً لوحدي من الجزائر بعد ما وعدتيني إنك حتحصليني، وصلت روما وقعدت في بنسيون «ساييا»، ورحت أول حاجة على السفارة الدانماركية، خدوا اسمي وقالوا لي تعالي بعد يومين، كنت خايفة مش حاعرف أحصل على الفيزا دي. تاني خطوة ما كنتش مخططة حاروح الدانمارك ازاى، طلع مش ممكن إلا بالطيارة وانا ما كنتش مرتبطة بأي مجموعة علشان يساعدوني بفلوس أو بالإجراءات، رحت الأمم المتحدة وقلت لهم أنا رايحة الدانمارك في المؤتمر بس ما لقتش حاجة تساعدني. سعد كان عنده شوية فلوس صغيرين في البنك كان كتب 3 أو أربع مقالات في فترة سابقة في مجلة بتطلع بالعربي في روما أظن اسمها «الرسالة»، إدوا له شوية فلوس وبعد كذا بطلوا ينشروا له وبطلوا بيعتوا له فلوس. الفلوس دي كانت قليلة ما تعملش حاجة، فسبناها في الحساب على أساس لما بنروح إيطاليا بنكون دايماً مزنوقين، اخدت منها واشترت تذكرة للدانمارك. لما اشتريت الفيزا كمان استريحت ورحت عند أبويا وأمي. كنت مبسوطة ومتحمسة فابتديت أعمل دعاية للمؤتمر في القرية، ولكن قرابينا في «ريبا» كانوا بيبيصوا لي ويضحكوا، باشرح لبنات خلاني «مارتشيلا» و«ماريزا» و«إيلينا» مرات اخويا، لطاف معايا دايماً كعائلة، لكن كانوا في ملكوتة تانية خالص وانا كنت مليانة حماس للمرأة .

جا لنا منك تلفون، ازاى اتصلت؟ أبويا ما كانش عنده تلفون، غالباً كلمت «دون فينتوريو» ابن خالتي القسيس وهو جه نادانا ورحنا عنده وانت رجعت اتصلت تاني وقلت إنك وصلت إيطاليا في المطار :

- ما اقدرش اخرج من المطار، معنديش فيزا، البوليس قال لازم تيجي تستلميني بنفسك .

على ملا وشنا الصبح اللي بعده بدري سافرنا أنا وأبويا. أنا كنت قلقانة من بيتك في المطار، أكيد انت فاكرة الحكاية دي كويس أصلك نمت على الأرض. وصلنا مطار روما ورحنا على بوليس المطار على طول نقول جايين نستلمك، فهم رفضوا !

- لا يمكن ندخلها، دي معندهاش فيزا .

وانت فعلاً ما خدتيش الفيزا، مش ممكن تاخدي الفيزا من الجزائر، لازم من مصر. أمال انت جيت على أساس إيه؟ أنا ابتديت أقلق من الحكاية دي :

- انتم عارفين احنا جايين منين؟ إحنا ساكنين في «ريباترانسوني» وعلشان نوصل هنا سبع تمن ساعات بالعربية وأبويا راجل كبير عنده سبعين سنة !

كنا جينا بعربية أبويا سابق طول السكة وانا مسافرة للدانمارك خلاص، حوسة. مفيش فايده .

- مش ممكن ندخلها .

فزعت فيهم فادوني نمرة السفارة المصرية :

- كلميهم في التلفون احكي لهم حكايتهك .

اتصلت بالسفارة بس كانوا في أجازة، فانا بقى في التلفون وقدام الناس بازعق وبالعربي مع الرجل اللي رد عليّ من السفارة :

- والطوارئ بتعملوا فيها إيه؟ دي طوارئ: البنبت عندها 17 سنة وأنا صحفية في مجلة «حواء»، اسمي نايلة كامل، مسافرة مؤتمر كوبنهاجن بكرة، ما اقدرش اسيبها في المطار اعمل إيه؟

وازعق ازعق ازعق، لقيت الناس حواليّ في المطار بيصوالى مش فاهمين أنا باقول إيه وقلقانيين. بس إيه برضه الزعيق جاب نتيجة، الرجل قال :

- إديني اتكلم مع الطابط الإيطالي اللي بتكلميه .

رحت ندهت لها، البوليس الطلياني كانت واحدة ست. بتاع السفارة كلمها والست البوليس رجعت وقعدت تقلب في الباسبور اللي قدامها، بتاعك؟ ولا بتاعي؟ أنا قعدت اعيط فالست بتاعة البوليس قالت :

- خلاص حنسيها .

قلت :

- ايوه، متشكرين، كويس .

بس أنا كنت مش قادرة أمسك نفسي، أعيط واعيط مش قادرة أسكت وابويا يا عيني قاعد جنبي وساكت، إنت شفتيني؟ ولا ساعتها بعثوا لك تيجي تقابلينا أخيراً؟ انت يمكن كل دا كنت في صالة الترانزيت مستتية وبعثوا نادوا على اسمك بالمكرفون. وصلت وبوسناك واخذناك وركبت معانا العربية، لما هدينا شوية شرحنا لنا إن رحنا تاخدي الفيزا في الجزائر فرفضوا علشان مش جزائرية وكنت ناوية تاخدي فيزا ترانزيت، بتقولي عملت قبل كدا لكن ما نفعلش المرة دي، أنا مش فاكراة ليه ما نفعلش المرة دي .

سبتك لأبويا ورجعتوا مع بعض «ريبا» في نفس اليوم بالعربية إنتم الاتنين .

أنا نمت في بانسيون «سايا» كالعادة والصبح رحت المطار تاني وسافرت إلى كوبنهاجن .

خلاص ركنتك ونسيتك مع أبويا وأمي وحانقرغ بقى للمؤتمر .

أول مؤتمر .

*

في مطار روما لقيت ثلاث أربع بنات بيتكلموا بالعربي فرُحت لهم على طول سعيدة ومبتسمة :

- أنا نائلة كامل من مصر أنا صحفية، إنتم منين؟

من الأول مش منفرجين ولما سمعوا «من مصر» تجهموا رُدُّوا ببرود :

- من اليمن .

- أه طيب كويس .

وعاوزه اتكلم معاهم «رايحين فين وازاي؟» ولكن بيردُّوا يا دوبك عايزين يخلصوا الكلام معايا، سببتهم ورحت قعدت في مكاني. أنا زي العبيطة مش واخدة بالي إن فيه مقاطعة للمصريين، في الجزاير كنت انتبهت إن فيه شعور ضد مصر، وكنت في المناقشة باقول لهم «أنا ضد السادات أكثر منكوا ولكن تكرهوا المصريين كلهم ومصر كلها؟» بس هو الواقع كان كذا البلاد العربية اعتبروا المصريين مسؤولين، سبنا السادات يعمل اللي عمله، لما شفت الستات اليمينيات في الطائرة ما خطرتش على بالي الحكاية دي. قابلت اليمينيات دُول مرة ثانية في المنتدى الشعبي، برَضُه يتحاشوني ومش عايزين يتكلموا معايا، ولما رجعت وحكيت لسعد الحكاية دي قال :

- دُولة اليمن أكثر ناس متشنجين ضد مصر اليومين دول .

وقعد يضحك عليّ ويضحكني. الطائرة كانت أغلبها ستات، مجموعة من الهندييات بيتكلموا إنجليزي واللغات الهندي الثانية، ولكن ما كانش فيه طلاينة، عرفت بعد كذا إن الطلاينة راحوا كوبنهاجن بالقطر وبعضهم راحوا بالعربية، طلع ممكن بالقطر بس أنا ما توصلتش له، بيمر في ألمانيا وأنا معنديش فيزا لألمانيا، خسارة علشان أكيد القطر كان أرخص .

نزلت من الطائرة وقلت: «يارب، أنا حالاقى الناس اللي أنا ساكنة عندهم ازاي؟». شفت واحدة دانماركية بتكلم واحدة هندية وبتقول لها :

- «?Egypt».

فالهندية رَدَّت :

- «No».

أنا لما سمعت مصر رحى لست وقلت لها :

- أنا من مصر ، أنا نائلة كامل .

استغربوا من شكلي، غالبًا متوقعين حيستقبلوا واحدة مصرية يبان العروبة على وشها أو على لبسها، بس كانوا لطاف، الست وجوزها جم ياخدوني من المطار بعربيتهم، شرحت لي إن البيت مش في كوبنهاجن نفسها، فيه قطارات بتروح لغاية الجزر، قرى صغيرة جنب بعض تابعة لكوبنهاجن أظن بيتهم كان في حطة اسمها «يوبورج»؟ طيب. عندهم بنت صغيرة عندها سنة أو سنتين شاريبين بيت فرحانين به ولسه بيدفعوا أقساطه وحوالين البيت جنينة صغيرة بتلات أربع شجرات تقاح، وزرعة فراولة بيقتفوا منها الفراولة ويتلجوها في الفريزر علشان الشتا. عشوني ليلتها وحضروا لي نوع من التارت بالبندق عملوها في نص ساعة، بيشتروا العجين جاهز، ويملوها بندق ويغطوها بالزبدة وسكر بودرة ويحطوها في الفرن. جبت لهم معايا هدية إزاة ويسكي وغطيان مخدات برسومات أرابيسك عاملهم أبو العينين، وغطا أبريق الشاي في شكل شيخ البلد عملاه بدر حمادة، وكانوا مبسوطين بيهم بس فجأة الطفلة الصغيرة «بيا» اتخضت من شيخ البلد أصل عنده شنب وشكله غريب وابتدت تعيط، فاضطروا يخبئوه، مش ناجحة الهدية دي. طلعوني في الدور اللي فوق، أوضة نوم لـ«بيا» وأوضة نومهم والحمام، وأوضة صغيرة تحت السقف يا دوبك فيها سرير ومكتب صغير .

- دي أوضتك، بس خدي بالك لما تطلعي وتنزلي تقفلي باب السلم علشان «بيا» ما تقعش .

وشرحوالي بيشتغل ازاي .

- بالنسبة للفطار إحنا حنوفره، عيش وجبنة وزبدة ومربى، الشاي اهه والكوبيات اهيه تعملي الفطار بتاعك، بالنسبة للغدا والعشا حتتصرفي إنت .

فهموني كمان إن الدانمارك في الشمال والشمس مش بتغرب إلا الساعة حذاشر ونص بالليل في الصيف وحكوا لي إن جت لهم ضيفة من البرتغال اتخضت إن الليل مش بيبجي والصبح النور بيتدي بدري، الليل كله على بعضه يا دوب تلات أو أربع ساعات .

- ما تقوميش، هو مش وقت للصحيان .

كان لطيف منهم يشرحوالي دا كله، الأيام اللي بعد كدا كانوا بينزلوا يودوا البنات للحضانة بدري الصبح قبل ما اصحى وما بقتش أشوفهم إلا نادرًا، كتر خيرهم والله على الاستضافة دي. أم «بيا» ما راحتش الشغل أول يوم وجت معايا المؤتمر، ركبنا القطر وورّتني مواعيد القطر إمتي وازاي وبكام، ولما انزل من القطر أركب أتوبيس، علمتني اجيب التذاكر، مفيش كمساري بيحصل التذكرة، الواحد يحط الفلوس في المكنة وياخد التذكرة، والسواقة - واحدة ست - تشوف إنني قطعت تذكرة وانزل آخد أتوبيس تاني يوصلني للجامعة. يعني قطر وأتوبيسين. طيب .

سواقين الأتوبيسين لطاف وبيسوقوا كويس، بس ستات، حتى في إيطاليا أنا ما كنتش لسه شفت ست بتسوق أتوبيس، عجبنتي الحكاية دي. الشوارع في الدانمارك حلوة ونضيفة وواسعة، والمرور منظم

والزحمة منظمة، كل حاجة منظمة .

اليوم الأول افتتاح المنتدى الشعبي في الجامعة أم «بيا» سألتني :

- تحضري أنهي مؤتمر؟

- أنا حاضر الاتنين .

وصلنا للجامعة في كوبنهاجن دخلنا في قاعة التسجيل، ترائبات دايرن دايرن مستطيلة. أم «بيا» جت معايا وكانت لابسة كارت متطوعين قالت لي :

- لازم تسجلي نفسك هنا .

رحت عند واحدة من البنات، كان فيه ستات ببساعدوا على التسجيل معظمهم شابات شعرهم أصفر وعينهم زرق، دانماركيات، عدد ما اقدرش أحده، مش ثلاثة أربعة، لا، يمكن ثلاثين أربعين متطوعة، فالإجراءات خلصت في دقيقتين، «الباسبور والدعوة والاسم» وعملت لي الكارت وعلقته على صدري و«اتفضلي باي باي».

الافتتاح وعدد الستات كبير مش قادرة أخش المدرج، حاولت ابص من بعيد، سود وبيض وصُفر، آسيويين وأفارقة وأوروبيين، تخان وكبار في السن وشعر أبيض وشابات. فجأة مجموعة مسكوا أيدين بعض وابتدوا يلفوا في حوش الجامعة ويغنوا، اسم الجمعية «YWCA» «جمعية الشابات المسيحية»، طبعهم كشافه شوية، يمسكوا أيدين بعض ويعملوا دايرتين واحدة جوه الثانية ويدوروا خلف خلاف ويغنوا. إنت ودينا اشتركتوا في معسكرات بتنظمها الجمعية دي في مصر، ما كنتش اعرف إن مهتمين بقضية المرأة. وإذا بستات تانيين يقولوا شعارات، وبعضهم يرفع أعلام، وواحدة ماسكة ميكروفون ووقت على صندوق وقالت كلمة، يعني زي احتفال مش منصة وجلسات وخطب وقورة. صاحبتنا الدانماركية أم «بيا» نبهتني :

- لو عاوزة تاخدي البرنامج اهه موجود هنا .

كويس إنها معايا تشرح لي. نظام متطوعات جميل لتسهيل الاشتراك في المؤتمر لستات مش واخدة على المؤتمرات معهاش فلوس كثير وما تعرفش البلد، يعني الستات اللي زيي، أم «بيا» عضوة في لجنة متطوعات دانماركية لاستقبال ستات المنتدى .

أخذت البرنامج وما عرفتش أقراه بسهولة، قعدت أبص على اليفط اللي قدام القاعات، وكان فيه على الحيطه إعلانات كثيرة عن ندوات واجتماعات، مواضيع مختلفة، الساعة كذا في أوضة كذا الموضوع الفلاني منظمة كذا بلد كذا، مش عارفة اختار ازاى. وانا ماشية لقيت نوال السعداوي في آخر الطرقة من بعيد، سعيدة أشوف حد من مصر واعرفها كمان، شاورت لها من بعيد وجريت عندها وسلمت عليها :

- وانت فين وعاملة إيه .

ردت :

- أنا أسفة أنا مشغولة .

وسابنتي ومشيت. فرجعت ادورّ على طريقة أحضر حاجة تهمني وكويسة. كان فيه قاعة ندوات عامة مفتوحة، ومئات الفصول الصغيرة، حالة تشبه اللي انت شفتيه بعد كذا معايا في مؤتمر نيروبي. كوبنهاجن مدينة منظمة والقاعات جديدة وواسعة ومريحة واليفط كثيرة ومع ذلك مش سهل. قريت البرنامج تاني، لقيت ندوة فيها واحدة من أمريكا من منظمة مسيحية، ومن مصر نوال السعداوي فقلت طب ما اسمع بتقول إيه. القاعة اتملت والست الأمريكية قالت «في الدين المسيحي فيه تمييز، الرجالة عندهم حقوق أكثر من الستات» وكانت بتتكّ كثير ودمها خفيف، بس انا مش فاهمة الإنجليزي الأمريكي بسهولة، ما فهمتش أغلب النكت. وبعدين جت نوال السعداوي وقالت كلمتها، كلمة ظريفة عن الـ «matriarcat» والـ «patriarcat» - النظام الأموي والنظام الأبوي - وازاي المرأة مش متساوية مع الرجل وإن دي حاجة قديمة وإن في بداية الإنسانية كان فيه فترة نظام أموي، النظرية مش بتاعتها بس هي بتعرضها كويس، وصقفوا لها. نوال كانت عايشة في الوقت دا في العراق هي وشريف حتاتة جوزها وقبلها أظن في الحبشة - أثيوبيا - كان بقى لي مدة مش على اتصال بيهم. لقيت فرقة موسيقية ستات واظن كان فيهم بعض الرجالة، داخلين القاعة الكبيرة ماشيين في الممر بالمزيكا سألت قالوا لي دي العراق، دردشت مع واحدة من البنات العراقيات عن كلمة نوال السعداوي، ما كانتش فظيعة زي بنات اليمن بس برضه بتتكلم بشيء من التحفظ. شابات وستات العراق فضلوا يضربوا مزيكا ويعزفوا أناشيد ويمشوا في الطرقات من أن لآخر طول مدة المؤتمر. إحنا ماشيين مش بنبص في وشوش بعض، موطينين نقرأ الكارت المتعلق على الصدر علشان مكتوب البلد اللي جاين منها. لقيت بادج مكتوب عليه مصر. أنا كل ما الاقي واحدة من مصر كنت بادوب، بتحصل لي حالة، باتكلم مع كل الناس، والناس بتكلمني، بس عاوزة ألفة، عاوزة ناس اعرفهم من مصر، كنت كدا .

- أنا باكتب في مجلة «حواء»، أنا نايلة كامل .

- آه .

- من فين في مصر؟

- القاهرة .

- أقصد ساكنة فين؟

- أنا ساكنة في باريس مش في مصر. بامثل مصر و«التجمع» وجاية من تشيكوسلوفاكيا .

هي كمان بتكلمني وهي مش عاوزة تكلمني، نوع من المقاطعة لمصر؟ ما حبتش تصاحبني ولا تحضر معايا، مشيت وسابنتي. مش عايزة اظلمها بس انا حزنت .

وانا خارجة من المنتدى الساعة واحدة أو اتنين الظهر لقيت صلاح حافظ وسميرة خاشقجي في وسط الزحمة، سميرة خاشقجي صابغة شعرها أصفر ولابسة تايبير في غاية الأناقة باين عليه «signé» - ماركة مشهورة - وبتروح وتيجي مع صلاح حافظ. سلمت عليها وسلمت على صلاح وشكرته، هو كمان مشغول، طول الوقت يبص حواليه كأنه بيدور على حد، قال لي بسرعة :

- لازم تحضري الافتتاح الرسمي، رُوحِي سجلي نفسك في قاعة الكونجرس الكبيرة اللي في وسط كوبنهاجن، فيه أتوبيسات .

في اللحظة دي جت مجموعة من الستات حاوطوا سميرة خاشقجي وهاجموها بالإنجليزي :

- إنت من أي بلد؟

- السعودية .

- وفي بلدك في السعودية، الستات بيلبسوا زيّك كذا؟

أنا لقيتها رزالة، ونوع من الضيق من الأناقة مش اهتمام بحرية المرأة، هجوم على حاجة ما تعييش سميرة، كنت حاتدخل بس الزحمة فصلت بيني وبينهم، وكمان سميرة خاشقجي مش محتاجة مساعدة .

دي مقابلة المصريين والعرب اللي شفتهم أول يوم في المؤتمر .

رحت أسجل للافتتاح الحكومي في الكونجرس واكتشفت إنني ممكن أدخل المؤتمر الرسمي كصحفية بس أملا استثمار تانية. تسجيل الصحفيين زحمة وبيطلبوا أوراق كتير والصحفيات يستنوا ويشوفوا لو اتقبلوا على كمبيوتر، مش سهل زي التسجيل في المنتدى الشعبي فقلقت . وقفت قدام مكتب الاستقبال ومليت استثمار وقدمتها مع جواب أمينة السعيد لواحدة من المسؤولات عن التسجيل، والله كنت من أواخر الناس اللي دخلوا، لسه داخله، لكن اللي خدت ورقي شافت من مصر وميت ألف نسخة - «حواء» كانت بتوزع حوالي ميت ألف نسخة أو أكثر - سابنتهم كلهم ودخلت ورا الموظفين التانيين وفي خمس دقائق جابت لي بادج الصحافة :

- دا بادج المؤتمر، الافتتاح له دعوة خاصة، عايزة؟

- طبعًا، عاوزة كل حاجة .

دققت بتركيز شوية لقيت الصحفيات اللي مستنيين يسجلوا أنفسهم توزيع ثلاث آلاف أو خمس آلاف نسخة في الحدود دي. أدتني كرتونة ملونة - دعوة الافتتاح .

كان فيه أتوبيس ببلاش عشر دقائق من الجامعة للكونجرس رايح جاي. سبت المنتدى ورحت الكونجرس قعدت ألف وادور لحد ما دخلت طرقة من الطرقات الكثيرة لقيت نفسي في القاعة الرئيسية. جو تاني خالص، جميع الخدمات، بنك بالكمبيوتر ومكتب تلغرافات وتراييزات في كل مكان ومقاعد جنب الحيطه، الواحد يقعد ياخذ نفسه يلاقي حاجة يسند عليها ويكتب التلغرافات المهمة ويوضب الكروت اللي الناس بنديها له وورق الندوات اللي بتتوزع، الواحد يقرأ البرنامج بهدوء وينقي، عرفت أنظم أفكارى شوية. كان فيه طرقة زي جنينة طويلة وواسعة وآخرها مطعم «سلف سرفيس». أكلت حاجة طبعًا - مش ممكن ما اكلش - وشربت قهوة وسمعت ناس بيقلوا «يلا ندخل مش حنلاقي مكان». دخلت قاعة مجلس الشعب الضخمة قبل ميعاد الافتتاح بساعتين، بدري شوية، القاعة مليانة تقريبًا، لقيت مكان مش بطال في الوسط ورا شوية، وطبعًا كارت الدعوة الملون طلع أساسي، من غيره ما كنتش حادخل، قعدت جنبى واحدة ست لابسة تايبير أزرق وعلى طول هي اللي كلمتني :

- أنا من النرويج، وزيرة سابقة .

نسبت دلوقت وزارة إيه أكيد اسمها موجود في جبل الورق اللي رجعت به. اتكلما كثير واحنا مستنيين واستمرينا نتقابل ونكلم بعض في الأيام اللي بعد كدا، هي تقول لي على النرويج وانا أقول لها عن مصر .

قفلوا البيان ووصلت ملكة الدانمارك لابسة تايبير لبني بيرنيطة على راسها وبعدين دخل «هامرشولد» سكرتير عام الأمم المتحدة، راجل كبير في السن، كنت شفت صورته في الجرايد. عزفوا النشيد الدانماركي ونشيد تاني يمكن بتاع الأمم المتحدة، بس الكل وقف وتصقيف وطقوس رسمية مريحة وسهلة المتابعة. الملكة افتتحت المؤتمر، وقالت كلمتين ترحيب وتمنيات طيبة مختصرين بالانجليزي، وكل مقعد فيه سماعه للترجمة، لازم الترجمة كانت كويسة حتى إن أنا مش فاكرة لو هي اتكلمت بالانجليزي ولا بالدانماركي. طلعت مجموعة زي دستة ستات من وسط الجمهور على المنصة وست كبيرة في السن سلمت على الملكة ووصلت لغاية «هامرشولد» وقدمت له كمية من الورق، منظمة في النرويج جمعت إمضاءات آلاف الستات من البلاد الإسكندنافية بيطلبوا من الأمم المتحدة يركزوا على السلام وعلى إنهاء الحروب، والجمهور صقف لهم تصقيف كبير. «هامرشولد» افتتح المؤتمر «في المكسيك سنة 1975 بمناسبة «عام المرأة» كنا متوقعين 3000 ست من التنظيمات غير الحكومية كمراقبين لكن فوجئنا بحضور 8000 ست واحتاسنا لتدبير أماكن للإقامة، موضوع المرأة ووضعها عايز إعادة دراسة من الأول خالص، ما يقضيش سنة للمرأة فقررنا في الأمم المتحدة لأول مرة في تاريخها تخصيص عقد كامل - عشر سنين - من 1975 إلى 1985، وسميناه «عقد المرأة». إحنا كنا في نص المدة، 1980. يا ترى حققنا إيه بعد خمس سنين؟»

أنا فاكرة الاتنين دول بالذات الملكة و«هامرشولد» علشان كنت مبسوطه اشوفهم. وانتهى اليوم، مش عارفة أوصف، كنت مذهولة وسعيدة وطايرة من الفرحة مش عارفة احضر إيه ولا إيه، وقررت اروح أخيرًا علشان أنام في بيت أم وأبو «بيبا»، أخذت الأتوبيسات والقطر، وانا في القطر بابص على اسم المحطات أحاول افكر اسم المحطة اللي لازم أنزل فيها، خايفة تفوتني. الحمد لله لما شفت

الاسم عرفته «جروسين لوندن» ونزلت. المسافة من البيت للمحطة مش قريب، بس أنا كان عندي رُكب كويصة ساعتها والدنيا لسه نور مع إن 9 بالليل زي ما حذروني، في السكة لقيت عربية زي عربيات الكشري في وسط الشارع بتبيع الهوت دوج المشهور بتاعهم. ياه حسيت بالجوع وافتكرت إن أهل «بيا» مش حبعشوني، اشتريت سندوتش فسألوني نخط إيه عليه؟ اختيارات كثيرة، قعدت أشاور على الحاجات وأنا تعبانة. رجعت امشي وانا باكل، بس الحقيقة لقيتهم مستيني عايزين يسمعوا مني وعاملين لي تارت البندق تاني .

- أنا اتعشيت متشكرين .

والبنبت الصغيرة كانت نامت خلاص فأم «بيا» سألت :

- أنا الصبح شفتك في القاعة العامة لما المندوبة بتاعة مصر عملت العرض بتاعها .

اللي هي نوال السعداوي .

- بس دورت عليك بعد الظهر ما لتكيش .

فقلت لها :

- أيوه رحنت أسجل نفسي في المؤتمر الرسمي .

ووريت لها إن دلوقت عندي كارت صحافة وممكن أخش في الاتنين، حسيت إنها ما انبسطتش إني باروح المؤتمر الرسمي، حبيت أؤكد لها إني جاية على حسابي وإن أنا نصيرة المرأة والمنندى الشعبي بس عايزة أعطي المؤتمر كله علشان انا صحفية. بعد ما اتوضّحت النقطة دي حكيت لهم شفت إيه وعملت إيه. نمت وما حسيتش بالنور والليل القصير من التعب، والصبح صحيت ما كانش فيه حد في البيت، راحوا الشغل، فطرت وأخذت القطر ورحنت للمنندى .

في مصر في محاولة من ضمن المحاولات بعد السادات، كوّنّا جمعية للكاتبات، أسّسنا «جمعية الكاتبات المصريات»، وأمينة السعيد انتُخبت رئيسة، كانت لطيفة الزيات عاوزة تكون الرئيسة ولكن أمينة السعيد كسبت الانتخابات، وانا أيدت أمينة السعيد واعتقدت إني بكدا كسبت أعداء كثير من اليساريات. أمينة السعيد راحت مع أنور السادات للقدس والحادثه دي مش فايته عندنا، اليساريين. على أي حال أمينة السعيد كسبت الانتخابات وقعدنا نفكر نعمل إيه في افتتاح أول نشاط للجمعية، فكرت في يوسف إدريس، يوسف إدريس دا شخصية كبيرة بس أنا قلت :

- أنا اتصل بيه .

لأن كنت باحس إن فيه حب بيني وبينه، عشم، بس خلّيت سعد يتصل بيه الأول، معنديش الثقة وبتكسف، سعد قال له على الفكرة ويوسف رحّب، فاتشجعت وأخذت السماعه فقال لي :

- يومها يكون عيد ميلادي واحتفل بيه معاكم .

جمعية الكاتبات عندهم طريقة شغل بتكرني بالتنظيم الشيوعي، مع إنهم ما كانوا شيوخ عيين ولا حتى تقديمين بس على طول سألو: «هو حيتكلم عن إيه بالظبط وازاي؟». عايزين يعرفوا بالتحديد كأننا في اجتماع خلية، فسألته فهو قال لي :

- أنا حآجي وحاكون المتحدث عن المرأة في ساعتها وحاقوم بإحياء حفل تأسيس الجمعية بمنتهى السعادة .

كلمت رجاء مراته :

- بس يا ترى هو حيتكلم عن إيه؟

علشان في الجمعية حيسألوني ويقلقوني، فرجاء قالت :

- لا لا لا، إنت سببي يوسف بحُرَيْته، لما تسيبيه يتكلم كويس وحقول حاجة حلوة، ما تخافيش كتبت في الأجنده وحافكره .

لما أمينة السعيد عرفت إن يكون عيد ميلاده قالت :

- ياه دا يكون عيد ميلادي أنا كمان، ما كنتش عاوزة أقول لكم، بس ما دام عيد ميلاد يوسف إدريس يبقى مابدهاش .

أظن عيد ميلادها السبعين. ابتدينا ن فكر ازاي نحتفل بيهم الاتنين، سعد كلم أمينة شفيق صديقتنا وعضو مجلس نقابة الصحفيين وكلم مكرم محمد أحمد اللي كان النقيب ساعتها علشان النقابة تدينا القاعة، ونزلنا خبر في الجرنال واسم أمينة السعيد ويوسف إدريس وجمعية الكاتبات، المسرح مليون وكانت بداية كويسة للجمعية. يوسف إدريس قال كلمتين حلوين قوي لأمينة السعيد، واتكلم عن المرأة كلام حلو وسرح في حاجات شعرية، بس اللي فضل معايا :

- أنا مش ببص للمرأة على إنها الملهمه الدائمة للفنانين بس، لا، أنا باحترم أي ست، أي امرأة، تمسك القلم وتقرر تقعد تكتب. باحترمها احترام ما تقدر وش تتصوروا قد إيه. أنا كاتب وعارف الكتابة مش سهلة وبالنسبة للمرأة أصعب بكثير من الرجل، الباب بيخبط... اللبان... العيش... العيال... الطبخ.. السوق !

خلى القاعة تصقف له قوي قوي، أصل القاعة فيها عدد سنات كبير، وأغلبهم كاتبات وهو يقولهم أنا باحترم الست اللي تقرر تمسك القلم وتقرر تكتب. فعلاً قد إيه الكتابة صعبة، وهو حاسس بيها.

الجمعية وزعت أسبنة صغيرة فيها وردتين للاحتفال بأول نشاط للجمعية فيوسف وهو ماشي قال :

- دا أحلى عيد ميلاد أنا احتفلت بيه خارج بسببت للبيت اقول لهم اهه في ناس بتحتفل بيّ !

لمدة طويلة بعد كذا اتكلمنا في الجمعية قد إيه كانت حلوة كلمته وأحيت الافتتاح بالفعل. فضلنا نشوف يوسف إدريس من وقت لوقت، وهو بيتحول لشخصية في المجتمع أكثر وأكثر، لدرجة إن لما نجيب محفوظ اترشح لجائزة نوبل وأخدها، في مصر الاختيار بين الاثنين صعب، أصل الاثنين موهوبين وقم ومختلفين عن بعض. يوسف إدريس نفسه اكتب بعد كذا .

الفكرة من جمعية الكاتبات إن الست اللي بتكتب تلاقي مجموعة تديها الدعم المعنوي والعملي إن امكن. كنا بنفكر نعمل نشاطات على الكتب والكاتبات يعملوا تكريم لكاتبة من الكاتبات كل شهر في المسرح الصغير في دار الأوبرا، ويعزموا الناس ويعملوا نوع من التعريف والإحياء لشغلها. استجمعت شجاعتني في تكريم أمينة السعيد، علشان أنا ما باعرفش اتكلم في الأماكن العامة ومش فاكرة إني اتكلمت قدام مجموعة في أي وقت تاني، وقفت وحكيت بصوتي حكايتي مع أمينة السعيد وتشجيعها لي :

- أمينة السعيد كان لها موقف إنساني جميل معيا .

ازاي جوزي كان مطلوب القبض عليه ومغضوب عليه من الدولة :

- مش حاقد انسى لها إنها شجعتني ودعمتني في لحظة ضعف واستسلام .

وصفقوا لي الحمد لله. أمينة السعيد حكيت بقى للناس حاجة أنا ما كنتش اعرفها، إن لما السادات كان بيقبض على اليسار وسعد كان هربان «طلبوا» منها توقفي عن الكتابة، مش عارفة مين اللي طلب منها وعن طريق مين، المباحث ولا مرات السادات ولا إيه، ولكن أمينة السعيد قالت «لهم»:

- لا، كله إلا دي، ملهاش دعوة بجوزها، نايلة حتستمر بشغلها .

مش عارفة قصدها إيه «ملهاش دعوة بجوزها» لأن أنا طبعا لي دعوة بجوزي ونص كمان، أنا ما كنتش عايشة بنفسي، بس المهم أنا حكيت وهي حكيت وأكّدت إن كان مطلوب تبعدي وهي صممت أكمل اكتب. أمينة السعيد ماتت دلوقت وانتهت الفترة دي والقصة دي، وانا استمررت اكتب في «حواء».

استمررت اكتب، واستمررت أتابع المعارك الاجتماعية والفكرية في إيطاليا وأوروبا، وتمكنت إني أحضر مؤتمر نيروبي سنة ١٩٨٥ معاك ومع هناء شوقي ورندا وريم، وكتبت عنه وعن الصراعات الفكرية والسياسية في قضايا المرأة. وكانت المعارك دي بتسمّع مع الركوند هنا في مصر. مظاهرات للستات بالمزيكة في الشوارع بالحلل والمقشّة ومريلة المطبخ ومكنة الخياطة ومعاهم الأطفال، زي ما العمال والفلاحين بينظأهروا بالمنجل والمطرقة ويفخروا بدورهم في

المجتمع ويطالبوا بحقوقهم. انتشرت صورة ربة البيت أو الزوجة اللي بست أو سبع دراعات كل إيد تعمل حاجة، إيد تكوي وإيد تشيل العيّل وإيد تطبخ وإيد تكنس وإيد تلاعب جوزها، إنت عندك الصورة دي معلقها في أوضتك. لو يموت الزوج ست البيت تاخذ معاش ضئيل باسمه، ستات كبار في السن عايشين وحش مع إنهم اشتغلوا طول حياتهم، اشتغلوا في بيوتهم وخدموا اجوازهم وعيالهم، وخلوا بالهم حتى من أهاليهم، الأولاد يكبروا ويهملوهم في حالة من الفقر ومن الضيق، فطلع شعار «الأم الواحدة تعرف تخلي بالها من ميت ابن، ولكن ميت ابن مش عارفين ياخدوا بالهم من أم واحدة»، بمعنى أن ست البيت لازم يكون لها حقوق، كتبت عن الموضوع دا ونشرت صور المظاهرات في «حواء» وعرضت وجهة النظر اللي بتحسب شغل المرأة في بيتها، وتقدره بالمليارات. فكرة ثورية بالنسبة لي .

كنت ماشية في شارع «الساندريا» في روما، ولقيت ترابيزة صغيرة على الرصيف وشباب بيجمعوا إمضاءات :

- علشان إيه؟

- ضد الـ «vivisezione».

- يعني إيه؟

تشريح وتجارب على الحيوانات وهي حية. «دي حاجة متوحشة وغير مقبولة وكمان مش ضرورية» بيقلوا «الأبحاث تحصل من غير تعذيب». أنا وقّعت على طول بس العريضة دي كانت جزء من حملة كبيرة ضد النشاطات الإنسانية المضرّة بكوكب الأرض وأدّت إلى تكوين منظمات سمّوا نفسهم «الخضر» للدفاع عن البيئة. ابتديت اقرا في الجرايد عن «إن الطبيعة زي البيت لازم نحافظ عليها وندافع عنها، مش كل واحد حُر يخسّر الغابات علشان يشغل مصنع، أو حيوان ينقرض علشان منتج بيجيب فلوس». مجموعات «الخضر» دي خسوا البرلمان، وحصلت مناقشة هل يتحولوا إلى أحزاب ولا يفضلوا حركات شعبية وحملات إعلامية، مش متأكدة إن دخول البرلمان قرار سليم، كان يبدو منطقي في ساعتها، اللي يهمني حيوية المجتمع. أول مقال لي عن البيئة كان عن مظاهرة للخضر في ألمانيا في شكل جنازة للشجر اللي بيموت، شايلين شجرة في تابوت وماشيين وراها، الشركات الكبرى بيثيلوا الغابات بدون تفكير ويستخدموا الخشب والأرض في مشاريع مربحة، بس قطع الأشجار بيقلل الأوكسيجين في الهواء ويضعف الأرض وكل الدورة الطبيعية بتتأثر من تدمير الغابات، لازم يكون فيه حدود. صورة جنازة الشجرة طافت العالم، فكرة جديدة على الناس إن لما تقطعي شجرة جريمة قتل، مش صحيح إن الشجرة جماد وملوش لازمة. كتبت عن النفايات النووية وأخطارها، مش بس الأسلحة النووية خطيرة بقوتها التدميرية. وكتبت عن مرض التوحد أول ما سمعت عنه وكان مش معروف بالمرّة، الكتابة في «حواء» بالطريقة دي كانت أهم حاجة بالنسبة لي، أنا ما بطلتش كتابة إلا مؤخرًا لما سعدت تعب سنة 1999.

*

خليل زاد تعبهُ أكثر وأكثر على مدى السنين، صعب أكون دقيقة في تقدير المدة، وفي النهاية اتوفى من غير ما يخلف. بعد ما اتوفى بحاجة بسيطة، شهر، محمد علي المساعد بتاعه اتجوز زينب أرملته «علشان يكون لي بيت في العزبة اللي باشتغل فيها» وبكدا دخل بيت زينب اللي كان بيت خليل، وأصبح مسؤول عن أرض جدو كلها. محمد علي كان غير خليل، عنده شيء من اللؤم فاهم في الزراعة وشاطر في الإدارة في نفس الوقت. على طول لما دخل على زينب واتجوزها حملت وجابت الولد علي الصغير. كانت حاجة صعبة على الناس اللي بيحبوا خليل إن زينب تتجوز بعده على طول وتخلف كمان. بس بالكلام يمين وشمال فهمت إن مسألة إن تعيش لوحدها في بيت خليل في العزبة مستحيل، «عمل طيب إن اتجوزها وثبتها في المكان»، كانت حترج لأهلها، بيقول لي سعد. الأهم إن زينب ارتفعت روحها المعنوية لما جابت علي، خلّت وكمان جابت ولد. محمد علي كان متجوز ومخلف صبيان من مراته الأولانية، بعد علي زينب جابت توأم بنات سموهم نادية ودينا على اسمكم، أنا اتأثرت قوي أصل علاقتي بالناس اللي في العزبة كافحت كثير علشان تستمر بالرغم من التطورات في البلد وفي العزبة وفي بيتي .

صحة زينب كانت في النازل، ببيجي لها روماتيزم، ويجي لها وجع في البطن، وبقت تتعالج وتأخذ حقن وحاجات وجابت كمان عيّل مع الأمل إن تجيب ولد ثاني وعلي ما يكونش ابنها الوحيد، جت لها بنت سموها شادية. شادية كانت ضعيفة، وما كانتش عايزة تكبر وغابت في المشي وفي الوقوف على رجليها. جمال أخو سعد متديّن من النوع اللي فيه رحمة وإنسانية، راح عند محمد علي وزينب وقال لهم :

- لازم تدّوها حقن كالسيوم وتودّوها عند الدكتور، ما تهملوهاش .

واتلفت لزينب وقال لها :

- حرام، لازم تاخدي بالك من شادية أكثر من اخواتها أصلها عيّانة وضعيفة .

وفعلًا جابوا لها حقن كالسيوم وتقوية وحاجات وخذوا بالهم منها، وما شاء الله شادية كبرت وبقت كويسة. زينب بطلت تجيب عيال على كدا وصحتها اتحسنّت هي كمان .

ظهر بقى على الساحة رجب ابن محمد علي الكبير من مراته الأولانية، استدعوه في التعبئة وراح الجيش، ولما رجع أبوه قرر يجوّزه، رجب رفض، ما قدرتش أفهم ساعتها رجب كان رافض الجواز دي ليه؟ في الأغلب مش جاهز للجواز. على أي حال أبوه كان بيعمل خطط لمصلحة العيلة، دا ياخذ بنت دا، ودي ياخذها ابن دا وكدا، بس انتهى الأمر إن رجب هرب من البيت، تمرد. العروسة بنت لطيفة، أعتقد بنت عشري، جت لها أزمة نفسية، عار إن العريس مش عاوز يتجوزها، برضه عمو جمال تدخّل وجابوا رجب يعقلوه. عقلوه للدرجة إن سمع كلامهم. شبكة التقاليد والعادات والمصالح ما تسمحش. رجوع رجب واتجوز وقاعد مع مراته لحد النهاردا وجايب منها ما شاء الله حاجة زي ست عيال - جواز ناجحة .

محمد علي أصبح ديكتاتور كبير مع الوقت، ورجب لما كبر أصبح زي أبوه، رجب نفسه دا اللي هرب ومش عايز يتجوز، كبير العيلة وبيدير مصالحها بكفاءة كبيرة، بس كان حيتجنن في شبابه .

أول واحد بيعت بنته للمدرسة ويسيبها تكمل بعد الابتدائية كان عم رياض الغفير، بعث عيشة وبعدها سلمى، ذكية وشاطرة بس ما حبتش تكمل دراستها، وبعدهم انتصار كملت ومتعينة دلوقت في قصر الثقافة في الفيوم. سعد ساعد على تعيينها هناك، وكانت حاجة كبيرة لنا كلنا إنها بقت موظفة في قصر الثقافة بالرغم من عزل سعد. العزبة دي لما انا ابتديت أروح في الستينات ما حدش كان بيعلم بناته، محمد علي حلف إن مش حيعلم بناته. الفكرة السائدة إن «البنت اللي تتعلم بتبور، مش بتجوز». عيشة بنت رياض حكّت لي إن المدرسين الرجالة انبسطوا من وجود مدرسات معاهم، واشتكت لي إن في الآخر يروحوا يتقدموا لواحدة من التلميذات. ملاحظة قالتها لي بمرارة شديدة لما كانت بتشتغل مُدرّسة لإنها اتأخرت شوية على الجواز فعلاً، بس اتجوزت برضه في الآخر وعندها أولاد، كل بنات رياض اتعلموا واتجوزوا، آخر واحدة اتجوزت هي البنت الكبيرة نفوسة بنته من مراته الأولى وهي الوحيدة اللي ما دخلتش مدارس وما اشتغلتش وحنان بنتها دخلت المدرسة وخالتها بتذاكر لها. أم مصطفى مرات عم رياض اللي علم بناته، ربّت أولاد الزوجة الأولانية وربّت ولادها، أنا كنت اعرف أم مصطفى لأنك كنت بتلعب مع ولادها مصطفى وعيشة وحمدى وإبراهيم وأحمد وسلمى وانتصار .

فكرت نعمل معسكر في العزبة، زي اللي كنت عملته في اسكندرية سنة 1966، كان في ذهني أكرر تجربة اسكندرية مع لميس، لما كنتو بتعملوا كل حاجة مع بعض، أنا ما تعبتش معاكم خالص في اسكندرية. رحنا كلنا بما فيها ولاد بهجت وبدر: هشام ووليد، وجه حسام ابن عز الدين وزياد بهاء مع ليلي أخته، واظن أحمد الزراعي، هشام ابن بهجت عثمان كان أكبر واحد وزياد أصغر واحد، دينا كانت اتولدت بس كانت صغيرة على المعسكر يمكن كان عندها سنتين أو ثلاثة. عم رياض كان يعمل الشاي العربي ثلاث أدوار بسكر كثير وبالنعناع، ويصبه لك بطريقة جميلة من فوق خالص في كبايات فزاز صغيرة يمكن قد فنجان القهوة التركي، شاي ثقيل مسكر ما بيعملوهوش إلا في الأرياف، وبالليل متخصص يعمل نار للعيال في جنينة بيت جدو، يجيب حطب ويقيده ولو فيه بطاطس أو درة في الأرض يسويها على النار. ما كانتش الكهرا بيا دخلت لسه، بالليل الضلعة شديدة والسما مليانة نجوم والقعدة بره بالنار حلوة. جوه البيوت كانوا بيولعوا كlobات ولمض جاز . يوم شم النسيم قررنا أنا ولميس نصحي بدري ونروح نشرب الشاي وناكل البيض الملون فوق على النلة اللي بيسموها «الأرة»، حضّرنا ترموس شاي وشوية أكل ومشينا، كان عندي القدرة أمشي المسافة دي مع العيال، مسافة تبدو لي مستحيلة دلوقت. قضينا شم النسيم في الأرض وسط الغيطان، ويمكن كان العيد الصغير لأن كان في كحك. في وقت معين لقينا ليلي بهاء مدروخة وعينيها زايدة، باين عليها التعب ساكتة ما بتلعبش وما تتحركش، جميلة قالت :

- يا عيني، لوحدها هنا في العيد، أكيد أهلها واحسناها .

قعدت جنبها اسألها واتكلم معاها اتضح إنها خلّصت علبة كحك لوحدها، أكلتها كلها على بعض، سمّنة كثير على طفلة عمرها حوالي 8 سنين فجالها تلبك. هي ليلي بهاء كانت رفيعة وما كانتش بتاكل كثير ولكن لما تحب حاجة تاكل بنفس، يمكن لغاية دلوقت الخصلة دي فيها، مش بتكتفي. لكن

في معسكر العزبة مش عارفة إيه السبب ما عرفناش نوضب كويس روح التعاون، حسام ابن عز الدين رفض يشترك في أي شغل أو لعب من أول يوم، إنت وليلى كنتو كبرتوا وبتتخانقوا كثير ومش فاضيين للنظام. أحسن واحد كان هشام ابن بهجت وبدر، أمه علمته شوية أعمال منزلية، يقوم الصبح يروح المطبخ ويحط الشعيرية واللبن والسكر ويجيب الحلة على السفرة. هشام بالرغم إنه ببساعد وعنده روح المعسكر بس ما كانش عنده الموهبة القيادية اللي كانت عند لميس، لميس عندها حماس تلاقي طرق لكل يشترك وينبسط. انتهى الأمر إن لازم أنا اللي اعمل أغلب الشغل وهشام ببساعدني، لعبتوا شوية واتخانقتوا شوية، وانا تعبت شوية، وادينا جايزة لهشام علشان كان أحسن واحد، ورجعنا مصر بس ما كررتهاش تاني .

في التمانينات عز أخو سعد عمل مشروع تسمين العجول وأخذ قروض على حس الأرض وجمال أخوهم الكبير كان ببساعد، أما سعد زي ما إنت عارفة رافض يتابع. إنت حاولت تشتغلي شوية معاهم، كنت بتروحي كل أسبوع علشان تمسكي الخزنة وتقبضي الأنفاس. بس المشروع دا كمان فشل أكثر من مشروع الطماطم، ولقينا علينا ديون والأرض والعزبة أصبحوا كابوس في حياة سعد تاني، وأصبح فيه حاجز نفسي أكبر وبطلنا نروح خالص لحد ما إنت خدت مسؤولية وتوليت بيع حطة من الأرض علشان تسديد الديون قبل ما يحجزوا علينا وراحت نص الأرض. بعدها رجعنا نروح العزبة تاني، لكن علاقتنا بالمكان تآكلت والعلاقات كمان اتغيرت، مش كل الناس اتصرفت بشكل كويس لما الأمور انهارت، استهتار على غدر، المكان اتهجر. بس قبل النهايات المريرة دي كل مرة كنت باروح العزبة كنت باحس إني سعيدة، اتعلمت في العزبة حاجات كثيرة وارتبطت بالناس وبال عقلية والمجتمع، كان عندي استعداد أفهم، والناس ساعدوني كل واحد بطريقة، الناس في العزبة على مر السنين والمسجونات في فترة السجن وطنط عزيزة .

«جنفياف»!

ما كنتش فاكرة اسمها، افنكرته فجأة، كان اسمها «جنفياف» زميلتي اللي قابلتها أول يوم في السجن ودوّرت وشها بعيد وما كلمتنيش، عمري ما عرفت اسم عيلتها، بعد الموقف دا ودوها طابور مع بنات منظمتها «م.ش.م»، ثريا أدهم اللي كانت مسؤولة عن المرأة في «التجمع» فيما بعد وأختها إحسان أدهم. الناس دُول ما كنتش باشوفهم إلا من بعيد في السجن وما حصلش إن اتقابلنا كثير بعد ما خرجنا، لكن قابلت «جنفياف» بعد أكثر من عشرين سنة تقريبًا، كنت اتجوزت سعد وخلفتك، شفتها ماشية مع واحدة قريبتها، هنا في الدقي بتدور على عنوان في سليمان جوهر من ناحية حجازي بتاع البيض ومكتبة «الجمهورية». عرفتها، وشها زي ما هو، هي اللي ندهنتي من بعيد في الشارع وطبعًا كلمتها، ما دام هي بتكلمني أنا لازم أرد، أصل حكايات «م.ش.م» وصراع المنظمات الكثير كان فات عليها زمن، والحقيقة كنت مبسوفة إنها بتكلمني وحكيت لسعد لما روحت البيت. شفتها تاني بعد سنين في مهرجان سينما تسجيلية، شفنا فيلم عن واحد مصري بيقابل واحدة يهودية في ألمانيا، كفيلم ما كانش له طعم، ومن ناحية المضمون ما كنتش فاهمة عاوز يقول إيه. فوجئت بـ«جنفياف» من ضمن الجمهور، سلمت عليّ وسألنتني :

- إنتِ رأيك إيه في الفيلم؟

- مش عارفة، ما عجبنيش، بس لازم أفكر فيه، ما فهمتوش كويس .

كان فيه واحد قاعد جنبني من الناحية الثانية قال لها :

- حيكون رأيها إيه يعني؟ مش دي «ماري روزنتال» مرات سعد كامل؟

الطريقة ما عجبنيش، حسيت إن فيه سوء ظن، أصل أنا ما كنتش حتى أعرفه، سكت وسألته :

- حضرتك مين؟

قال لي بس مش فاكرة الاسم الأولاني فاكرة «الحسيني»، حاجة الحسيني، اتكلما في حاجات عامة لغاية ما لقيت سعد واقف مع ناس تانية ومشينا .

بعد سنين، لسه من قيمة قريب، إحنا دلوقت إيه ألفين وانتين؟ قابلت «جنفياف» في جمعية الكاتبات وسلمت عليّ بحرارة شديدة، وانا باسلم بحرارة برّضه، طب اعمل إيه؟ عمرنا ما اتكلما على الموقف اللي حصل بينا في السجن وإنها رفضت تتعامل معايا :

- لازم تيجي نادي السينما اللي رئيسه أحمد الحضري، 36 شارع شريف تاني دور .

أنا أعرف أحمد الحضري من زمان من أيام ما سعد كان بيشتغل في الثقافة الجماهيرية .

- يا نايلة إوعي ما تحبش .

أول مرة تنادينني «نايلة»، يمكن أول مرة تكتشف إن اسمي أصبح نايلة؟ طبعًا يوم التلات جا وانا نسيت وكمان ما بقتش اتحرك كثير في الفترة الأخيرة، أنا سعيدة على أي حال إني افتكرت اسمها، أصلك ما تعرفيش الصدمة اللي حصلت لي لما خرجت من الزنزانة أول يوم في السجن ورحت لها علشان أكلّمها وتسببني اتكلم ما تردش عليّ، والسجانات يتفرجوا علينا ويضحكوا مع بعض. كان عندي 18 سنة، لو أقابلها المرّة الجاية لازم أفتح معاها الموضوع أشوفها فاكرة الموقف دا ولا إيه؟

مناقشات سياسية كثير بين «م.ش.م.» و«حدثو» بس أكثر من المناقشات السياسية كانت الخلافات بين المنظمات، وانا شايقة إن الخلافات والتوتر خسروا نوعية الحياة في السجن. تصوّرني إحنا مقبوض علينا على حساب السياسة والرأي، وزعلانين من بعض؟ أصل الخلافات كانت بتنتهي بزعل حقيقي كأننا أعداء. زي ما حكيت سعد بطرس وآمال عبد النور، كانوا ميالين لـ«م.ش.م.» وانا كنت «حدثو» لكن ما كناش مرتاحين لطريقة الخلاف الشديد وبقينا نتفاهم ونحاول نقل من الحدة ومن عنف الكلام والمشاعر، سعد بطرس كانت بتأيدني، ولما هي بتتكلم كانت بتعبر عن تفكيرني، بافتكرها بالخير، كان مقبوض عليها للمرة الأولى وحصل تعاطف كبير بيني وبينها. دا موقفي بشكل عفوي من طريقة الخلافات من ساعتها وفضل موقفي على طول في السجن لغاية ما خرجت، ولحد دلوقت، من أيام «جوليو لاوري» والطريقة اللي طردوه بيها من المنظمة بتهمة «الاتصالات الجانبية»، و«لي لي دايان» اللي «أوديت» طردتها و«جنفياف» اللي ما رضيتش تكلمني، وفيه كمان يوسف حلمي. يوسف حلمي كان سكرتير عام حركة «أنصار السلام» وخذ موقف مع قبول تقسيم فلسطين وهاجموه بشدة. كان رأيه دولة واحدة، لكن كان شايف إن تنتفذ قرارات الأمم المتحدة أولاً وبعد كذا نسعى لتكوين دولة واحدة فيدرالية من الفلسطينيين والإسرائيليين، بالذات بعد هزيمة الجيش المصري والعربي في 1948 وضعف الفلسطينيين في المنطقة بسبب الهزيمة. الإسرائيليين أظن أعلنوا دولتهم، انفردوا بالقرار دا على طول أول ما الجيوش المصرية والعربية هجمت. فمن وجهة نظره قرار الأمم المتحدة كان أحسن سياسيًا وأفضل الحلول لوقف النزيف. أنا دايمًا بانسى الأحداث والتواريخ بدقة، ارجعي بقى للتاريخ إنت والقضية الفلسطينية، إنت تعرفيها. اللي انا أعرفه كويس هو إن يوسف حلمي كان مع الطرف اللي بيقترح التعامل مع دولة إسرائيل والتخاطب مع الشعب الإسرائيلي. الطرف دا خد هجوم ما اقدرش أقول لك عليه من القطب الشيوعي الثاني، اللي رأيهم إنه لا نعترف بدولة إسرائيل، وقرار الأمم المتحدة يترفض. الشيوعيين اللي كانوا متفقين مع كلام يوسف حلمي ومن ضمنهم كمال عبد الحليم وإبراهيم عبد الحليم من «أنصار السلام» خدوا هجوم بالعمالة للصهيونية، وبالعمالة لليهود، وفيه تهمة اسمها «الوفاء لـ«هنري كوريل»»، «الjasوس» كانوا بيعتبروه أكبر جاسوس في الدنيا و عميل الصهيونية في مصر، يعني شتايم لا نهاية لها. عرفت بعد كذا إن يوسف حلمي قضى وقت وحش قوي سنة أو سنتين متعبين. أظن كمان اتحدت إقامته في البيت لمدة سنة من حكومة الثورة برضه من تحت راس الموقف. ولما خرجنا من السجن رحنا زرناه كان عيان قوي، جا له سرطان وفقد

حيويته ومات بعدها بفترة صغيرة. أنا مش عارفة لو كان عنده حِق في رأيه، لكن دي كانت العلاقة بين التنظيمات، اتهامات سياسية بالتخوين والعمالة عمَّال على بطل، بالذات «م.ش.م».

بالمقارنة مع خلافات الشيوعيين، علاقة أبويا وأمي بأبو وأم سعد كانت حميمة. أبويا وأمي كانوا ببيجوا أثناء الأسبوع يزوروني في الدقي وأنا كنت باقعد مع أمي ونانا نتكلم، قعدة ستاتي كدا، وأبويا مسك في لعب الشطرنج مع أبو سعد وحبوا بعض حب. جدو كامل كان متعود ينزل القهوة يلعب شطرنج، بطل يروح القهوة وبقى يكلم أبويا - ما كنش عندنا تلفون في أبو العلا - بس يسعى ويطلب إن أبويا يبجي يلعبوا شطرنج سوا، خدوا على بعض لدرجة كانوا بيزعلوا مع بعض ويتصالحوا على دور شطرنج. يلعبوا مدة طويلة، ساعتين تلاتة وأكثر ويبجي وقت عشا جدو ونانا تنادي :

- يلاً العشا .

وهو يرد :

- ما تز عجنيش .

نانا تشرح لي :

- أصله بيلعب الشطرنج .

عشنا في البيت دا مع أبو وأم سعد مدة طويلة، حوالي 16 سنة، من 1959 لما خرجنا من السجن لحد 1975 لما نانا ماتت، بيصلوا وبيصوموا بانتظام ولو فيه ضيوف بيجوا لهم، بيجوا بعد المغرب أو بعد العشا. عندهم نظام استمروا فيه، عمرهم ما طلبوا منا حاجة، منِّي أو من سعد. كنت باعرف شوية إنجليزي يعني بالذات مع سعد كان بالإنجليزي، شوية الكلمتين اللي قلناهم لبعض كفاية لمعرفتي بالإنجليزي، واستمريت أكلمه وأكتب له جوابات بالإنجليزي لما كنا في السجن لغاية بعد ما اتجوزنا وجينا نعيش هنا مع نانا وجدو اللي كانوا بيتكلموا عربي، بالذات نانا ما تعرفش إنجليزي. اتفقنا سعد وأنا نتكلم عربي أصل ما يصحش إن احنا نتكلم باللغة اللي هي ما تفهمهاش، وأنا «in the meantime» - في هذه الأثناء - كنت دخلت مرتين السجن، مش مرة واحدة، واتحسننت في العربي. أبويا ما كنش بيشرب، يمكن لو كاس واحد بالكثير، يعمل كاس زبيب ويحط حنة تلج ويتمزج في لعب الشطرنج مع جدو، في يوم قالوا له :

- على فكرة النهاردا مولد النبي .

وكان فيه حلويات وحاجات فرد بحماس :

- صحيح؟ ولا خدت بالي، كل سنة وانتو طيبين .

وخذ كاس الزبيب بتاعه :

- طيب يبقى نشرب الكاس في صحة النبي .

ضحكوا ضحك، ما ز علوش، خدوها إنه غشيم، وأمي أكثر منه في الحاجات دي. أنا ما كنتش في الأوضة بس سعد جه يحكي لي وهو بيضحك، ونانا كمان، وفضلوا يحكوها القصة دي ويضحكوا عليها. أمي كانت بنتكلم مع نانا عن الطبخ والحلويات واتعلمت من نانا تطبخ الخبيزة، ما كانتش تعرفها، ونانا اتعلمت من أمي كيكة البلح، وانبسبت منها وسمتها «كيكة أم ماري». الحالة بينهم كانت كويسة، العلاقة كانت مثالية، ما كنتش واخدة بالي إنها حاجة نادرة وإن نانا وجدو عندهم تسامح ووسع فكر، ناس تانية مش أكيد يستقبلوا العلاقة دي بنفس الطريقة، وأمي وأبويأ كذلك. نانا وجدو بيصلوا بانتظام والحقيقة كانوا متعودين مع سعد إن من صغره مش ملتزم، مش بيصلي وهما استقروا إنه ما بيعملش أي حاجة صح من وجهة نظرهم في موضوع الدين، وفتحي رضوان كتب فقرة لطيفة عن سعد وتمردّه في واحد من كتبه. من ناحيتي ما كانش عندي فكرة، وحصل إني صُمت رمضان مرة واحدة وما كررتهاش السنة اللي بعدها علشان جالي صداع ونانا حبيبتني كانت بتقول :

- أصلك ما اتعودتيش من وانت صغيرة، إحنا متعودين نبتدي نصوم شوية بشوية واحنا أطفال، فالجسم يتعود .

تفسير إنساني كويس. باقول دا علشان أنا ما حسنتش بين العيلة وأصدقاء العيلة وقرابيهم بحاجة، ولا في الفيوم، بالعكس حسسوني إني مش غريبة وانهم تقبلوني، ولما كنت باغلط، كانوا بيضحكوا، «الخواجاية»، بطيبة ولطف وكانوا بيسألوني عن عوايدي وباسألهم عن عوايدهم. مها بنت جمال أخو سعد زي بنتي، كانت بتيجي لي كتير وخدنا على بعض، واتمرنت فيها على تربية العيال قبل ما أخلفك، ولما كبرت دخلت فنون جميلة قسم نحت، وكانت حميمة قوي معايا تيجي لي بعد الكلية تحكي لي وتستشيرني زي بنتي أو أختي الصغيرة .

لما خرجنا من السجن في 1959 حد قال لنا :

- تعالوا نقضي راس السنة عند مارسيل نصيري وميشيل كامل .

فبابا قال :

- أه، بس احنا مش معزومين .

- ما حدش معزوم، كل الشيوخ عيين كل سنة بيروحوا يحتفلوا عندهم، مراته بتعمل عزومة كبيرة .

قررنا نروح أنا وسعد، لبسنا ونزلنا ورحنا. مارسيل عندها بيت في الزمالك جميل بأوض واسعة كثيرة، هي سابت البيت من مدة، لكن البيت لسه موجود وحاورّي لك بلكونتها. لقينا الباب مفتوح وفيه ناس على باسطة السلم من كتر الناس. كان فيه سفرجية رايعين جايين، دورت على مارسيل لقيتها مشغولة تدير السفرة والطباخين. البيت مليون مليون لدرجة إن ما تقدر يش تقوتي، تفضلي

مركونة في زاوية، يا قاعدة يا واقفة ما تقدريش تغيري مكانك من كتر الناس بس مش فاكرة ان قابلت حد أعرفه كويس أو مهتمة به. ميشيل كامل جوز مارسيل من قادة فصيل من الشيوعيين وكثير منهم دلوقت في حزب «التجمع» وجريدة «الأهالي». ما كنتش واخدة بالي إن أعدادهم كبيرة أنا حسيت يومها إنهم أغلبية واحنا أقلية، كل دول شيوعيين أهه وأنا ما اعرفهمش . الساعة 12 فتحوا السفارة، كان فيه طبق طويل بسمكاية كبيرة جدًا متغطية بالمايونيز، أنا قلت في نفسي لو أبويا، كان زخرف المايونيز دي، ما كنتش سابها كدا، دُقتها فوجئت ان السمكة مفصصة، شايلين الجلد والشوك والراس محطوطة زينة والمايونيز مش حلوة زي بتاعة أبويا. أكل حلو بس مش مريح، ناس كثير وما اعرفهمش فحكاية مش ممتعة ما رضيتش اروح تاني لمارسيل في راس السنة . لكن كنت باشوفها في اجتماعات مع ميشيل كامل في حواديت الوحدة بين المنظمات، كنت باروح مع سعد هو وميشيل يتناقشوا وانا اقعده مع مارسيل، وبكدا عرفت قصة ابنها بيبو، عنده نوع من المشكلة الذهنية، مش دريان إيه خطر وإيه مش خطر، ممكن بكل بساطة ينط من درابزين البلكونة، وبتيجي له فترات هياج ولازم على طول تاخذ بالها منه. مارسيل كتبت لمعاهد في فرنسا للتأهيل وتحسين الوضع، وورّتني الأدوات اللي جابتها له، مكعبات وأوراق ورسومات تساعدته يتعلم الحروف والأرقام في البيت. أعجبت بمارسيل، عملت حتة مجهود مع بيبو، كانوا مرتبطين بالولد دا قوي مارسيل وميشيل، أظن الدكاترة قالوا لها مش ممكن تخلف تاني بسبب عيب في الدم .

لكن وجود مارسيل نصيري لغاية الوقت دا - في الستينات - في مصر وبالعلنية الكبيرة دي، يبقى لسه مفيش الحساسية بتاعة مين يهودي ومش يهودي، مين مسلم ومين مسيحي. هي يهودية وميشيل أعتقد مسيحي، أنا ما سألتش إيه الطريقة اللي اتجوزوا بيها، ما كنتش باهتم ساعتها بالتفاصيل دي ولا باخد بالي من الفروق في الأديان. في وقت ما سابوا مصر واستقروا في باريس، ما شفتهاش تاني إلا مرة في السبعينات جت زارتنا في كابينة ميامي في اسكندرية وكان معاها بيبو. ولكن لغاية 1967 ويمكن بعدها كمان ما كناش بنفكر في اليهود، كان فيه إسرائيل من ضمن الأعداء والقوى الاستعمارية .

ما حسنتش مثلاً في عيلة سعد ولا لحظة إنهم مش قابليني كمصرية ومسلمة في وسطهم، حقيقي ما حسنتش إن فيه أي نوع من التعصب. مرة فوزية مرات أحمد حمروش وإحنا قاعدين في الأوبرا ابتدت تحكي لي :

- أحسن أصدقاءنا وأحسن جيرانا كانوا يهود .

وقعدت تحكي لي عن مش عارفة مين ومش عارفة إيه، والعلاقة بين عيلتها وعيلتهم :

- هما مشيوا ولكن لغاية ما مشيوا عمرنا ما اتخانقنا، عمرنا ما زعلنا من بعض وكنا بنتبادل حاجة البيت نستلف ونعزم .

عايزة تقول مفيش تعصب، ففوجئت ليه هي بتحكي لي الحكاية؟ يظهر واخدة في الاعتبار إن أنا من أصل يهودي وأنا زي ما قلت الموضوع ما كناش واخد بُعد شخصي .

وقبلها في 1956 والعدوان الثلاثي، إحساس العداء كان ضد الأجانب عموماً مش ضد إسرائيل بس أو اليهود بالذات، ضد إسرائيل وفرنسا وانجلترا علشان الثلاثة هجموا علينا وانجلترا أكثر واحدة لأنها كانت محتلانا لغاية قريب. حصلت هوجة بمناسبة الحرب وانطردت فيها عدد من العائلات اليهودية، واتضح إن بعض الطباط شاركووا في الطرد واستولوا على شقق وأملاك المطرودين بأتمان رخيصة تعتبر ببلاش، يعني نوع من الاستيلاء والنهب، بس في نفس الوقت أنا ساعتها كنت في السجن، وما شفتش تعصب من إدارة السجن ولا المسجونات، كان اسمنا «شيوعية» وفينا عدد من اليهود بنكتب لعبد الناصر جوابات، وهو ما يعبرناش، عايزين نروح نحارب في القنال. وبعد ما خرجنا من السجن كان فيه مشاكل تانية كتيرة بالإضافة إلى إن انتو اتولدتوا وكنا مهتمين ناخذ بالننا منكوا ونكبركوا، والوضع دا استمر طول ما أبويا وأمي كانوا لسه هنا .

بعد 1967، ابتديت آخذ بالي من الدعاية في إيطاليا، بلاش أقول يهودية حاقول إسرائيلية، كانت دعاية كبيرة . إحنا هنا في مصر كنا معلنين كدولة مصرية مقاطعة دولة إسرائيل، فبنقرا جرابينا ونسمع أخبارنا ومفيش فرصة نتناقش ولا نتكلم مع أي حد. في إيطاليا ابتدوا يذيعوا أفلام عن اللي بيسموها الـ «shoa» ، مش عارفة جابوا منين الكلمة دي، أفلام بتحكى إن اليهود عانوا أيام الحرب - النازيين كانوا فظاع مع اليهود - وإن على مدى قرون طويلة اليهود عاشوا في «جيتوهات» معزولين في أحياء. وحكومات بولندا وروسيا والنمسا وبلاد أوروبية تانية ساهموا في اضطهاد اليهود، لأنهم يهود، ويهود كثير اضطروا يهربوا، مساكين. مسلسلات وأفلام وبرامج ما كانتش موجودة في 1964 لما سافرت أول مرة واتعرفنا على إيطاليا والعائلة. فوجئت إن أمي تأثرت، ومن وقت لوقت كانت بتقول لي «اتفرجت على الفيلم الفلاني، مساكين اليهود حصل لهم كذا وكذا» مش أبويا اللي بيفتح الموضوع، أمي هي اللي بتتكلم على سجيته :

- شوفي حصل لهم إيه؟ ودلوقت العرب عاوزين يقتلوهم .

والله كانت بتقول لي كذا بالظبط، أنا ما كنتش بارضى اسمع كثير، موقفي واضح مع القضية العربية، ما باقولش «لا ماحصلش» ولكن باقول :

- اللي حصل لهم في الحرب ما يديهش حق يروحوا ياخدوا بلد مش بلدهم .

- يروحوا فين؟ هما أصلاً من هناك .

- مش صحيح أصلاً من هناك، ولو صحيح، العرب موجودين وغلط اليهود يطردهم ويقتلوهم .

المناقشات دي كانت صغيرة مش كبيرة، نقعد على ترابيزة السفارة نشرب قهوة وهي عاوزة تعرف أنا حاقول لها إيه، عندها الخصلة دي، تجر شكل عايزة تفهم، بس أنا ما كنتش بادبها مجال للمناقشة، كنت باقاطع أمي. دا غير إن ما كانش عندي الإحساس ولا واخدة بالي إن أبويا نفسه يهودي، كنت اسقط الموضوع دا كله من ذهني، أبويا كان بيسمع المناقشات دي من غير ما يتدخل .



هنا المجتمع كان بيتغير كمان، فوق الفاترينة فيه تمثال لو احدة ست نايمة عريانة، التمثال دا بتاع حماتي، نانا منيرة أم سعد من يوم ما اتجوزت وعملوا عفش البيت والصالون، دايمًا محطوط في حنة ظاهرة. نانا ما كانتش بتخبّيه بالعكس، قطعة فنية للديكور، تمثال حلو زينة بتحطه في الوش على الفاترينة أو البوفيه مكان الفازة الخضرا . مع مرور الزمن حبة بحبة ابتديت أحس إن اللي ببيجوا ينضفوا بيزقوها ورا، أو يحطوا قماشة عليها. انتهى الأمر إن حتلاقيها دلوقت مستخبية ورا

حاجات تانية. حنخليها طبعًا الست العريانة دي، أنا مش حاشيلها، ولكن بالنسبة للي بينضف أصبحت غير لائقة، بقت تعمل ارتباك. حاجة ما كانتش موجودة أيام نانا وجدو .

كل حاجة يمكن بتروح وتيجي، ويمكن أهم حاجة تهمني دلوقت في قلبي هي رأي نبيل، حفيدي، لما يكبر، في نونته دي، جدته، اللي هي أنا، سيكون أثره ايه لما يعرف في يوم من الأيام ويكبر إن نونته - وأنا باحبه قوي وهو بيحبني - لها علاقة بالشعب دا اللي بقينا نكرهه بسبب الممارسات اللي بيعملوها . قلت يمكن يبقى كويس إن اسيب له الأحداث زي ما حصلت لي، أسجلها. زمان لما كنت بافكر اكتب مذكراتي أو «السيرة الذاتية» زي ما بتسموها، كنت بالاقى حاجات طريفة بس ما كنتش بالاقى حاجات مهمة، علشان عادة الواحد لما يكتب السيرة الذاتية لازم يكون أنجز حاجة. أنا اتصرفت في حياتي، دخلت في موضوعات وخرجت من موضوعات ولكن في نهاية الأمر مش شايعة التصرفات والأنشطة دي كانت مفيدة لأي حد. يمكن أهم حاجة عملتها إن حتى لو دخلت في سلك غلط وسكك مش غلط في النهاية اتصرفت دايماً بإخلاص شديد، باواجه نفسي واللي باشوفه لازم يتعمل عملته من غير ما أفكر حيجري لي ايه، ما كنتش حذرة. أعتقد كنت عفوية، رجعت اعمل اللي شافاه صح، كل مرة. تصرفاتي كان فيها «passion» - عاطفة - مفيش برودة أو قلة اهتمام . نبيل سيكون عنده صدمة إن نونته دي اللي بتعني له بالطلياني وعاوزه دايماً توديه إيطاليا قوي قوي لما يعرف إن «أصول عائلتها يهودي، واليهود دول يستحقوا الكره » ، لكن أنا اللي عملته ما يستحقش إن يكرهني، بس هو دا الموضوع. فبدل ما يتصور حاجات أو يتقال له حاجات عني وما يعرفش يعمل بيها ايه، قلت مفيش مانع أحكي له كل حاجة. معنديش مانع إن نبيل لما أنا مش حاكون موجودة، لما هو يكبر يعمل الفانتازي بتاعته أو خياله بس أكون حكيت له اللي أقدر عليه .

أنا حاتوقف شوية عند أصل العائلات اللي أنا جاية منها، بالاقى ان كان فيه حركة كبيرة في العالم، مش بس في عيلة أبويا ولكن في عيلة أمي وحتى في عيلة سعد. إنت مرة كدا قلت «nonna» جت مصر علشان الحب»، لكن الواحد لو يدقق يلاقي إن مش بس علشان الحب. احنا بقينا دلوقت خلاص سنة ألفين، أنا باتكلم عن أواخر 1800 وبداية 1900 بما فيها الحرب العالمية الأولى سنة 1914. الحرب العالمية الأولى كانت حاجة جديدة نسبياً، سموها «عالمية» علشان الحرب ما كانتش عالمية قبل كدا، أول مرة بلاد كثيرة تدخل في الموضوع، ويمكن دي كانت من بدايات الـ «Globalisation» - العولمة - اللي احنا غرقانين فيها دلوقت. عيلة أبويا القصة اللي نعرفها ابتدت في «أوديسا»، ما نعرفش قبل «أوديسا» العيلة كانت فين، ونعرف إن على مدى التاريخ فيه حركة لليهود بعضها بسبب الاضطهاد، بس مش كلها بسبب الاضطهاد، جدي مثلاً ساب «أوديسا» بطوله ولأسباب شخصية، وفي اسطمبول اتجوز ساره التركية، وساره نفسها واضح من عائلة هربت من اسبانيا إلى تركيا في القرون الوسطى بسبب الاضطهاد. جم مصر، ليه جم مصر؟ أبويا نقلاً عن جدي، ناس كثيرة كانت بتيجي مصر في الوقت دا، مصر كانت بلد الـ «Cuccagnia» - كلمة طلياني معناها الخير الكثير. كان فيه موجة هجرة لمصر، وناس كثيرة ببيجوا علشان فيها شغل وممكن يعيشوا أحسن هنا. أنا باتساءل هل دا لأن ما كانش فيه حروب في مصر في الوقت دا؟ دا تفسيرى أنا .

تفسيرى جاي من كلام فتحي رضوان من بقة عن عيلته: أختين جم من القوقاز إلى مصر، بنات صغيرين عمرهم عشر سنين، كان في حروب مستمرة بين قبائل وجنسيات وأديان مختلفة ويمكن بالذات بين روسيا وتركيا، بين القيصر والسلطان. الجد الأبخازي لسعد حط بناته الصغيرين على حمار وهرّبهم هم وأمههم وبعث معاهم خال وخدام و3 حمير وقال :

- هنا مفيش أمان، روحوا مصر لبيت حمدي في الزقازيق قولوا له على اسمي وهو حيساعدكم .

الخال سابههم في نص السكة ورجع يحارب، والأم ماتت في الطريق، وبالطريقة دي وصلوا مصر على حمار بمساعدة الخادم، دوّروا على الناس اللي أبوهم قال عليهم والناس دي تبنوهم وسموهم صفية وحفيظة، كان فيه عائلة قاسم بيتجوزوا من عائلة حمدي على طول وجوزوا البنات. أم سعد حماتي نانا منيرة وخال سعد فتحي رضوان وبقية العيلة أحفاد بنت من البننتين دول. فتحي رضوان النهاردا أديب وسياسي كبير في مصر، الكلام اللي بيقوله إلى حدّ ما فيه أساس من العلم، حاول يسجل القصة زي ما سمعها مع شوية تحليل في مذكراته «خط العتبة» و«الخليج العاشق». فتحي رضوان اتولد في مصر ووصل لمنصب وزير في عدد من الوزارات يعني مكانة مرموقة حقيقي، ويحكى قصة أهله كدا «ما كانش فيه أمان في بلدهم فحطوا البنات على حمار وبعثهم على مصر»، هو دا أظن اللي بيقولوا عليه «يهربوا بجلدهم». دي كانت سمعة مصر - بلد الأمن والرخاء - في عين الجد الكبير لفتحي رضوان في «أبخازيا»، وفي عين موسى وساره جدودي في اسطمبول وبعد كدا بشوية في عينين «لياندرا» أمي في قرية «ريبا» في إيطاليا .



إحنا ما نعرفش قصص كثير عن جدو كامل، مش عارفة ليه، ما كانش مختلط مع عيلته، كمّل تعليمه وأصبح مدرس وبعدين ناظر وبعدين مفتش - كامل بك أحمد. أحلى ذكريات سعد وهم ساكنين في المدرسة لما كان أبوهم ناظر في المنيا. يمكن انت يا نادية لما تقضي شوية تبقي تحاولي تعرفي أكثر، إنت ابتديت من صغرك، قعدت تلعب في أدراج تسريحة نانا ولقيت رزمة جوابات من صديق جدو كامل، كان اسمه نوفل؟ ما عندناش جوابات جدو لكن عندنا الرد عليها. نوفل بيخطب عروسة لجدو وبنعرف ازاي اتقدم لنانا منيرة، كنز والله، قعدنا نقرأها ونفهمها وننخيلها، وسعد كتب عنها مقال في «الأخبار» يوصف تفتح أبوه والرغبة في التحرر. كان فخور إن جدو كامل اشترط ان العروسة «ضروري تكون متعلمة وضروري يزورها يشوفها وتشوفه قبل ما يتجوزوا»، مش عايز ست أمية ومش عايز يتجوز عمياني، ولو انا فاكرة كويس فعلاً راح زارهم وصديقه نصحه ياخذ معاه فاكهة هدية. الكلام دا حواليين ثورة 1919. جدو كامل عنده أحفاد كثير ما شاء الله، مها ومحمد ولميس وليلى وأحمد وحسام وعبير وانت ودينا، وولادهم، ممكن أي حد فيهم يعمل بحث عن عائلة جدو كامل، زي فتحي رضوان وبعديه قاسم مراد ما عمل عن حفيظة وصفية اللي جاينين من «أبخازيا»، بفضل قاسم مراد فهمنا بعض الصور اللي لقيناها في البيت هنا. اللي نعرفه إن جدو كامل اختلف مع أهله وهو شاب وساب بني سويف وراحوا الشواشنة في الفيوم. لما قرب من المعاش وهب نفسه للزراعة، باع أرض الـ30 فدان في الشواشنة واشترى العزبة 100 فدان في سيلا «أرض الشواشنة ماشية ومش طالبة مجهود، إنما أرض سيلا فيها جزء بور وممكن استصلاحها» كان عنده روح الاستصلاح وفي نفس الوقت يتملك ميت فدان مش ثلاثين. جاب معاه عم رياض و2 فلاحين من الشواشنة لسيلا وفي سيلا انضم له خليل. عم رياض وعم عبد الله وعشري وخليل، الجيل الأول اللي ابتدى عزبة سيلا مع جدو وفضلوا فيها لغاية آخر عمرهم. جدو شغل رياض غفير وبقي عنده سلاح، بندقية مرخصة وبالطو كافي صوف يلبسه فوق الجلابية، له نظام يصحى بالليل من وقت لوقت، يلف ويدور حواليين العزبة بالبندقية ويتأكد إن كله مظبوط، على أساس ما تحصلش سرقة في الجرن أو في كارة البهايم. كانوا بيحددوا إن عم رياض أصله من العرب، زي خليل، دايمًا يفرقوا كويس في الفلاحين ميين عرب وميين فلاح، عرب في الحالة دي تقريبًا معناها «بدو»، هل جم من زمان من الصحرا واستوطنوا في المنطقة يرعوا الغنم؟ فيه «عرب» كثير حواليين بني سويف وسيلا مش بعيدة عن بني سويف. أما عشري وعم عبد الله ففلاحين مش «عرب»، عم عبد الله مزارع عنده خبرة في كل المواسم ودورة المحاصيل والأرض والحرت والآفات والسبخ، وعشري متخصص في ري الأرض، يفتح المية على الأحواض بالترتيب والمية تتوزع مظبوط وكل حوض يستفيد أحسن استفادة. اكتشف تاني لي إن نصيب الأرض من مية الري بنتوزن بالوقت مش بالكمية، يعني ربع ساعة مية أو نص يوم أو يوم بحاله حسب مساحة الأرض، لما يبجي دورك تفتحي مية الترة على أرضك انت وشطارتك أثناء الوقت المخصص لك لو تعرفي توصلي كفاية لكل الأرض، فيها شيء من الهندسة وعشري كان مهندس ري بالخبرة، راجل خجول وما اتعرفتش على مراته وولاده، أصغر واحد في المجموعة اللي أسست العزبة مع جدو. خليل ما خلفش وعم رياض علم بناته زي ما حكيت، لكن الملاحظة إن جيل الولاد كله ساب الزراعة، ولاد العرب وولاد الفلاحين. حمدي أبو رياض اندروش وبني جامع قدام سور البيت في سيلا، صوته مش حلو أبدًا لكن يدن ضروري بالطريقة السئيلة بتاعة اليومين دول في المكرفون بعلو حسّه، ولما يتكلم ما بيتشمش وبيص الناحية الثانية ويلوي بوزه، وأحمد راح ليبيا ومصطفى اشتغل في التموين وعلي ابن زينب في المقاولات ورجب يشرف على الأرض لكن ما يزرعش

بنفسه وأشرف أبو حسين ومروان ووليد كلهم، يمكن مش فاضل في الأرض إلا رمضان أخوهم و غصب عنه .

أمي «لياندر» اتولدت في قرية «ريبا» في إيطاليا، وراحت المدرسة لغاية سنة تالته ابتدائي وسابت لأن كان لازم تشتغل في الفرن مع ابوها ومعندهاش صبر للمذاكرة، يا دوك اتعلمت الكتابة والقراية لكن العائلة كلها فضلت على اتصال عبر السنين بفضل جواباتها الفيأضة. كتبت جوابات كثير طول حياتها فيها قصصها وقصص عائلتها وقصص أبويا وعيلته تسمعها وتحكيها في الجوابات. بافتكر أمي «صوت وصورة» وهي بتحكي لي عن أصل عيلتها وهي حكتها مش مرة واحدة، لا، مبيت مرة، وأنا كنت باسمعها كل مرة. الأسطورة بتقول إن «كليتيو كارداريلي» كان ابن راجل غني عنده علبة خشب جميلة «piena di scodi d'oro» - مليانة فلوس ذهب عليها صورة نابليون. العلبة دي جواها أوراق ملكية أرض ومزارع كروم حوالين القرية. أبو «كليتيو» مات قبل ما «كليتيو» يبلغ سن الرشد ويقدر يورث أملاك ابوه، أم «كليتيو» خافت من الحرامية وراحت لقسيس الكنيسة شالت عنده أوراق الملكية والفلوس الذهب، ووصته يدي العلبة لابنها لما يكبر. «كليتيو» راح يحارب، رجع من الحرب لقي أمه ماتت فراح عند القسيس .

- إديني أملاكي .

- أنا ما اخدتش حاجة من أمك، عندك إثبات؟

كان قسيس الكنيسة اللي بيصلوا فيها، يعرفوه ويعرفهم، شخص مضمون يشيلوا عنده أمانة، ما كانش فيه بنوك مثلاً. أهل «ريبا» مؤمنين وكلهم متدينين والقساوسة عندهم نفوذ كبير على الناس و«ريبا» كانت من القرى المساندة للفاتيكان ضد الملك وضد «جاريبالدي»، و«كليتيو» من «القمصان الحمر» بيتقال عليه «جاريبالدينو»، فمسألة إن القسيس أنكر انه خد الأوراق والفلوس من أمه ممكن له علاقة إن القسيس بيعتبره اشتراكي ضد الكنيسة. جيش «جاريبالدي» كان له ميول اشتراكية، بمعنى جيش شعبي كله فلاحين بينضموا له باختيارهم ومش تابع لإمارة أو للبابا أو لإمبراطور. ما اعتقدش كان فيه حزب اشتراكي لسه، مجرد إن «جاريبالدي» مستقل بالجيش بتاعه مش بيطيع حد. على أي حال أمي بتؤكد إن «كليتيو» كان راجل مؤمن ومواظب على الكنيسة لغاية اليوم اللي القسيس خان الأمانة، من يومها بعد عن الكنيسة وقرر مش حيدخلها تاني ولا حتى علشان يصلي يوم الحد .

وبكدا «كليتيو» لقي نفسه من غير فلوس، كان اكتسب مهنة الفرن في الجيش ففكر يشتغل فران، وراح خطب شابة اسمها «فيتوريا» من عيلة متوسطة. العادة عند الطلاينة إن الأب يحوش مهر فلوس ذهب أو أرض ولما بنته تيجي تتجوز تدّي مهر هدية لجوزها. «كليتيو» أخذ المهر وبنى به فرن يخبز فيه عيش، وجابوا 3 أولاد: «جوردانو» و«نينو» و«أوليفو»، و3 بنات: «ألبينا» و«جيجيتا» و«لياندر» - «لياندر» الصغيرة هي أمي واتولدت سنة 1902. «كليتيو» كان شخص ظريف وشكله جميل وبيحب الحياة الحلوة، و«فيتوريا» أمها ست مؤمنة قريية من الكنيسة وحساسة في موضوع الأديان. «كليتيو» بيروح الكانتين - بار قروي بسيط الرجالة تروح تشرب فيه نبيت بعد الشغل، تعبان وجسمه سخن من الفرن وفي الكانتين فيه الـ «prostitutes» - بائعات الهوى - بتوع

البلد، وجدّتي تغيّر وتتخاّنق معاه. الخناق اليومي أصبح عادة استمرت وبقت أوحش وأوحش مع الوقت، يرجع البيت نص سكران و«فيتوريا» مش قادرة تمسك نفسها وينتهي الأمر إنه يضربها وهي تعيظ وتصرخ، والعيال مش قادرين يتدخلوا لأن «كليتو» أصبح معندوش مانع يضرب ولاده كمان وهو سكران، اتعودوا يسكتوا ويستنوا خايفين. أمي بتحكي إن جدتي عمرها ما قدرت تسكت ولا تقبل الوضع دا أبدًا .

طفولتها كانت مليانة شغل وفقر، بالرغم من كدا ذكريات أمي الريفية مبهجة، بتموت في البيض النّي، تصحى الصبح بدري تتسحب لعشة الفراخ وتخرم القشرة وتشفطها، تسرق بيضتين ثلاثة أربعة لأن في موسم البيض ما حدش بياخد باله. وفي موسم البرتقان أمها تشتري برتقانة واحدة بالعدد لكل عيّل، توكلهم البرتقانة بقشرتها ومعها حنة عيش وقيراطين نبيت، فطار الصبح على الريق يديهم في برد الشتا ويفوقهم ويديهم انتعاشة تحضّرم للشغل. أمي كانت بتحن للفتار دا في مصر، ولما ينزل البرتقان البلدي اللي بدمه كانت تقطم البرتقانة من غير ما تقشرها وتقول لي «حلوة، دوقي، دوقي». في موسم الطماطم أمها تجيب العيش البابت وتحط عليه قوطة تتبله ملح وفلفل وزيت زيتون ونقطة خل وتديه للعيال تصبيرة أثناء النهار، الضهر «كليتو» يسيب الفرن يخطف نص ساعة يبجي ياكل لقمة خفيفة زي دي في البيت، بتشوفيني لغاية دلوقت من وقت لوقت أكل العيش البلدي القديم بطريقة أمي. اقتصاديًا الحالة كانت وحشة، أيام صعبة، مش مرتاحين، إيطاليا كلها كانت في فقر كبير نتيجة الحروب المتوالية، وعلشان كدا جدّي «كليتو» ربّي أرانب، يذبهم ويطبّخهم في الفرن عنده، علشان كدا جدّتي «فيتوريا» ما كانت بتطيق تاكل أرنب، بتقول بيّفكرها بالعيّل اللي لسه مولود وما تاكّش منه أبدًا، واضح إن جدتي كانت من عيلة «refined» - راقية شوية - ويمكن دا السبب إنها كانت بترفض تاكل الأرانب باعتبارها لحمة فقرا. كانوا بياكلوا «بولنتا» كثير، أرخص حتى من المكرونة. بعد الشغل «كليتو» يعمل حلة «بولنتا» كبيرة ويصبّها على خشب التراييزة وبمعلقة خشب يفردها والأم تكون عملت صلصة الطماطم، تصبّها في وسط «البولنتا» ويقعدوا دايرن دايرن التراييزة ياخدوا الصلصة بالمعلقة من النص يخلطوها بـ«البولنتا» على الخشب مباشرة وياكلوا. أمي بتحكي لي وانا باتخيل المنظر دا وانا صغيرة، كانت صورة غريبة وكان نفسي أكل معاهم .

ما كانش فيه مواسير مية، المية توصل البيوت في قنوات مكشوفة، يصحوا يلاقوا المية اتجمدت في الشتا، يولعوا وابور زي وابور السبّاكين ويسيحوا المية علشان تنزل في الحنفية ويعرفوا يحضّروا عجين للفرن. مفيش مجاري، الصرف بير تحت البيت، زي غرف التقطيش في سيلا عندنا في الفيوم، كل كام شهر البلدية تبعت رجالة يفتحوا البير يكسحوا وينضفوا، والروايح فظيعة والعيال يطفشوا من البيت طول اليوم .

جدي كان بيسمي أمي «l'asino della familia» - حمار الأسرة - كانت حمار شغل، كان عندهم قيزان كبير والعجينة ثقيلة أمي تدخل دراعاتها لغاية فوق الكوع وتشيل العجين وتقلبه وتشيله وترجعه، ولازم تعجن مدة طويلة، هي الوحيدة في اخواتها صبيان وبنات اللي كان عندها القدرة تستحمل الشغلانة دي. لما العيش يستوي تخرج هي واخوها «جوردانو» بالعيش على راسهم الصبح بدري في عز الشتا يوزعوه على البيوت والأرض عليها طبقة جليد من الندى، والشوارع

طالعة نازلة فتتزلزل وتقع وتهب على ضهرها وتقوم تلم العيش. أخوها كان مهرج يقول نكت على طول ويقلد أهل البلد، وهي كانت سريعة الضحك فكان كله مرح في مرح كانت بتحبّه قوي .

في الصيف العيال يروحوا البحر مع بعض يوم، ينزلوا من الجبل ويقضوا النهار على الشاطئ ويرجعوا. ما كانش فيه عربيات و«ريبا» قرية فوق الجبل، ينزلوا ازاي من على الجبل؟ مشروع كبير بالكارتة اللي بيجرها حصان، واحد عنده كارتة وشغلته يطلع وينزل الناس والبضائع من وإلى القرية. الفجر يركبوا الكارتة وتنزل بيهم والطريق كان بياخد ساعات نزول من «ريبا» إلى «جروتاماري»، عقبال ما يوصلوا تكون الشمس طلعت. يجروا على الرمل من غير شماسي ومن غير كراسي يخشوا في البحر بهدومهم مفيش مايوهاات. ما كانش بيروح معاهم أهل، سواق الكارتة هو المسؤول عن «مشروع البحر» الموسمي لأطفال «ريبا» ومعاهم عيش وفاكهة. تصوري لو بياخد ساعتين تلاتة علشان ينزلوا بالكارتة، يبقى مشوار الطلوع كام ساعة؟ بعد يوم في الشمس والبحر يرجعوا البيت مدغدغين ميّتين من التعب والجوع، أمهم توكلهم مكرونة بالصلصة وتيمهم وتفكرهم «بكره شغل». يوم شم النسيم هنا، مرة في السنة الكارتات من الصبح بدري تطلع بالأولاد والبنات راكبين دايرن داير ومدلدين رجليهم والسنتات قاعدين في الوسط متربعين بيغنوا ويطلبوا ويرقصوا، يفوتوا تحت بيتنا في شارع نعيم في أبو العلا وأمي تطلع تنفرج عليهم من البلكونة وتفتكر رحلة البحر في «ريبا».



«كليتو» الأب انضم للجيش الإيطالي ثاني لما قامت الحرب العالمية الأولى، خدّوه لخبرته كعسكري قديم، «لياندر» كان عندها 12 سنة واشتغلت هي وامها واخواتها في الفرن يخبزوا في غيابه، كله

صعب وأصعب أيام الحرب. شباب القرية رجع من الجبهة جايب أغاني جديدة اتعلموها من بعض، لا كان في راديو ولا تلفزيون والأغاني كانت بتنتقل عن طريق السفر. يجتمعوا في الميدان تحت الشباييك ويغنوا «serenata» - نوع من الغزل للبنات اللي عايشين جوه البيوت. واحد من الشباب دول حط عينه على «لياندر» وهي بتوزع العيش وابتدى يغني لها، والمفروض هي ما تردش عليه، بنت مؤدبة ما بتردش عالولاد، بس أعجبت بيه. قال لها عاوز يتجوزها وجه يطلبها من البيت، أبوها رفض رفض بات «سُمعته مش كويسة، عنده علاقات بسينات سمعتهم وحشة، جت له أمراض تناسلية أثناء الحرب». «لياندر» ما رضيتش تصدق وافكرته مش عاوزها تتجوز علشان محتاجها في الفرن، فاستمرت في العلاقة من ورا ضهر أمها وأبوها. الولد يغني لها تحت الشبايك وأمها تقفها وتقول لابوها وابوها يضربها علقة سخنة وهي تعترض :

- أنا عندي أكثر من 21 سنة واقدر أعمل زي ما أنا عاوزة .

اتفق الولد مع «لياندر» يهربوا يروحوا مصر مع بعض وقالت لابوها وامها :

- إن كنتم عاوزيني أسيب الولد دا وما اتجوزوش ابعطوني عند خالتي اللي في مصر .

في مصر كان فيه قريبتهم أو بلدياتهم، هاجرت هي وجوزها عايشين في القاهرة، وفعلاً «كليتو» و «فيتوريا» كتبوا للخالة جواب وبعد شهر وصل الرد «أه مستعدة أستقبل «لياندر»، فيه مكان عندنا في البيت وأنا حاخذ بالي منها، ابعطوها». الناس اللي بيوصلوا مصر من إيطاليا بيقدوا مع حد بلدياتهم لغاية ما يلاقوا لهم شغل ويسكنوهم. «كليتو» كان حزين وهو بيودع بنته بيقول «بافقد أحسن ولادي في شغل الفرن».

لكن «لياندر» سافرت سعيدة. وصلوها المحطة وحطوا في إيدها اللي فاضل معاهم بعد ما اشتروا لها تذكرة القطر والباخرة وقالوا لها لما توصلي إدي الفلوس دي للخالة، ركبوها القطر اللي رايح «باري» وسلموا عليها وعطوا، أمي فضلت للأخر تحكي لي الحكاية دي لأنها ما شافتهمش تاني، لما زارت إيطاليا بعد عشرين ثلاثين سنة أبوها وأمها كانوا ماتوا. ما تعبتش في مصر لكن ندمت على الحزن اللي سببته لأمها ولأبوها، ما كانوش عايزينها تمشي، وهي كانت عاوزة تشوف بلاد جديدة وتتجوز وكانت بتحب الشاب دا، تحكي لي وتكرر لي آخر منظر: أهلها على رصيف المحطة وهي جوه القطر بتبعد .

وصلت «باري» وقابلت الشاب وركبوا المركب مع بعض، لأول مرة تكون لوحدها، أول مرة تخرج بره «ريبا»، مستقلة ومليانة حماس وحتتصر وحتتصري الدنيا كلها مع إن معاهها فلوس قليلة. من أول ليلة على المركب لاحظت إن حبيبها بيلف ويدور مع الستات التانيين، سكتت اليومين تلاتة اللي كان لازم تستحملهم في البحر، لكن قررت بينها وبين نفسها إن مش حتشوف وشه تاني. ما رضيتش حتى تسلّم على الولد دا ولا تعاتبه ولا حاجة خالص وفي الطريق من اسكندرية إلى مصر، قصدي أقول القاهرة، اعترفت للخالة بالحقيقة :

- لكن الشخص دا أنا مش عايزة اشوف وشه تاني .

الولد فضل يلف ويدور لغاية ما عرف طريقها وراح لها بيت الخالة يترجى ويقول أنا ما عملتش حاجة وانا عاوز اتجوزها ويعيط، لكن الخالة فضلت تكرر :

- مفيش حد بالاسم دا، هي مش موجودة هنا .

جه ثلاث مرات وبعد كدا اختفى وانتهى أمره على كدا .

يظهر إن رحلة المركب وهواء البحر فتح نفس «لياندر» على الأكل وجالها «boulimie» - تاكل وما يكفيهاش - الصبح الخالة تجيب لها رغيف فينو بحاله وكباية لبن، و«لياندر» تسأسأ العيش وتشرب اللبن كله ولسه عاوزة كمان «ياكل بشرهة كل شيء وأي شيء وما باشبعش» فبعد أسبوع أو عشر أيام الخالة بصت لها كدا وهي بتاكل وقالت :

- أظن لازم نلاقي لك شغل .

باتصورّ أمي شابة ولسه واصلة بلد جديد، صغيرة ومليانة حيوية جاية من قرية جَوْها نضيف ومتعودة على الشغل الكثير صحتها كويسة، مش ممكن تقعد من غير ما تعمل حاجة. الخالة دخلتها عند أسرة كمربية لبنت صغيرة اسمها «جينيت» ، عيلة ساكنة في واحدة من العمارات اللي على اليمين في نهاية ميدان باب اللوق وانبت جاية من ميدان التحرير ، عمارتين ثلاثة في حدود خمس إدوار بأسانسير ، عمارات كويسة. أبو «جينيت» كان رئيس قسم في محلات «شملا»، أغنياء مبسوطين، بيتهم حلو مليون أوض ومليان عفش، عندهم سفرجي يخدم على السفرة وطباخ يطبخ في المطبخ، و«لياندر» بقت الدادة . أم «جينيت» لقت «لياندر» اسم طويل وسمتها «ليا» كاختصار، وسكنتها عندهم. أمي كان عندها يوم واحد في الأسبوع أجازة تروح تزور الخالة. «جينيت» الصغيرة معندهاش شهية و«لياندر» تقننت علشان توكلها، عملت لها الـ «zabaione» - بيض مربوب بالسكر - وجبة مغذية تعرفها من أمها في شتا «ريبا»، تفصل صفارين بيضة في فنجان صيني تحط عليه ثلاث اربع معالق سكر سنترفيش، وبالمعلقة الصغيرة ترُب ترُب ترُب، السكر يسبح والبيض يسخن وينفش ويتملي هوا ويصبح كريمة مسكرة ومغذية ومقوية. «لياندر» تمثل لها وتحكي لها حكايات وتغني لها وترقص لها وتعمل لها أراجوز لحد ما البنت تبص لفوق وبقها يفتح وهوب تحط لها معلقة الأكل في بقها. ما تعرفش أي لغة غير الطلياني فكانت بتتكلم طلياني فرنساوي مع أم «جينيت» «أشيل الحرف الأخير في الكلمة الطلياني فتبقى فرنساوي وخلاص» الباب بالطلياني «la porta» تقولها «la porte» ، لكن مش كل الكلمات الطلياني تشيلي الحرف الأخير تبقى فرنساوي، المقشة بالطلياني «la scopa» وبلغة «لياندر» تبقى «la scope» لكن ملهاش معنى بالفرنساوي، الروح الحلوة دي خلّت أم «جينيت» في غاية السعادة. حالتها استقرت شوية وابتدت تاخذ على البلد، واتفقت مع واحد يبجي بعربية حنطور كل يوم الصبح ياخدها هي و«جينيت» من شارع المدابغ اللي هو شارع شريف دلوقت على شارع فؤاد لحد جنينة الأزبكية. جنينة الأزبكية ساعتها كانت أكبر من دلوقت ثلاث اربع مرات، مليانة أشجار ومساحات كبيرة وأحواض زهور معتنى بها، وفي وسط الجنينة كان في كشك حديد بيسمّوه كشك المزیکا لأن يوم جمعة الساعة 10 الصبح فرقة موسيقى البوليس بتقدم فيه عرض. فرقة البوليس المصرية كانت

فرقة على مستوى بنشترك كل سنة في مهرجان «باري» الدولي لموسيقى فرق البوليس وحصلت على الجائزة الأولى عدد من المرات .

«لياندر» ما كانتش الدادة الوحيدة اللي بتيجي تفسح الأطفال في جنبنة الأزيكية، كان فيه مجموعة مربيات ببيجوا بالعيال و عملت أصحاب، يحكوا لبعض عن أحوالهم، ما يزهقوش والعيال تلعب ساعتين أو ثلاثة، ويروحو البيت يتغذوا. دادة منهم جاية مصر هربانة مع أهلها من منطقة أرمينيا في تركيا، وحكت لـ «لياندر» ازاي الأتر ك خشوا بيوتهم موّوا الناس عواجيز وصغيرين وستات، يدوروا على الستات حوامل يقتلوهم من بطنهم علشان يموتوا الأم والجنين. يفصلوا الرؤوس ويقطعوا صدور الستات، نوع من التنظيف العرقي زي ما بيسموه، فظائع ممكن كان فيه شيء من المبالغة أو ممكن مفيش مبالغة، لأن الدادة الأرمينية دي شافت بعينها المجازر هي وعيلتها. المربيات دول كانوا شابات في سن أمي في العشرينات فعلى طول تبتدي تجارب البنات ومحاولات الجواز والارتباط .

*

«إيليا» أبويا اتولد في القاهرة سنة 1909 ، أعتقد في منطقة حارة اليهود، مكتوب في شهادة ميلاده محل الميلاد: درب الجديد. ما كانش عنده القدرة على حكي الحواديت زي أمي، ولا بالصوت ولا بالكتابة، لكن كان بيحب الحواديت برضه: أبوه، يعني جدّي «موسى روزنتال» اتولد في «أوديسا» ابن خياط، واضح مستريح نسبياً لأنه فاتح بيته بنسيون أو لوكاندة، أمه ماتت لما كان عنده ثلاث سنين، مرات أبوه كانت وحشة معاه فلما وصل لسن 18 سنة وقدر يتخلص من البيئة الأسرية بتاعة مرات أبوه خد بعضه وهرب راح اسطمبول، أظن بالمركب، وهناك اتجوز واحدة اسمها ساره، يهودية تركية مستقرة ومقيمة هناك. موسى وساره جم القاهرة واستقروا فيها ومعاهم طفل عمره سننتين، عمّي «بنيامين»، الكلام دا في أوائل القرن حوالي 1900. موسى اشتغل قمصنجي، خد محل ترزي صغير في الموسكي في حارة اليهود وكان بيحصل جلايب افرنجي بيضة بالياقة والإسورة وزرار في الكمام زي القمصان الأفرنجي، الجلابية المصري الفلاحي عندنا مختلفة شوية، الكمام واسعة من تحت عند الإيديين وفيها حردة على الرقبة وشق من قدام علشان يوصلوا بأيديهم لجيب داخلي في الصديري، بيسموها السيالة. موسى وساره ما كانوا أشغوا يا دويك على شغل موسى. أنا باستنتج من كلام أبويا إن موسى كان راجل طيب، اللي بيحكوه عليه يدل على إنه راجل بيعمل شغله ويكسب اللي يكسبه ويرجع البيت، بياكل عيلته وخلص، معندوش طموحات ولا يفكر في تسالي، وما عملش علاقات اجتماعية معينة .

أما «ساره روزنتال» مراته، جدّتي أم أبويا فشخصية خرافية شوية، عكس موسى، تحضر الجوازا والمآتم، حد يموت تلم من الناس لمساعدة الأسرة وتوفق جوازا وخشت في أحوال الحنة اللي عايشة فيها، وفي فترة قصيرة بقت زي شيخ حارة، مع إنهم لما جُم مصر ما كانوا يعرفوا حد خالص، هل كانت زي خاطبة مثلاً؟ ما اعرفش لو كانوا بيدوها هدايا نظير النشاطات دي. ساره اتأخذت بحب السينما اللي دخلت مصر في الوقت دا، كانت بتروح بانتظام تتفرج على القصص مع صاحبها «لوسي» الداية أو المولدة. باتصور إن ساره كانت أمية، مش بتقرا ومش بتكتب، ولسه الراديو مكانش ظهر، السينما دخلت مصر قبل الراديو، فكل ما بيجي فيلم جديد، السننتين دول - ساره

و«لوسي» - ياخذوا بعضهم ويروحوا السينما، واعتقد إن أبويا ورث حب السينما من أمه. ساره جابت خمس صبيان، أربعة منهم اتولدوا في مصر منهم أبويا اللي اتولد سنة 1909. صحيح موسى كان بيكسب على القد ولكن ساره اهتمت بتعليم الولاد الخمسة. علمت الولاد في مدرسة خيرية اسمها «La Goutte de Lait» - «نقطة اللبن». «نقطة اللبن» مؤسسة خيرية تابعة للجالية اليهودية، لها فروع في بلاد كثيرة في العالم وبتقدم خدمات لليهود اللي على قدهم، نوع من النشاط الخيري وسلطة للأغنياء. هنا في مصر كان فيه عائلات غنية من اليهود زي عائلات موصيري وقطاوي، قطاوي كان وزير في وزارة من وزارات السلطان، وفي فيلم يوسف شاهين «اسكندرية ليه؟» جه مشهد عنه والمسرحي المشهور «البية»، يوسف بك وهبي هو اللي مثل دور قطاوي باشا داخل العربية مع بنته وقال لها «أنا حاهاجر، حاروح جنوب أفريقيا ومن هناك حاروح أورشليم» وبنته - نجلاء فتحي - كانت بتحب شاب مصري تقدمي شيوعي - أحمد زكي - ردت على أبوها «أنا عاوزة أقعد هنا مش عاوزة أمشي من مصر» الحوار الدقيق ممكن نراجعه من الفيلم. كان فيه مستشفى يهودي مشهور بقى دلوقت مستشفى القوات المسلحة في غمرة، مين كان بيصرف على المستشفى دي؟ مؤسسة «نقطة اللبن» اللي بيمولها الأغنياء اليهود زي قطاوي، ومن ضمن المشاريع الخيرية عملوا «مدرسة نقطة اللبن» وكانت مجانية وبيأخذوا اليهود الفقرا من الروضة لغاية الابتدائي، ولاد ساره بما فيهم أبويا اتعلموا هناك ودرسوا بالفرنساوي .

ساره كانت بتحب أبويا وبتقول ««إيليا» دا أطيب ولادي» والحقيقة ان من صغره كان عنده ميول للتأمل وميول فنية. كان عايز يشتغل في حاجة فيها فن، رسم، موسيقى، حاجات من النوع دا فلما كبر شوية موسى أبوه قاله :

- أنا شايف إن طبعك مناسب للمهنة بنااعتنا، قمصنجي، إنت تنفع تقعد مدة طويلة على المكنة تفصل عندك الصبر .

فأبويا قال :

- لا أنا بالذات المهنة دي مش عاوز اشتغل فيها .

فاقترح عليه يتعلم كهربا. الكهربا كانت حاجة جديدة دخلت مع شركة «ماركوني» الانجليزية في بداية القرن، على اسم الرجل اللي اخترع الراديو والتلغراف. شغل الإضاءة في البيوت بيحتاج شيء من الحس الفني والذوق في وضع الأباجورات واللمض، «إيليا» قال لأبوه :

- أتعلم كهربا .



اشتغل صبي في محل كهربائي معرفة جدتي ساره. ما اكتفاه، أنا حكيت لك إن فيما بعد سجل نفسه في كورس لتعليم الكهرباء بالمراسلة من باريس، الكورسات كانت تجي له بالبوسة، يدرس ويحل التمرينات والمسائل ويعتقها بالبوسة لمدة سنتين وفي الآخر امتحن ونجح وخذ شهادة .

موسى التريزي عيي، اشتكى من صداع وطول الوقت تعبان، يقولوا جا له ورم في المخ، سرطان، ويمكن دا من الأسباب يا عيني إن بعد الشغل كان يبحب يقعد في البيت ويرتاح وما كانش عنده حيوية. ابتدى يهمل الدكان ويقعد في البيت ومات صغير نسبياً وكدا استقر الفقر في البيت. الولاد ابتدوا يشتغلوا يجيبوا قرشين، كل أول شهر يستلموا الماهية ويسلموها لساره وهي تديهم حاجة لمصاريفهم الشخصية والمواصلات. من الشغلانات اللي أخذها «إيليا» في شبابه كانت في قصر الملك في بلبس لما كانوا بيدخلوا الكهرباء في القصر، وفيه صورة «إيليا» على موتوسيكل في العلبة اللي جنب السواق، شاب صغير عنده 16 سنة في وسط فريق تأسيس شبكة كهربا بنها، وبعدين خد شغل في جنيئة الأزبكية، أبويا كان شاب رياضي صغير يطلع على السلم ويركب السلوك واللمض على الشجر ودايرن دايرن السور .

*

في يوم من الأيام «لياندر» كانت قاعدة في جنيئة الأزبكية مع الداوات صاحباتها، والينت «جينييت» الصغيرة بتلعب في الرمل على الأرض مع الأطفال التانيين، «لياندر» اتلفتت بالصدفة وعينها وقعت على شجرة قاعد عليها شاب جميل حواجه تخينة وشعره بني مموّج ثقيل لدرجة إنه واقف كدا فوق راسه، وبيبص لها، فهي كمان بصت له واتسحرت، ومن ساعتها ما عرفتتش تشيل عينها من عليه. أبويا حكى لي نفس الشيء تقريباً، وهو بيوصل سلوك الكهربا وبيركب اللمض فوق الشجرة، عينه وقعت على دكة تحت الشجرة، ولقى بنت جميلة قاعدة عليها، مش فاكرو شها إنما فاكرو شعرها، غزير ومموّج كستنائي، مليان شعر حوالين راسها، ففضل يبص لها يبص لها يبص لها وهو مسحور .

وفضلوا مدة طويلة يبصوا البعض .

ودا كان الحب من أول نظرة .

حبوا بعض من شعرهم، هو شعره لفوق وهي شعرها بالعرض .

كل يوم «لياندر» تروح الأزبكية تبحت عن «إيليا»، و«إيليا» يطلع الشجرة اللي هي قاعدة تحتها ويتظاهر إنه بيشتغل، وبيصوا البعض لغاية ما لقاها لوحدها من غير صاحباتها فاتشجع ونزل من على الشجرة وحاول يقول لها :

- أنا اسمي «إيليا» .

وهي تقول :

- أنا اسمي «لياندر ا».

كل يوم بالطريقة دي، يا عيني «جينيت» لما كانت بتشوف الشاب «إيليا» تعيِّط علشان عارفة إن «لياندر ا» حتبطل تلعب معاها، والدادوات صاحبات أمي كانوا بيخفقوا. «Vedevo il sole davanti ai occhi miei» - أمي بتقول لي «باشوف الشمس قدام عينيا». شعر أمي كستنائي موج كثيف، وأبويا علشان يثبت لي إن شعرها كان حاجة مخصوصة بيحكي إن الأمشاط العضم اللي بيحبيها لها كانت بتتكسر وهي بتتسرح فعمل لها مشط ألومونيوم، أبويا اللي عمل المشط بايده، بزاه سن سن، كان شاطر في الأعمال اليدوية. المشط دا أنا نفسي استعملته مدة طويلة، وكان موجود في البيت دايماً، أكيد خدوه معاهم إيطاليا لما مشيوا .

أمي كان عندها أكثر من 25 سنة وهو ما كانش تم 21، أكبر منه، علشان أمي تقبله كذب عليها وقال لها إن عنده 25 سنة، أصغر من أمي بسبع سنين، ما بيانش إنه صغير لأنه طويل وعريض والشعر العالي دا مخليه بيان كبير. ما اعرفش العلاقة بالطريقة دي دامت قد إيه، لكن الحب استمر وقال لها إن هدفه شريف وعاوز يتعرف على أسرتها وجه يقابل الخالة قريبتها وأم «جينيت» اللي بتشتغل عندها كأولياء أمورها، وبعدين راح يقول لأمه. ساره لما سمعت ان «لياندر ا» مسيحية قالت :

- مستحيل! تتجوز مسيحية؟ حاجة ما تتعملش .

وعملت مجهود وراحت تقابل «لياندر ا» تحاول تعقلها، أصل ساره زي ما حكيت كان عندها خبرة اجتماعية كبيرة في الجوازات والعلاقات الاجتماعية، قالت لـ«لياندر ا» إن «إيليا» كذب عليها :

- «إيليا» عنده 20 سنة، أصغر منك بكثير، إنت دلوقت مش حاسة بس لما تكبروا في السن حتتعبي، دا غير إنه مش في سن مسؤولية .

- مش بيكسب ماهية؟ ما دام بيساعد البيت وبيقوم بواجباته يبقى مسؤول، وانا مقتصدة واعرف أنظم، أنا ست بيت ممتازة، اتعلمت في إيطاليا قبل ما آجي مصر .

«لياندر ا» قالت لنفسها: «ساره بتقول معندوش 21 سنة علشان ما نتجوزش». بتصدّق قوي وتظن قوي في نفس الوقت، زي لما ابوها في إيطاليا قال لها دا شاب وحش وسُمعتة مش كويسة ظنت فيه وقالت لنفسها «بيقول كذا علشان مش عاوزني أسيب الفرن» بس أبوها كان بيقول الحقيقة، وساره كمان كانت بتقول الحقيقة .

- ابني مش مناسب لك، من دين مختلف، إنت بنت كويسة وحلوة، حتلاقي واحد مسيحي زيّك يستحقك، «إيليا» يهودي، وانتم عندكم عادات واحنا عندنا عادات، ما ينفعش يهودي يتجوز مسيحية، حتحصل مشاكل .

- مالي أنا ومال الخلاف في الأديان، مش ربنا واحد؟ خلاص، أنا ابقى يهودية .

حسب ما أمي حكّت لي بنفسها إن مشكلة مسيحية ويهودي ما ظهرتش إلا لما جُم يتجوزوا، لغاية السن دا ما كانش عندها فكرة أو مش واخدة بالها إن فيه أديان مختلفة في الدنيا وان الجواز بين الأديان بيعمل تعقيدات، غالبًا مفيش غير مسيحيين في «ريبا»، وكاتولييك بالتحديد، فالموضوع مش حاضر في ذهنها .

*

بعد ما أمي ماتت في 1981 أصريت إن أبويا بييجي يقعد شهرين عندنا في البيت، رحّت إيطاليا حضرت الجنازة ورجع معايا، كان بيقدّر يدخل مصر يزورني بالباسبور الطلياني. قعد في أوضة السفرة - اللي دلوقت أصبحت أوضة نومنا - وانفتح يحكي قصة حياته وقصة أهله، قعدنا نسمع له وخليناه يحكي قصص كثير بس نسيتهما، ما ركزتش كويس، إنت يا نادية كنت معايا يومها وللأسف كنت شابة صغيرة، مفيش أي لوم عليك، أنا اللي كان مفروض أنتبه لأهمية اللحظة دي واسجل. من ضمن الحاجات اللي حكاها وما كنتش اعرفها إن أمه ساره وصاحبته «لوسي» الداية كانوا مواعدين بعض أنه حيتجوز بنتها، متعودين على كدا في مجتمع درب البرابرة :

- عايزني أقول لـ«لوسي» إنك مش حنتجوز بنتها؟ لا وكمان واحدة مش يهودية؟ واكبر منك في السن؟ إنت لسه صغير، وموعد لبنت «لوسي»، مستحيل تتجوزها .

أبويا كان رأيه إن «لياندر» جميلة لكن هو انبهر من شخصيتها، أمي مفتوحة بتشع حيوية، هو كان منطوي شوية مش متحدث، ياخذ وقته قبل ما يتكلم أو قبل ما يقرر، بالتأكيد الفرق كبير بين الشخصيتين. الجديد إنه حكى لي إنه تردد، ما كانش يحب يزعل أمه وفكر شوية ومع إصرار أمه راح لـ«لياندر» وقال لها :

- «لياندر» يظهر إن مفيش نصيب ولازم نستسلم للأمر الواقع .

فأمي بقى ردت بكل قوتها :

- «Elia! Non farmi questo dispiacere» (يا «إيليا» اوعى تزعلني الزعلة دي) أنا لا يمكن اتخلى عنك، ولو مش حنتجوزني أنا حاموت نفسي .

أو حاجة من النوع دا، وفي الغالب كرّرت :

- لو كان على الدين أنا أبقي يهودية، ربنا واحد .

رجع «إيليا» تاني لأمه وقال لها :

- لازم اتجوزها أنا وعدتها وباحبها، هي مستعدة تعتنق الدين اليهودي .

وحصل .

عملوا ازاي علشان يدخلوا أمي لليهودية؟ ازاي اتصرفت جدتي في النهاية علشان تحقق الجواز دا؟ أكيد راحوا عند الحاخام واتجوزوا عند الحاخام، لكن أنا اكتشفت بعد ما كبرت واتجوزت، إن الدين اليهودي ما يقبلش حد من بره، مش زي الدين المسيحي بيقبل إن أي حد عايز يبقى مسيحي، والإسلام كمان، الواحد ممكن يعتنق الإسلام، إلا الدين اليهودي دا، ما يقبلوش وافدين جدد للدين بتاعهم أبدًا. بس يظهر أبويا كان المفضل عند أمه فعلاً، طيب وهادي وما بيز علهاش وشغيل، ابن كويس بالنسبة لها فما حبتش تزعله .

الأهل زعلوا و «لوسي» صاحبة ساره زعلت، وأساساً جدتي ساره كانت زعلانة أكثر واحدة وأكيد أهل «لياندر» أكيد زعلوا. أمي أصرت وهو كمان كان متمسك بيها فعرفت تنتصر على تردده أصر هو عند أمه والجوازة تمت اهه، وراحوا يعيشوا في بيت العشماوي. دي بقى قصة جواز أبويا وامي اللي فرضوها على جدتي ساره .

اتولدت أنا وانا معنديش فكرة طبعاً إن كان فيه المشاكل دي. هما عاشوا طول عمرهم مع بعض، وبت ظروف عند أبويا إن فقد شغله في الأزمة العالمية وكانت ظروف صعبة، وامي وقفت معاه وفي الآخر كمان سافروا مع بعض إلى إيطاليا وعاشوا مع بعض طول الوقت وممكن أقول إن كانت جوازة ناجحة .

العلاقة بين أمي وأبويا وبين ساره كانت كويسة علشان أنا افكر جدتي وهي بتزورهم في بيتهم. أمي كانت جادة في الجواز وبنقول إن حماتها لما شافتها ست بيت شاطرة بتعمل الشغل كله وبتطبخ كويس وبتأخذ بالها من جوزها حبتها إلى حد ما. وفي الغالب كمان أمي كانت كويسة مع حماتها بس أمي لسانها طويل، بتحكي لي كانت بتنتقد عوايدهم وتنتقد جدتي في علاقاتها الاجتماعية الواسعة وفي إنها بتخرج كثير من البيت، مش عوايد الستات في «ريبيا»، هناك ستات البيوت يقعدوا طول النهار ينصفوا يوضبوا وياخدوا بالهم من الولاد ولما يخرجوا يقعدوا قدام باب البيت مع جيرانهم يشغلوا تريكو وينموا. «عندها 5 أولاد وجوزها عيان، بتخرج تشوف ناس وتروح السينما» أمي مش متضايقه منها ولكن تنتقدها في الحاجة اللي ناقصة في أمي، الثقافة والتذوق الفني، حكاية مرواحها السينما بانتظام مع صاحبها «لوسي». «يصح كدا؟» أنا كنت صغيرة وباسمها «معندهم فلوس كفاية في البيت وهي تروح تصرف قرش ولا قرشين في السينما؟ يصح كدا؟» ما كنتش بارؤد وما اعرفش صح ولا مش صح لكن جدتي كانت ست طيبة وشاطرة والحمد لله في الآخر باركت الجواز، ولما كنا بنروح نزورها كانت بتستقبل أبويا وامي بشكل كويس وكانت بتحبنى زي الأحفاد التانيين. دلوقت كبرت وبافكر أمي بتنتقد ساره إنها بتخرج كثير وهي نفسها سابت بيت ابوها وهجت من البلد لوحدها، لكن اهه تعليقات أمي، دي طبيعتها والحقيقة إن كان عندها ميل للغيرة. بس المعاملة بينهم أكيد كانت كويسة لأن الاتنين قلبهم طيب، بدليل إن «إيليا» استمر يدفع نصيبه من المساعدة لأسرة جدتي لأنهم تعبوا مادياً بعد موت الأب .

وبعدين أبويا بيحب الأكل وشخصيته من النوع اللي يفرق معاه لو ياكل كويس، فطبعاً كان متمزج مع أمي، كان رفيع وتجن بعد الجواز. حكى لي يوم ما انفتح يحكي بعد موت أمي، إنه عزم على أمه في بيتهم علشان يورئها قد إيه هو مرتاح وقد إيه أمي بتطبخ كويس، عايزين جدتي تكون راضية عنهم . أمي نزلت سوق العتبة، تمشية صغيرة من شارع العشماوي لسوق العتبة. ما اعرفش لو انت

شفت سوق العنبة: سوق ضخم فيه كل حاجة من جزارين على بتوع فراخ على بتوع سمك، وخضار وفاكهة، حاجة فخمة لواحدة زي أمي بتحب الطبخ. المهم أمي نزلت السوق وجابت «costolette di maiale» - ريش خنزير - أمي بتحبها وبتفكرها بطفولتها في بيت أهلها، وعايزة تتوصى بحماتها . أبويا وصل البيت قال :

- يا خبر دا أمي ما بتاكلش خنزير .

أصل اليهود ما بياكلوش لحمه الخنزير، لكن أبويا ما كانتش متدين ولا متمسك بالتفاصيل دي، بيحب الأكل ويفهم فيه وهي طبّاخة عظيمة فيظهر ما كانتش لسه خدت بالها من التفاصيل اليهودية وطبخت اللحم. اتشاوروا شوية مع بعض وقعدوا يفكروا وفي الآخر أبويا حكى لنا إنه قال :

- إحنا مش حنقول حاجة ولو هي تسأل نقول لها لحمه بتلو، نكذب عليها أحسن ما تزعل، وعلى إيه نزعها؟

أصل الخنزير لحمته طرية ومش حمرة عاملة زي البتلو فعلاً. عيلة أبويا كانوا طبيين يمشوا على الدين والتعاليم حسب تقديرهم للأحسن. جت جدتي وانيسطت وحببت أكل أمي كله وحببت ريش اللحمه بالذات لأن سنان جدتي ساره يا عيني ما كانتش كويسة، لقت اللحمه طرية وخفيفة وطعمة، ويمكن ما سألتش كثير وسابوا الحكاية على كدا ومشيت مبسوطه، حبوا يخلوها تفضل مبسوطه من الجوازة دي اللي هما حققوها. ساره ما كانتش شاطرة في الطبخ - وحسب تحليل أمي دا بسبب انشغالها بالحياة الاجتماعية - متعوده تجيب حنة كندوز تعمل بيها شوربة، لحمه كتف دسمة شوية - الكتف مش طري زي الفخدة - تقطعها حتت وتحطها في الحلة الكبيرة مع أي خضراوات متاحة، بطاطس كوسة جزر حتى الفاصوليا البيضاء والكرّات، ويحطوها على نار في الماشة - شعلة دماسة - من يوم الجمعة بالليل ويروحوا يناموا ويسيبوها قايدة طول الليل والنهار ولما يبجي الظهر يوم السبت تكون الطبخة مستوية واللحمه الجامدة كان بينتهي الأمر إن تستوي وبكدا يوم السبت ياكلوا أكلة سخنة من غير ما يولعوا نار ولا يطبخوا - حسب تعاليم التدين اليهودي. المهم إن اللحمه اللي جدتي ساره تعرفها كانت جامدة بالمقارنة مع الريش اللي أكلتها عند أمي وأبويا. والحقيقة إن أبويا بيفنكر من أمه طبختين بس، السمك بالمايونيز وهو اتعلمها منها وكان بيعملها لنا، و«البورش» اللي هي شوربة البنجر، أكيد من أكلات «أوديسا» اللي جت مع جدّي موسى، أبويا ما اتعلمش «البورش» وفضل يحن لها لحد ما مات وهو نفسه يدوقها، ولكن لا هو ولا أمي عرفوا يتعلموها ولا أنا كمان .

آخر قصة لها علاقة بجوازتهم غير العادية لأبويا وأمّي هي إنهم كرّروا الجواز، وانا ما سألتش نفسي ليه - ساعتها. عملوا لنا اللازم علشان نتحول إلى مسيحيين لما كان عندي حاجة زي 10-11 سنة وكان حدث كبير و«فيليتشتا» كانت مبسوطه و«فيليا» وأمّي كمان سعيدة والجيران كلهم متحمسين وأبويا «très généreux» عملها كهديه لأمّي في عيد ميلادها 12 يونيو بروح من الكرم الشديد. أعتقد فهمت دلوقت الحماس دا كله من الجالية ومن القسيس، أنا في الحقيقة ما فكرتش في الموضوع إلا الأيام دي وقعدت اربط، بالتأكيد السبب الرئيسي لضغوط الحرب واضطهاد اليهود والخوف من الألمان، بس ليه أبويا اختار اليوم كهديه لعيد ميلاد أمّي يفرحها؟ لقيت إن فيه سبب

أقوى، أصل من وجهة نظرهم «لياندرا» مش متجوزة في الكنيسة وتبقى عايشة في الحرام. إنت فاهمة؟ رحنا كلنا الكنيسة ومعانا الجيران ودخلنا كلنا المسيحية وأبويا وأمي اتجوزوا تاني، المرة دي في الكنيسة، ومن وجهة نظر «فيليتشتا» والجيران تعتبر أول مرة .



اللي أفنكره بنفسي إن بيت جدتي كان في الدور الأول، ثلاث أوض نوم، أوضة للأهل وأوضتين للولاد الخمسة. الصالة في آخرها كان فيه باب بدرفتين خشب بعرض الحيطه بيفتح على أوضة القعاد، كنبتين اسطمبولي طوال وضيقين، كنبتين زي بتوع العزبة بثلثت للضهر وفي الوسط مخدات مدورة بيسموها «مدفع»، البياضات بيضة بياض ناصع وكسر دايرن داير، عملت بياضات زيتها للكنبة الصغيرة هنا في الدقي .

جدتي ساره تقعد عليها وتغني لي :

Quiere che le canta

Quiere che le balla

Quiere che le diga mashaallah

كلمة «ما شاء الله» اللي في الآخر عربي وباقي الكلام «اسبانيولي-لادينو»، مخلوط بكلمات تركي: «عايزاني أغني لها، عايزاني ارقصها، عايزاني أقول لها ما شاء الله».

تغنيها لي وتتططني، ست حنونة ولطيفة، صحيح ما كانتش ست بيت شاطرة زي «فيتوريا» مرات ابنها الكبير «بنيامين»، بس برضه كان عندها ملبس وحاجات للعيال. وهي الجدة الوحيدة اللي عرفتها أصل جدّي موسى مات وانا صغيرة وطشاش كدا متصورة إني شفته لابس الجلابية التركي البيضة دي اللي بيفضّلها، وجدودي من أمي ماتوا في إيطاليا عمري ما شفتم، أسمع قصصهم بس .

أكثر واحدة اتصاحبنا على بعض من ولاد عمامي كانت «سارينا» بنت داود الأخ اللي فوق راس أبويا. كنا بنتقابل أنا و«سارينا» يا في بيتهم أو في بيت ساره أو عند مرات عمي الثاني «بنيامين»، أظن كانوا ساكنين كلهم قريب من بعض . كانت المفضّلة عندي بالعب معاها كثير علشان كان عندها «fantasy» - خيال - وتندمج في اللعب، نقعد كأنا ستات بيزوروا بعض ويتكلموا ونقدم القهوة والشاي والمربّى، وننط الحبل. أختها التوأم - «فيكي» - تشبه لأهمهم «كلارا»، بيضة، عينين زي الكشافات، مش متكلمة ولا متحركة، و«بيبو» أخوهم الكبير ما كانش بيلعب معنا بالرغم إنه تقريباً من سننا، و«كيّتي» بنت عمي الثانية لكن الاستغراق في اللعب كان مع «سارينا». الكبار يقعدوا في الصالة وبيعوتونا السطوح، «سارينا» تاخذني المطبخ وتجيب رغيف عيش بلدي وتسخّنه على النار وانا أف جنبها ونتكلم، تقطع العيش أربع ارباع وتعمل سندوتشات جبنة بيضة اسطمبولي حادقة ونطلع السطوح ناكل ونندمج أكثر واكثر. ما كنتش متعودة على الأكلة دي لأن العيش البلدي كان بيخش بيتنا يوم واحد في الأسبوع، يوم الفول، الجمعة أو الحد حسب أجازة أبويا، الفول يحتاج قعدة وعيش بلدي طازة، غير كدا كنا بناكل فينو. أظن أمي حذفت من النظام الغذائي في البيت الأكلات المصرية الحريفة والبلدي ومنها الجبنة البيضة الإسطمبولي. كان فيه راجل في التوفيقية يعمل جبنة بيضة عادية كنا بنروح التوفيقية مخصوص نشترها، اسمها جبنة «روبير»، و«روبير» دا هو اللي يعمل الجبنة بنفسه، بيصنع الجبنة ويجيبها ويخرط ويوزن على الميزان ويلف الطللية ويقف على الكيس ياخذ الفلوس .

أنا باحب «سارينا» أكثر من أي حد ثاني أصل ذكرياتي معاها، فاكدة تعبيرات وشها، مش ثابت، تتكلم وتقول وتفتح وتقل عينيها وتسكت وتشاور بالإيد، معيرة. أبو «سارينا»، «دافيد» أو داود اتعلم واشتغل موظف في بنك، وساره كانت فخورة بيه، اتجوز «كلارا» جارتهم من الحنة، حلوة وعينيها زرق وبتكلم قليل وتتحرك أقل، بنوثة ساكنة وقاعدة، خلفوا ثلاثة عيال «بيبو» و «فيكي» و«سارينا»، «دافيد» كان متولي أمر أخوه الصغير «سولومون» أصغر أخ، ومسكنه عنده علشان يخفف المسؤوليات على ساره الجدة بعد مرض وموت جدّي. ولكن «دافيد» نفسه عيي، بيقلوا جا له ورم في المخ زي أبوه ومات صغير ما كملش أربعين سنة وأولاده لسه صغيرين 8 و12 سنة. «كلارا» الأرملة ما كانتش بتشتغل ومش شاطرة في حاجة معينة، مصيبة إن أبوهم يموت بدري. «سولومون»، عمي الصغير اللي عايش معاها في البيت كان ابتدى يشتغل وما كانش متجوز لسه فاستمر يعيش مع عيلة «دافيد» ويصرف عليهم . أمي كانت بتقول كلام مش واضح معناها إن المفروض «سولومون» يتجوز «كلارا»، بعد سنين اكتشفت من القراءات إن اليهود لما واحد

يموت الأخ اللي العازب يتجوز الأرملة ويربّي الأولاد . بس «سولومون» ماتجوزش «كلارا»، شال المسؤولية وربّي الأولاد لغاية الآخر وكانوا بيعتبروه أبوهم .

اللي افنكره من «سولومون» إن صوته حلو ولما يبجي عندنا في البيت في شارع نعيم وانا صغيرة كنا بنخليه يغني «Parlami d'amore Mariu» - «كلميني عن الحب يا ماريو» - وكل قعدة لازم يغني أغاني «تينو روسي» و«كاروزو» و«بنيامينو جيلي» المشهورة .

عندي عم جاب 6 عيال ما افنكرش ولا واحد فيهم ولا أساميهم ولا شكلهم، اسمه «إيزيدورو» كان المشكلة الكبيرة في حياة ساره. علمت الولاد وشغلتهم إلا هو، شقي ما عرفش ينتظم في الدراسة، حاولت تشغله بس ما كانش بيقد في أي شغلانة أكثر من 7 اشهر، لازم ينتهي بخناقة و«إيزيدورو» يسبب الشغل. مش مبسوط ولا إيه حكايته؟ جدتي ساره الشخصية القوية وشيخة الحارة اللي بتشغل أولادها وتقرر مصيرهم ما كانش قادرة عليه وما نجحتش تخليه يثبت في أي حنة فجوّزته وهو صغير على أمل إنه يستقر. دي بالنسبة لي فكرة غريبة: علشان يساعدوا الشاب يستقر يروحوا يجوّزوه و«إيزيدورو» اتجوز وجاب ست أولاد، بنت وخمس صبيان، ولكن الأسرة دي ما كانتش مستقرة، الجواز ما جابش استقرار، و«إيزيدورو» كان بيعيش بمساعدة أمه واخواته. مجيئهم البيت عندنا كان نادر، لكن في يوم أبويا عزمه على الغدا وبينما أمي بتطبخ في المطبخ أبويا قعد مع «إيزيدورو» على ترابيزة السفارة يحضّر المايونيز، جاب زيت ولمون والملاحة وبصبر شديد وبشويش بشويش قعد يلف صفار البيض بالشوكة ويزوّد الزيت نقطة نقطة. «إيزيدورو» ابتدى يقول نكت على «ازاي الواحد يجيب ولاد وما يجبش بنات»، فأنا اهتميت فخدوا بالهم إني متابعة :

- يا «إيليا» عايز تعرف ازاي الواحد يجيب أولاد وما يجبش بنات؟

- أيوه، عايز أعرف .

- يا سيدي الواحد علشان يجيب ولاد ... إنت يعني مصمم تعرف؟ طيب أنا حاقول لك .

في النهاية طبعًا ما قالش حاجة بس قضاوا الزيارة ضحك عليّ وفجأة «إيزيدورو» قام وقال لأبويا :

- مش معقول يا «إيليا» انت حتقعد ساعتين تعمل في المايونيز .

- لازم نقطة نقطة علشان ما تقطعش .

- ولا تقطع ولا حاجة هات هنا .

وخذ من أبويا الزيت دلقه على البيض مرة واحدة ولف بالشوكة وفي خمس دقائق طبق المايونيز كان جاهز ولا قطعت ولا حاجة، ما كانش عنده الصبر يستنى. دي الذكرى الوحيدة اللي عندي معاه، العم «إيزيدورو» كان عندي حوالي خمس سنين قبل الحرب العالمية الثانية. عيلة

«إيزيدورو» من أوائل الناس اللي سافروا إلى فلسطين، قبل 1948، سافروا بدري واختفوا من هنا وأثارهم اختفت هناك برضه. ماتوا؟ راحوا فين؟ ما اعرفش أي حاجة عنهم .

«بنيامين» الكبير كان عكس «إيزيدورو»، شخصية مستقرة وعيلة مستقرة. الوحيد اللي اتولد في تركيا، جه مصر وهو عنده سنتين، اشتغل عامل في المطابع الأميرية واتجوز «تسيا فيتوريا» يعني العمة «فيتوريا»، ست بيت أسطورية، حتى أمي اعترفت إنها ست بيت ممتازة. «تسيا فيتوريا» مشهورة بالمربات، مربة مستكة بالفزدق - رغم إن ما كانوا أغنيا بس يظهر حاجات زي الفزدق كانت لسه في متناول الناس ولو بحساب. تعمل اللارنج المجفف بالسكر، تقطع قشر اللارنج شرايح طويلة يلصموها مع بعض بالخيط والإبرة، يعملوا عقود لارنج ويلفوها في السكر فالسكر يلزق على القشرة وينشروها بالسكر اللي عليها في الشمس لحد ما السكر يدوب والقشرة تتشف، يسلتوها من الدوبارة ويقدموها للضيوف. تقدم لنا أصناف المربات على صينية عليها كبايات مية كثير وكباية ازاز بشماعة للمعالق، ندوق مربة المستكة أو اللارنج ونسبب المعلقة اللي استخدمناها في كباية المية.

خلفوا أربعة بالترتيب بنت ولد بنت ولد «ستلا» وموسى و«كيتي» و«جاكو»، ساكنين في بيت أرضي من غير سلاّم نخش على طول من بوابة العمارة لحوش طويل، كان بيت الأمة لكل الأولاد. عمي «بنيامين» هو كمان تعب بدري وجاه له شلل نصفي وفقد شغله، ضربة كبيرة لعيلة مزنوقة أصلاً، ولكن عيلة «بنيامين» متصرفة - مش زي عائلة «دافيد» - جابوا عربية زي عربية الكشري و«بنيامين» وقف يعمل طعمية وساندويتشات في الشارع على الناصية، كل يوم قبل المغرب بشوية «فيتوريا» مراته الطباخة الممتازة تجيب الفول المدشوش تنقعه وتقرمه وتحضر خلطة الطعمية في حلة كبيرة من بالليل، وبنتها «كيتي» وقفت اشتغلت معاهم، «كيتي» تشبه أمها، واعتقد إنها فضلت تختوخة وجدعة زي أمها على طول. الأخت الكبيرة «ستلا» ما كانت شغيلة - زي عروسة حلوة وبيضة ورقيقة وكانت بتعمل «pose» - منظر كذا بشيء من التباعد بينها وبين الناس الشعبين دول، عاملة أرسقراطية. أبويا وأمي ياخدونا أنا واخويا الصغير لعربية الطعمية نشترى ونقعد نتعشى في الشارع ساندويتشات الطعمية الجميلة بالطحينة بتاعة عمي «بنيامين» ومراته «فيتوريا». عاشوا كدا عيلة «بنيامين»، مزنوقين ومتصرفين .

أنا كان عندي مشاكل مع البوليس السياسي من وانا عندي 18 سنة، ودخلت السجن كذا مرة وكنت في القايمه السودا ونفس الحاجة سعد، اتجوزت واحد عنده اسم وملف عند البوليس من قبل ما يقابلني وفي وقت معين كانوا عايزين يرخلوني، لكن أبويا ما كانش له علاقة بأي سياسة أبداً والبوليس السياسي عمرهم ما تعرضوا له ولا كان فيه شكوك عليه وما رخلوهوش، يُعتبر إن مشي بخطرته ونفس الشيء أخويا، بس ما خدش الجنسية، ما اقدرش أقول إن كان فيه تعاطف مع الأجانب في المجتمع، بالعكس، كان فيه لهجة ضد الأجانب وضد اليهود بسبب العدوان الثلاثي الفرنسيين والانجليز والإسرائيليين، بس أبويا ايه كان بيشتغل هنا وعمره ما حصل له أي عداوة مباشرة من الناس والعلاقة مع الجيران والأقارب قبل ما يسافروا كانت لطيفة، دي كانت سياسة الدولة، مؤخرًا أخويا حكى لي ازاي الدولة كانت بتضايقه في الإقامة وتصاريح الشغل، وأبويا أخذ سفر بلا عودة من الجوازات وهو خارج من مصر وما كانش يقدر يجي مصر لمدة طويلة .

أبويا من ناحيته ما كانش منجذب خالص ولا لإسرائيل ولا للديانة اليهودية ولا لأي ديانة، افكرت إن في شبابه اهتم باتجاه منتشر في العالم اسمه «Les libres penseurs» - «المفكرين الأحرار» - فلسفتهم إن التفكير في الدين يبقى بحرية وإن الأديان السماوية زي بعض لها رب واحد، وإن الإيمان جوه القلب ومش ضروري متابعة طقوس دينية بشكل دقيق، أبويا كان كدا وبيقول على نفسه كدا، وانا افكرت كويس إن عمره ما كان متدين ولا متعصب ولا لدين ولا لأي حاجة، عمري ما سمعته بيقول تعليق على المجتمع المصري كأنه مش منه. ما كانش عنده أصدقاء رجالة من أي صنف بيجوا البيت علشان أمي ما كانتش بتسمح بحاجات زي دي، عيلته بس اللي بيجوا يزورونا، بيتكلم عربي كويس وعلاقاته مع أهل الحنة في بولاق ومع زمائله في الشغل كويسة، حب الثقافة والفنون وبيشتغل بذمة وبيحب عيلته، ما سابش مصر إلا بعد ما اتولدت إنت، حوالي 1965 لما جت له فرصة ينتقل مركز «النمرو» في إيطاليا وعلشان أخويا هاجر لهنالك وانا كنت باقول «أنا مش إيطالية، باحب إيطاليا طبعاً بسبب أمي، بس كدا من بعيد لبعيد»، أنا باحكي الحكاية دي تاني أصل أنا نفسي مستغربة إنني اخدت الموقف دا وانا عندي 17 سنة، حقيقي مش قادرة أفهم جالي ازاى بينما الشيوعيين اللي كنت متعلقة بيهم كانوا بيسافروا .

«برتو» أخويا خد موقف مختلف عني، خلص دراسة في مدرسة «الفيرير» عند الرهبان في باب اللوق وكان شاطر، كان أحسن مني في الدراسة، أنا كنت كسلانة وهو مجتهد، بيعمل حاجات إضافية، يجيب كتب من المكتبة ويعمل أبحاث، ولما خرجت من السجن لقيته بيشغل مدرس ابتدائي في مدرسة «الفيرير» اللي اتخرج منها، وكان فيه كلام كثير بين اصحابه عن الهجرة لبلاد تانية وإن مصر قفلت مفيش فيها فرص للتقدم بالنسبة للخواتم، و«برتو» معندوش جنسية، «apolide»، زيّنا أنا وأبويا، مصري بالولادة والتربية ولكن بدون ورق. أول واحد سافر من أصحاب «برتو» كان ولد أبوه له أصول من جزيرة مالطة وكان عندهم ورق انجليزي وراحوا انجلترا، أمه بعنت لأمي جوابات تشكي «فين شمس مصر؟ جسمي مليون رومانيزم، وشبورة وبرد على طول وشغل كثير» أمي كانت بتقرأ لي الجوابات دي وتقول «شوفي؟ مش مبسوطه ومتضايقه، صعب ست كبيرة تسبب بيتها في السن دا». أعز أصدقاء «برتو» كان «جاك بن مايور» أثر عليه يروح معاه البرازيل لدرجة ابتدوا يجهزوا أوراقهم مع بعض، في آخر لحظة قبل السفر أبو «جاك» مات، و«جاك» يا عيني في يوم وليلة أصبح مسؤول عن عيلته، وخطة سفر «برتو» اتلغت، سمعت من «برتو» إن راحوا البرازيل فعلاً وبعد كدا «جاك» استقر في أمريكا الشمالية. بيدو إنها كانت صداقة كبيرة لأن بعد مرور 40 أو 50 سنة «جاك» راح إيطاليا علشان يزور «برتو» و«برتو» كان منفعل جداً من الزيارة دي .

لما اتلغت خطة البرازيل، «برتو» راح إيطاليا ورتّبوا بقي ان أبويا وأمي يصفوا أمورهم هنا في مصر بالراحة ويحصلوه، وفعلاً بعنوا عفشهم من أبو العلا بالمركب. الحصول على الجنسية من أول الحاجات اللي عملها «برتو» علشان شركة التبريد في «فلورنسا» ما كانتش حتشغله إلا لو عنده ملف جنسية يثبت إنه حيكون طلياني في بحر مدة قصيرة وإنها مسألة إجراءات وأعتقد إن «برتو» خد الجنسية الإيطالية بالهجرة إلى إيطاليا على أساس أمه إيطالية، أعتقد إنه ما حصلش عليها بالجواز .

طلع قانون في مصر في 1951 على أساسه أصبح ما ينطبق علينا شروط الجنسية ومن ساعتها بدل ما كنا نعتبر مصريين بقوا يعتبرونا مش مصريين، واللي يتم 21 سنة يتقدم للحصول على ورق الجنسية المصرية ولازم يثبت إنه من أصل عثماني. مش ممكن إن سكان مصر كان لازم يعملوا طلب جنسية، فانا مش عارفة إيه الشرط اللي خرّجنا من الجنسية. أبويا مكتوب مصري في شهادة الميلاد ومولود في مصر وعنده شهادة معاملة من الخدمة العسكرية، أه، أنا نسيت أقول لك المصريين لما يوصلوا في سن معين لازم يخشوا في التجنيد وكانت سمعة التجنيد وحشة وبهدلة للشباب، يا حبيبتى يا جدّتي، ساره، لما ورقة الاستدعاء جت لأبويا، أمه دفعت له الـ20 جنيه علشان ياخذ إعفا لأنه كان ابتدئ يشتغل، فهماني قصدي أقول إيه؟ جدّتي دفعت على أساس إنهم مصريين وعابزة تجنّبهم متاعب التجنيد من غير ما تسبب لهم مشاكل ويكون ورقهم مطبوط. دفعت العشرين جنيه اللي كانت مقررة بشكل رسمي لأي حد مستدعى للتجنيد للحصول على شهادة معاملة مع الإغفاء من الخدمة في الجيش. 20 جنيه مصري ساعتها كانت حاجة كبيرة، إحنا بنتكلم على سنة 1925 تقريباً، ودا من ضمن الحاجات الكثير اللي عملتها ساره في عز الفقر علشان ولادها. لما أبويا حاول يقدم على الجنسية في الخمسينات الإعفا كان مستند مع أبويا لإثبات إنه مصري، الأجانب ما كانش بييجي لهم استدعاء، الخلاصة إن أبويا عاش طول عمره على أساس إنه مصري، اتولد هنا في القاهرة سنة 1909 وكل الأشغال اللي اشتغلها دخل فيها على أساس إنه مصري الجنسية، وأمى اتجوزته وهي معتبراه مصري، مصري خواجه. وانا كمان اتولدت هنا واخويا اتولد هنا وكنا عايشين على إننا مصريين لغاية سنة 1951، أمنا إيطالية وأبونا مصري لحد ما طلع القانون دا .

واحنا راجعين من الإقامة في السويس سنة 1936، كان عندي 5 سنين وكان لازم أخش أولى ابتدائي، أمى خدنتي تسجّلني في المدرسة الإيطالي في بولاق والموظف هناك بص على شهادة الميلاد وقال لأمى :

- بس دي مش طليانية .

- إزاي مش طليانية؟ إحنا طليانية، أنا طليانية .

- بس ايه شهادة الميلاد بتقول إنها مصرية .

- دي بنتي واتولدت هنا فاتسجّلت بالطريقة دي لكن أنا ولائي لإيطاليا .

أمى كانت دايماً بالطريقة دي مع الورق الرسمي، فأنا حبيت أساعد كلام أمى فتدخلت من غير ما حد يسألني وقلت بالطليناني :

- مطبوط إحنا في البيت بنتكلم طلياني، عايشين في بولاق وكل الناس بيتكلموا طلياني .

أو حاجة زي دي، أمى عملت خناقة يومئذ وزعت وقالت :

- لا يمكن، لازم تاخودها، بنتي حتدخل المدرسة الطلياني .

المدرسة معتبراني مصرية وأمي بتتخايق علشان المدرسة تاخد في الاعتبار كونها هي طليانية، المهم قبلوني ودخلت المدرسة الإيطالي في الآخر زي ما انت عارفة. ولما ابتديت أشتغل الواحد بيقدم دايماً شهادة الميلاد زي شركة «جون ديكنسون» للورق أول شغل لي، كنت باخد الشغل باعتباري مصرية. «ألبير آرييه» وحليم طوسون الاتنين مصريين بنفس الطريقة، لكن يمكن أقدم؟ أو يمكن أبهاتهم كانوا شطار وفاهمين وحصلوا على الجنسية المصرية قبل ما القوانين دي تطلع علشان الناس الفاهمة كانوا بيعملوا كدا. جدتي كانت شاطرة شوية بس مش شاطرة كفاية، جابت شهادة الإعفا من التجنيد بس ما قدمت على الجنسية ولا أبويا كان متتبه، بالذات إن موضوع الجنسية ما كانش مطروح كمشكلة أصلاً، الجنسية كانت لسه حاجة طبيعية إلى حد كبير. أبويا كان قدم على الجنسية لما طلع القانون دا ما ردوش عليه، بعث تاني وتالت، أنا ما كانش لسه عندي 21 سنة، لما تميت 21 سنة قدمت على طول لكن ما ردوش برضه .


مسألة إن أبويا من غير ورق ومش معتبر مصري في القانون الجديد من الحاجات اللي ممكن حسمت قرار السفر وأكدت على نظرية «برتو» ، إن ملهمش مكان في مصر. أتصور إن أمي قررت إن ما دام الوضع واخدهم ناحية إن يسيبوا بينهم في مصر، بالتأكد تفضل يروحوا إيطاليا مش أي مكان تاني، والحقيقة أمي كانت مبسوطة ترجع بلدها، كان بقا لها تقريباً 40 سنة في مصر وكان فيه حاجات بتضايقها باستمرار زي الوساخة والتراب، وعيلتها هناك، أظن لما الوضع ابتدا يتغير عليهم في مصر كانت جاهزة ترجع .

أبويا وأمي خدوا بعضهم وعملوا الإجراءات وفعلاً سابوا مصر وراحوا إيطاليا، وأول ما وصلوا أمي وضبت أوراقها وكان سهل تثبت إنها إيطالية، أوراقها وأوراق عيلتها موجودة في سجلات قرية «ريبيا» وكانت مطلعة باسبور في مصر من الفنصلية الإيطالية وأبويا قدم على الجنسية الإيطالية على أساس الجواز. يا دوب استقروا سنة أو سنتين أبويا اترفد. أمي هي اللي حكيت لي عن سبب الاستغناء عنه، كان فيه نقابة قوية للعاملين وطلبوا منه ينضم للنقابة ويتضامن معاهم في واحد من الإضرابات وهو كان مقتنع بالمطالب فراح معاهم، مش فاهم إن ملوش حقوق، ما كانش حصل على الجنسية الإيطالي فالإدارة فصلته والنقابة ما قدرتش تعمل له حاجة. دي كانت أكبر ضربة أخذوها في حياتهم هما الاتنين، علشان المرة دي بقي كانوا من غير دخل بصحيح، وفي السن دا وفي بلد جديد، كان صعب أبويا يلاقي شغل. أمي حكيت لي الحكاية دي بعد سنين طويلة، أنا ما عرفتش في ساعتها، كانت عاوزة تفهمني إن أبويا عمره ما كان عنده حس عملي للمصلحة ومعندوش خبرة . أمي طلبت معاش، وكفاح الستات في إيطاليا اللي أنا كنت باكتب عنه في حوا جاب نتيجة وحصلوا على معاش ربات البيوت وأمي استفادت من الإنجاز دا .

ظهر في حياتهم بقي ابن خالي «إنريكو» ومراته «ماريزا»، بالذات «ماريزا»، تبنتهم كأنها بنتهم، موظفة كبيرة نسبياً في البلدية، عندها خبرة واتصالات فتابعت لهم موضوع الجنسية الإيطالية لأبويا وساعدت في إجراءات المعاش ليهم هم الاتنين. معاش أبويا كان حاجة قليلة أصل يعتبر إنه ما اشتغلش، سنين شغله في مصر ما اتحسبتش في إيطاليا، ما حصلش على معاش راجل عاش عمره يشتغل، لأ، خد معاش المعوقين ومصابي الحروب والحالات الخاصة، نوع من المساعدة كدا على

الماشية من الحكومة علشان ما يسيبوش حد من غير فلوس خالص. أظن كانوا بياخدوا تسعين ألف أو خمسة وتسعين ألف ليرة ليهم هم الاتنين على بعض، مبلغ بسيط زي 100 دولار في الشهر. عاشوا يا دوبك على القدر، واحنا لما كنا بنروح لهم، السفريات اللي انا باحكي عنها، كان وضعهم كذا. أبويا كان بيساعد نفسه، الناس في البلد عرفوا إنه بيعرف في الكهرباء، فاللي عاوزة تصلح المكوة بتاعتها مثلاً بيعتوا يصلح لهم ويدفعوا له حاجة، واتعلم يجلد الكتب فكانوا بيحبوا له كتب، أعمال صغيرة، ويدوا له حاجة، وعلمك تجلدي الكتب وتساعديه. هما عاشوا في الفترة الأخيرة بالطريقة دي. البيت اللي كنا بنزورهم فيه كان بتاع «إنريكو» و«ماريزا» ورثوه عن خالي «جوردانو»، سابوهم ساكنين في البيت بايجار بسيط، الحياة غليت وما زودوش الإيجار، إيجار يمكن ما يقضيش ورقة دمغة، كانوا في منتهى الرقة وعاملين خاطر لخالي يخلوا بالهم من اخته. «ماريزا» كانت بنتجي «ريبا» بانتظام علشان تزور القرافة، حاجة مقدسة عندهم في البلد زيارة القرافة، وكل مرة لازم يفوتوا على أهلي يجيبوا لهم قزازة نبيت ولما كبروا وما بقوش يشربوا نبيت بقت تجيب لهم قزازة زيت زيتون، ويعد ما أمي ماتت استمروا يعدوا على أبويا لحد ما مات هو كمان. الست جارتهم اللي كانت ساكنة تحتهم كانوا فلاحين عندهم حدة أرض وبيروحوها يزرعوها بنفسهم، لما يرجعوا من الأرض لازم تبعت ابنها بكيس فيه طماطم وفاكهة وخضراوات الموسم، الولد يطلع يسيبه لأبويا وأمي على السلم قدام الباب. أنا ما كنتش دريانية إن وضعهم المالي مش مريح للدرجة دي، لأنهم كانوا منظمين أنفسهم وعاشين كويس، واحنا علشان نساfer كنا بنسافر بخمسة جنيه مصري مسموح لنا نحوّلهم دولارات، كانت فترة جمال عبد الناصر، وعلى أي حال هنا سعد عمره ما كان عنده فلوس علشان نقدر نعمل الحاجات بالراحة، ولكن عشنا كويس إحنا كمان وخلصت. أبويا زي ما اتعلم تجلدي الكتب القديمة، ابتدى يعمل أشغال من الخيال بالدوبارة والمسامير، ملهاش شكل معين واطن كان بيبيعهم، في زيارة من الزيارات عمل لنا اتنين واحدة موجودة عند دينا وواحدة تانية كانت عندك في الأوضة يا نادية، ودلوقت موجودة في أوصتي. ما كنتش بأديها أهمية لكن بقيت متمسكة بيها واحتفظنا بيها ما رميناهاش .

الحصول على الجنسية الإيطالية لأبويا كانت فرحة، وأمي كتبت لي جواب مؤثر. كنت منبوذة من أمي بعد السجن وكانت بتعتبر إنه عار وعتب ومن الغلطات الكبيرة اللي عملتها في حياتي «إيه أهمية الشيوعية دي؟» اللي تستاهل إن أخسر حياتي علشانها، أمي اشتراكية «garibaldina» - يعني تبع «جاريبالدي» - وطنية إيطالية قديمة، لما كنت في السجن ما كانتش شايقة أنا باربط أزاى بين «جاريبالدي» بتاعها وشيوعيتي، والفكرة غريبة عليهم في «ريبا» إن «بنت «لياندر» في السجن». بس لما استقرت في إيطاليا لقت الحزب الشيوعي له سمعة تانية، سمعة جميلة، موجودين في القرى والمدن حتى في «ريبا». حضرت الانتخابات ولقت السنات عندهم الحق في التصويت وبعدين أبويا حصل على الجنسية، كتبت لي «لأول مرة في حياتي أنتخب وانا في السن دا، عملت الورق ورحت انتخبت، وانتخبت حزب أفكارك» قالت لي كلام لطيف أنا متأثرة منه طول الوقت: «فهمت قيمة أفكارك، ما كنتش مقدرها». انتشجعت تفهم لما شافت الحزب الشيوعي علني وبيأخد فوق الـ30% من الأصوات وبيدعم مطالب كويسة بالنسبة لها، و«باولو» ابن اخوها دخل الحزب الشيوعي والكل بيحترمه و«باولو» بيقدّرنا وفيه بيننا تفاهم واحترام، وكل مرة نروح «ريبا» لازم يقابلنا أنا وسعد وتبادل الآراء والأفكار والانطباعات. أنا والله لميت جوابات أمي بس صعب أرجع أقرأهم .



في وقت ما وانا باحكي قلت إن فيه موقفين أنا مش عارفة أفسرهم في نفسي، عشتهم بتناقض، الحاجة الأولى كانت «أنا أي نوع من الأمهات»، اتكلمت في الموضوع دا قد ما قدرت وخلص عدّى ومش ممكن أعمل فيه حاجة أكثر من كدا، ما حكّتش كل حاجة بس حكيت حاجات كثير واللي حصل بعد كدا إنتو تعرفوه، تبقوا تحكوه إنتو لنبييل .

الموضوع الثاني اللي مش عارفة أفسره في نفسي وشاغل بالي وعايزة أتأمل فيه هو «إزاي أنا ما سألتش ولا مرة عن أسرتي اليهودية اللي كانت كلها ساكنة هنا في مصر، وعرفت كدا عالماشي من أبويا وأمّي إنهم مشيوا راحوا إسرائيل». إزاي أسقطهم؟ أنا ما كنتش باعمل مجهود، أنا بطلت افكر فيهم أو احس بيهم. حصل لي نوع من البلادة في الموضوع .

ذكرياتي القليلة وشوية المعلومات عن طريق أبويا وأمّي بنقول إنهم ناس طبييين ومفيش حد منهم اهتم بالسياسة، الاهتمامات كانت بنتصب على الأكل والشغل والدخل ومواضيع ثقافية شعبية، زي غنا «تسيو سولومون» وميول أبويا الفنية. كانوا بيتكلموا عربي أحسن منّا بسبب إن أمّي كانت متمسكة بلغتها في بيتها، ومعظم زباين عربية الطعمية بتاعة عمي «بنيامين» ما كانوا خواجهات، مصريين من سكان الحطة وبيكلموهم عربي. يمكن سفرهم حصل لما الحياة زنقت قدامهم والعمل ما كانش سهل، «جاكو» كان أصغرهم، صبي عنده 12 أو 13 سنة وما كانش في «scope» - منظور - لعمل معقول في المستقبل وبتصور كان فيه إغراءات إن هناك حيالقوا مجال لحياة أحسن. الدليل على كدا إنهم ما سافروش مع بعض، سافروا حسب تقديرهم للإمكانيات. في الأول زي ما سمعت

اختفت أسرة «إيزيدورو»، انفصل عن العيلة وسافر، و«إيزيدورو» دا ما كانش له في السياسة خالص، بيبحب الحياة والضحك المرح ومعدوش فلوس وبيلقط رزقه كذا زي ما تيجي، وأكد سافر مش عن اقتناع أو عقيدة، مجرد مغامرة أو محاولة. أما عيلة «دافيد» اللي مات هنا في مصر وعيلة «بنيامين» اللي جا له شلل هنا في مصر برضه، دول الكتلة الأساسية اللي قرروا السفر والهجرة إلى فلسطين والعيلتين عندهم مشاكل اقتصادية، ما كانوا مرتاحين بالمرّة. «كيتي» الجدعة اللي بتساعد أهلها على عربية الطعمية، شفتها مرة في زيارة لـ«سارينا» هي وجوزها، يمكن محاسب - شغلانة كويسة - معاها ولد وحامل في الثاني. كان فيه ناس كثيرة، أهل البيت خمسة واحنا الأربعة، و«كيتي» وجوزها والشقة صغيرة، وضع مثير للأطفال فابن «كيتي» يا عيني مابطلش يجري وينط وينزل تحت الكراسي وينط على الكنبه ويطلع بره ويدخل جوه ويرزع باب ويمسك كباية ويرمي طبق، كان عامل إزعاج فظيع، و«كيتي» أصلاً مليانة وتخانة أكثر بسبب الحمل مش قادرة تتحرك وطول القعدة تقول لجوزها «الحق الولد». جوزها عجبي، راجل متعاون، ياخذ الولد يقعه ويتكلم معاه ويلاغيه والولد يجري منه ويقوم تاني ويروح يجيبه، راجل متحدث وعنده صبر يتابع الولد وهو بيشارك في الحوار. عيلة العم الكبير «بنيامين» اللي كان بيشتغل في المطابع الأميرية وعربية الطعمية، بمراته بتاعة المربّات طنط «فيتوريا» وابنه الصغير «جاكو» اللي ما كانش عنده 15 سنة وبنتهم «كيتي» وجوزها وأولادهم الاتنين الصبيان سافروا، بس إمتي؟ وازاي؟ للأسف عمي «بنيامين» تعب، جات له جلطة تاني وقعد في البيت يمكن سافروا في الوقت دا؟

العم الأصغر «سولومون» ما اتجوزش وسافر مع أرملة عمي «دافيد» وأولادها «سارينا» و«فيكي» وأخوهم الكبير «بيبو»، ولا أعرف سافروا سنة كام، كأنهم اختفوا. إزاي مثلاً أنا ما عرفتش عن سفر «سارينا» في ساعتها، هل كنت في السجن مثلاً؟

الوحيد اللي ما سافرش من العيلة كان ابن عمهم موسى، وانا لَمَّا اتجوزت في سنة 1954 ما كانش فاضل إلا هو من عيلة أبويا. موسى كان ابن نكتة وبيتكلم قليل، طويل ورفيع وحليوة، عينيه عسلي وشعره مموج أصفر مع إن أبوه وأمه شعرهم اسود. اختار بنت يهودية مصرية فح مش خواجاية، وسط الجالية اليهودية برضه فيه شيء من التفرقة بين الأشكيناز والسفرديم اليهود الشرقيين العرب، واللي عندهم اسم افرنجي - أوروبّي زي «روزنتال»، أشكيناز. كان اسمها «ماري» بس بيكتبوها «Mery»، «ميري»، وانا اسمي بيتكتب «Mary»، «ماري». عيلة موسى بيوصفوها «مصرية، عربية، البننت سمرا» وهي فعلاً سمرا وشعرها إسود، من أسرة مش تعبانة أظن أبوها تاجر في الموسكي. غالباً كان فيه نوع من الاعتراض من ناحية أهل موسى ولكن موسى أصر يتجوزها وراح يعيش معاها في بيت أسرتها. أسرة «ميري» عملت فرح وعزموا القراب والجيران في بيت فيه أوض كثيرة، أول ما وصلنا حطونا أنا وأبويا وأمي وأخويا في أوضة منهم، واحنا فايئين شُفنا إن الأوض الثانية ناس بتاكل، جايبين طباخين وأكل كثير طالع من المطبخ. قعدنا جابوا لنا الأكل أكلنا وقمنا علشان ناس ثانية تيجي تقعد مكاننا وتاكل، الأكل بالدور، افتكرت المنظر دلوقت وانا باحكي، منظر جديد بالنسبة لي، الأكل بالدور. أكل على أساس أسماك، أنواع كثير من الأسماك المقلية مع رز بني، كذا طبق، هُبر سمك، كثير ولذيذ. أنا وأبويا انبسطنا، أمي بقي كان عندها حساسية للريحة والحاجات الشرقية ما كانتش بتتقبلها بسهولة ودايمًا عندها انتقادات، أبويا قال لها :

- شيلي الجلد وخذى اللحمة البيضاء اللي جوه، حلوة .

وفعلًا عملت كذا وعجبها - عنيدة قوي. بعد عشرات السنين محمود السعدني كان له صديق اسمه إبراهيم نافع - تاجر مانجا مش صحفي «الأهرام» - عمل حفلة لما بنته اتجوزت وافتكرت فرح موسى و«ميري»، جاب حصان يرقص في أرض فاضية وحط ترايبيزات وكراسي، الرجالة تحت والستات فوق ودبح ما اعرفش كام عجل وعمل لحمة مسلوقة وطبخ رز والناس تاكل بالدور برضه زي فرح «ميري» وموسى. ما أظنش انت كنت معايا يا نادية اللي جه معنا كان علي شعث وراح مع سعد عند الرجالة - «دا انت يا نبيل ما كنتش لسه اتولدت، لو كنت اتولدت يبقى كنت صغير قوي». كنا بنتقرج على حصان بيرقص وطلبونا فقمنا قعدنا عند الأكل وجابوا طبق كبير فيه هُبر لحمة ورز وكان فيه ناس قبلينا وناس بعدينا نادوهم ياكلوا بعد ما خلصنا، أنا كنت مع رضا مرات حسن فؤاد ومرات محمود السعدني. الفرق بين الفرحين إن فرح بنت إبراهيم نافع الستات كانوا منفصلين عن الرجالة، في فرح موسى العائلات كانت بتفضل مع بعضها. موسى حضر جوازنا أنا وسعد وعندي صورة له لما عملنا حفلة وبوفيه ساندويتشات وحلويات على ترايبيزة السفرة هنا في بيت الدقي، وحضر مع بنته النونو الصغيرة .

بس برضه مش فاكرة سفره .

أكد السفر حصل في فترة بعد ما أنا ابتديت أهتم فيها بالسياسة وانفصلت وجدانيًا عن أخبار البيت والعيلة، اللي اعرفه إن أصل عيلة «بنيامين» العيَّان وعيلة «دافيد» اللي مات ومعاهم «سولومون» العم الصغير كانوا مزنوقين قوي وفيه احتمال إن أبويا كان بيشارك في مساعدة «إيزيدورو» وعيلته. أعتقد إن مع صعود نزوة كراهية الأجانب بعد إنشاء إسرائيل وحرب 1948 وبعدين مجيء جمال عبد الناصر، الفترة كلها بعد 1948 وحريق القاهرة و1952 أعتقد ابتدى إحساس وحش، الأجانب واليهود شافوا إن مبقاش فيه مستقبل في مصر، بالذات للشباب . ما كانش فيه الحياة اللي أنا عشتها وأنا صغيرة أثناء الحرب العالمية الثانية وبعدها، مش عارفة ازاى رغم الحرب الناس كانت عايشة مع بعض كويس . لكن أنا ما انشغلتش بسفر العيلة، أنا أيامها كنت في ملكوتة تانية، أعرف طشاش إنهم راحوا إسرائيل وما كنتش باتعاطف معاهم، أنا خلاص دخلت في فكر الاشتراكية وإن إسرائيل صهيونية، والصهيونية هم اللي عملوا إسرائيل مشروع استعماري والاشتراكيين ضد الفكرة من أصلها، وكنت أدبت نفسي وجسمي وروحي للفكر الشيوعي الماركسي المصري الوطني - هنا .

على قد ذكرياتي التدين كان على خفيف في العيلة، متدينين طبعًا، ولكن الدين مش واخذ حيز وما شفتش طقوس كثير. الحاجة الدينية الوحيدة اللي افكرها لما «بيبو» ابن عمي تم 13 سنة، فيه طقس في الدين اليهودي اسمه «تيفيلين» أو «بار ميتزفاه» بمناسبة وصول الولد لسن البلوغ، ولعوا الشمعدان اليهودي اللي فيه 6 شموع في نص دايرة وصلوا للولد شوية صلوات، وبعد الطقوس كانوا محضرين بوفيه حلويات وساندويتشات على الترايبيزة في بيت أمه كأنه عيد ميلاد. كان فيه عيد تاني بيصوموا فيه وبيشتررو العيش اللي أبويا بيسميه «ماتزاه» عيش ناشف مقرمش في حجم الرقاق أو الفطير المشلتت، عيش متماسك بيستوي بالشمس من غير خميرة. أنا ما اعرفش لو بيصوموا من الفجر للمغرب ولا من المغرب للمغرب، وما اعرفش في العيلة بيواظبوا إلى أي درجة، فاكرة إن

عندنا في بيت أبويا وأمي عمرنا ما مشينا على الحكاية دي، أبويا في بداية شهر الصيام بتاعهم كان بييجيب كيس فيه أكلة صيام تقليدية عاملاها له، عيش «الماتزاه» بالجينة البيضة متسأسأ في اللبن وتصب عليه بيض مربوب وتقليه، تبقى شوية زي فطيرة مقلية أو قطايف بالجينة. حاجة لذيذة كذا وناكلها من غير ما نصوم، على أي حال أنا كنت باحبها وخلص، نوع من الذكريات .

*

«سارينا» فضلت على اتصال بابويا وأمي من إسرائيل، مش عارفة ازاي عرفوا يتصلوا ببعض ويراسلوا بعض، جابوا عناوين بعض ازاي؟ عمري ما سألت. أنا مش فاكرة «سارينا» غير وهي طفلة بنلعب مع بعض لكن أعتقد إنها فضلت على طبعها الحلو بدليل إن لما سافروا كلهم هي اللي استمرت في العلاقة مع أبويا. تكتب جوابات : «Cher oncle Elia, Je te raconte Pepo a fait ça et je ne sais pas quoi - «عزيزي عمي «إيليا»، عايزة احكي لك «بيبو» عمل كذا وفلان حصل له كذا...» - وأبويا وأمي فضلوا يكتبوا لها من إيطاليا وهي تكتب لهم وتديهم أخبار الكل، ما حدش غيرها من العيلة عمل التواصل دا. أمي كانت مشتركة في المراسلة دي أكثر من أبويا، بتحب تكتب وتعبر عن نفسها وتحب تسمع الأخبار وحببت «سارينا» علشان «سارينا» بتكتب لها أخبار العيلة، عمي «سولومون» وولاد عمي موسى و«ستلا» و«كيتي» و«جاكو»، وأخبارها هي نفسها وأختها «فيكي» وأخوها «بيبو»، وتشتكي من فلان وتمدح فلان وتسال أمي على أبويا، «عمو «إيليا»».

عمي «سولومون» قرر يزورهم في «ريبا» ، في الأثناء دي كان اتجوز واحدة إسرائيلية، ووصل فعلاً لـ«ريبا» مع الست دي. أمي بتقول إنها كانت وحشة تمشي في الشارع وكل الناس يتقربوا عليها «سمرا» وجونلتها كرانش وشعرها طويل ومتساب كذا وتلبس حلقان ذهبي مدورة كبيرة زي العجيرية». الحكاية دي ضايقت أمي، وأمي حكته بضيق وانفعال، أبويا ما قالش حاجة، في الغالب ذهنه كان أوسع من أمي وفاهم إن الناس مختلفين عن بعض في الدنيا، الست دي طبعا كانت غريبة على النظرة الكلاسيكية في قرية «ريبا»، محافظين خالص هناك، والعجر في إيطاليا وأوروبا اسمهم «الروما» ويعتبروا حاجة مش كويسة. «سولومون» ومراته جابوا هدية لطيفة لأبويا وأمي، طقم 6 كبايات صغيرة ودورق قزاز ملون حلو علشان النبيت، اليهود ما ياكلوش خنزير ولكن يشربوا نبيت، يختلفوا عن المسلمين في الحكاية دي، أبويا لما جه مصر بعد الزيارة دي أداني هدية «سولومون»:

- أنا مش حاستعملها وانتم بييجي لكم ناس وبتشربوا نبيت، خدوها .

سعد انبسط وما كنش عنده مانع، إحساس الرفض المنتشر مش متأصل عنده تجاه أي جنس أو دين أو أي حاجة زي دي، ولا زالت الهدية موجودة في الفاترينة، أظن كسرت 3 كبايات وفاضل منهم كبايتين أو ثلاثة والدورق نفسه موجود .

بعد كذا زارهم «جاكو» أصغر ولاد عمي ويظهر كنت في السجن لما هو سافر. أنا آخر مرة شفت «جاكو» كان صبي صغير 14 أو 15 سنة. «جاكو» اشتغل في «هيلتون تل أبيب» مش عارفة إيه

بالتحديد يمكن في الاستقبال بس هم كانوا فرحانين لما خد الشغلانة. هو كمان قرّر يروح إيطاليا يقابل أبويا، وأبويا راح ياخده من محطة القطر في «سان بينيديتو»، القطر وصل والناس نزلت وأبويا مش لاقى «جاكو»، استنى القطر اللي بعده وبرضه ما لقاهوش ونزل نفق المشاة علشان يعدي ويروح وفي النفق شاف واحد من ضهره يشبه أخوه «بنيامين»، نادى عليه من بعيد :

- «جاكو»! «جاكو»!

وفعلًا الراجل اتلفت وطلع «جاكو» وقعد يشاور :

- «إيليا»! «إيليا».

وحضنوا بعض وأبويا كان فرحان إن عرفه من ضهره، هي العيلة دي فعلًا لها قطعة يشبهوا بعض. «جاكو» قعد في «ريبيا» يومين تلاتة، ما كانش يقدر يقعد أكثر علشان الرحلة إلى إيطاليا كانت مكافأة من الفندق للعاملين، وهو اختار إيطاليا علشان يروح يشوف عمه، الحقيقة أنا كنت احب أشوف «جاكو». بس أنا دلوقت حاسة إنى متلخبطة مين كان متجوز البنت الجميلة اللي أمي وصفتها إنها «عجرية» ومين أبويا عرفه من ضهره في المحطة مش عارفة لو دا حصل مع «سولومون» ولا «جاكو»، القصتين دخلوا في بعض .

أمي بتتنقل لي الأخبار دي وانا باسمع وأقول «كويس» وخالص بس مش مهتمة ومش حاسة إن لازم أهتم. في يوم من الأيام كدا بعد مرور وقت طويل وأبويا وأمي كانوا كبار في السن، بدون مقدمات أمي أدتني عنوان «سارينا» وعنوان حد تاني فيهم يمكن «جاكو» «خدي العناوين». غريبة أمي دي، ملهاش دعوة باليهود وتتنقدهم انتقاد شديد من كونها مسيحية، تعتبر متعصبة نوعًا ما، مش سهلة ومنفتحة في موضوع الأديان، تنقدهم وتتنقد شكل الست مرات «جاكو» اللي ما تعرفهاش وتقول «سمرا وشعرها اسود وطويل وكله «boucles» - مموج - ومسيباه لغاية وسطها من ورا» كأن دي حاجات وحثّة، وبعدين تديني عناوينهم، يظهر الناحية العائلية غلبت، أصل انتهى الأمر إن أنا خدت العنوان منها واحتفظت به ونسيته وانتهى الأمر .

هنا في مصر العلاقة مع إسرائيل بدل ما تتحسن كل شوية تزداد سوءًا بسبب أعمال إسرائيل، بس مش عارفة الواحد ممكن يعمل إيه؟ ما كانش ممكن الواحد يتصرف بشكل تاني. طول السنين دي مصر بتعاني من وجود إسرائيل مزروعة في وسط البلاد العربية. وحصلت حكاية قرية «ياميت» في سينا اللي حسب رأي الإسرائيليين عملوها «bijou» - «تحفة على البحر» - الرمل حلو في منطقة العريش والإسرائيليين اللي سكنوا هناك كانوا ابتدوا يستخدموها سياحيًا ورفضوا يخرجوا ويسيبوا سينا لما إسرائيل انسحبت منها بعد معاهدة السلام، انتهى الأمر إن الحكومة الإسرائيلية بعنت أقفاص حديد كبيرة وكانت بتقبض عليهم وتدخلهم بالقوة وتقل عليهم جوه الققص ويشيلوهم بالونش وينقلوهم الناحية الثانية من الحدود جوه إسرائيل، وشفنا ازاى دمروا «ياميت» وسابوها لنا على الأرض، نسفوها بعد ما كانت - بيقولوا - حاجة حلوة .

*

في 1982 إنتِ اتعرفتِ على رندا شعث في معرض الكتاب وانتو بتعملوا مجهود ضد حصار إسرائيل لبيروت أيام حرب لبنان، كنتو بتوزعوا ستيكرز عليها علم فلسطين في معرض الكتاب واتصاحبتموا قوي. أنا ابتديت اتعرّف على صفاء أم رندا لأنها أبدت اهتمام بمجتمع المثقفين من أصدقائنا. صفاء ماتت فجأة في حادثة عربية وكانت صدمة كبيرة وأنا كنت باحس بتعاطف مع الولاد وشوية بشوية دخلوا عيلتنا، علي ابنها ودينا كبروا شوية حبوا بعض وقرروا يتجوزوا. كانت حاجة جميلة، دينا وعلي حبوا بعض بصحيح. دينا مبالغة للاكتئاب بس لما تتحمس لحاجة تنوّر وتعمل معجزات، طالعة لسعد قوي في الحكاية دي. «وبغض النظر عن أي شيء، نبيل شعث جدك يا نبيل ما ظهرش عليه أي تردد أو حساسية ناحية الجائزة دي، كان فيه احترام كبير بينا، وأنا حبيت علي زي ابني». عملوا فرح جميل وطلعت زفة دينا من هنا عندنا في الدقي من الشارع في عزّ الظهر، كانوا حلوين وفرّحوا الناس حوالينهم، إنتِ كنت موجودة وسعيدة ودينا كانت زي القمر وعلي وشه منور، وسعد كمان بشوش ومتعاون، بيبقى رايق قوي .

بعده بمدة رحتم فلسطين علشان أزور علي شعث ودينا لما كانوا هناك، والسلطة الفلسطينية كانت دخلت قطاع غزة، رايحة أزور بنتي والفلسطينيين اللي دخلوا العيلة وما فكرتش آخذ عنوان «سارينا» معايا، ولا فكرت إن دي فرصة وممكن أروح اشوفهم. كان فيه أخبار بمحاولات لحل للقضية الفلسطينية ونبيل شعث كان عضو في الحكومة، وزير في السلطة الوطنية وعرفات كان راح غزة واحنا رحنا غزة نشوف، سعد وأنا، علي كان انتقل لغزة واشتغل لمدة سنة تقريبا .

رحتم غزة مرة ثانية ضيفة عند رندا... - «إنتِ كنت صغير خالص يا نبيل، بيبى خالص وانت في غزة» - ساعتها قعدت أفكر شوية زيادة إن علي بعد أمتار أو كيلومترات قليلة من غزة فيه قراب لي وهما طبعاً في المعسكر الثاني . ما كنتش بافكر فيهم كثير في حياتي، بس ساعتها ابتديت أفكر هل معقول إن احنا قريبين بالطريقة دي وبقي لنا المدة دي من غير أي علاقة؟ على أساس المبادئ والقضية الوطنية والوضع السياسي وفكرت إن كويس إنني احتفظت بعنوان «سارينا»، يمكن أكثر من عشرين سنة؟ «سارينا» اللي من يوم ما راحت تسكن في إسرائيل استمرت تراسل أبويا في إيطاليا وتديّ له أخبار عن عيلتها .

ابتديت آخذ بالي وافتكّر إن فيه قراب هناك، دا حصل بعد دخول السلطة الوطنية في فلسطين ورحنا غزة كلنا مع بعض، يمكن فكرت فيهم بجدية أكثر ساعتها على أساس إن كان بيدو إن الحالة ممكن تتحسن وحينفقوا ووضع الكراهية الشديدة حيهدا شوية .

بعد كام سنة كميليا جبران الفلسطينية و«فرقة صابرين» جُم هنا يغنوا في مصر، وانتِ اتصاحبتم عليهم وجم هنا في البيت دا، وبعد ما مشيوا إنتِ جيتِ وقلتِ «أنا حروح ازور كميليا في فلسطين»، في القدس أظن أو في رام الله، ورحتم فعلاً واتعرفتم على أهلها وأخوها خالد وراما واتعرفتموا على غادة وشري اللي كانت ساعتها مقبلة في رام الله وبتشتغل هناك، وتعددت الزيارات مرتين أو ثلاثة، لكن أنا ما افتكرتش العناوين دي إلا قريب، بعد سنين مما إنتِ ابتديت تروحي فلسطين، مؤخرًا من سنتين ثلاثة افتكرت العناوين وادّتهم لك .

احنا اللي اتصلنا بيهم الأول .

*

بعد مكالمة «سارينا»، فوجئت بمكالمة من «جاكو»! «جاكو» اللي اشتغل في «الهيلتون» في تل أبيب، مش عارفة جاب نمرتي منين، من «سارينا» أو من «بني» ابن «كيتي»، كلمني هنا في القاهرة وبيقول لي :

- أنا جيت مصر مرتين ورحت الدقي ورحت كل حنة .

بيتكلم بالعربي وفيات، هو كدا من وهو صغير «expansif» - معبر :

- وما اعرفش انت في مصر ولا فين .

على أي حال هو ما دورش عليّ، هو جه يزور مصر علشان يستعيد ذكريات طفولته في القاهرة، ولكن اتصل يكلمني عن حبه لمصر كتير. «جاكو» دا بقى شعره إسود واسمر وطويل ورفيع، لطيف في كلامه وأكثر واحد يشبه لـ«سارينا» بنت عمي في الطبع، حركات الإيدى والحيوية والنكت، بيضحك ومبتسم على طول. مكالمة تلفونية طويلة بمناسبة العيد الكبير يهني سعد جوزي، هو ما يعرفش سعد، واضح أهله سافروا قبل ما أنا اتعرف بسعد. المكالمة الطويلة دي علشان يهني سعد بالعيد، عيد اللحمة، ويقول لي إنه جه مصر وزعلان إن ما كانش يعرف عنواني، وراح كل حنة يعرفها في القاهرة، محلات «تسيباس» في الموسكي في الشارع اللي بيروح للعباسية، شارع الخليج المصري زمان، بس دلوقت اسمه أظن الجيش، «تسيباس» الحلواني الأصلي - وبعد كدا فتح فرع ثاني في شارع فؤاد في التقاطع بين شارع 26 يوليو وعماد الدين اللي بيودي لباب الحديد ما اعرفش التقاطع دا فيه إيه دلوقت - «جاكو» حكى لي إنه دور علي «تسيباس» وعلى مصانع الشكولاتة والبونبونيرات اللي بتتعمل في درب البرابرة علشان الأفراح والسبوع، وجه الدقي وراح الهرم، وقد إيه بيحب مصر والقاهرة والمصريين، كل دا بالعربي. كلمني بالعربي لمدة ساعة. سعد هو اللي رد في الأول، «جاكو» قال :

- أنا عاوز «ماري»، «ماري» موجودة؟

وقال لسعد :

- كل سنة وانت طيب .

أنا كنت متحمسة من حرارة المكالمة فقلت له تعالى ثاني قال لي :

- صعب، أنا عندي السكر في صوابع رجليه وعايزين يطيروا لي رجلي وانا قلت لهم لا ما ينفعش إن اقعد برجل واحدة .

قال كدا «عايزين يطيروا لي رجلي»، بيمشي بصعوبة، يبدو عنده زي غرغرينة سكر .

في الوقت دا بالظبط جت كميليا القاهرة مع واحدة صاحبته فلسطينية وفي نفس الوقت رندا شعث كانت على علاقة حميمة بينا وبتتكلم كثير. واحنا في العربية وصلنا البيت وقبل ما نزل انت سألتيني يا نادية :

- قال لك إيه قريبك في التلفون؟

اتفحت في الكلام وقعدت احكي لكميليا وأقول لها عن حب «جاكو» لمصر وذكرياته فيها، والعربية واقفة، حتى ما نزلناش نكمل كلام في البيت، أخذني الكلام. ما خدتش بالي، البننت الفلسطينية الثانية قاعدة جنبها ويمكن صعب إنها تفهم العلاقة، وليه أنا متحمسة كدا إن واحد قريبي بيكلمني من إسرائيل وبيقول لي الكلام دا عن مصر. كنت متحمسة واتكلم اتكلم وأقول كل حاجة، كميليا كانت بتبص لي كدا متحفزة شوية - أنا فاهماها. نزلنا من العربية والحكاية عدت، بس انا قعدت أفكر هل كان يصح إن أنا أورّي الحماس دا كله؟ كميليا كالفلسطينية والبننت الفلسطينية الثانية كمان بكل اللي بيعانوه في بلدهم والقصة الغريبة الطويلة دي اللي بقا لها أكثر من 50 سنة مش عاوزة تنتهي، من حقهم - وانا بافهم دا كويس - إن ما يكونوش متعاطفين مع عواطف عائلية انقطعت مدة طويلة. أنا «جاكو» دا ماشوفتوش وهو كبير أبداً، كبر للدرجة إن طلع على المعاش ورجله فيها مشكلة كبيرة وعاوزين يعملوا له بتر بينما أنا صورة «جاكو» عندي صبي عنده 13 سنة تقريباً، ويتصل ويقول لي كلام الحب دا. طبعاً مش بيحيب سيرة الفلسطينيين هو بيتكلم عن الحنة اللي هو كان عايش فيها في مصر .

دي بقى من الحاجات الغربية اللي بتحصل لي .

إنت بعد كدا قلت لي إن انطباعك إن كميليا كانت متأثرة ومتعاطفة معايا، هي كانت ساكتة بتبص لي، بس ممكن، ممكن عندك حق، أصل أنا مرّيت بمراحل في الغالب فيها جمود. أنا من يوم ما انضمت للشيوعيين وللشيعية والقضية الوطنية المصرية ومسألة إن فيه لي قرايب هناك، أنا أسقطتهم من دماغي، وما ابتدش أفكر وافتكر ذكريات ساريننا والقرايب شوية بشوية إلا لما الحالة لانت شوية ونبيل شعث سافر وراح غزة واحنا رحنا نزوره هناك، حاجة «تابو» عندنا، مقاطعة، مقاطعة كاملة، وانا اقتنعت مدة طويلة إن دا أسلوب من أساليب الكفاح ضد الناس الوحشين دول - وانا مقتنعة إنهم وحشين - كانت أول مرة أحكي قدام حد ما يعرفش قصتي فمتوقعة الاستياء حتى من كميليا .

مقتنعة من وانا صغيرة شباب مع الاشتراكيين والشيوعيين الماركسيين التقدميين، بنوصف المنظمات الصهيونية إن عندهم نوع من الفاشية ومن العنصرية ضد حقوق الإنسان . الصهاينة أول ما راحوا إسرائيل وكونوا الدولة بتاعتهم، الأخبار اللي جت لنا إنهم عاملين «الكيوتر» اللي هي معسكرات لمجموعات يشتغلوا في الأرض مع بعض وحياتة مشتركة زي الكشافة، ومن ضمن المحاضرات والتحليلات في المنظمات الشيوعية كانوا بيشرحوا وبيقولوا «دي مظاهر اشتراكية لكن الحقيقة إن دي جريمة ضد الفلسطينيين واتجاه عنصري ضد الاشتراكية، اشتراكية ازاوي وهي مبنية على عنصرية؟ مايعرّكوش إن عندهم حياة مشتركة مع بعض ياكلوا مع بعض ويصرفوا مع بعض، لكن بين الاشتراكية وبين الصهيونية مفيش أي علاقة من الأول»، اللي بيقولوا الكلام دا يهود

برضه، ما تنسيش إن كثير من الشيوعيين هنا في مصر كانوا يهود، وانا اقتنعت بالكلام دا، وأهه دلوقت اتحمست تاني شوية زيادة في الكلام. أنا باقول إيه، أنا زعلت إن ممكن أكون فهمت كميليا بشكل مش مطبوط، باحب كميليا ومعجبة بيها من كل ناحية، فنيًا وسياسيًا وكل حاجة، لكن اللي حصل بعد ما خلصت الكلام ونزلت من العربية وقعدت افنكر، تساءلت يا ترى حتقول إيه، أو مش مهم حتقول إيه، إحساسها ممكن يكون إيه. أنا باتكلم عن حاجة عائلية ولكن اللي هي عاشته، ما عاشتس حالة عائلية مع اليهود، عاشت قمع وتزييف للتاريخ علشان هي درست في مدرسة في إسرائيل، تاريخ بعيد عن الحقيقة زي ما الإسرائيليين زيّفوه. أنا عندي فكرة عن تزييف المناهج والتاريخ من قبل ما اتعرف على كميليا، من أيام المدرسة مع أمي بالنسبة للفاشية، وكمان لما حضرنا مؤتمر المرأة في نيروبي في كينيا وانت كنت معايا، شفنا الست الإسرائيلية «زيبورا طوبي» اتكلمت عن تزييف التاريخ في المدارس الإسرائيلية والستات الصهيونيات في المؤتمر كانوا عايزين يموتوها من غيظهم منها. عندي فكرة إن حصلت ومستمرة تحصل - جريمة كبيرة في فلسطين - فجأة أنا أطلع بكل الحماس دا لـ«جاكو» علشان كلمني لمدة ساعة في التلفون. إحنا ممكن نسأل كميليا، بس الحكاية ملهاش أهمية أصل ساعتها أنا حسيت كدا إني ممكن ما اتقهمش. دلوقت أنا تغلبت على حاجات كثيرة، على كثير من التابوهات ومن الأفكار الجامدة اللي كانت عندي، لما حكيت لكميليا كنت لسه جديدة في التحول بين الاعتقاد بأن المقاطعة بكل الطرق بدون تمييز ممكن تكون مفيدة للقضية وبأن لازم نكرههم وندمرهم وحاجة من النوع دا .

*

رجعت افنكر أمال عبد النور في السجن، حكيت لي قصة هروبها من فلسطين إلى مصر. فلسطين ما كانتس حرة، كانت تحت سيطرة إنجلترا. وكان فيه تعاطف وتواطؤ أحيانًا بين السكان الفلسطينيين واللاجئين اليهود ضد الإنجليز، وكان فيه يهود في فلسطين أصلًا عايشين هناك من قرون - يهود فلسطينيين غير اللاجئين من أوروبا بعد الحرب العالمية أو من البلاد العربية - فلسطين كان فيها عرب مسلمين ومسيحيين ويهود. عيلة أمال مسيحيين كانوا عايشين في فلسطين تحت الاحتلال البريطاني لما مجموعات اليهود الجديدة وصلوا. خد وقت لحد لما ظهر في وسط اليهود ناس منظمين بيعملوا سياسة إرهابية ضد السكان، فالسكان الفلسطينيين اضطروا يهربوا وفهموا إن فيه مؤامرة سياسية كبرى ضدهم، أغلب الفلسطينيين ما فهموش من الأول. من وجهة نظري والقصاص اللي باسمعها، لولا قرارات سياسية ومصالح خارج فلسطين، خارج الشعب الفلسطيني اللي عايش هناك أصلًا وخارج مصلحة اللاجئين اليهود اللي كانوا بيهربوا من الاضطهاد الأوروبي ومن معسكرات اعتقال النازي، اللاجئين دول كان ممكن يعملوا حياتهم في فلسطين ويعيشوا هناك مع الفلسطينيين، يعيشوا مع بعض ويشغلوا مع بعض وما تحصلش الحاجات اللي حصلت بعد كدا. أنا بارجع دايماً لقصة هروب أمال عبد النور وأسرتها، زي ما هي حكيت لنا لما وصلت في السجن، كانت شاهد عيان، شافت بعينها وهي صغيرة، وفود ومجيء فلول المهاجرين اليهود من بلاد أوروبا وتعایشهم، الدعاية والخطط السياسية والاقتصادية لاستغلال الوضع عملت خسائر كبيرة في العلاقات الإنسانية .

بس، دا ملخص الكلام .

بعد مرور كل الوقت دا واستمرار الظلم وتراكم الكراهية والمصادمات من حروب وجرائم بين الشعوب وبين الناس، طبعًا دلوقت صعب إن الثقة ترجع. ولكن برضه ممكن، ممكن لو الواحد ياخذها بشكل عقلائي ويكون فيه مجهود حقيقي لعدم إشعال النار أكثر واكثر بين الناس، برضه ممكن. أنا عندي أمل إن يمكن مين عارف في حدود فترة بسيطة، بعد التدهور اللي بيحصل والشعور العدائي اللي الواحد عنده ضد المغتصبين وضد عنجھية الإسرائييليين، يمكن الواحد لما يفقد الأمل نهائي تبتي تظهر مظاهر أمل جديد .

أنا عارفة إن حوَلِّي ناس كتيرة مش بتفكر بالطريقة دي ولما آجي اتكلم معاهم باقى حريصة، ما باقدرش أقول بصراحة على وجهة نظري بان على أي حال الشعبين لازم يتغلبوا على حاجات كتيرة حصلت، حاجة صعبة بس لازم يحصل، ما اقدرش أقول علشان الناس ما تفهمش، بيفتكرنا إنني باتكلم عن تنازلات .

على المستوى الشخصي، أنا دلوقت ميّالة أكثر واكثر إن افكر إن أنا يمكن كنت غلطانة وكان لازم أكون متعمقة في الموضوع من الناحية الإنسانية شوية أكثر بالنسبة للعيلة . أنا عمري ما فكرت ليه هما راحوا إسرائيل، إيه السبب؟ يمكن ما انطردوش من هنا طرد وكان فيه ظروف، ويمكن انطردوا، وأنا ما فكرتتش. أبويا كان عنده فرصة يختار لأن أمي إيطالية وابنه في إيطاليا وأنا في مصر، لكن بقية اخواته مش نفس الظروف، أنا في ذهني حظيتهم في معسكر العدو وخلص، زي الاستعمار الأمريكي، زي الرأسمالية، زي الاحتكارات. الاحتكارات والاستعمار والهيمنة الأمريكية مش كلام، فيه بني آدمين بينفذوا، فيه منهم واعيين ولكن بالتأكيد الأغلبية العظمى ماشيين زي ما بيقرروا وزي ما بيسمعوا في التلفزيون وزي ما بيسمعوا من القادة بتوعهم، وزي ما بيتناقشوا بينهم، وزي ما حصل لهم، ويمشوا على المبادئ والأفكار السائدة، وفين وفين لما واحد بيتدي يقول «الله؟» «يمكن مش صح» ويعارض وتبتي تتكوّن معارضة، الوعي بييجي ببطء. فكرت إن رغم إنني فاهمة الاشتراكية والشيوعية والماركسية هم مستقبل الإنسانية والطريق الصح ولازم الواحد يمشي لها، كان لازم آخذ في الاعتبار وآتمل في كل شيء. أنا دلوقت باتأمل أي قضية، مش القضية الوطنية بس، لكن حتى فكر الوطنية نفسه بدون تعمق وتأمل يحصل فيه كثير من التطرف ويمكن من «المنش صح»، أو كثير من الغلط، علشان بيكبر الشعور بان الوطن وأولاد الوطن دول حاجة أحسن من التانيين، فيه شيء من الفاشية في الموضوع بتساعد على احتقار ونظرة تعالي للغير، إنهم أقل منا، شيء من القبلية، «إحنا أحسن»، الفكر الوطني ممكن يسهّل الكراهية لو من غير تفكير، مش بنكره المسؤولين عن السياسة الوحشة بس، نبتي نكره الشعب كله وما نتأملش، دا مش صح إن نكره الشعب ومش مفيد. أنا مش حاعرف أعبر للأخر في الموضوع دا، أصل دي قصة كبيرة وطويلة ومش محبوبة، مسألة إن تاخدي موقف متأمل من فلسفة أو فكرة الوطنية .

لكن مفيش مانع مراجعة لبعض الحاجات، ومفيش مانع زيادة في تقدير أبويا اللي ما قطعش الصلة مع العائلة وما مشيش ورايا. كان بيحاول ما يز علنيش، عمره ما ناقشني في صحة موقعي من العائلة، ويمكن كان بيحاول يفهمني، احترمني وتحمل المتاعب اللي أنا سببتها له. كل مرة كنت باخش السجن كانت متاعب كبيرة بالنسبة لهم، ياخذوا بالهم مني ويصرفوا عليّ ويحاولوا يخففوا عني قد ما يقدرنا مشقة السجن .

الحكاية دي بتثير التفكير عندي، ما اقدرش ما أقولهاش، التمسك بالمواقف بدون تأمل خلاني أنسى العلاقة بيني وبين شخصية أبويا على مدى الخمسين سنة اللي فاتوا. فكرت إن أنا بنته وخذت من الأول موقف بالابتعاد عن العيلة وعدم الرغبة في إن أعرف حاجة عنهم، موقف فيه شيء من التطرف مني، اتعامل ازاى هو، أبويا، مع الحكاية دي؟ لغاية ما كبرت شوية 15، 16 سنة وبقيت شيعية، العلاقة مع العيلة اليهودية اللي عايشة هنا كانت حلوة ولكن ما بنشوفش بعض كثير، هما ساكنين جنب بعض، بيوتهم تقريباً في نفس الشارع، يروحوا ماشيين من بيت للتاني في الحطة، عايشين مع بعض بشكل يومي، لكن من بولاق لعندهم في درب البرابرة لازم رُكوبة علشان ييجوا لنا أو احنا نروح لهم، فيه استمرارية لكن العلاقة مش حميمة. بعد كذا العلاقة انقطعت من طرفي أنا، من ناحية الاهتمام بيهم كبني آدمين، بدليل إن أنا في الآخر ما حسنتش بسفرهم ولا حتى «سارينا» صاحبتى، لكن أبويا استمر في العلاقة اللي واضح لي دلوقت إنه لازم كان بين نارين، بس ما قعدش يلومني أو يتدخل ويقول دا غلط ودا مش صح، مش عاوز يقطع مع عيلته أصله عارف ظروفهم، تابع سفرهم وما حكايش، راح عمل الواجب العائلي العاطفي من سُكات، ما حبش يفرض عليّ قراره لو لازم يروح يقف جنبهم ولا مش لازم يروح .

كل مرة نتقابل أبويا يدّيني أخبار العيلة باختصار شديد، ««سارينا» بعنت تقول عندها مشاكل مع رُكبها» بالطريقة دي عرفت إن رُكبها ابتدت قبل رُكبي، أو «فلان مات» أو «بتسلم عليك»، وأنا أرد «ابقوا سلموا لي عليها». في جواب تاني بعد حرب من الحروب 1967 أو 1973، أبويا قال لي إن ابن «بيبو» أو ابن «فيكي» مات، طبعاً حاجة صعبة. من ناحيتي كان فيه شيء من عدم التركيز، ما كانش عندي عواطف، كأنهم حاجة تهمة أبويا وهو يرد على الجواب، عمري ما حاولت أسأل أبويا عن أخبارهم، حتى ولو علشان خاطره هو، أو أكتب لهم كلمتين أسلم عليهم، أو مثلاً أعزي في موت الولد دا في الحرب، نسيت ببساطة، دي حاجة كبيرة إن شاب يموت في الحرب . أمي كانت فيأضة وبتكشني، تقول لي إن شافت أفلام في التلفزيون الإيطالي عن «الهولوكوست»:

- تعرفي إيه هو «الهولوكوست»؟

- أيوه طبعاً .

أنا كنت عارفة إن فيه ناس كثير ماتوا في الحرب العالمية الثانية في معسكرات النازي، ما اهتمامش أعرف تفاصيل الفيلم علشان اشوف إيه اللي كان بيهز أمي بالطريقة دي؟ اتنين من العيلة «سولومون» و«جاكو» زي ما حكيت عملوا سفرية وراحوا زاروا أبويا في «ريبيا»، باتلقى أخبارهم من غير ما اتأثر، مش عارفة ازاى كدا، حاجة عاملة لي إزعاج، أصل أنا مش عديمة العواطف، يمكن عندي جمود فكري ولكن من الناحية العاطفية باتأثر من المواقف الإنسانية، ومع ذلك ما اتأثرتش ساعتها بالأخبار دي وتلقيتها كدا كأخبار ناس ما يعنونيش، ومش مهمة بيهم .

أنا ما وصلتش لسه لدرجة حكم على تصرفاتي، الإحساس دا، الحكم، مش موجود ومش عارفة حاجيه منين، أو حايد النظر في موقعي ازاى، بأمانة إيه ومن أي ناحية؟ أصل كمان إن أنا أخذ جانب المظلوم وابقى وفيه له فكرياً وادعمه من الناحية العاطفية، دا كمان مش غلط 100 في الـ100. إحنا في الحياة لازم ناخذ موقف، مسألة إن أعيد النظر في اللي عملته وإن يمكن لازم أخذ

موقف مختلف، دا عاوز مني أقعد أفكر كتير. بدون شك إن كفاح الماركسيين من اشتراكيين وشيوعيين والموقف لمحاربة النازية والفاشية اللي انتهى بالحرب العالمية الثانية كان يلزم قوة إرادة وتضحيات شخصية. لازم قسوة على النفس علشان تواجهي قسوة الهجوم على الاشتراكية والماركسية، لازم الواحد يتغلب على كتير من مشاعره وعواطفه. مسألة إن تبقي متماسكة في السجن ما بيجيش إلا بقوة تحمل، الإنسان بيعملها بإن يضغط على أحاسيسه الطبيعية. إحساسه الطبيعي إن عاوز يخرج وإن عاوز يكون حر ومش عاوز يستحمل القيود والحبسة، ودا مؤلم. السجن صعب حتى من غير التعذيب الجسدي، السجن ما بيعديش من غير قدرة على إن الواحد يجمد نفسه. ناس كتيرة بنتهار لما بنتحبس وعلشان الواحد يقنع العدو إن انت مش حتتكسر، لما تعملي المجهود دا بنتكسري كمان كتير من المشاعر الإنسانية بتاعتك، بتبعديها من على السطح وتدخلها جوه، ما تسيببش نفسك على حريتك وتعترفي باحساسك .

الحماس اللي أنا حظيته لاتخاذ موقف سياسي، الجزء الكفاحي من حياتي، كان لازم أحط شيء من الغرور ومن التقدير لنفسي إن أنا قدرت أنجز و قدرت اوصل للأخر وما انهارتش في النص وقلت لأ أنا مش حاقد على الكفاح. اخترت وقررت اخش في السكة دي وبعد كذا آجي في النص واروح انهار؟ لازم شيء من الغرور علشان أبرر لنفسي المجهود اللي باعمله. كنت باقول لنفسي «أنا شاطرة، أنا الوحيدة من مجموعة الطالينة اللي جت لي الشجاعة إن أقول لا أنا مش حسافر». أخويا عنده نفس ظروف بس ما اختار سكة الكفاح، حب يختار يشتغل ويستمر في حياته بشكل عادي، أنا مش بالومه وزيه عشرات ومئات، بس اللي حصل إن مسألة إن جت لي الشجاعة إن أختار المقاومة كان بيديني نوع من الرضا إن عندي شيء من قوة الإرادة والولاء، شيء من التميز، دا على حساب إن الواحد يسبب نفسه لميوله العاطفية والرغبات الشخصية والحاجات الحلوة في الحياة، وكمان على حساب التأمل أو التعمق ودا اللي وحش .

أنا لما خدت موقف مع القضية الوطنية، كان مع مصر، موقف جي من الفكر الوطني، أصل برضه كانت مرحلة، القضية الوطنية مرت بمراحل كثيرة حسب الظروف، سنة 1919 لما حصلت المظاهرات ضد الاحتلال، كانوا وطنيين، أنا ما اقدرش أقول كانوا غلطانين، والفترة اللي عشتها أنا، كانت برضه ضد الاستعمار وكان فيه جوانب التاريخ يوضحها للي عايز، لكن كان فيه إيه غلط في حكم جمال عبد الناصر؟ والشعور الوطني وكل المرحلة اللي عشتها أنا بعد الحرب العالمية الثانية وبعد إنشاء إسرائيل على الأرض الفلسطينية، دي كانت وطنية ضد الاستعمار والهجوم الثلاثي في 1956 أنا كنت في السجن ساعتها، وبعتنا جواب مستعدين نطلع نحارب للدفاع عن الوطن ونرجع السجن تاني بعد كذا. الجواب كان موجه لجمال عبد الناصر بالاسم، علشان الدفاع عن الوطن ومش علشان يفرج عنا، لو هو عاوز يستمر يحبسنا أصله مش شيوعي وضد الشيوعية، ماشي، إحنا بنحط الخلاف على جنب لأن فيه حاجة أكبر دلوقت، عاوزين ندافع عن الوطن. مفيش رومانسية ولا عاطفية أكثر من كذا. هل دا كان غلط؟

ما كنتش باقاطع أبويا وأمي، بس ما كنتش باسأل على باقي الأسرة اللي موجودة في إسرائيل، كل اللي في إسرائيل ما يخصنيش، والوضع بالنسبة لي كان يتلخص في إن «الاستعمار الأمريكي الأجنبي بيحاربنا ويبستقروا البلاد العربية وإسرائيل واقفة معاهم» وكنا واخدين مسألة إن إحنا

ضدهم من وجهة نظر وطنية شديدة بدون تأمل إنساني ولا حتى سياسي. الحكاية دي زادت أيام السادات مش قادرة أحدد لكن يمكن دي الفترة اللي ابتديت أشعر بالتدريج ان اسمي يهودي وابتديت أكون مش مرتاحة بصحيح، أنا لفترة طويلة زي ما عمّالة أكرر ما كنتش باحس ان اسمي في الأصل يهودي ولا إني مسيحية ولا إني مسلمة - أصبحت مسلمة. أنا حسيت بالحكاية دي وُخري من بضع سنين وشوية، ومش على إيد الناس العاديين ولا أصحاب سعد اللي حكيت عنهم كثير وانت ودينا شفتوهم وعاشرتوهم بنفسكم، الشعور دا جالي على إيد بعض الشيوعيين والشيوعيات، الناس اللي كنت أتصور أو أتوقع منهم يحتضنوني ويحبوني بالرغم من الاختلاف في الدين أو الخلافات السياسية. المقاطعة بالطريقة دي من غير تفكير ومن غير تدقيق الواحد ما كانش ياخذ باله إنها حتكون مضرة للدرجة دي مع الوقت .

بصّي أنا مش عاوزة أحمل الذكريات حاجات أعمق من اللي تتحملة ولا أحملها أحكام على المراحل التاريخية ولا الأحداث والمواقف اللي احنا كشباب لقينا نفسنا لازم ناخذها. أنا عاوزة أقول إن ممكن موقفي من العائلة بيدو قاسي أو فيه جمود كبير، لكن أنا أعتقد إن الفترة اللي عشناها، علشان الواحد يستحمل ويفضل على موقفه وما ينهارش، كان لا بد إن يقتل في نفسه كثير من عواطفه وأحاسيسه وإنسانيته .

في الغالب دا اللي حصل معايا، في الغالب، في الغالب .

*

حبيبي نبيل، كلمتين بس حاقولهم لك كدا. إنت عندك سبع سنين دلوقت مش بس ممكن تكون مستغرب من الكلام اللي أنا باقوله وحتسمعه، كمان إيه مش حتفهمه دلوقت. بس أنا باقوله لك، مش علشان تقهمني وتقهم الكلام دلوقت، لا، لكن علشان تسمعه لما تكبر شوية وتبتدي تفكر في حاجات كثيرة، أنا أحب أدّيك واقولك ما عندي، بالكويس وبالوحش. عاوزة أؤكد لك حاجة واحدة: اللي عملته في حياتي من وانا صغيرة أصغر منك لغاية دلوقت ولغاية ما حاموت، عملته بصدق كبير، وباقتناع كبير، حتى لما كان غلط، حتى لما اضطريت أصحح واقول دا كان غلط، كان بصدق. وممكن أقول إن أنا مبسوطه من نفسي، مش فخورة، لا، في فرق كبير، أنا ما انجزتش أي حاجة مهمة من الحاجات اللي تعتبر الواحد يقول أنا فخور إن عملت كدا وكدا، لكن أنا مبسوطه من نفسي وسعيدة من نفسي وسعيدة باللي حققته في الحدود القليلة بتاعتي. أنا لما حاموت عندي إحساس إن حاموت بهدوء «Sereine, dans la sérénité». عشت زي ما جت لي الحياة وواجهتها زي ما أنا تصورت إن دا الصح، الواحد بيتصرف في الحياة .

يلاً يا حبيبي أدّيك بوسة وإلى اللقاء .

أنا حاسة إن لازم اقول له الكلمتين دُول علشان أنا عاوزاه يحبّني وما يفهمنيش غلط وإن لما يكبر يكون عنده إحساس باللطف تجاهي زي الجدات التانيين، أنا عندي إحساس لطيف نحو جدّتي ساره دي، شخصية ظريفة أنا معجبة بيها واللي عملته كان في حدودها خالص، لكن ممكن إحساس نبيل ما يكونش لطيف لما يكبر. هو ما يعرفش إن أنا من أصل يهودي وما بيقولش «ضد الإسرائيليين»

أو «دول إسرائيليين»، هو يقول «يهود» أو «اليهود» وهو بصحيح الإسرائيليين دول يهود صحيح عمالين يعملوا جرايم وبيعملوها من زمان ضد الفلسطينيين، فطبيعي إن لما يكبر يكون صعب عليه إن يكون فلسطيني بإحساسه الصادق بحقوقه وفي نفس الوقت يكتشف إن أنا من أصل يهودي، ودي صدمة مش حلوة .

على مدى السنين العدوان ببيجي من إسرائيل على مصر وانا كنت كلي في مصر، ومسألة إن ليّ قرايب هناك، أسقطتهم من دماغي، مشيت مع الجو اللي حوّليّ، لو كنت فضلت متعاطفة أو مشغولة بالقرايب اللي في إسرائيل يمكن دا كان ممكن يعمل لي مشكلة نفسية، مشيت بعواطف ورأي البيئة اللي عشت فيها والطريق اللي انا اخترته بين السجون والكفاح، أنا بالطريقة دي ما حسنتش بمشكلة، ودا ممكن يحصل لنبييل تجاهي .

مفيش غير أخيراً إن بقيت أفكر وافتكر شخصية أبويا اللي عرف ولا يلومني على اللي باعمله ولا يقطع العلاقة مع عيلته علشان يسايرني، أنا بالاقبها خصلة كويسة وممكن دا يزيدني إعجاب، بلاش إعجاب، احترام. عايزة أضيف على الإعجاب إن ذهنيًا فيه عندي تقدير واحترام له، مش كل الناس زيّه. حكاية أبويا دي كلها ما فكرتش فيها إلا من يوم أو يومين، نتيجة لكل الكلام اللي عمالين نقوله والذكريات اللي عمّالة أطلعها من ذاكرتي، اتصرفت كثير من غير تفكير طويل وعميق، وأن الأوان وانا عندي 70 واكثر من 70 سنة دلوقت إن أصرف وقت أفكر واتعمق شوية .

يكفيني علشان أرضي ضميري إن أقول إن جالي الإحساس في الفترة الأخيرة بعد أبويا ما مات وأمي ماتت وبعد مرور أكثر من 50 سنة من القطيعة، إن المقاطعة للأسرة دي كانت من غير سبب ومن غير هدف .

كفاية إن النهاردا ما اكونش قاطعة ويكون عندي تساؤلات .

مش مسألة إن نبييل يحبّني، هو بيحبّني .

مش عاوزة يحصل لك «shock» يا نبييل إن الـ «Nonna» دي بتاعة البيتزا أو بتاعة السلطات اللي انت بتعملها هنا في المطبخ عندي بتملا لي حلة المكرونة زيت وخل وبقدونس وحاجات زي دي، مش عاوزة يجي لك صدمة إنك فجأة تكتشف «الله دي من اليهود وعندها أهل في إسرائيل وإسرائيل هي العدو الأكبر للفلسطينيين وضد العرب» وانت فلسطيني كمان. فمهم إن الواحد يحكي كدا على بلاطة حصل ازاى. أنا متأكدة إن انت عندك من الذكاء ما يكفي إن لما تكبر تقدر تدرك وتفهم التناقضات الكثيرة اللي معمولة منها الحياة الإنسانية. مش تناقضات خاصة بي أنا بس، يمكن لو تتكش في كثير من الناس وتخليهم يتكلموا حيقولوا حاجات فعلاً فيها تناقضات كثيرة، حتفهمها، ويبقى كويس، يبقى زيادة في المدارك وفي الإحساس بالحياة وبالدينا .

عاوز تسألني حاجة تانية؟

*

مش عارفة لو في أي حاجة تانية عاوزة اقولها .

قلت لـ«سارينا» في التلفون :

- ما تيجي تزوريني يمكن يبقى أسهل لو انت تيجي مع «بني» تزورينا هنا .

أنا نفسي أشوفها قبل ما اموت وقبل ما تموت هي كمان . خصوصًا إن بعد ما انت رحيت فلسطين ورحيت لغاية عندهم واتعرفت عليهم، جوزها اللي اسمه «هارون» مات ومش حاشوفه عمري . ممكن تحصل لـ«سارينا» حاجة، هي عاملة قسطرة في القلب مرتين، وساكنة في الدور الثالث، قالت لي كدا في التلفون، مش بتقدر تنزل وتطلع من البيت بسهولة. «بني» ابن «كيتي» حفيد «بنيامين» والجيران ببساعدوها يجيبوا لها الطلبات . عندها بنت وولد متجوزين وعندهم أسرة وساكنين بعيد عنها، بيجوا لها ساعات بس مشغولين بين شغل وولاد ما بيجولهاش كثير .

على أي حال، أنا نفسي أشوفها واحضنها، دي حنتبقى من أحلى الأحلام اللي أحققها، ساعتها مش حيهمني رأي الناس هنا في مصر، أنا عارفة إنهم لسه متمسكين بفكرة المقاطعة للشعب الإسرائيلي كله مش بس المسؤولين والدولة والمؤسسات . بالمناسبة مفيش مقاطعة بين الدولتين بدليل إن العلاقة بين الحكومتين مستمرة، اللي مستمر حقيقي هي المقاطعة بين الشعوب ودا اللي غلط. مش عايزة أضيع وقت في كلام كثير لأن دي حاجات مش حنتغير بسهولة، بس نفسي أشوف «سارينا» قبل ما يحصل لي أي حاجة وما اقدرش أتحرك وما اقدرش أسافر، ممكن يحصل في سنّي دا .

أنا حققت أمنية من أمنياتي وهي إني عرفت حبيبي نبيل بأخويا «برتو» وابنه «أندريا» وباقي أفراد الأسرة الإيطالية: «إيلينا» و«لليو» و«باولو»، شافوا نبيل ونبيل شافهم .

دي خطوة .

إن شاء الله ممكن نكررها لو اعيش، لكن الخطوة بتاعة إن اروح يافا ...

ساعات أقعد أفكر حاروح ازاي؟ هل أروح بالطيارة ولا أروح من فتحة رفح ولا بالعربية؟
يحصل ازاي؟ إن شاء الله نادية ويمكن رندا معاها يقدرُوا يوقفُوا وياخدوني وهيلا هوب وفوووم
أروح هناك !

أنا متصور لي حاعيط لما حاحضن «سارينا» .

يلاً ...

هو عيب إن أنا أقعد أعيط على حاجة صغيرة زي دي لما في العالم فيه مآسي مثلثة عند شعوب كثيرة .

والناس مش مرتاحة في أي حنة .

ولكن اهه اتأثرت المرة دي .

ومين عارف يمكن فعلاً حيثحقق الحلم دا كمان .

شكر و عرفان

أكمل صفوت، إيمان مرسال، حسام بهجت، خالدة ياسين، رندا شعث، ريم سعد، شري لآب، عزة خليل، علي دسوقي، غدير أبو هلال، كرم يوسف، ليلي إسكندر، محمد عمار، محمد عطية المحامي، محمد هاشم، مديحة دوس، ملك لبيب، منال حمزة، منال فؤاد، مي شكري، نادية سامي، نائل الطوخي، نايرة عجة، نجاه عبد الحق، هبة خليفة، يمنى الختام، صديقات البلكونة .

أحمد خليل ومحسنة توفيق، نبيلة رزق الله وشكري فؤاد، عصمت سالم وصفوت عبد الحليم، عطيات الأبنودي، هبة غبور، ديزي روفائيل، مايسة طلعت، ألبير آرييه .



SUEZ

1936









12521



Documentum Matrimonii

PAROCHIA B.M.V. DE MONTE CARMELO
CAIRI (BULACCO) ÆGIPTI

IN DEI NOMINE AMEN:

Ego infrascriptas Parochus hujus Ecclesie B.M.V. de Monte Carmelo, fidem facio ac testor,
quod in Libro Matrimoniorum II^o Pag. 154 N. 4 invenitur:

Anno Domini 1954 die 16 mensis Maji

Filius <u>Kamel Ahmad</u>	_____
<u>K A M E L</u>	_____
et <u>Munirae Saquan</u>	_____
<u>SAAD EL DINE</u>	_____
Natiore <u>Aegyptius</u>	_____
<u>Aegyptius</u>	_____
Natus <u>Cairi</u>	_____
die _____ mensis <u>Novembris</u> anni <u>1924</u>	_____

et

Filia <u>Elise Rosenthal</u>	_____
<u>R O S E N T H A L</u>	_____
et <u>Leandrae Cardarelli</u>	_____
<u>M A R I A</u>	_____
Natiore <u>apolidis</u>	_____
<u>(Apolide)</u>	_____
Nata <u>Cairi</u>	_____
die <u>30</u> mensis <u>Martii</u> anni <u>1931</u>	_____

in legitimo Matrimonio conjuncti sunt a R.P. Martino Girri-parocho-

Testes:

_____	<u>Victorius Agius</u>
_____	<u>Vilia Villarosa</u>
_____	_____
_____	_____

In quorum fidem, etc.

Datum ex officio Parochiali B. M. V. de Monte Carmelo Cairi (Bulacco) Ægypti.
die 3 mensis Octobris 1954



Parochus
P. Martinus Girri
P. Martinus Girri O.P.M.









































































كيفية عمل صلصة البليخ ام ماري

كوز زبدية	بعض الكيلو
نصف كوز لبن	ونصف كوز زيت
نفل مطحون	ملحقة
طعنة	ونصف شوية
وشر ليمون	ونافثيا
وغيرها الزبدية	مع
بيدات	بعض الصفا
بعض	مع الفلفل
شيرة	وتقطيعه
والا احر	تم بالذبيحة
بعض	بعض

تم تقطير الزيت ثم تصفى
 ثم البياض ثم تصفى البياض
 تصفى اللبنة ثم تصفى البياض
 ثم تصفى البياض والذبيحة
 ثم تصفى البياض والذبيحة
 ثم تصفى البياض والذبيحة